


UTL AT DOWNSVIEW



D RANGE BAY SHLF POS ITEM C
39 12 04 15 12 015 4

PLEASE DO NOT REMOVE
CARDS OR SLIPS FROM THIS POCKET

UNIVERSITY OF TORONTO LIBRARY

DR
440
M87
1877
v.4

Mustafá Nuri, Paşa
Netayic ül-vuku'at

2432a

9/
19

نتایج الوقوف


جلد رابع

Mustafá Nūrī, Paşa

Netāyic ūl-vukū'āt

ترجمی دفعہ اولہرق اخوت مطبعہ سندھ طبع اولنشد

س ۱۳۲۷ ھ



DR
440
M87
1877
v.4

افادۀ مخصوصه

بيك اوچ يوزيدى سنه سنده اوقاف هايون ناظري ايكن داربقايه ارتحال ايدن مصطفى نوري پاشا طقسان اوچدن طقسان سكر سنه سنه قدر دفتر خاقاني نظارتنده بوانديني صروده (نتايج الوقوعات) عنوانيله بر تاريخ عثمانى طبع ايتدرمكه باشلامش ايدى. وبواثرى اساساً درت جلد اوزرينه ترتيب ايتمش اولديني حالده بونك انجق اوچ جلدني پيدربي نشر ايدم بيلوب دردنجيسنك نشرينى بعض اسبابدن طولايي تاخير ايش ويا تصادف غريب ياخود اثر ملهميت اولمق اوزرده بر جمعه كوني آكسزين وقوع بولان وفتندن بر هفته اول قاين برادري بولنان پدرم داخليله ناظري اسبق سعيد افندي يه خطاباً (برادر اكر بن اوله جك اولورسه م تاريخمك دردنجي جلدني بر زمان مساعدده طبع ايتديريكر) بوانده وشهود محضرنده وصيتده بولنش ايدى.

مصطفى پاشانك وفتندن پدرمك ارتحاليه قدر اون سكر سنه گذران اولمش ايكن مع التأسف اواسباب زائل اولماش وبناء عليه (زمان مساعد) حلول ايتامش ايدى. پدرم ايسه شوموفقيتمز لكندن ناشى تأسف ايدرك اشته سنك وصيتنى دائماً تذكر وبركون كايده امكان بولنورسه بووصيتك يرينه كتيرلمسنى بو عاجزه امر واخطار ايدر ايدى.


فى الحقيقه پدرمده اشته سنك وصيتنى ايفايه مقتدر اولمقسزين بوندن برسنه اول مرتحل دار آخرت اولدى. فقط لله الحمد والمنه بوندن بش آي اول نسيم حریت، طلوع آفتاب مشروطيتله برابر وزان اولمغه باشلايجه نيجه آثار مستحضر دنك برر نهال شتادیده کي صارغیلرندن چيقارلمغه باشلامسى وبوفیض ايله ساحه مطبوعات پك آزوقت ايچنده يوزلرجه مؤلفات مرغوبه ايله زینتیاب اولمسی اشته دن پدرم وپدردن بو عاجزه مدوروصیت احكامنك اجراسنه بر سائق مؤثر اولمغه جلد رابع مذکوركد بلطفه تعالى طبع ونشرينه ابتدار قلمشدر.

برده اثرک اقسام ثلثة اوليه سی اساساً آز مقدارده طبع ايتديرلمش اولوب مع مافیه

نسخ منتشره سی دخی بالاخره بعض کارگذارلرک آماج دانه انتفاعی اولغله هیچ بریرده آلتوب صاتیلمز اولمش وعمومک استفاده سی تأمین ایدر یولده محرر بولنان بودکرلی اثر اسباب معروضه دن طولای بسبتون اورتهدن قالمش ایدوکی جهته اوچ اولکی جلدلرکده بوکره یکیدن طبعی۔ مؤلفک اودای متبایه سنک اخطارینه وشو صورت مشار الیهک نامنک خیر ورحمتله یاد ایدلسنه وسیله اوله جغنه بناء۔ مناسب کورلمشدر . شوراسنی ده علاوه ایده یم که (نتایج الوقوعات) کرچه درت جلد در فقط مندرجاتی اعتباریه آلتی بابنه منقسمدرکه برنجیسی ابتدای ظهور آل عثماندن سکز یوز درت تاریخنده کی تیمور وقعه سنه قدر اولان یوز بش سنهک وقوعاتی ، ایکنجیسی ییلدیرم بایزیدخانک وفتندن سلطان بایزید خان ثانینک ترک سلطنت ایتدیکی تاریخه قدر تقریباً یوز اون اوچ سنهک احوالی ، اوچنجیسی سکز یوز اون سکز سنه سنده واقع یاوز سلطان سلیمک جلوسندن بیک اوچ تاریخنده سلطان مراد ثالثک وفاتنه دکین سکسان بش ییلاق حادثاتی ، دردنجیسی بیک اوچ سنه سنده وقوع بولان سلطان محمد ثالثک جلوسندن بیک طقسان طقوزده سلطان محمد رابعک خلعنه قدر اولان طقسان بش سنهک وقایعی ، بشنجیسی سلطان سلیمان ثانینک جلوسندن بیک یوز سکسان سکز سنه سنده منعقد قینارجه مصالحه سنه قدر اولان وقوعاتی مینندر .

بشنجی بابی تشکیل ایدن اشبو جلد رابع ایسه بیک یوز سکسان سکز تاریخندن بیک ایکیوز الی یدی تاریخنه قدر جریان ایدن التمش طقوز ییلاق احوالی محتویدر .

« ومن الله التوفيق » محمد غالب



بشنجی باب

اشبو تاریخک بشنجی بابی بیک یوز سکسان سکر تاریخندن بیک ایکی یوز اللی یدی تاریخنه قدر اولان وقوعاتی میندر .

باب سابقده بیان اولندیغی اوزره روسیهلو ایله عقد مصالحه اولوب لیکن روسیهلولر قریمک ضبطنه مقدمه اولان تاتار سر بستلکنی قبول ایتدیرمش اولدقلرندن بمنه تعالی آتیده تفصیل اولنه جغی اوزره نوبنو اختلالر ایقاع ایدرک بالاخره غصب و تملک ایلدکلری جهتله اون اوچ سنه قدر ممتد اولان اشبو مصالحه عادتاً بر متارکه حکمنده اولوب حتی بین الدولتین جریان ایدن منازعات و محاورات برایکی دفعه اعلان حرب مرتبه سنه واصل اولمشیکن جسارت اولنه مامشیدی . چونکه دولت علیه تنظیم عسکر و تميم مهماته محتاج اولوب سلطان عبدالحمید خان حضرتلری ایسه بونلرک حصولی مقصدیله صدر اعظمیره رخصت کامله ویرمش وارکان دولته تحمیل تمشیت مصلحت ایلش اولدیغی حالده ابتدا کی صدر اعظمیری اولان عزت محمد پاشا غایت بطی و اقربا و اتباعنه مغلوب وایکنجیسی درویش پاشا هوا و هوسی ایله مشغول اولدیغنه و اوچنجیسی اولان دارندهلی محمد پاشا تهدیدیغی ایقاعه قادر کوپرلی طرزنده برپیر صاحب تدبیر ایدیسده سلحدار محمد افندی ایله او یوشه مدیغنه مبنی بودخی کما ینبغی بر خدمته موفق اوله مقسزین منفصل و قلفات محمد پاشا مسند صدارته واصل اولدی . بو ذات یکچیریلکدن نشأت ایدوب چندان اداره مهام دولته لیاقت و کفایتی حائز اولدیغندن بیک یوز طقسان اوچ شعباننده عزل اولنه رق سلحدار مشارالیه که قره وزیر نامیله مشهوردر . اخذ مهر هایون ایله بالذات متصدی امور صدارت اولغه مجبور اولدی . صدر مشارالیه سلطان عبدالحمید خان حضرتلرینک معتمد و مؤتمنی اولغله هر خصوصه مستشار سلطنت ایدی عاقل و معارف شناس و صلاح حال ایله موصوف مقدم و مقتدر بر ذات اولدیغندن واستقلال دو بالا ایدوکنندن بر بحق سنه قدر ممتد اولان ایام صدارتنده حسن ادارهیه موفق و باخصوص استانبولک ضبط و ربطی و حوایجینک جلب و استحضاری خصوصاً صلرنده ابراز مهارت و درایتله بین الانام ممدوح اولوب امور کلیه دولتک اصلاح و تمشیتنه دخی مظهر اولسی امید اولنور ایکن بیک یوز طقسان بش صفرنده مرتحل دار آخرت

اولدی . عزت پاشا ثانیاً متکا پیرای صدارت اولوب سابقی وجهله وظیفه صدارتی اقربا وقرناسنه تسلیم ایدرک برحق سنه قدر تعطیل مهام و خلفی اولان یکن محمد پاشا غایت بغیض و غرضکار بر آدم اولمغله درت آیدن عبارت اولان ایام صدارتنده اجرای نفسانیتیه نصب نفس اهتمام ایدوب طقسان یدی محرمده معزول و وزیر کتخداسی بولسان خلیل حمید افندی مسند صدارته ارتقا ایله نائل مسؤل اولدی .

خلیل حمید پاشانک تشبثاتی

قینارجه مصالحه سی متارکه حکمنده و دولت علیه لاجرم عهد قریبده حربیه مجبور اوله جفی مرتبه بدهتمده اولدیغندن دونمانک تکشیری ضمننده کلیتو کراسته ولوازم سائر ترتیب و تنظیمنه اقدام اولندیغی مثلوسرحداتک احکام و ترصینه واهمیت موقعیه سی سفر سابقده متحقق اولان اسماعیله مجدداً برقاعه بناسنه مباشرت وچرکس قبائلنک لدی الحاجه قوالانلری مقصدیله تحت حکومت ادخال و اصلاح احواللری ضمننده فرح علی پاشا صوغوجق محافظی نصب اولنوب مشارالیهک تدابیر حمتمندانه سیله آنایه قلعه سی بنا و قبائل مذکوره کوندن کونه دائره دین مین و مدنیه ادخال اولنمقده ایسه ده بونلر تفرعات قیلندن اوله رق اصل اعتنا اولنه جق ماده عسا کر موظفه نک تصحیح انتظام و اطاعتی قضیه سی ایدی لکن ضابطان عسکری اعتشاش نظاماتدن مستفیدونفرات نامه اولان اشخاص ایسه خیر و شری تمیزه غیر مقتدر اولدقلرندن تنظیم احواللرینه قیام ومقت خواران اللرنده اولان علوفه عسکریه نک استردادینه اقدام اولندیغی آنده ضابطانک جزوی تحریکاتیه رفع علم عصیان و اوجاغمره سوء قصد و معاملاتنه حقارت اولنه یور دیهرک انواع مفسدته اغاز ایده جکلری درکار اولدیغندن بوخصوصه جسارت اولنه میوب یالکز تیمارلو سپاهینک توجیهاتنه و نا اهل اولانلره تیمار وزعامت توجیه قلنامسنه دائر برنظام یاپاشیدی . حق ساطان عبدالحمید خان حضر تلرینه برادرکز عسا کر منتظمه ترتینه نیت و نظاماتلرینی قلمه آلدیرمغه همت یاشلر ایدی . سفر ظهوریله اجراسنه موفق اوله مدی دیدکلرنده ایله صفاتی کوستروب ان شاه اوغلی موفق اولور دیو جامع الکلم بر جواب ویرمش اولدقلری منقولدر .

صدر جدید فطین ودرایتکار و صبرلی وجسور کنج و دینج برذات اولدیغندن بوکار الزم و دشواره عازم اولوب اقدمجه ترتیب قلنمش اولان اوچیوز نفر سرعت طوچیلرینی ایکی بیك نفره ابلاغ ومواقع مهمه ده ذخائر کلیه ادخار وسائر لوازم حربیه نک استکمانه

صرف وسعی و اقتدار ایلدی . لکن تنظیم عسکر مصارفات عظیمهیه محتاج و قارشولق بولمق مقتضی اولمسیله اولامستحفظ نامیله سرحداتده بولنان طوائف عسکریه علوفه لری یوقلمه ایتدیروب کلیتو محلول بولدی . بعده استانبولده دخی یوقلمه اجراسنه و فیما بعد علوفه عسکریه نك منع بیع و شراسنه و اتباع و اصناف کبی ایرادجیلرک عهده لرنده بولنان عساکر علوفه لرینک ابطالنه قرار و یروب بعض مرتبه اجرا آته دخی تثبیت ایلمسیله او جاقلو بیننده تحدث ایدن شراره قیل و قاله ایرادجیلر دخی لهیب افروز اولدقلرندن ولوله ساز مسامع اعیان اولمغه باشلدی . مع مافیه ابتدای صدارتنده اغراض شخیصه دن بجانب ایددجکنه یمین وارکان دواتی تأمین ایدوب برسنه قدر عهدنده ثابت قدم اولمشیکن صکرملری تغیر اوضاع ایلسی و جمع نقود و امواله حرص و تهاکی و قریم استیلا سنک هنکام صدارتنه تصادفی پیمانه وقع و اعتبارینی شکست ایلشیدی . خلا فکیران صدر مشار الیهدن شیخ الاسلام قدن معزول عوض پاشا زاده ابراهیم بك همشیره پادشاهی اسماء سلطاننه تذکره تحریر و صدر اعظمك علوفه عسکریه نی تنقیح دن مرادی یکی چریلری آیاقلندیروب تجدید سلطنت ایتدیرمکدر دیو تذکیر ایلله لیل و نهار آرزومند اولدیغی مقام فتوایی تحصیل بو صداقتی آلت ایدوب قپودان دریا غازی حسن پاشا دخی قول مذکور ی تأیید و تصدیق ایلدیکنه و دفتر دار بولنان سایم اضا زاده نظیف افندی که سلطان حمید خان حضر تلرینک شهزاده لککری او اننده تولد ایدوب آخرتلك خانم نامیله مشهور اولان کریمه لری در شهوار خانمك زوجیدر حرمی واسطه سیله اشبو شراره القا آته مروحه جنبان اشتداد اولدیغنه منی بیك یوز طقسان طقوز سنه سی جمادی الاولینک یکرمی سکننجی کونی عزل و بوزجه اطه سنه نقل اولنوب بش اوز کون مرورنده جده و الیلکی توجیه اولنمشیکن متعاقباً قتل و اعدام اولندی . واقعا خلیل حمید پاشانك تشبثاتی باعث اختلال اوله بیلمك مظنون ایهده او یله برشیء واقع اولسه طوپك آغزینه اولاکندوسی کله جکی آشکار اولمسیله بو وسیله ایلله تجدید سلطنت عزویاتی بی اساس و غیر معقول اولدیغی بدیهیاتدندر . مقام صدارته کتوریلان شاهین علی پاشا امی و عامی بر آدم اولوب صدارتی ایهه سفر سابقده اوزی قلعه سنك محافظه و روسیه لی مهاجماتنك مدافعه سنه موفقیتی ایچون برنوع مکافات اولدیغندن سرحداتده طبعی نمکن اولمیان نفایس اطعمه اکیله گذارنده ایام و طقوز آی قدر متکا پیرای مسند عز و احتشام اولدقدن صکره معزول و اوچ درت آی مقدم قپودان پاشا کتبخدا الغندن رتبه وزارتله موره و الیسی نصب اولنان قوجه یوسف پاشا ایکی یوز سنه سی اوائلنده صدر صدارته منقول اولدی بونك

زماننده روسیه و نیمچه سفرلری کشاد قلمش اولدیغندن بمنه تعالی احوالی آتیده
تفصیل اولنه جقدر .

احوال جزایرلی غازی حسن پاشا

قیودان دریا جزایرلی غازی حسن پاشا دولت عبدالحمید خانی وقوعاتنده اکثریا صاحب
رأی و تدبیر اولدیغندن خدمات واقعه سیله احوال ذاتیه سی بیان اولنمق مقتضی کورلمشدرکه
سلسله حادثاتک توضیحه قوت ویرر .

جلد سابقده بیان اولدیغی اوزره چشمه وقعه سنده ولتی جزیره سی تخلیصنده مشارالیه دن
مشهود اولان شجاعت و موفقیت سیبیه رتبه وزارت ایله قیودان دریا نصب اولنوب
عنوان غازی ایله منشور اعتباری توشیح ایدلمشیدی . محاربه سابقه اواخرنده روسحق
سر عسکرلکی و بعد المصالحه ایکنجی دفعه قیودان پاشالق خاعقیله دوش افتخاری تزیین
قلندی . برالشام طرفلرنده ماتریمندن ایکن تحصیل ثروت و قدرت و دولت علیه نک روسیه
محاربه سیله اشتغالندن استفاده ایله سواحل شامیه یی ضبط و عکا قلعه سنده تحصن ایدن
طاهر عمر نام متغلب مصرده تفرعن ایدن بولوت قیان علی بک ایله اتحاد و مسقو
دونماسی امیرالیه دولت علیه عاینده اجرای مخبرات و مذاکرات ایتیمکده ایکن ابوالذهب
محمد بکک سیف سطوتیه علی بک مقتول و او آراق مصالحه دخی منعقد اولمغله مشارالیه
محمد بک جانب سلطنت سینه دن طاهر عمرک تنکیلنه مأمور ایدلمشسده برالشامه وصولنده
مرتحل دار آخرت اولمغله بو خدمت قیودان مشارالیه ک عهده درایتنه حواله اولندی .
بناءً علیه سکسان طقوز سنه سی اواخرنده دونمای هایون ایله عزیمت و عکا قلعه سی
محاصره یه مباشرت ایدوب طاهر عمرک اکثری عسکری مغربی و قیودان مشارالیه
دخی غرب اوجاقلری بیننده صاحب نام و شان اولدیغندن مغریلردن ال طوته رق باغی
مرقومک قتل و ازاله سنه موفق اولدیغی مثلاًو ایرتسی سنه دخی اولحوالیده بولنان اولاد
و اتباعنک اشقیاسنی قتل و اعدام ایله بقیه سی استانبوله کتوردی . ینه سفر سابق سیاتندن
اوله رق هنکام محاربه ده موره رعایاسی علم افراز طغیان اولمغله آرئودلقدن عسکر سوق
اولنوب جمعیت شقاوت پریشان ایدلمشیدی . لیکن آرئود طائفه سی موره جزیره سنده
یرلشوب تجارت صورتیه کرک اسلام کرک خرسیانلری نجه قهر و ظلملرینه آلدقلرینه
وبونلرک دفع تغلب و تسلطلرینه والیرک قدرت و لیاقتلری قاصر اولمسنه مبنی بیک
یوز طقسان ایکی سنه سنده قیودان مشارالیه موره والیلکی ضمیمه بالتوجیه ارسال

قلندی . مقر ولایت اولان طرابلسجهیه تقرینده آرناوودلر استحکام انشاسیله مدافعهیه قیام ایلدکلرندن عظیم بر محاربه وقوعیله ایکی اوچبیک شتی اعدام اولنوب بقیه سی استیان ایلدیلر . اهالی اوزرنده اولان مطلوبلری یوزبیک غروشه قطع و کندولری جزیره دن دفع اولنوب فیما بعد کلماملریچون کرک ارناوودلره کرک اهالییه نذرلر تخصیص وتعیین قلنهرق آسایش مملکت اعاده اولندی . جزیره مرقومه ده واقع مانیه رعایاسی مناعت موقعیه لرینه استناداً اوتهدنبری شقاوت وعصیان اوزره اولدقلرندن مشارالیه ایرتسی سنه دونمای هایون ایله آق دکرزه خروجنده انلرک دخی تأدیپ و تربیه لرینه مباشرت و شمدییه قدر مسبوق اولدینی وجهله حرباً مانیه طاغلرینی آورده قبضه جلادت ایلدی بوندنصکره هر سنه معتاد اولدینی اوزره دونمای هایون ایله آق دکرزه سفر و جزیره لرده و آناتولی ساحلرینده مخالف طور تابعیت حرکات باغیانیه . متجاسر اولان دره بکلری مثلومتغلبه یی کشته تیغ ظفر ایتمکله کوندن کونه وقع و شانی مترقی اولوب اتابک دولت و محارس تحت سلطنت مقامنده بولنور ایدی . بیک ایکی یوز برسنه سی بغاة امرای مصریه یی تأدیپ مأموریتیه اولجانبه عزیمت و خطه مصریه یی عصاة امرادن تخلیص و تخلیه یه همت ایدوب انجق روسیه سفرینک ظهورینه مبنی بوجه مسارعت استانبوله دعوت اولندیغندن امر تأدیپ لایقیله اکمال ایتمکسزین عودت و تحصیل ایلدیکی اون ایکی بیک کیسه ذمات امرای خزینه یه تسلیم ایلدی مشارالیه مهیب و وقور و کثرت ثروت و قدرت ایله مشهور بر وزیر شجاعتمیر اولوب حتی اعانه سفریه اوله رق اون بیک کیسه ویرمشدرکه دیرکلی ریال ایکی غروش اعتباریه شمدیکی حساب اوزره یوزبیک کیسه یی تجاوز ایدر . چشمه وقعهنده دونمای هایون کلیاً محترق اولمشکن ازسرنو انشا و اکمال اثر غیرت و اقدامی اولدیغندن بشقه ترسانده مجدداً قالیونجی قشله سی و جسیم برجامع شریف و سائر ابنیه خیریه انشاسنه موفق اولوب آق دکرز آطه لرنده و دونماتک کشت و کنار ایلدیکی ساحلارده چشمه و سائر مثللو آثار خیریه سی بولندق محل یوقدر . عصرینک مورخلری جمع ماله انهماک ایله اتهام ایدرلر سده هر حالده محاسنی سیئاتنه غالب اولدینی درکاردر .

قریم وقوعات

کله لم قریم وقوعاتنه : طائفه تاتارسربست اولوب ایستدکلرینی قریم خاناننه انتخاب ایللری قینارجه معاهده سی احکامندن اولق حسیله عقب مصالحه ده قریم علما و امراسی

صاحبکرای مقام خانی به انتخاب ایدوب لیکن موسقولونک نیت وافکار غصب کاریسنى
تفرس ایتملریله طرف دولت علیهیه ارسال مبعوثان وتقدیم معروضات ایله سر بستلک
رفعنى وقدمى وجهله جانب سلطنت سنیه دن صاحبکرایه خاتلق توجیه اولنمى استندا
ایلدیلر. بوماده معاهده مذکور نك اس اساسی اولوب روسیه لولرک بوکا بروجهله موافقت
ایتمه چکی معلوم ايسه ده هیچ اولمازسه بر صورت متوسطهیه ربط اولنقى اوزره پادشاه انام
خليفة اسلام اولدیغندن خان مشار الیه ارسال تشریفات ایله تصدیق امارتی لوازم
مذهبییه دن اولدیغی هنوز استانبوله کلان روسیه ایلیچیسنه افاده اولنوب قرق بر کونده
پترسبورغدن جواب موافق کلمه میر علم محمد بك ایله ازمان سابقه ده معتاد اولان تشریفات
ارسال قلمدی. سفر هنگامنده سابق خانلردن دولت کرای خان جانب دولت علیه دن
مأموراً قوبان طرفلرنده بولندیغندن عقد مصالحه عقبنده قریمه کذار ایلد کده طائفة تاتار
صاحب کرای خلع و مشار الیه مسند حکومت اقعاد ایدرک طرف سلطنت سنیهیه
عرض محضر تقدیم وصاحبکرای خانانی اوان مضایقه ده اختیار اولنوب دولت کرای
کد کدن صکره آکا کیمسه نك اطاعت و انقیاد ایتمه چکی بدیهی اولدیغندن رفع ربه
اطاعت و دولت کرایه تجدید بیعت اولندیغنی تذکیر ایتملریله برابر روسیه دولته دخی
بومالده تبلیغات رسمیه ایفا ایلدیلر روسیه لولر محاربه سابقه ده قریمه دخول و طائفة تاتار
ایله عقد مصالحه ایلدکلی اوانده صورت سفارته پترسبورغه کیمش اولان شاهنکرای
آرایش دنیا به فریفته و صید های حکومت هوسیه بصر بصیرتی بسته بر میرزای اقبال
پرست اولدیغی روسیه لولرک معلومی اولدیغندن قوردقلری دولاب استیلانک اداره سنى
مشار الیه کردن بلاهته تحمیل ایلیکی تصمیم ایلدیلر بناء علیه پاردر صرف ایدرک
وانواع دیاس اجرا ایلهرک پیدا ایتدکلی طرفدارلری واسطه سیله بیک یوزطقسان
برسنه سنده شاهنکرای مقام خانی به انتخاب ایتدیروب معاونت فعلیه ایچون دخی معیتنه
مقدار وافی روسیه عسکری ترفیق و دولت کرای قوه عسکریه ایله اخافه و فراره مجبور
ایلد کدن صکره مخالفت اظهار ایدن وجوه تاتاری جبراً و کرها شاهنکرایه بیعت
ایتدیردیلر. بو خبر طرف دولت علیهیه منعکس اولدقده قریم خلقی حقننده روسیه لونک
قولاً و فعلاً واقع اولان مداخله لری معاهده منعقد نك تمامیه خلافی اولدیغندن بوبابده
هر درلو شکایات و دعوا به قیام اولندیسه ده اصلاً بر ثمره حاصل اوله مدیغندن جانب دولت
علیه دن دخی بوندن مقدم ایکی دفعه قریم خانلغنده بولنش اولان سلیم کرای خان انتخاب
و قریمه ارسال قلمدی. شاهنکرای ایله سلیم کرای بیننده بالذفات محاربه لری واقع اولوب

لکن شاهنکرای طرفی روسیه عسکرینک اعانه سیله قوتلو بولندیغندن سلیم کرای ایشی باشه
 چیقارمه میوب بالضروره استانبوله عودت ایلدی. آرتق بونک اوزرینه قریم امورینه
 دولت علیه نك دخی فعلاً مداخله ایلسی بین الوکلا قرار کیر اولوب بوندن طولای روسیه
 دواتی اعلان حرب ایدرایسه متوکلاً علی اه مدافعه سنه قیام اولنسی اختیار اولنغله جانیکیلی
 حاجی علی پاشا قریم سرعسکری نصب و حوزة حکومتی اولان طربزون و جانیك طرفلرندن
 رقبیک قدر عسکر ترتیب اولنوب بمنه تعالی ایلروده ایجابی وجهله حرکت اولنق اوزره
 شمدیلک سکزاون بیک قدرینی بالاستصحاب دونمای هایون ایله قریم جانبه مرور ایلسی
 ضمننده ارسال منشور و قپودان دریاغازی حسن پاشا دخی هم دونمای هایون ایله سرعسکر
 مشارالیمی قریمه کچورمک و همدد بالاتفاق مطالب دواتی یرینه کتورمک ایچون مأمور
 بیورلدی طقسان ایکی سنه سی ربیع الآخرنده دونمای هایون ترتیبات سفریه ایله مملو اوله رقب
 بشکطاش پیشگاهنه چیقوب موافق هوایه مترقب اولدینی خالد بحکمته تعالی قرق کون قدر
 لدوس روزکاری اسمدیکندن حرکت ایدمدی. فرانسه لولر سکسان ایکی سفرنده سلطنت
 سنیه یی حربه تشویق و ترغیب ایتشلر ایکن بوکره روسیه لولره بر خدمت ایتک و قترینه نك
 نظر خشنودی و منویتی قزاق پولتیقه لری اقتضاسندن اولدیغندن فرانسه ایاجیسی
 درلودلائل و اخافه لرله قریم مسئله سی صاحبا بتورمکه چالشمقده اولدیغندن بونک تأثیریه
 دولت علیه نك قزار سابق تو هن ایدوب روسیه جنرالیه بالخباره ایجاب وقت و حاله موافق
 حرکت اولنسی ضمننده قپودان و سرعسکر مشارالیه مایه تعلیمات ویرلدی بنابرین دونمای
 هایون سینوب لیانندن علی پاشا عسکرینی آلب قریم ساحل لرینه وصول بولدقده مسقولولر
 قرنته بهانه سیله مخابره ماده سی قرق کون قدر تأخیر ایلدکارندن مشارالیه مایه تعلیمات جدیده
 و قطعیه طابنه مجبور اولدیلر بونک اوزرینه عساکر اسلامیه نك مناسب بر محله اخراج
 واکر روسیه لولر محاربه یه جرأت ایدرلر سه مقابله و مدافعه لرینه قیام اولنسی ایچون
 مأموریت قطعیه ویراش ایشه ده قردیه عسکر چیقارلدینی تقدیرده مسقولولرک حربه
 مباشرت ایدجک لری میدانده بولنه رقب موسم دریادخی کذار ایلش اولدیغندن حربه جسارت
 اولنه میوب دونمای هایون ایله مشارالیه ماسنه مزبوره رمضاننده سینوبه عودت ایلدیلر
 فرانسه ایاجیسنک پیدرپی واقع اولان افادات صاحجویانه سیله سنه مزبوره ایام شتاسنده
 دولت علیه نك درجه درجه حرارتی زائل و مطالعة مشکلات سفریه ایله بر صورت تسویه یه
 مائل اولدیغندن عبدالرزاق باهرا فندی مرخصانی و فرانسه ایاجیسی توسطیه آینه لی قواق
 تنقیح نامه سی تنظیم و طقسان اوچ محرمنده تعاطی اولنه رقب قوه قریبه یه کلش اولان حرب

وقال بر مقدار تأخرايتدى. بوتقيحنامه قينارجه معاهده سنك بعض موادنى مفسر حكمنده اولوب فقط روسيه لولر شاهنكر ايدن وازچكمكدن ايسه اختيار سفر ايلك بزجه دها مرجحدر ديهرك مشاراليهك مؤبداً تصديق حكومتى خصوصنده اصرار ايلريله مؤبد لفظى يرينه محلوليت حقيقه تعبيرى وضع اولنه رق بو قدرجه تعديلات ايله اكتفا واوزى قيرى دينيلان اراضينك جانب دولت عليه عائد اولدينى تصريح ومملكهت حقنده معهود اولان احكام دخی توضيح قلندى.

بوصورتله شاهنكر اى مسقولولرك نصب كرده سى اولديغندن طرف خلافت اسلاميه يه يك بارد معامله لر كوسترمكه برابر روسيه ايمپراطور يچه سى قترينه دن بررتبه عسكريه رجا وعادتا استحما ايتمكه استدعاسى قرين قبول ونشان وقواليرك رتبه سى اعطاسيله واصل مسؤل اولوب ياور صورتنده يانه برقاچ مسقو ضابطى دخی ترفيق قلندى. مشاراليه انلرك تعليم والقا آتيله عسا كر منتظمه يازمق وقريمده بولنان اوقافى الغا ايلك و آلافرانغه سفردده طعام يمك وعلناً شراب اچمك كى اهاينك حوصله لرينه صيغشميه جق حر كاته مباشرت وطعن ايدنلر حقنده مجازات شديد يه جرأت ايدوب بو حال ايله درت بش سنه قدر جابرانه حكومت ايلديشه ده مسقولر هم مشاراليه بى بو واديلره سوق والقا وهمده برفساد چيقارمق اچون پس پرده دن امر اى تاتارى تشويق واغرا ايلكده اولد قلرندن عاقبت طقسان آقى سنه سى اواسطنده شاهنكر ايك برادر لرندن بهادر كراى وارسلان كراى اهاينك اوكلرينه دوشوب شاهنكر ايك اوزرينه هجوم ايلريله مشاراليه بجرأ يكي قلعه ده بولنان روسيه قوماندانه التجا ايلدى. وجوه تاتاردخى بهادر كراى مقام خانى يه وارسلان كراى قالغايلق مسندينه اقعاد وعرض محضر ومبعوثلر ارساليه كيفيتى طرف دولت عليه وروسيه يه اشعار ايلديلر. روسيه لولرك تاتار سر استلگندن واتخاب قاعده سيله خان نصبندن مقصدلرى قريمده اختلال وفساد اكسيك اولماق وبرصره سنى دوشوردىكى آنده غصب واستملاك ايتك قضيه سى اولوب بو واند ايسه انكلتر دلولر آمريكا اختلالنك دفعى تدار كيله مشغول وفرانسه لولر ايسه انكلتر دنك تباعد طبيعيسندن ناشى قترينه نك نظر خشنوديسنى قزانمق املنده بولمغله و آوستريا ايمپراطور يچه سى مارى تره زك وفاتيله جالس تحت حكومت اولان ايمپراطور جديد غايت ساده دل ودولتنك منافع ومضراتنى ادراك دن غافل اولوب ممالك سلطنت سنه دن بعض يرلرك نمچه دولته الحاق قلنمى حقنده قترينه نك عرض ايلدىكى مواعيد ابله فريبانه يه قايله رق عقد اتفاق اياكله مشاراليه انك ارادىنى فرصت ميدانه كلش ومارشال پوتمكىنى عسا كر كلييه ايله قريم

جوارینه کوندروب تصمیماتی تهیه ایلد کد نصکره بود فعه کی اختلالی احداث ایلمدی .
 بناءً علیه شاهنکرایک یانه مقدار کافی عسکر ترفیق ایدرک قریمه ارسال وقوه جبریه ایله
 تکرار مقام خانییه اقعاد ایتکله نقش بر آب حکمنده اوله رق مشارالیه بوکره دخی یدی
 سکنز آی قدر مسند حکومتده بولندیقی حالد مارشال مزبور موجود معیتی اولان اردو
 ایله طقسان یدی سنه سی اوائلده قریمه داخل ووسط مملکتده واقع آق صوحر اسنده
 وجوه تاتاری جمع ایله روسیه ایمپراطور یچه سی قترینه قریم وقوبان مملکتلرینی کشور
 حکومتده ضم والحاق ایلدیکنی بالاعلان جبراً تبعیت ایتدیره رک نتیجه تشبثاته واصل
 اولدی بر مدت دها اغفال قصدیه شاهنکرایه سنوی سکنز یوز بیک روبله معاش تخصیص
 قانمش ایسه ده اوچ درت سنه مرورنده استقلال اولدیغندن مشارالیه چارناچار ممالک
 عثمانیه رحلت وبالاخره ردوسده مقتولاً دارمجازاته موصلت ایلمشدر قوم تاتار بو نتیجه
 فلاکت اشتالی مشاهده ایله کرفتار اندوه وملال اولوب چاره وتدبیره اقتدارلری مفقود
 اولدیغندن اون بیک تدرخانه اوزی قیرینه مرور وبر طاقی دخی بحرأ اناطولی ساحلرینه
 عبور ایدوب عجزه وضعفاسی کردنداده ربقه اسارت اولدیلر. بوندن صکره یعنی طقسان
 یدی سنه سی اوآخرنده وخلیل حمید پاشا صدارتنک برنجی سنه سنده اوزی صوبی کنارینه
 جسنم روسیه اردولری کلکله برابر در سعادتده بولنان مسقو ایلیچسی قریمک روسیه
 والکنه الحاق اولندیقی مصدق سند ویرملک اوزرد تکالیف شدیدیه ابتدار ونمچه
 ایلیچسینی دخی اشریک ایدوب حدودده بولنان قوه عسکریه یه یومیه یوز بیک غروش
 صرف قلم مقده اولدیغندن بحثله سریعاً یاسند مطلوبونک اعطاسی ویاخود جواب رد
 ویرلمسی خصوصنده فوق الغایه استعجال ایلدی . ارکان دولت بالدفعات عقد انجمن
 مشورت ایدوب ایکی میلیون نفوس اسلامیه یی حاوی اولان قوجه بر اقلیمک مسقولینک
 کرفتار ید استیلاسی اولمسی دیناً و ماکاً سلطنت سنیه یی حربه مجبور ایددجکی بدیهی
 ایسه ده دشمن تدارکات قویه ایله حدودلرده حاضر ودولت علیه ایسه لوازمات حربیه سی
 هنوز اکال ایلدیکی باهر اولوب باخصوص قریم روسیه لونک ید ضبطنه کیرمش وشمدی
 اختیار اولنه حق سفر مقدمه استیلانک وقوعنه ممانعت دائر دسی تجاوز ایدرک تخلیص
 مملکت مقصدینه مبتنی بولنش اولمغله اکال لوازمات حربیه ایچون سکوت ایله براز
 زمان ترانلق صورتی قرار پذیر اولدی لیکن روسیه لو سند طلبنده اصرار وفرانسه
 ایلیچسی بلا محاربه ایشک بتورلمسی خصوصنده صرف وسع واققدار ایتکله نهایت قینارجه
 معاهده سنک اوچنجی ماده سی که قوم تاتارک سر بستلکنی متضمندر انک کائن لم یکن حکمنده

اولدیغنی مشعرسند اعطاسنه قرار ویرلدی . وکویا دولت علیه قریمک روسیه لو حکمنه داخل اولدیغنی صراحةً تصدیق ایتیوب یالکز قریم حقنده اولان معاهده سنی الغا ایش اولدی مع مافیه ارکان دولت سند ویرمیه رک سکوت ایله کچشدیرمک خصوصنه چالیشدق لری حالده بودرجه سنی طوتدیره میوب وقریمک روسیه ممالکنه الحاقی تصدیقاً سند اعطاسنی دخی کوزه آلدیره میوب ایکیسی اورتاسی اوله رق قوم تاتارک وقریمک بیطرفلغنی مقاوله سنی اسقاط ایله تنظیم مصاحبت اولنق ترجیح ایدلدی بوماده کویا بر دیپلوماتاق اولوب ایلروده سلطنت سنیه نک دعوایه قیام ایده بیلمسی حقنی محافظه مقصدینه مبتنی ایسه ده دولترک بومثللو دعوالرینی فصل ایده جک محکمه انحق قوه حربه اولمغله بوکی تکلفاتدن هیچ بروقنده استفاده اولندیغنی کورلما مشدر . حتی ایکی یوز التی سنه سنده عقد اولنان زشتوی عهدنامه سنک ایکنجی ماده سنده قریم و طمانک روسیه ممالکنه الحاقی مین اولان سنده اختیار اولنان مطالعات و تکلفات هپ بهوده اولمشدر . بوکی شیلر ایکی سبیدن منبعث اولوب برنجیسی حقیقه فائده امید و خلیاسیله یاپیلور . ایکنجیسی هم عصر اولان معترضله نوعاً مدافعه ایچون حاضر لنور . نته کیم عصر مزده بلغرادی صربستانه ترک ایدنلر بزقلعه یی امارتک امتیازینه ادخال ایتیوب بافرمان مخصوص محافظلغنی صرب بکنه تفویض ایتدک وقلعه ده صرب بایراغیله برابر عثمانی سنجاغنک زکمر اولنمسی دخی شرط قوشدق دیرلر ایدی بوبابده جریان ایدن مذاکرات ونشر اولنان اعلاننامه لر واعطا اولنان سند مفصلات توارینخده مسطور اولمغله و مره بعد اخری اشعار اولندیغنی اوزره مقصد عاجزانه هر عصرده اداره امور دولتی بیانه منحصر بولمغله سمت تفصیلاته کیدلیوب فقط بوماده حقنده وقوعات سابقه و آتیهدن استنباط اولنان احکامنک برنبده بیانته ابتدار قلندی .

حکم زمان چوق شیلری جریان اصلیسندن چیقاردیغنی درکار اولدیغندن بیلور بیلمز احوال اسلافه طعن انداز اولق مسلك عاجزانه حجه مغایر انصاف ایسه ده بوبابده وارد خاطر اولان شیلرک اتیانی فائده دن خالی اولماق له بوجه آتی ترقیمنه ابتدار اولندی روسیه لولرک قریم حقنده اولان اقوال و افعال لرینک حاصل ایده جکی نتیجه مرتبه بده ائده اولوب او یله برکشور اسلامک استیلاسی ایسه بلا محاربه هضم اولنق قابل اوله میه جنی آشکار ایدو کندن یدی سکر سنه صکره واقع اولان محاربه طقسان اوچ سنه سی یعنی شاهنکرایک خانلغه انتخابی زماننده اختیار اولنش اولسه دولت علیه ایچون اهون اوله بیلمسی مأمول ایدی . چونکه سلطنت سنیه نک وقت قزانوب حربه حاضر لنمسی

تقریباً اسماعیل قلعه‌سی بنا و چرکستان طرفلری تحت انضباطه وضع اولمق و بر مقدار ذخایر ادخاریله ترسانه و طوخنخانه‌جه بعض تنظیمات اجرا قلمق قضیه لرندن عبارت اولوب دشمنه جوابی ویریه بیله جک درجده بر تدبیر کلی اولدیغندن بونلر مهمما ممکن اولوقت دخی یاپیه بیلوردی لیکن مسقولولر تأخر سفردن درت بیوک فائده یه دسترس اولدیلر که برنجیسی نیچه ایمراطور یچه‌سی ماری ترز قترینه‌نک مزاج و مشوارینه وبالآ خره اوستریا دولتی دخی اضرار ایده جکنه عارفه اولدیغندن قولاً و فعلاً حرکاته معارض اولدینی حالدده هم کندوسی هم ده بالآ خره جالس مسند حکومت اولان اوغلی ایمراطور ژوزف روسیه و ایله عقد تفاقه مجبور اولغله بالضروره قوه اسلامیه ایکی دشمن اوزرینه منقسم اولمق لازم کلدی ایکنجیسی طقسان اوچ تاریخنده دها قریم اوجانی کلیاً سونماش و قوم تاتار طاغلماش ایدو کندن مسقولو ایچون بر چبان اوله بیلوردی. اوینجیسی تاریخ مزبورده روسیه لونک قره دکرده دونمای هایونی تهدید ایده جک درجده قوه بحریه‌سی تأسیس ایلامش اولمسیله سفر آتیده واقع اولان مشکلات بحریه محل یوغیدی. دردنجیسی روسیه لولر هنوز قفلیس خانی ارکلی خانی تحت حکومته آلامش اولملریله اولجانبدن سلطنت سنییه یی ازعاج و اضراره مقتدر دکل ایدیلر بونلردن باشقه یوانتیقه‌جه و تدارکاتجه اولان منافعلرینی بی حد و قیاسدر .

سفر ایران

عصر عبدالحمید خانیده خفیفجه بر ایران محاربه‌سی دخی واقع اولمش اولدیغندن آنی دخی اجمالاً بیان ایدم : نادر شاهک قتلندن صکره عجمستانده صفویه ونادریه منسوباتندن خلیجه آدم دعوائی شاهیه قیام ایده رک یکدیگریله محاربه لر ایتشلر سده هیچ بر بنی علم اغراز استقلال اوله مدینی حالدده طائفه زندیه دن کریم خان شیراز طرفلرنده امثاله نسبتله کسب عظمت و قدرت ایدوب کمال عقل و درایتندن ناشی اسلافی کبی شاهق دعواسنه عدم نصدی ایله ایران و کیلی نامنی اشعار و کویا مسند شاهیه ایچون مذهب ایرانیانه موافق بر بنی اختیار ایده جکنی ایما و تذکار ایلدی . مع مانیه دولت علیه‌نک مشغولیت حربیه سندن استفادده ایله بغداد طرفلرینی ضبط ایده بیلورسه ایرانیان بیننده وقع وشانی برقات دها تزیاید ایده جکی مجزومی اولدیغندن سکسان طقوز سنه‌سی اوائلنده بر قوه مفرزه ایله برادری صادق خانی بصره محاصره سنه ارسال و بغداد ملحقاتنه دخی اطاله دست تجاوز ایسیله وقوع حال اقدمجه سفارتله مشارالیه زند کریم خانه کوندلرش اولان شاعر

مشهور وهی افندی طرفندن و بغداد والیسی عمر پاشا جانبندن انها و عساکر کلیه ارسالیله اعانه و امداد اولمنسی استدعا قلندی بناءً علیه دیار بکر والیسی اسپناچی مصطفی پاشا و وزون عباد پاشا و کرکوک والیسی عبدالجلیل زاده سلیمان پاشا و کبکی عبدی پاشا مشار الیه عمر پاشا معیتته تعیین و ارسال اولندی فقط استیضاح ماده بی متضمن اولحوالی مأمور لرینه یازیلان امر نامه لره کلان جوابلر یکتدیگرینه موافق اولمیوب باخصوص مشار الیه سلیمان پاشانک تحریر اتنده زند کریم خانک بغداد طرف لرینه هجومی عمر پاشانک زوار ایران حقنده متجاسر اولدینی ظلم و تعدیسندن و بغدادده وفات ایدن عجملرک مخلفات لرینی ضبط و بابان پاشا لرینی رشوت اخذیله صیق صیق عزل و تبدیل ایلسندن نشأت ایلدیکی اشعار اولندیغنه و عمر پاشا سکر اون سنه دنبرو بغداد والیاکننده بولنوب عزلی اوته دنبرو جایگیر ضمیر دولت بولندیغنه مبنی بغداد والیلکی بیک طقسان سنه سی اوائلنده اسپناچی مصطفی پاشایه و دیاربکر والیلکی عمر پاشایه تفویض اولنه رق توجیه فرمان لر یله برابر شاید عمر پاشا اطاعت ایتمیوبده بغدادی تسایم ایتر ایسه قتل اولمنسی متضمن آیروجه بر فرمان دخی خفیاً مصطفی پاشایه تسایار قلندی. عمر پاشا امر سلطانیه اطاعت و بغداددن خروج مسارعت ایشیکن مصطفی پاشا مالنه طمعاً یدنده کی فرمان عالی بی سوء استعمال و برقرینه مشار الیه قتله استعجال ایلمکله برابر عجملرک صلیحی متضمن اولان اخبار اغفال انکی لرینه فریفته اوله رق عمر پاشانک ازاله سیله مخاصمات بر طرف اولدی ظن ایدوب معیتته مأمور اولان امرا و عسکری طاغندی. بصره محاصره سی ایسه اون درت ماعه بالغ و امداد ظهوری دخی ممتنع اولمغله صادق خان نکرار هجوم ایدرک بصره بی تسخیر و مسالمی بولنان سلیمان اغا ایله اشراف بلده بی اسیر ایدوب اموال و فیره ایله شیرازه ایصال ایلدی. بو خبر در دولته واصل اولدقده ویریلان قنوی شریفه موجبجه زند کریم خان اوزرینه اعلان حرب اوانوب آنجق آزر بایجان خانلری جانب دولت علیه ابراز محبت و زند کریمدن عرض شکایت ایدمکد کلرندن آنلره استمالتمه لر تحریر و اضروم جانبندن سوق عسکر اولنق صورتی تأخیر اوانوب بغداد والیلکی مقتول عمر پاشا کتخدالرندن عباد اغایه و کرکوک ایلی ماردین و یوده سی حسن اغایه بارتبه وزارت توجیه اوانوب مصطفی پاشا دیار بکرده قلعه بند و متعاقباً قتل و اعدام قلندی.

کردستان طرفلرنده بعض مرتبه محاربات و مدافعات واقع اولمش ایسه ده بصره نک استخلاصی ممکن اوله میوب عباد پاشا دخی وفات ایلدیکندن ایالت بغداد مشار الیه حسن پاشایه توجیه بیورلدی. صادق خان بصره بی ضبط ایتدکنصکره اون ایکی بیک عسکر ایله

برادر زادہ سی علی محمد خانی محافظ براقشیدی . خان مومی الیہ متفک عشیرتی شیخی
 تاملری تحت اطاعتہ آلمق اوزره اون بیک قدر عسکرایلہ بصرہ دن حرکت و تقابل وقوعندہ
 عسکر ایرانندن اوتوز بش قدر آتلو آنحق تخلیص جان ایدوب ماعداسی و خان مزبور
 ایلہ ایکی نفر برادرلری مقتول اولمغله بووقعه زند کریم خانہ پک زیادہ تأثیر ایدہ رک خستہ
 و بیک یوز طقسان اوج سنہ سی صفرندہ سفر آخرتہ کمر بستہ اولدی . اوتوز سنہ دنبرو
 مشار الیہ زند کریم خان ممالک ایرانندہ اولدقچہ علم افراز استقبال اولمشیکن وقوع وفتیلہ
 اقربا و تعلقاتی بینندہ آتش اختلاف شرر افشان اولمغله و قاچار قبیلہ سندن آغا محمد خان
 عراق عجمہ متصدیٰ دعویٰ استبداد اولہرق کوندن کونہ نشو و نما بولمغله دولت
 زندیہ اون ایکی سنہ صکرہ کلیاً منقرض اولمشدر بروجہ محرر زندیہ طائفہ سی بینندہ
 مقاتلات ظهور ایلک جہتیلہ ارتق بصرہ یی محافظہ ایدہ میہ جککری محسوسلری اولدیغندن
 سالف الذکر بصرہ مسلمی سلیمان اغایہ بصرہ یی توجیہ ایدوب ارسال ایشلرایدی . حالبوکہ
 اولجہ عجملرک بصرہ دن چکلشمش اولدقلری خبری بغدادہ واصل اولدقدہ حسین پاشا
 طرفندن نعمان افندی نامندہ بریسی مسلم اولہرق کوندرلمش و شیخ نامردخی سلیمان اذانک
 خصمی بولنمش اولدیغندن اغای مومی الیہ ہویزہدہ اقامت و وقوعات سابقہ یی و کیفیت صداقت
 و خدمتی استانبولہ تحریر ایدوب ظهور جوابہ منظر اولدی . مومی الیہک لیاقت و قابلیتی
 نزد دولت علیہدہ متعین و او آراق شیخ نامردخی مقتول اولمسیلہ ایالت بصرہ و متعاقباً
 ایالت بغداد بارتبہ وزارت مشار الیہ توجیہ بیورلدی . اشوسلیمان پاشا یکر می سنہ دن متجاوز
 بغداددہ حکومت و ضبط و تربط مملکتہ موفق اولمغله بعد ازین بیوک سلیمان پاشا نامیلہ
 کسب شہرت و عظمت ایشدر .

ایرانلر یکدیگرینہ دوشوب غوغا ایتمکدہ اولدقلرندن و مطلوب دولت اولان بصرہ
 استخلاصی دخی حصول بولدیغندن طبیعتیلہ ایران محاربہ سی برطرف اولدی .

روسہ و نمچہ یہ اعلان سفر

قینارجہ معاهدہ سی سینہ دولتی مجروح ایدوب قریم استیلاسی دہ داغ بربالای داغ
 اولمشیکن طرف دشمنندہ کوریلان نشو و نما و بالعکس ہیئت اسلامیدہ مشاہدہ اولنان
 عدم انتظام و فقدانی اسباب و قاچار ناچار ارکان دولتی صبر و سکوتہ اجبار ایتمکدہ
 اولمسیلہ برابر سلطان عبدالحمید خان حضرتلری واصل سن فتور اولدیغندن و باخصوص
 کمال ورع و تقویٰ ایلہ متصف و سفر سابقدہ سرحداتدہ بولنان صبیان و نسوانک کرفتار
 اولدقلری فلاکتلرہ واقف اولدیغندن وقوع حربی ایستہ من و زمانمدہ عباداہ پایمال

اوله جقسه جناب حق روحی قبض ایلسون دیودعالیلردی لکن روسیه ایلیچینسک نوبنو واقع اولان تکالیف طاققفرسانی وایمپراطوریچه نك کمال دبدبه ودارات ایله قریمه کلسی غیرت وحیت عامیانه وامیانه ایله متصف اولان صدراعظم یوسف پاشانک واکاپرواولان ارکان وخدامک صبروآراملرینی احراق وافنا ایدوب انکلتزه وپروسیا ایلیچیلری دخی کندو دولترینک پولتیقه لری ایجابجه سلطنت سنییه یی حربه نشویق ایتکده ایدیلر روسیه ایمپراطوریچه سی کندی حسابجه سفرك برمدت دها تأخیری آرزوسنده اولدیغندن ابراز رفق وملایمت ایچون ایلیچینسه تعلیمات کوندرمکده اولدینی حالدہ رئیس وکلاسی بولنان بوتکین قریم ولسارابه و لهستانی برلشدیروب حکمدار اولق مالخولیاسنده اولدیغندن وقوع حربہ متهاک وایلچی ایسه انک تحصیل رضاسنه منہمک اولمسیله ظاهراً ابراز ملایمت وحقیقتده استلزام سفری متضمن حرکاته نصب نفس مفسدت ایلدیکنه مبنی طرفین حکمدارلرینک مرضیسی دکل ایکن مقتضای قدر امر سفر مقرر اولدی بناءً علیه عقد اولنان مجلس مشورتده صدراعظم کشاد سفری التزام ایدوب شیخ الاسلام مفتی زاده احمدافندی صورت مماشات کوستردیکندن ورأی خلافتده بولنان اکابر صدر مشارالیهک چهره خراش ازاری اولسندن وهمناک اولدقلرندن بیک ایکی یوز برسنه سی شوال شریفنده اعلان حربہ قرار ویرلدی حتی اولجه آینه لی قواق قصرنده عقد اولنان مجلس مکالمه یی ورای باب خفادن سلطان عبدالحمیدخان حضر تلرینه اساع وروسیه ایلیچینسک اظهار ایلکده اولدینی رعونه بالذات کسب اطلاع ایله تهییج عروق غضب وغیرت ایتدیرلش وبو کره دخی ویریلان قنوی شریفه موجبجه اعلان حرب اولنق ضروری اولدینی وتأخیری موجب مخافات اوله جفی صدراعظم طرفندن افاده اولنه رق ایسترایسته مزبول وتصدیقه اجبار ایدلمشدرشهریار مشارالیه حضر تلری اکر سفر اولمزایسه تختکده اوطوره مزسین دیورلر ومسقوکیلری بالاتزام سرای بروننده یاتوب قصداً وتحقیرآبی ادبلکه جرأت ایده یورلر دیو سویلیورلر لکن بن اویله شی کورمدم دیدکلری منقولدر .

عقد مجلس عمومی اولدینی کونکه بیک ایکی یوز برسنه سی شوال شریفنک یکرمی سکننجی کونیدر روسیه ایلیچینسی باب عالی یه احضار وتنفس اوطه سنه اقعاد اولنوب مواد منازع فیهادن اولافغانده مقیم مسقو قونسلوسی مفسد بر آدم اولمغله بلا توقف ممالک محروسه دن قالدیرلمسی ثانیاً تفلیس خانی ارکلی خان حقنده روسیه دولتنک دعوی ایلدیکی صحابت مغایر عهد اولوب تفلیسده مسقو عسکرینک بولنمی دخی ایکی سنه دنبرو چلدر وکرجستان طرفلرنده انواع شورش واختلاله بادی اولدیغندن روسیه عسکرینک اولخوالیدن

چکلمسی ثالثاً استانبولدن مرور و عبور ایدن مسقوکیلری ممنوعاتدن مال آلدقلى محقق اولمغله بلااستثنا یوقلانمسی رابعاً التى آى مقدم یاشدن فرار ایدن بغداد ویوده سی علكساندرینك روسیه دولته التجا ایلدیكى تحقیق قلمش اولدیغندن طرف دولت علیه یه ردوتسلیم قلمسی خامساً بر موجب عهداوی اهالیسنه ویرلسی مشروط اولان طوزك اعطاسنده تردد قلماسی سادساً روسیه ممالککنده بولنان دولت علیه تجاروتبعه سنك حمایه سی ضمننده روسیه مملکتلرنده جانب سلطنت سنیه دن مأمورلر اقامه سی قطعاً مطلوب دولت اولدیغنی شفاهاً وبالواسطه افاده اولندقدہ ایلچی مومی الیه دولتدن استیدان ایتدکجه جواب ویرمه جکنی بیان ایلکله و بودخی وقت کچورمک مقصدینه مبتیدر دینکله ایلچی مومی الیه بر معناد یدی قله ده بالتوقیف اعلان سفر اولندی صدر اعظم تدارکات سفریه ایله اشتغال ایلکده اولوب علامت حرکت اولان طوغ اخراجی رسمی اجرا اولندیغنی کون نتیجه ایلچیسی بر قطعه تقریر کوندروب موسقولو ایله اولان اتفاقلری حسیله انلردخی اعلان حرب ایلدکلرینی بیان و پساپورظنك اعطاسی درمیان ایلکله بو کیفیت صدر مشارالیه موجب دهشت وتلاش اولمشسده اظهار تجلدن بشقه چاره قالدیغندن نتیجه دولتی حقنده جانب سلطنت سنیه دن فوق العاده رعایت و مساعدته ابراز اولمشیکن بلاموجب نقض عهد ایلدیكى حقنده قلمه آلمان اعلاننامه نك دول معظمه یه ارسالله بیان حال قلندی بونك اوزرینه حضور هایونده عقد مجلس اولنوب اردوی هایونك قغنی جانبه توجهی مقتضی ایدوکی مذاکره اولمش ایسه ده بر نتیجه استحصال اولنه مامغله ادرنه یه بعدالوصول ایجاب حاله کوره حرکت اولمغه قرار ویرلدى .

وبیک ایکی یوزسنه سی جمادی الاولنده سردار اکرم یوسف پاشا سنجاق شریفی و صنوف عسکریه یی مستصحباً در سعادتدن قیام و ادرنه صحراسنه ربط طناب خیام ایلدی یوزسنه دنبرو صربستان رعایاسنك دماغنه هواى استقلال صعود ایلش اولدیغندن نتیجه سفرلری واقع اولدقجه طرف طرف عقد جمعیت ایله ذروء عصیانہ عروج و قطع طرق و معابر ایدہ کلدکلرندن اردوی هایون سلسلتره طرفلرینه سوق اولندیغنی تقدیرجه بلغراد محصور حکمنده قاله جغنی مطالعه سنی مبنی روسیه جانبنك جهت بحریه سی قپودان دریاغازی حسن پاشایه و طرف بریسی اسماعیل سرعسکری صدر سابق شاهین علی پاشایه حواله اولنه رق موکب هایونك دخی ایکسی اورتہ سی بولمق اوزره و دین جهته سوق اولمسی قرارلشدیرلدى واسماعیل سرعسکری معیتته و اوزی و خوتین و بندر قلعه لری محافظه لرینه صنوف متنوعه دن یوزبیکدن متجاوز عسکر ترتیب و اسراقلندی .

نمچه لولره غلبه

نمچه لولر اول امرده بوسنه یه تعرض ایتیشلر ایسه ده ارسال ایلد کلری قوه مفروز لر
منهزم اولمغله بلغرادک محاصره سنه نیت ایشلر ایدی لکن موکب صدر اعظمینک و دینه
طوغری توجهنی استماع ایلد کلرنده قرانته موقعی اولوب نظارت دینیلان قصبه یه و کیر و سنده
واقع مهادیه بوغازینه استحکامات انشاسیله مترقب مدافعه و انجام کار اولدیلر اردوی هایون
ودین صحرا سنه لدی الوصول ایکی یوز ایکی سنه سی ذی القعدة سنده و دین سر عسکری بولنان
ملک پاشا کتخداسی حسن پاشا که جنازه حسن پاشا دخی دیر لر قلفات طرفه امرار
واورادن نظارت اوزرینه ارسال اولمغله محاربات شدید و قوعیله استحکامات موجوده
ضبط و عسا کر دشمن طرد قلندی صدر اعظم سنجا ق شریفی واردوی هایونک آغراغنی
ودین صحرا سنده براغوب عسا کر منتخبه ایله فتح الاسلام صحرا سنه وارد اوله رق پیدر پی
سر عسکر اردو سنه عسکر ارسال و مهادیه بوغازینک تسخیرینه اقدام اولمسنی اشعار ایدوب
بالا خره کندوسی دخی مرور و ساحل طونه ده واقع اینک نام براستحکام مشکل التسخیری
فتح ایلدی بوندن صکره زور بازوی مجاهدین ایله ذکر اولنان مهادیه بوغازی استحکاماتی
ضبط و غایت صرب طاغلره طوپلر اخراجیله و نمچه ایمپراطورینک قومانده سی تحتده
اولان بیوک اردوسی تضییق اوله رق عسا کر منتظمه دن مرتب اولان او یله جسیم براردو
رجعت و فراره مجبور اولمغله عسا کر اسلامی نه تک تعقیباتندن کلی تلفات و ضرره گرفتار
اولدی بلغراد سر عسکری دخی طونه نک قارشو سنده واقع پانچویه عسکر امرار ایلاکله
اورادن افلاق حدودینه قدر ساحلاً یکر می و عرضاً کذلک یکر می ساعتک اراضی که
بنات اووه سی نامیله معروفدر کاملاً ضبط و تسخیر و حاوی اولدینی قرا و قصبات یغما
و تخریب قلندی بو محاربه لرده سکساندن متجاوز طوپ و عسکر و اهالیدن الی بیکدن زیاده اسیر
اخذ و اعتنام اولمشدر . صدر اعظم غایت مقدم و غیور بر ذات اولدینندن ضبط و تسخیر
اولنان یرلرک ترکی حوصله حمیتنه صیغشدره مامقله محافظه لری اسبابنه تشبث ایتیش ایسه ده
مال غنائمه مغتم اولان جیوش اسلامی طاقم طاقم مملکتلری جانبه روبراه فرار اولدقلرینه
وروز قاسم مرور ایدوب روسیه طرفی دخی فنا لشمقه ایدوکنه مبنی بالضروره ایکی یوز
اوچ سنه سی محرمنده طونه یی برو طرفه کچوب شهر صفرده روسجق مشتاسنه داخل
اولدی و مهادیه و نظارت طرفلرنده براغیلان مستحفظین دخی نمچه لولرک مهاجمانه تاب آور
مقاومت اوله میه جقلرینی ادراک ایله مجبور رجعت اولدیلر . نمچه لولر ابتدای سفرده

دارالاماره بغداد اولان یاش شهری اوزرینه براردو سوق ایدوب بغداد ویوده سنی اسیر و شهر مذکوری ضبط ایلمش اولدقلری حالد افلاق ویوده سی بولسان مارویانی بك یذل اموال ایله خلیجه عسکر جمع ایتمش واسماعیل سرعسکری طرفندن دخی معیتنه جیوش و فیره تعیین وارسال قلمش اولدیغندن طرف طرف نمچه ممالککنه هجوم ایله ممالک دشمنی پامال جند منصور ایلدیکنه وقوبان خانلخی نامیله بسارابیا طرفلرینه مأمور قلنان شهباز کرای دخی عسکر تاتار ایله هیبت بخشای ورود اولدیغنه بناء نمچه لولر یاشی ترکیه مجبور و خان مشار ایله جانیکلی علی پاشا زاده مقداد پاشا شهر مزبوره داخل اولمشلر ایدی .

استیلای اوزی

روسیه فلد مارشالی پوتمکین معیتنه تعیین اولان یوزیکرمی بیک قدر عسکرک سکسان بیکنی بالاستصحاب اوزی قلعه سی محاصره سینه عزیمت ویکرمی بشر بیک کشیلک ایکی قوه مفزده نك برینی یاش اوزرینه و دیگرینی خوتین تسخیرینه سوق ایلدی . یاش اوزرینه مأمور اولان مسقولوره بر نمچه قوه مفزده سی دخی منضم اولغله شهباز کرای خان و مقداد پاشا اشبو ایکی دشمنه مقاومت ایدهمیه جکلرینی درک ایله اسماعیله کلرلیله یاش شهری تکرار کرفتار استیلا اولدی . بنابرین اسماعیل اردوسیله خوتین بینه دشمن خیلوت ایلمش اولدیغندن امداد و اعانه قبولری مسدود اولغله بر آیدن متجاوز مدافعه دن صکره خوتین قلعه سی دخی اعدا اله کیردی . اوزی محافظی محمد پاشا ابتدای سفرده قلبرون قلعه سنی ضبط ایتمک داعیه سیله اوچ بش بیک قدر عسکری اوفق قایقلر ایله قارشویه کچوروب مسقولور کروییه چکلمکله اشبو خدعه حربیه یه فریفته اوله رق تکرار عسکر کتورمک ایچون قایقلر عودت ایلدکده مسقولر کلیتله هجوم ایلدیکندن عسا کراسلامیه دوکوشه دوکوشه واصل رتبه شهادت و بو کیفیت اوزیده مجتمع اولان عسکرک قلته وضع قلبنه عات اولدیغندن محافظ مشارالیه تبدیل واسماعیل اردوسندن عسا کرجدیده ارسالیله بازوی اقتدارلری تشدید قلمشیدی .

قپودان دریا غازی حسن پاشا دونمای هایون ایله اوزی پیشگاهنه واصل اولوب لکن صولر صیغ اولق حسیله بیوک کمیلر قلعه یه تقرب ایدم مدکلرندن مستصحی اولدیغی ایجه دونمای سوق ایدوب برقاچ کون محاربه اولندی ، مسقولورک ایجه دونماسی کثرت اوزره اولغله و طرف اسلامدن صیغ محلره وضع اولنان نشانلر بر تقریبله دشمن طرفندن

تحويل اوله رق سفن عثمانیه نك خط حرکتلرینی شاشرتمش اولملریله صراکب اسلامیه نك اکثریسی صیغره اوطوروب کیمیسی محرق و کیمیسی ایادی اعدایه کرفتار اولدی . بعده روسیه لونك بیوک دونمسی سیواستیول لیماندن خروج ایله برولره طوغری کیکده ایدوکلری استخبار اولندیغندن قبودان پاشا دونمای هایونی قالدیروب اوزرلرینه وارمش وبالحراره ینه مذکور لیمانه فراره اجبار ایلدکن صکره اوزی پیشگاهنه عودت ایلشسهده استانبولدن طلب ایلدیکی سفن صغیره ایله عسا کر جدید مدت مدیده لدوس روز کاری اسماسندن ناشی قره دکر بوغازندن حرکت و دونمای هایونه التحاقه مسارعت ایده مدکارندن و موسم شتا دخی تقرب ایتدیکندن بالضروره قبودان پاشا عودته مبادرت وایکی یوز اوچ سنه سی صفرنده در سعاده مواصلت ایلدی .

مسقولولر اوزی قلعه سنی کمال کرمی ایله تضیق ایتیکده اولدقلری حالد دونمای هایونك عودتندن صکره قلوبون وهوجه بك وسائر ساحلله استحکامات انشاسیله بحرأ دخی محاصره یی تشدید ایدوب حکمت خدا بوسنه کی قیش قرق الی سنه دهری کورلندک صورتده شدید اولدیغندن کرک استانبولدن و کرک روسیجده مشتانشین اولان اردوی هایوندن ودها اقرب بولان اسماعیل اردوسندن بووجهله اعانه و امداد چاره بولنه مدی . روسیه لولرک واقع اولان هجوملری تلفات کثیره یی مؤدی اولمقده ایدیسهده مارشال پوتمکین هر درلو مشکلات وضایعاته تحمل ایدرک تسخیر قلعه یه نصب نفس اقدام ایدر ایدی . اوزی نهری منجمد اولمق و قلعه نك اوجهتی سهل التسخیر بولمق حسابیله ایکی یوز اوچ سنه سی جمادی الاولنده که اربعینك یکر می التسخیر کونیدر . لایعد نردبانلر ایله هجوم ایدوب اگرچه جیوش اسلامیه قلعه بدنلرنده مدافعه دلیرانه ایله یکر می بیك مسقولو تهلمش ایهده عسکر دشمن بتر توکنور درجهده اولمادیغندن بالاخره قلعه یی ضبط ایلدیله و پوتمکین اوچ کون نهب و غارت و رخصت ویرمکه یکر می بش بیك قدر عسا کر واهالی غریق لجه شهادت اولدی .

ارتحال سلطان عبدالحمید خان اول وجلوس سلطان سلیم خان ثالث

اوزی استیلاسی عامه اهل اسلامه موجب اندوه و ملال اولدیغنی مثللو سلطان عبدالحمید خان حضرت تلرینه دخی زیاده تأثیر ایلکه عیش زندگانیلری کوندن کونه متغیر اوله رق نهایت بیك ایکی یوز اوچ سنه سی رجب شریفك اوزن ایکنجی کونی واصل ریاض جنت

و برادر زاده لری سلطان سلیم خان ثالث حضرتلری جالس تخت سلطنت اولدی لر .
 شهریار مرحوم حضرتلری بیك یوز اوتوز یدی تاریخنده متولد و سکسان یدی
 او اخرنده نائل دیهیم عثمانی اولوب اون بش بحق سنه دن متجاوز پادشاهلق ایتشد ر .
 ورع و تقوی ایله متصف و عبادالله حقنده شفقت و مرحمتی مسلم برسلطان ولایت شعار
 اولوب قره سلحدار دیمکله مشهور سید محمد پاشا و جزایرلی حسن پاشا و کریمه لری در
 شهوار خانم زوجی نظیف افندی و اندرون رجانندن بعض مؤتمن و معتمدلرینک القآتی
 موجبجه حرکت ایدر لر و صدراعظم لره استقلال تام و یروب معروضاتلرینی رد ایتزلر
 ایدی . انحق صفوت قبلرندن و دسائس کونیه یه عدم و قوفلرندن ناشی تشخیص اغراض
 خصوصنده چندان مهارتلری اولماغله جابجا واقع اولان القآت مزورانیه یی صحتیه حمل
 ایده کلشدر در .

سلطان سلیم خان حضرتلری کنج و صاحب عزم برپادشاه اولغله و اصلاح مصالح
 دولت حقنده اولان موفقیتسزلکی خاقان سابقک اختیارلغنه حمل ایدن لر کندوسندن
 امیدوار بولنلریله اسباب غلبه نک تحصیلی و امور مهمه نک تنظیمی ایچون هر درلو فداکارلنی
 اختیار ایده جکلرینی صادر اولان خط هایونلرنده بیان و توضیح ایدوب تفقد امور
 ضمنتده دائماً تبدیل کزر لر ایدی .

پدرلری مرحوم اکثریا صو یولجی قیافتنده و عملیری مرحوم دخی بعضاً سوخته
 هیئتنده کشت و کذار بیوردقلری مثللو سلطان سلیم حضرتلری غالباً خبره جی قیافتنی
 اختیار بیوردقلری منقولدر . شهزاده لکلری اوآنده طرف هایونلرینه منتسب بولنلری
 مناصب مناسبه ایله تطیب و برنجی لالاری محمود بکی والده کتخداننی وایکنجی لالاری
 ولی شمس الدین بکی قپوجیلر کتخداننی ایله تلطیف بیوردقلری مثللو خلیل حمید پاشا
 ماده سنده ذیمدخل بولنان ترسانه امینی حاجی سلیم اغایی و اوغلی اولان وزیر کتخداسی
 نظیف افندی یی اعدام ایتدیردی لر . قپودان دریا غازی حسن پاشا دخی بوجله دن ایسه ده
 مسبوق الحدمه غازی بروزی ر اولدیغندن یالکز عزلیله اکتفا و اسماعیل سرعسکر لکیله
 اردوی هایون جانینه اسرا قلندی . حتی اول عصری ادراک ایدنلردن منقولدر که مشار
 الیهک دائره سی خلقی درت بش بیك کشیدن مرکب اولوب استانبولدن حرکت ایلدیکی
 کون سلطان سلیم حضرتلری کاغد خانه کوشکندن آلاینی تماشایور مشلر قصر هایون
 حذاسنه کلدیکنده مشار الیه زمین بوس تمنا اولدقن صکره عادت عصر اوزره کورک
 کیدیرلک ایچون درون قصره دعوت اولندقده ده بر خد متمز سبقت ایتدی انشالله

تعالی خدمت ایدر و نائل التفات اولورز دیه‌رک آتئی سوروب و در حال البسه رسمیه سنی سفری قیافته تحویل ایدوب عسکرینک ایچنه قارشمش و تکرار دعوته تشبث قلندی ایسه‌ده اولوقته قدر قارشوکی طاغده عسکرینک اوکنده کیتمکده ایدوکی مشاهده اولمشدر. روش حاله و بوروایتیه باقیلنجه انک حقنده دخی سؤ قصد ملحوظ اولدینی حالده کثرت خدم و حشمنی و قدم خدمت و حیثیتی بر درجه‌یه قدر اغماض عینی موجب اولمشدر.

صدر اعظم یوسف پاشا غایت غیور و مقدم و تهدیدینی ایقاعه قادر بر ذات اولوب حتی شدت شتا مناسبتیه اوزی قلعه‌سنه امداد و اعانه طریقلری مسدود اولدقده اوچ بیک نفر منتخب سواری‌یه قیشلق البسه یاپدیروب بالذات امداده کیتمک اوزره ایکن استیلا وقوعیه بالضروره تأخر ایتمشیدی. موسم بهارک حلولی جهتیه طرف طرف تجمع ایتمکده اولان عساکری یوقلمق ایچون کاه یرکوکی‌یه کچوب و کاه طونه ساحلرینی کشت و کذار ایدوب لوازم حربیه‌نک تنظیم و تدارکیلّه مشغول اولدینی حالده بیک ایکی یوز اوچ سنه‌سی رمضانده خدمت صدارت و سپهسالاری و دین سرعسکری کتخدا حسن پاشایه تفویض و ذکر اولنان سرعسکرلک دخی مشارالیه یوسف پاشایه احاله قلندی. چونکه قوجیلر کتخداسی اولان ولی شمس‌الدین بک عصر سابقده کوردیکی مؤاخذه‌لری یوسف پاشادن بیلوب غایت بغیض و بویله بروقت مضایقه‌ده تبدل صدارتدن طرف سلطنت سنییه عارض اوله‌حق مضراتی ادرا کدن عاجز اولغله مهر جدید سلطانی‌ی و ابقای صدارتی متضمن خط‌پادشاهی‌ی ایصاله مأموراً اردوی هایونه کلدکده یوسف پاشا هر نه قدر تطیب و تألیفه سعی ایتش ایسه‌ده اغراض ذاتیه‌نک تسکینه مقتدر اوله‌مدیغندن بعدالعوده پاشای مشار الیه سنه سابقده نمچه‌دن آلتان اسرا قیزلرندن متمتع اولمق کبی احوال ذاتیه‌نی و شونندن بونندن استماع ایلدیکي بعض قبايح واقعه و غیر واقعه‌نی اعظام و ذات شاهانه‌ی اغضاب ایدرک عزل و تبدیلی استحصا ایلدی. لکن چوق کچمکسزین سلطان سلیم حضرتلری میر مشارالیه امور مهمه‌ده استخدامه لیاقتی اولمديغنی تفتن ایتمکه نظر التفاتدن اسقاط بیوردیلر. واقعا یوسف پاشا سفرك مقتضی اولدینی مهمات و مشکلاتی لایقيله تدقیق و ارباب و قوفک سوزلرینه التفات ایتیه‌رک علی‌العجله اعلان حرب ایلسندن ناشی مخطی ایسه‌ده حد ذاتنده مقدم و غیر مفتور و تهدیدینی ایقاعه قادر اولدیغندن اصلح موجود و پروسیالیر ایلّه عقد اتفاق ایدرک سبب اولدینی حربک ضرر سزجه ختام پذیر اولمسی حقنده بذل جهود ایلکده ایدوکی مشهود ایدی. یرینه انتخاب اولنان آدمک

رجحانی ونه یابه بیله جکی موازنه اولنمق سرین شمس الدین بک کی بر بدلانک سوزیله مشار الیهک عزلی دولت علیه ایچون ضایعات عظیمه یی مؤدی اولدیغی وقوعات آتیه ایله معلوم اولور .

بوزه بوزغنی

صدر جدید سنه سابقه ده مهاده سر عسکری ایکن موفق اولمش ایسه ده سردار اکریم بولان یوسف پاشانک علی التوالی عسکر ومهمات یتشدیر می و مکرراً بالذات موکب سر عسکری یه کلوب تمشیت مهام ایلمی اعظم اسباب فتح وظفر اولمشیدی امر عظیم صدارت مشار الیه جنازه حسن پاشانک دوش بی اقتدارینه تحمیل اولندقدنه نه پیاچغنی شاشیروب ارکان دولتک اقوالنه معقول ومناسب دیمکدن غیری چاره سی قالمدی . سلطان سلیم خان حضر تری ایسه کنبج و غیور وقرناسنک لاف و کذافلرینی واصل واساسدن عاری تداییر بی معنالرینی صحیح ظنیله مغرور اولدیغندن اردوی هایونک افلاق طرفنه کچوب مسقو ونمچه لولری تدمیر وتحت محاصره ده بولان بندر و آق کرمان قلعه لرینی تخلیص ایلمی ضمننده سردار اکریمی تضییق ایلمکده ایدی . بناءً علیه ایکی یوز دوت سنه سی محرمی که ایام حریف ایدی . اردوی هایون ایله روسجقدن حرکت وماچین طرفلرندن طونه نهرینی قایقلا ایله مرور و بونده نهرندن دخی عبور اولنوب فوفشان جوارنده بر موقع اتخاذ اولندی ایسه ده ایلروده دهها مناسب بریر بولمق احتمالیله موکب هایونک کافه سواریمی کمانکش مصطفی پاشا رفاقتیله ایلرویه سوق قلمشیدی . موکب هایوندن تقریباً ایکی ساعتک ایلروده نمچه لونک برقوه مفروزه سنه تصادف اولنوب قاعده حریبه اوزرینه کرو چکلمک مقتضی ایکن حریبه مباشرت قلمسیله ویا لکز سوارینک طوپ وتفنک قارشوسنده پایدار اوله مامسی طبیعی اولمسيله یواش یواش کیرولیه رک موقع اردوی هایونه کلدیله و بو آره لق برروسیه فرقه سی دخی ظهور وهجوم ایلدیکه اشبوا یکی دشمن فرقه لرینک جمله سی او توز بیک قدر مکمل ومرتب عسکردن عبارت ایدوکی مرویدر بش یچق ساعت قدر محاربه اولنوب آنجق بروجه محرر سواریان اسلام درجنک اول زده لشمش اولدیغندن پیادکانک جناحینی محافظه یه قادر اوله ماملریله اردوی هایون گرفتار کسر وانهمزام اوله رق افتان وخیزان بوزه نهرندن عبور ایلمک صدندنه ایکن پک چوق انسان وحیوان ومهمات وحقی رئیس الکتاب خیری افندی دخی غرقاب عدم اولدیله . بوانهمزام سبیله تحت محاصره ده بولان بندر و آق کرمان قلعه لری مسقولو طرفندن وبلغراد حصن حصینی نمچه لو جانبدن گرفتار کمند استیلا

اولدی . مسقولولرك بيوك اردوسى اسماعيل اوزرينه هجوم ايدوب سرعسكر بولنان جزايرلى حسن پاشا اولاً خارجده مقابله بعدد وراى استحکامدن مدافعه ايدرك مسقولولر کليتلو تلفاته گرفتار ومنهزماً عازم سمت فرار اولدقلرى اخبار ساردهسى اردوى هايونك رجعتى اوانده وارد اولمغله نوعماً موجب تسليت اولدى . صدر اعظم جنازه حسن پاشا موکب هايونه مشتاً اتخاذا اولنان شمنى يه دخوانى متعاقب عزل وجزايرلى حسن پاشا مسند صدارته نصب اولنوب ابتدای صدارتنده مقدماً ويره ايله بندر آقكرمان وکيلي قلعه لرني تسليم ايدن طيفور پاشا واکثر امرايى قتل ايلد کدنصكره شمنى يه وصولنك اوچنجى كوني كتخدا سليمان رشيد افندى ايله مکتوبى امين افندى يى دخی بغته اعدام ايلدى . بو بابده روايات عديده يه تصادف اولنوب عقله قريبي صدر سابقك جرزه سزلکندن ناشى ايش بونلرك النده بولنديغندن هزيمت سابقه نك سببي کندولرينه عطف اولنه رق تأديبلرى طرف پادشاهيدن اراده بيورلمش اولسى و صدر جديدك دخی عداوت سابقه سى بولمى قضيه لريدر . صدر مشاراليه اول امرده استقلال تام و يرلمشيكن چوق كچمكسزين مباينت افكار ظهوريله اجرا آت و معروضاتى طرف هايوندن رد وابطال اولمغه باشلادى هر نه حال ايسه اول بهار ايچون تداركات حربيه ايله مشغول بولنديغى و سگسان ياشنى متجاوز اولديغى حالده صدارتنك دردنجى آيى اولان ايكيوزدورت رجبك اون دردنجى كوني حمای محرقه دن شمنیده وفات ايلدى . مهيب و خونريز بر وزير غازى ايدى . رحمة الله عليه سلا نيکده اولوقتلرى مدرک بر پيردن استماع اولمشدرکه اورنوس زاده لردن فاتحان ناظرى اولان احمد بك سفره مأمور اولمغله کندوسى و عسکرى حاضرلنوب سنجاقلر ديکلمش ووقت حرکت حلول ايلش اولديغى حالده ميرمشار اليه آياق سوريوب وقت کچورمکده اولمسنه کيمسه برمعنا ويره من ايکن ناکاه جزايرلى حسن پاشانك وفاتى شيوعبولدقده درحال حرکت واردوى هايون جانبنه سوق سمنند عزيمت ايتش اولمغله سبب تاتنى صدر مرحومك مهابتى خوفى اولديغى آکلاشلمشدر . اردوى هايون ارکانى دخی کمال دهشت ايچنده بولندقلرى حالده مرحوم مشاراليهک و فاتيله تحصيل حيات جديد ايلدکلرى منقولدر .

مقام صدارته بريسنگ انتخابى خصوصى اندرون رجالى وقائم مقام پاشا و شيخ الاسلام افندى بيننده بالدفعات مذاکره اولنوب لکن مطالعة انجام کار ايله هيچ بريسى بو امر عظيمه رأى ويره مدکلرندن نهايت قرعه شرعيه ايله انتخابنه قرار و يرلمسکه روس جقلى شريف حسن پاشانك صدارتى موافق قرعه تقدير دوشدى . مشاراليه سگسان ايکى

سفرنده روسجق اعیانلغندن رتبه و زارته نائل و ختام سفردن صکره اوتده بروده اقامته مأموریتله ثروت و سامانی زائل اولوب بوسفرده راخوه محافظه سنه مأمورایدلمشیدی. بناء علیه حیثیت ذاتیه و زمانیه دن عاری برذاتک صدارتی نه کندوسنک ونه ده هیسج کسه نك اصلا خاطرینه ظهور ایتمز ایکن سائق تقدیر بویله برصورت غیر ملحوظه تصویرایلدی.

وقوع نصرت در یرکوی

بکرشده بولنان نیمچه اردوسی قوماندانی قوبورغ قرق بیک قدر عسکرله یرکوی قلعه سنی محاصره ایدوب صدر مشارالیه دخی کمال غیرت و اقدام ایله اردوی هایوندن و روسجق حوالیلسندن پیدرپی عسکر و مهمات ارسالله تقویه بازوی مجاهدین ایلدیکندن بالاخره عساکر دشمن هزیمت فاحشهیه کرفتار واللی قدر طوپ و خمبره و کلیتو جبهه خانه و مهمات ترک ایدرک رهروسمت فرار اولملریله بومظفریت و متعاقباً نیمچه لو ایله عقد متارکویه موفقیت صدر مشارالیه باعث ممدوحیت اولمشیکن بروجه آتی ماورویانی بکی قتل ایلمسی مقدمه نکبتی اولدی چونکه میرمشارالیه مدت مدیده ترسانه ترجانلغنده بولمغله جزایرلی حسن پاشایه منتسب اولوب انک همیتله عصر عبدالحمید خانیده افلاق ویوده سی نصب اولنش ایدی حد ذاتنده جری وجسور و غیور برذات اولمغله سفر ظهورنده خزینه ثروتی آچوب معینه تعیین اولنان عساکر و کندوسنک جمع ایده بیلدیکی بهادرلره ایثار ایدرک شهرت و شانی اولحوالی بی طولدیرلمش و مهادیه محاربه سی هنگامده طرف طرف نیمچه مالکنه هجوم ایله کسب مظفریت و اردوی هایونه کلی خدمت ایتمشدی بوزه بوزغندن صکره افلاقده پایدار اوله میوب برقاج بیک آدمیله زشتوی طرفه مروره مجبور اولمشیدی یاننده کلیتو مجوهرات بولنق شایعه سنه مبنی صدراعظم آنلری غصب ایتمک طمعنه دوشوب ییچاره بی دماغنده خیانت اولمق و متهی فرار بولنق اوزره طرف پادشاهییه عرض و اعدامنه اراده استحصال ایلمکله اولحوالیده بولنان مأمورین ایله اطرافنی بالاحاطه قتل و اعدامنه ظفر بولدی شوقدروارکه میرمشارالیه مقدمات افندیسی اولان پتراکینک فاملیاسندن ضربخانه صرافی بولنان دیگر پتراکییه عداوت و غمز و سعایتله قتل ایتدیرمه درجه سنه قدر مجاسرت ایدوب حتی افلاق بکی اولدینی کون الای ایله باب هایوندن خروجنده صراف مرقومک سرمقطوعنی سیر ایلمش و کندوسی دخی بالاخره مثلله مجازات کورمشدر

استیلای اسماعیل

سکسان ایکی سفرنده اسماعیل موقعنک اهمیتی تحقق ایلدیکنه مبنی بعد المصالحه غایت

متین وجسیم برقلعه بنا و تجهیز و تسلیحیه اعتنا اولنوب اشبو سفرده عسا کر کلیه ایله
تحصین اولنمش و حدود اسلامییه نك اك مهم استنادكاهی بولنمشیدی . کچن سنه روسیه لیلرک
هجومنده اولوقت اسماعیل سرعسکری بولنان جزایرلی حسن پاشانک سیف سطوتیه
منهزماً ارجاع اولنمشلر ایکن بوسنه دهامکمل قوت و کمال شدتله محاصره ایلدیلر .
صدراعظم ایکی یوزدورت سنه سی ذی القعدة سنک دردنجی و تموزک التنجی کونی اردوی
هایونله شمنیدن حرکت و روسیه اوزرینه توجیه وجهه عزیمت ایتمشیکن نجه لیلرک
یرکویده مبتلا اولدقنری انهزام سبیلله انلرک اوزرینه صولت اولنق دهاسهولتلی کورندیکنه
مبنی تحویل نیت و روسجقدن یرکوی جانبه مروره مبادرت ایلدی . انجق متعاقباً
پروسیالیر حدود سابقه اساس اولق اوزره آوستریا دولتی مصالحهیه اجبار وارضا
وعقد متارکه سندلرینی امضا ایلدکلری خبری وارد اولغله یرکوی صحراسنده الی کون
قدر اصرار اولنان وقت اوان حربی اضاعه دن بشقه برشی مفید اولمدی . بعده اردوی
هایون روسجغه عودت و موسقولو اوزرینه عزیمت تجدید نیت اولنوب سلستریه قدر
کیدلش ایسهده موسم شتانک حلولی جهتیه موکب هایونک اکثر عسکری طاغلمش
اولدیغندن حصول مقصده امکان و اقتدار مفقود اولغله بالضروره شمنی مشتاسنه رجعت
اولنوب فقط صدراعظم کمال حیرت و دهشتدنناشی بر مقدار سواری استصحاب واسماعیل
امداد ایلك خلیاسیه دوبریجه طرفلرینه طوغری شتاب ایلدی . موسقولیر کیلی قلعه سنی
استیلا و طولجی و ایساجی قصبه لرینی احراق ایلدکدن صکره بش الی آیدنبرو تخت
محاصره ده بولنان اسماعیل قلعه سنی برأ و نهراً تضیق ایدوب صدر مشارالیه هر نه قدر
امداد و اعانهیه دامن درمیان اولدیهده بر وجهله مقتدر اوله مدیغنه و موسقولولر هر درلو
تلفاتی اختیار و کمال شدتله بالدفعات هجومه ابتدار ایلدکلرینه مبنی بالاخره ایکی یوز بش
سنه سی ربیع الآخرینک اون التنجی و کانون اولک اون برنجی کونی حرباً استیلا ایلملریله
طرفیندن یکر میشر بیک آمدن زیاده تلفات واقع اولوب حتی روسیه لونک معتبر برجنرالی
و محافظ قلعه آیدوسلی محمد پاشا دخی قنطره سیفدن مرور ایلدی . صدر اعظم بووقعه
اوزرینه کمال خوف و خشیتله صحرالرده طولاشمقده ایکن عزل و قتلنه اراده سنیه تعلق
ایلدیکندن ایکی یوز بش سنه سی جمادی الآخره سنک طقوزنجی و شمنی مشتاسنه دخولی
کونی قتل و اعدام اولنوب و دین سرعسکری بولنان صدر اسبق قوجه یوسف پاشا
ثانیاً متکا پیرای صدارت عظمی اولدی .

اسوچ اتفاقی

ابتدای سفرده دولت علیه ایله اسوچ دولتی بیننده صالح و حربیده برابر اولمق و جانب سلطنت سنیه دن یکر می بیک کیسه اعانه حربیه و یرمک اوزره عقد اتفاق اولمغله دولت مشارالیها دخی حربیه مباشرت ایتشیدی . واقع اولان محاربات بحریه ده اسوچلو مظهر غلبه اولمش ایسه ده محاربات بریده اکثریا مغلوب اوله کلدیکنه و دولت علیه اردولری دخی مبتلای انهم اولدیغنه نظراً اسوچ قرالی منوی ضمیری اولان استرداد ممالیکه قدرتیات اوله میه جغنی و روسیه لو افسادیه داخل ممالیکنده دخی بعض مخالف فرقه لر ظهور ایلدیکنی مشاهده ایسیله عهد نامه اتفاق مغایری اوله رق ایکی یوز بش سنه سنده روسیه لو ایله عقد مصالحه ایلدی . دولت علیه مبالغ موعوده محسوباً بر مقدار اچقه اعطا ایلمش اولمغله بوکا مقابل بحر بالطقده بولنان روسیه دونماسنک آق دکره کله مامسی منافعه دسترس اولدی .

پروسیا اتفاقی

سلطنت سنیه نك اعلان حرب ایلسنی متعاقب پروسیا و فرانسه واسپانیا دولتری عرض توسط ایدوب آنجق پروسیالورلر اشبو توسطی عقد اتفاق ایله تأیید و تشدید ایدرک پروسیا دولتی طونه نك بو طرفنده اولان ممالک دولت علیه یی ضامن اولمق و روسیه ونمچه دولتری نی بالته دید قبول صایحه اجبار و بصورت ممکن اوله من ایسه ایکسینه دخی اعلان حرب ایلمک و دولت علیه دخی پروسیالودن غیری بر دولت توسطیله عقد صلح ایتیه جکنی تعهد ایلمک شرائطیه تجاوزی و تحفظی اتفاق ایلمکی طلب ایدرلر و فرانسه لونک عرض ایتدیکی توسط مجرد رقیلری اولان انکلترو لوی روسیه ایمپراطور یچه سی قترینه نك نظرندن اسقاط ایلمک ایچون روسیه دولته خدمت ایلمک افکارینه مبیدر دیرلر ایدی . فرانسه لورلر ابراز خلوص و مودتله برابر یالکزر عرض توسط ایدوب پروسیالورلر ایچون آنلرک مرامی دولت علیه نك زمام اداره سنی ید اداره لرینه آلوب در دست تقسیم اولان لهستاندن حصه جسیمه اله کچیرمک و روسیه و آوستریا دولتری نی اخافه و تهدید و دولت علیه اتفاقی بهالوصافق ضمننده در دیوبسط و تمهید و اذهان ارکان دولتی تخدیش و تشویش ایلرایدی اسپانیالورلر بزم اصلا منفعت ذاتیه و پولتیقه جه استفاده من اولیوب مجرد انسانیتیه خدمت و بووسیله ایله تحصیل شان و شرف ایلمکدن بشقه مطالعه من یوقدر دیرلر ایدی .

تفصیلاتی جودت پاشا تاریخنده مسطور اولدینی اوزره بویابده بین الوکلا انواع مباحث و سفر ایل اوزون اوزون مجاوبات و مکاتبات جریان ایدوب توسط ایدمچک دولتک اولدجه تهدیدینی ایقاعه قادر اولسی لازمه دن واسپانیالو محارب اولان دولترلر دن اوزاق محله بولندیغندن انک توسطندن ثمره نافع مأمول اولماغله ذهنلر پروسیا و فرانسه لو اوزرنده قالب بالاخره پروسیا اتفاقی ترجیح و اجرای ایجابی تصحیح قلمقمده ایکن سلطان سلیم خان حضر تلیرنک جلوسلریله هواد کیشوب دشمنلرک دفع تغلب و تسلطریله قریمک استردادی خیلاری تجدیدایلدی و شهریار مشارالیه حضر تلی اخذ انتقام اولندجه صلحه راضی اولدقلرینی خطوط متعدده ایل اعلان بیوردیلر برقاچ ماه مرورنده بوزره بوزغنی وقوع بولغله نظام سز عسکر و فقدان مهمات سیروسفر ایل غلبه ممکن اوله میه جفی و کار ایدمچم دیر ایکن ضرره و غراندینی جهتله جزایرلی حسن پاشا صدارتنده پروسیا اتفاقی تمهید و سنداتی امضا و تعاطی اولندی. انک اوزرینه پروسیالولر نمچه حدودینه بر قوه جسیمه سوق ایدرک حدود قدیمه اساسیله عقد مصالحیه اجبار ایللریله متارکه اولنوب فقط نمچه لولر من جهة روسیه لویه معاوتی الدن بر اقدقلرندن مصالحه مذاکراتی طقوز آی قدر سور و کلیوب دولت علیه نك اوستریا حدودلرنده بولن ان عسکرینی روسیه اوزرینه سوق ایتمکه میدان ویرمدیلر.

محاربة ماچین

اول بهار حلولنده روسیه لولر دوبریجهیه کچوب ایصال خساره مباشرت و عسا کر مجتمع اولمق سزین اولحوالیده بولن ان جنود موحدینه ایقاع پریشانی و دهشت ایلدکلرندن صدر اعظم ایکی یوز بش سنه سی شوال شریفنک سکزنجی کونی اردوی هایونی شنیدن قالدیروب دوبریجهیه طوغری عطف زمام و روم ایلی والیسی مصطفی پاشایی سر عسکر نصب ایدرک معینه عسا کر کلیه ترفیقیه ماچینه اعزام ایلدی. سر عسکر مشار الیه دشمن طونه طرفندن ظهور ایدر ظنیه طویلری اوجهته تعبیه ایتدیرمش اولدینی حالده مسقولولر اولطر فدن بر مقدار عسکر ابراز و قوه موجوده لرله ارقه طرفندن یوریش ایتدیلر. کوردعلو و تپه دنلی علی پاشا و جبار زاده سلیمان بک و قره عثمان اوغلی محمد اغا کندولرینه منسوب سواری ایل برقاچ دفعه دشمن آلایرینه هجوم و ابراز شجاعت و جلادت ایتدیلر ایسه ده سواری ایل پیاده پی مدافعه قابل اوله مدیغندن بش التی ساعت قدر محاربه دن صکره عسا کر اسلامیه بر ساعت قدر برویه چکیلوب بوهنکامده موکب

صدر اعظمی دخی تقرب ایلشیدی . محاربه نك غالیت و مغلوبیتی لایقيله تعین ایده میوب روسیه لولر دخی کلیتلو تلفات ویردکلرندن انلر دخی پایدار اوله میهرق طونه دن قارشویه کچدیلر . صدر اعظم حرسویه عودت ویکیدن استکمال اسباب مقاتله یه مباشرت ایدوب چندکون صکره تتمیم مهمات ایله تکرار ماچین صحراسنه نصب سرادقات اسلام ایلدی .

محاربه بخریه

محاربه نك ایکنجی و اوچنجی سنه لری قپودان دریا کریدلی حسین پاشا دونمای هایونی بالاستصحاب قره دکره چیقوب اوچ درت دفعه مسقو دونماسیله محاربه ایلش و طرفیندن اوچر بشرکمی تلف اولمشسده غلبه مطلقه هرایکی جانبده نصیب اولدیغندن ختام سفره قدر قره دکره تحت امنیته الهامشدر .

استیلای آناپه

مقدما چیچن قبیله سندن شیخ منصور نامنده برذات ظهور وباشنه طوپلادیغنی قبائل خلقيله اولحوالیده بولنان روسیه فرقه لری اوزرینه هجوم ایدوب نائل فوز وظفر اولغله ولوله شهرتی عالمگیر اولمشدی سفر وقوعنده اقوام چراکسه دن استمداد نامه لر وارد اولسیله جانیکیلی حاجی علی پاشانك اوغلی بطل حسین پاشا آناپه سرعسکری نصب اولنهرق عساکرو فیره ایله اعزام قلندی چراکسه خلقی خفیف سواری دیمك اولدیغندن اچیقندن عساکر منتظمه دشمنه مقابل اوله میه جقلری مطالعه سنه واردوی سرعسکری بی نعله کافی عرب و حیوان تدارکی مشکل ایدوکنه مبنی بطل پاشا آناپه ده اقامت و اطرافه فرقه لر سوقيله تعجیز دشمنه مباشرت ایتکی تصویب ایلش و روسیه لولرک برنجی هجوملرینی دفع ایتش اولدیغنی حالده طرف پادشاهیدن بهمه حال عساکر اسلامیه بی قبارطای ایچنه صوقسی امر و تأکید و خاصکیانندن جلاد محمود دخی مباشر تعین وارسال اولنغله بطل پاشا خوف و دهشته دوشه رک چارناچار ایکی یوزدرت سنه سی ذی الحجه سنده آناپه دن حرکت ویش سنه سی صفرنده نهرقوبانی مرورایله قبارطایه موصلت ایلدی اردوده قرق قدر طوپ ایله یکیکچری وکوکالو و قپو خلقی اوله رق اوتوزیکه قریب عساکر موجود اولدقدن بشقه برطرفدن قبائل دلاورلری دخی تجمع ایتکله اولدجه برقوت حاصل اولدیغندن رؤسای چراکسه سرعسکری پاشاینها ایلرویه طوغری تشویق ایتکده اولدقلری حالده مشارایله اول امرده جوارده بولنان برروسیه فرقه سنی ازاله لازمدر دیره رک دلی باشیسی ایله برمقدار

عسکرافراز وارسال و امرای چرا کسه باری هیئت مجتمعه مزله کیده لم دیدکجه تغند و تجبر اظهار ایلدی لدی التقابل دلی باشی منهزماً عودت و دشمن دخی تعقیبه مسارعت ایدرک بونلرک تقریبی اردوده قارغشهلوق و قوعنی مستلزم اولدینی هنگامده سرعسکر بطلال پاشا اوچ باش آدمی ایلله روسیه عسکری طرفه فرار و دخالت ایلدی بناء علیه عسا کر اسلامیه فوج فوج رجعتیه آغاز و قبائل خلقی دخی بونلری تعقیب دشمندن محافظه ایدرک قوبان نهرینی کچوب افغان و خیزان آناپهیه واصل اولدیلر بطلال پاشا کندو عهده سنده بولنان طربزون منصبک پدری کتخدا لغندن نشأت ایدن ارضروم و الیسی صاری عبدالله پاشایه توجیه اولنمسندن و تبدیل خاصکیسی جلاد محمورک تعجیل قیام و حرکت ایچون مباشر تعیین قلمنمسندن خوف و دهشته مستغرق اولوب خصوصیه بعض روایتیه کوره جلاد محمودده بطلال پاشانک قتلنی متضمن خط هایون اولدینی دخی جمله تحقیقاتدن ایدی انسانک خوف جان ایلله هر فنانخی اختیار ایلسی طبیعی اولمسنه نظراً بطلال پاشا بر درجهیه قدر معذور اوله بیلور سده معیتده مجتمع اولان قوه موجوده بی مقدمانه و غیورانه استعمال ایدرک دشمن ایلله لایقیه چارپیشمش اولسه یا غالب و یا خود مغلوب اولمقدن بشقه احتمال اولیوب غالب کلور ایسه حقنده اولان سوء تصمیم مبدل الطاف و اعتبار اولور و مغلوب اولور ایسه اولوقت نفسنی موسقولولره تسلیم ایدرک مجبوراً اسیر اولمش رنکنه قویه بیلور ایکن صرف وسع و مقدرت ایتکسزین دشمنه دخالت ایلسی کندوسنک مقدوحیتنی و اولاد و منسوبینک مقتول و محزون اولسنی مستلزم اولمشدر. بو خبر موخشی در دولته واصل اولدقده سالف الذکر صاری عبدالله پاشا آناپه سرعسکری نصب اولنوب سیر سریع ایلله یتشمسی تأکید و توصیه اولندینی حالده مشارالیه طربزون طرفلرنده بولنان بعض خصماسیله اوغراشمغه ابتدار و مأموریت مهمه سنی عقدۀ تأخره دوچار ایتکله مسقولولر ایکنجی دفعه آناپهیه هجوم ایدوب حرباً استیلا ایلدیلر و مؤخرأ بو تهمت ایلله عبدالله پاشا دخی قتل اولندی.

مبارکه روسیه

دولت علیه قریمک استردادی خلیاسیله اعلان حرب ایلش اولدینی حالده بو قدر قلاع و ممالک ید دشمنه کچدیکندن امکانشزانی میدانیه چیقدیغنه مبنی ضرر سزجه عقد مصالحه اوانه بیلور ایسه موفقیتدن معدود اوله جنی تسلیم کرده انام اولوب فقط سلیم خان ثالث حضرتلری هیچ اولمز ایسه بر محاربه قزانیه رق اولدقجه اکمال ناموس ایلله صالح

اولنسی ارزوسنده بولنغله بوبابده سردارا کر مه تا کیدات وتویخت اجرا ایتمکده ایدی. اردوی
 هایون ارکانی ایسه عسکرک انتظام وانضباط سزلغنی مشاهده وپروسیا دولتی فرانسه اختلالنک
 کسب اهمیت وجسامت ایتمکده اولدیغندن نه نتیجه حاصل ایده جگنی درپیش نظر ایدرک
 روسیه اوزرینه اعلان حرب ایتیموب یالکیز تهدیدات ایله امر صلیحی متعی بولندیغنی
 مطالعه ایله غلبه دن بالکلیه مایوس ایدیلر بناء علیه طرف صدراعظمیدن قلاصده بولنان روسیه
 قوماندانی جنرال مکتوب تحریر واردوی هایونک عسا کر کلیه ایله ماچینه کلدیکندن
 وبوکره وقوع بوله حق محاربه ده غالبیت نه جانبه عائد اوله جغنی مجهول بولندیغندن بحثله
 دولت علیه جنکه حاضر اولدیغنی مثللو صلحه دخی مهیا ایدوکی تزییر اولندی کلان جوابده
 طورله نهرندن حدود قطع اولنق وقینارجه معاهده سیله انک متفرعاتندن اولان مقاولات
 کماکان مرعی اولق و مملکتینه دائر بولنان معاهدات ومساعدات ابقا قلنق اساسلریله
 عقد متارکیه راضی اولدقلری اشعار قلنغله کیفیت اردوی هایون ارکانی بیننده لدی التذکر
 احوال حربیه وعسکریه یه نظراً بوصورتک قبولنده مجبوریت درکار اولوب محاربه یه دوام
 اولندیغنی تقدیرجه دها بیوک فناقلر ظهوری آشکار اولدیغندن هر حالده عقد مصالحه دولت وملت
 ایچون خیرلواوله جغنه اتفاق آرا ایله قرار ویرلمکله وبواوانده مذاکرات صلحیه یه مباشرت
 قلنمسی ایچون طرف پادشاهیدن مأذونیت دخی وارد اولغله مورخ مشهور واصف افندی
 ارسال اولنهرق چرکستان و آناطولی حدودلری قبل السفر بولندیغنی منوال اوزره قالمق
 وید دشمنده بولنان قلاع وبقاعک طرف دولت علیه یه تسلیمی اساس اولق اوزره ایکی
 ماده دخی علاوه سیله ایکی یوز بش سنه سی ذی الحجه سنک اوننجی وتموزک اوتوز برنجی
 کونی سکرز آی مدته قلاصده عقد متارکه اولندی .

مصالحه نمچه

پروسیا وانکلتره وفلمنک دولتلری توسطلری ایله زشتوی قصبه سنده عقد اولنان
 مجلس مکالمه یه دولت علیه طرفندن رئیس الکتاب عبدالله بری افندی واستانبول
 پایه لولرندن عصمت بک ومکتوبی دری افندی مرخص اول وثانی وثالث تعیین قلنمش
 اولدیغندن نمچه دولتلری مرخصلری و دول متوسطه مأمورلریله لدی الاجتماع مباحثات
 کثیره وبالذفات بسط بساط مکالمه دن صکره ایکی یوز بش سنه سی ذی الحجه سنک اون بری
 تاریخیه مورخ اولان مصالحه نامه یی تنظیم وتعاطی ایلدیلر قلاصده مقیم ویا برکاب سوی
 جحیم اولان روسیه فلد مارشالی پوتمکین ایله بالخا بره یاش قصبه سی موقع مذاکره تعیین اولنغله
 مشارالیه مرخصلرک اردوی هایونه کلرینی متعاقب مرخصیتلری تجدید ایله قصبه مذکوره
 جانبنه بعث وتسییر اولدیلر .

مصالحه روسیه

طور له دن حدود قطعی اوزی ایالتی و اوزی قری دینیلان اراضی جسمیه بی مسقوولره ترك و تسلیمی متضمن اولدیغندن سلطان سلیم خان حضرتلری بغایت منفعل اولغله و هر تقدیر اساس سندنده مندرج ایسه ده بونک رفع و ازاله سی مطلوب و ملتزمی بولمغله بوبابده اقدام و اصرار اولمسی و ممکن اوله مدینی تقدیرده مدت متارکة نك ختامنده ینه حربیه دوام اولمق اوزره شمیدین تدارکات مقتضیه به مباشرت قلمسنی صدر اعظمه امر و اراده بیور مقده اولملریله موکب هایونده بولسان وزرا و رجال دولت و اوجاق اغاری دینیلان ضابطان عسکری اوطاغ سردار اکرمی به دعوت و افاده کیفیت اولندقدده مطالعات سابقه لرینی تکرار و عسکره نظام ویرلدجکه و مهمات سفریه استحضار و استکمال اولندجقه مسقوولره مقابله ناقابل و حربیه دوام اولندجقه ضایعات ملکیه و اتلاف نفوسدن غیر برشی حاصل اولمیه جنی ظاهر اولدیغنه مبنی طرف پادشاهیدن وقوعی ملحوظ اولان مؤاخذه به راضی اولور و دولت و ملت خیرلو اولان صورتی بیاندن اجتناب ایلین دیه رک فدا کارلق اظهار ایلدیلر و تفصیلات لازمه درجیله ترقیم اولنان عرض محضری بالاتفاق تمهیر و تقدیم ایتدیلر .

بونک اوزرینه استانبولده عقد اولنان مجالس متعدده آن بآن توسع ایتمکده اولان فرانسه سیل اختلالنک اوکنه سد حکمک قصدیله آوروپاده براتفاق دولی آرزوسی مشدد اولدیغنه بناءً پروسیالولر روسیه اوزرینه اعلان حرب ایتدکلرندن ماعدا مقدما کندولرینه حصر ایتدیردکلری توسطدن فراغت صددنده بولندقلرندن واردوی هایونک حالی دخی سالف الذکر عرض محضردن مستبان اولدیغندن چارناچار عقد مصالحه به قرار ویریلوب طرف پادشاهیدن دخی قرین قبول اولغله موکب هایون شمنی مشتاسنه عودت و یاش قصبه سنده بولنان مرخصلر مذاکراته مداومت ایدرک ایکی یوز آلتی سنه سی حمادی الاولیسنک اون بشی تاریخیه مورخ و اون اوچ ماده بی حاوی اولان و یاش عهدنامه سی نامیه معروف بولنان صلحنامه تنظیم و تعاطی اولندی . غرائبندرکه قینارجه مصالحه سنده سلطنت سنیه بالضروره تاتارک سربستلکنی تصدیقه مجبور اولغله بوکا مقابل مقدما وعد اولنان تضمین سفری به محل قالماشیکن رئیس الکتاب و مرخص ثانی بولنان ابراهیم افندینک بوش بوغازلنی دولت علیه بی تضمین نقدی بلاسنه مبتلا ایتمشیدی . بوکره آنک خلافت اوله رق استانبولده ارکان دولت تضمین سفری اعطاسنه رضا داده اولدینی و مرخصلره مأذونیت ویرلدیکی حالد روسیه مرخصی شرائط صلاحیه بی قبول و طلب تضمیندن عدول ایتشدر . سکسان ایکی سفرنده اولان پریشانغنه نسبتله بو محاربه نك وقوعات اهو نجه در . زیرا

سفر مزبورده دولت علیه‌نک امرا و عسکری متروکیت حائده بولنوب بودفعه ایسه سفر سابق سببیه اولدقجه تجدید ممارسه ایلمشیر ایدی . اکر نمجه لو اعلان حرب ایلامش و بوجهتله سلطنت سنیه‌نک قوتی ایکی یه منقسم اولامش اولسه بلکه بعض مرتبه موفقیت امید اولنور ایدی . نه چاره که شیوه قضا حکمنی اجرا ایدوب قریمی تخلیص ایده لم دیر ایکن اوزی ایالتی الدن چیقدی .

بعد المصالحه صدر اعظم یوسف پاشا ردوی هایون ایله شمنیدن حرکت و ایکی یوزالتی سنه سی شعباننده در سعادتیه مواصلت ایدوب رمضانک اون ایکنجی کونی طربزون و الیلکی و آنایه سر عسکر لکیله مسند صدارتدن منفصل و عصر محمودخان اولده نائل وزارت اولوب سکسان ایکی سفرنده علی التوالی بش التی سنه قائم مقاملقد بولنش و متنفذان عصرک تحصیل رضالینه موفق اولمش اولان ملک محمد پاشا مقام صدارته نائل اولدی .

بو اوانده ایسه قوه بریه و بحریه‌نک تنظیمی ایچون باراده سنیه ارکان دولت لایحه لر تقدیم ایتمکده و امور مختلفه دولتک یولنه قونلسی خصوصنه جالیشمقدده اولدینجی حالدده صدر مشارالیه پرکار اداره بی متنفذان عصره تسلیم ایلدیکندن بین الطرفا بال بیجاغی نامیه مشهر اولمشدر بعض محرملری رخاوت اداره سندن بحث ایلدکده (بن نائل صدارت اولدقدن بش اون کون صکره سلطان سلیم خان حضر تریله ایلک ملاقاتده یوقلمه نیتهله طوغریسی رجال دولتکیزی پک غیور و صادق ذاتلر بولدم دیدم ایرتسی کونی متنفذان عصر طرفندن عظیم تشکر و هدیه لر تقدیم اولندی اکلادمکه هر نه سویلر ایا سیم در حال آنلره واصل اوله جق وانلره استشاره بیوریله جق بناء علیه او یوشمق یولنی طو تدم و صفای خاطرله امرار اوقات ایلدم) دیو جواب و یردیکی مرویدر لکن بو بر عذر واهی ظن اولنور زیرا ابتدای نشأتندن بروحالی بومرکزده در اسایش نفسنی هر شیئه ترجیح ایدن ذوات بویله اعذار متوهمه تصنیع ایدرلر .

فتح و هرات

فی الاصل جزایر ملحقاتندن اولدینجی حالدده عصر محمودخان اولده اسپانیه اله کچن و هرات قلعه سی مؤخرآ جزایر لو ایلله اسپانیه بیننده عقد اولنان مصالحه ده خارج ازمکالمه طو تلمش اولمسنه مبنی بو اوانده جزایر غزاتی برآ و بحرآ هجوم ایلله ضبط و تسخیر ایلمش اولدقلری خبر مسرت اثری در دولته واصل اولدی .

کوچک حسین پاشانک قیودانلنی

سلطان سلیم خان حضر تریلرینک اوان صباوتندنبرو بنده خاص الخاصلری اولان

کوچک حسین اغا جلوس هایونده باش چوقدار نصب اولمش و بعد المصالحه بارتبه وزارت قیودالمق و اسم سلطان شوهر اکیله قدری دوبالاقلمشیدی سفر هنگامده روسیه لو طرفندن کوندریلان مأمورلرک تشویق و اقداریله موره جزیره سنده واقع صولوجه و مانیه اشقیاسی علم افزا شقاوت اولوب تدارک ایلدکلری اون بش بکرمی قدر سفینه نك قوماندسنی قره قچاق و لامبو نامنده ایکی شقیه تسلیم ایدرک سواحل و تجارت کیلرینه خسارت ایده کلدکلری حالدده مصالحه و قوعیله قیودان جدید بونلرک ازاله و استیصالرینه مأمور بیورلدیغندن دونمای هایون ایله شراعکشای عزیمت و چاملیچه اوکلرنده ملاقات ایدوب بالحاربه کیلرینک کیمنی ضبط و کیمنی احراق و قره یه دو کیلان اشقیایی قتل و تدمیر ایلدکن صکره مرکز اتخاذ ایلدکلری موقعلرده اولان استحکاملرینی دخی تخریب ایلدی بو خبر اشبو ایکی یوزالتی سنه سی ذی القعدة سنده واصل اولوب سلطان سلیم خان حضرتلری تربیت کرده سی اولان قیودان مشارالیهک بو وجهله موفقیتندن فوق العاده مسرور اولدی صدراعظم ملک محمد پاشا ایکی بحق سنه قدر مسند آرای وکالت اولوب رضای هایونه توفیق حرکت و متفندان عصرک مزاجنه کوره حکومت ایتیش ایهده بواوانده شهریار انام حضرتلری نظام جدید عسکرینک تنظیمنه و ترسانه نك اصلاح احوالنه و ایراد جدید تدارکنه همت و اقدام ایتمکده اولمسیله و مقدم و مقتدر بر ذاتک مقام صدارتده بولنسی لزومی متین اولمغله ایکی یوز طقوز سنه سی ربیع الاولنک یکریمی التنجی کونی مشارالیه معزول و ایکی سنه دنبرو مصر والیلکنده حسن سلوکی مشهود اولان عزت محمد پاشا مقام صدارته موصول اولدی .

پاسبان اوغلی وقعه سی

ان شاه تعالی بوبابک تکمله سنده ایراد اولنه جنی وجهله اناطولی و باخصوص روم ایلی ممالکی اعیان و دره بکی و طاغلی اشقیاسی کبی متغلبه اللرنده اولوب بونلردن و دین محصلی اولان پاسبان اوغلی عثمان اغا که فی الاصل و دین یمقلرندن یعنی مستحفظ یکچریلرندن ایکن کسب قدرت و تمیز ایدرک محصلغی در دست ایتیش و مؤخرآ و دین والیلکنه دخی ظفریاب اولوب کوندن کونه دائره حکومتی توسیع و طرنوی و زوسجق طرفلرینه قدرپای اندازلقلری اولمشیدی .

روم ایلیده بولنان و لاه متغلبه مرقومه نك تأدیب و تنکیلرینه چالشمقده ایهلرده پاسبان اوغلی طاغلی جسامت و اهمیت حاصل ایلش و رفع و ازاله سی ولاتک حوصله اقتدارندن خروج ایتیش اولدیغنه مبنی بیک ایکی یوز اون ایکی سنه سی قیودان دریا کوچک حسین پاشا

بالاستقلال و دین سرعسگری نصب و معیتنه عسا کر وافیہ و طوب و مهمات تعیین و ترتیب اولنہ رق ارسال قلندی پاسبان اوغلنک روسجق و بلغراد جانبلرینہ سوق ایلدیکی ایکی فرقه اشقیا و الیلرک مدافعه سیلہ منہزم اولہ رق اردوی سرعسکرینک تقریبی جہتیلہ زیر حکمنده بولنان قلاع و بلدان دخی تخلیص اولمغله و دین قلعه سی تحت محاصره یہ الندی برقاچ آی مقاتلات ایلہ کرکی کبی تصدیق اولنمشکین فرانسزلرک مصری استیلاسی خبری وارد اولمغله و پاسبان اوغلی دخی فیما بعد رضای دولتدن خارج حرکتده بولنماق شرطیلہ استیمان ایتمکله حسب الوقت قرین عفو پادشاهی اولوب رتبہ وزارتله و دین والیسی نصب اولندی .

فرانسزلرک مصره استیلاسی

فرانسه حکومتک جمهوریتہ تحوّلدن صکره در سعادته بولنان مصلحتکنذارک طلب و تشویقیلہ ایکی یوز طقوز سنہ سی جانب دولت علیہ دن جمهوریت مذکورہ تصدیق اولمغله ورتبناق نام ذات ایلچیلرکله در سعادته واصل اولمش واول اوانده جانب سلطنت سنہ دن آوروپا دولترینہ اقامت ایلچیلری نصب و ارسال قلمقده ایدوکنندن دفتردار کیسه داری علی افندی دخی پارسه سفیر تعیین اولنہ رق اعزام ایدلمشدی . مومی ایلہ ورتبناق دولت علیہ ایلہ فرانسه حکومتی بیننده تحفظی و تجاوزی عقد اتفاق استدعاسنه اغاز ایدوب بونک طرفینہ فوائدی حقنده لسان دیپلوماسی اوزره انواع دلائل ایراد و قریمک استدرا دینہ قدر توسیع منافعی مستلزم اوله جغنی یاد ایدرک سلطان سلیم خان حضر تلرینک میل و خواهشی استحصاله موفق اولمغله الحاله هذہ آوروپاده جاری اولان محارباتک ختامندن اعتباراً آوروپا قطعہ سنده وقوع عبوله جق محاربه لرده دولت علیہ و فرانسه حکومتی مشترک اولمق ویا لکنز فرانسه نک انکلتره ایلہ محاربه سی حالنده سلطنت سنہ بیطرف قالمق شرائطیلہ اون بش ماده یی متضمن بر اتفاقنامه لایحه سی تنظیم و خواص وکلا بیننده مطالعه قلندی فرانسه پولتیقه سنک تغیرات متوالیه سنہ و بو اتفاقدن اغبرار ایلہ روسیه و نمچه دولترینک مخصوصه یه قیام ایلاری وارد خاطر اولمسنه نظراً بعض ارکان دولت بونک شمیدیلک تأخیری رأینده بولنمشلر ایسه ده بوبابده طرف پادشاهیدن اقدام اولنمقده ایدوکنندن شیخ الاسلام افندی ایلہ صدور وسائر لازم کلنلرک جامیلہ بالا طرف تدقیق و مطالعه کیفیت اولمغه تعلیق اولنہ رق حضور هایونه عرض اولنمقده بوایش صدورک بیلہ جکی شی اولمیوب بغایت مکتوم طوئسی دخی الزم اولدیغندن همان امضا و تعاطی اولنمسی باخط هایون تأکید بیورلمغله ایکی یوز اون سنہ سی ذی القعدہ سنک اون یدنجی کونی تمهیر و مبادله اولندی .

آراسی چوق کچمکسزین فرانسه‌لو ایله نمچه‌لو بیتنده و ندیک اراضیسی تقسیم اولنوب جزایر سبعة ایله قارشوسنده واقع پروزه ساحلاری فرانسزلرک حصه‌سنه اصابت ایلش و بو جهتله روم ایلی قطعه‌سی روسیه و آوستریا دولتلیله همحدود ایکن برده فرانسه ظهور ایتمش اولدیغندن سلطنت سینه‌نک اندیشه‌سی متزاید اولدینی هنکامده فرانسه ترسانه‌سی اولان طولونده عظیم دونما و قره‌عسکری حاضر لقمده اولدینی و بوتدازک مصرک تسخیری مقصدینه مبتنی ایدوکی حوادثلری شیوعبولغله دولت علیه مصر قلعه‌سنده استحکامات انشاسی و لوازم مدافعه استحضاری خصوصلرینه تشبث ایلش ایسه‌ده اورالره وقت قالمدی . شویله‌که بو اوانده ایسه فرانسزلرک ازغونلغی مرتبه کالده اولدیغندن ایتالیا محاربه‌لرنده تحصیل صیت و شهرت ایتمش اولان جنرال بوناپارت تزیدد وقع و حیثیت ایچون بو امر عظیم وخیم نتیجه‌یه مباشرت و حکومت جمهوریه‌دن استحصال رخصت ایتمکله حاضر لدینی آلتمش بیک قدر عسکری یکر می بش قطعه سفن حربیه ایله اوچیوزدن متجاوز مراکب نقلیه‌یه تحمیل و طولون ترسانه‌سندن خروج ایتدی . اولا مالطه جزیره‌سنه اوغرایوب جزوی محاصره ایله تسخیر و ردوسک فتح‌دنبری مالطه‌یه منتقل و اوچیوز سنه‌یه قریب حکومت ایدن شوالیه‌لر اداره‌سنی الغا ایدوب بعده بیک ایکیوز اون اوچ سنه‌سی محرمی اواسطنده اسکندریه‌یه مواصلت و قره‌یه عسکر اخراجنه مسارعت ایلدی . اسکندریه‌یی حرباً ضبط ایتدکدنصکره مصر اوزرینه توجه ایدوب والی ولایت بکر پاشا و رئیس امرا ابراهیم بک و مراد بک اوتوز بیک قدر عسکر جمع ایله مدافعه‌یه مبادرت ایتشلر و کوله‌من سوارسی دینانک برنجی اتلوسی ایدوکنی فرانسزلره تسلیم ایتدیرمشلر ایسه‌ده طوب و تفنک ایله پر آتش اولان عساکر منتظمه دشمنه تاب آور مقاومت اوله‌مدقلرندن هربری برطرفه پریشان اولملریله فرانسزلر مصری تسخیر ایلدیلر . انکلتره دونماسی فرانسز کیلیرنی تحریده اولدقلری حالده برطاقم وقوعات جسیمه‌نک ظهوری و یک چوق قانلر دوکلسی مقرر اولدیغندن اسکندریه‌یه عسکر اخراج ایتمکسزین راست کتوره‌میوب اون کون صکره انجور پیشکاهنده بولدیلر و درحال ایقاء نأثره جنک ایله برمقدارینی حرق و غرق و ماعداسنی کند تسخیره ربط ایلدیلر بونک اوزرینه فرانسه اردوسنک پارس ایله مخابراتی منقطع و امداد و استمداد قیوسی منسد اولغله فرانسزلر مصرده محصور حکمنده قالدیلر جنرال بوناپارت افکار اسلامیه‌یی جلب ایلک قصدیه مصره ورودی انکلتره لونک هند معاملاتنی قطع ایتک و کوله‌من بکلرینی تأدیب ایلک ایچون مساعدۀ دوات علیه‌یه مستند ایدوکنی اعلان و شعائر اسلامیه‌نک کافی السابق اجراسی

و ملکتک اعمار و احیاسی خصوصاً رینه نصب نفس اہتمام ایدہ جکنی در میان ایتمکدہ اولوب بوبادہ عکا و الیسی جزار پاشای دخی اغفالہ چالیشمش و مخصوص ایاجی اعزامیلہ عقد اتفاقیہ دعوت ایتش ایسہدہ جزار پاشا جانب دولت علیہدن مصرک استخلاصنہ مأمور اولمغلہ کلان ایلچی بی حضورینہ بیلہ قبول ایتہرک اعادہ ولوازم حربیہ نک اکالانہ مسارعت ایلدیکندن بوناپارت مصردن حرکت و جزار پاشا اوزرینہ عزیمت ایلدی حیفا قلعه سنی و یرہ ایلہ ویافہ قلعه سنی حرباً استیلا و ترک سلاح ایدن بشیک قدر ارتودو عربان عسکرینی قورشونہ دیزمک کی غدارانی اجرا ایدرک عکایہ واصل اولوب الی کوندن متجاوز کمال شدتہ تضیق و بالآخرہ صید علی بورجی ہدم ایلہ یوریش ایلدی جزار پاشا دخی مقدماتی حضرلمش اولدینی ایکی عدد لغمہ آتش و یرمکلہ خلیجہ فرانسز برہوا اولوب قلعه یہ داخل اولنلر دخی طرف طرف تدمیر و یوزاللی قدری اسیر اولندی حتی جزار پاشا کندی سراینک نردبانندہ بالذات ایکی فرانسز قتل ایلدیکی مرویدر .

بوناپارت بونک اوزرینہ بردها هجوم ایتش ایسہدہ ینہ شیعیانہ و فداکارانہ مدافعہ اولندیغندن مایوساً عودتہ قرار و یروب بیوک طوپلری اوتیہ برویہ کومہرک و کندی اغورندہ مجروح اولان خستہ لرینی آفیون روحی ایلہ تسمیم ایدرک مصرہ عودت ایلدی فرانسه ژورنال لرندہ محرر اولدینی اوزرہ مصرہ کلان فرانسه عسکری آلتش بیکہ قریب ایکن بووقعہدن صکرہ اوتوز بیکہ تنزل ایدوب مصر محاربہ لرندہ تلف و خستہ لقدن فوت اولان فرانسزلر اشبو عکا جنسکنہ نسبتلہ جزوی اولسنہ نظراً بو محاربہدہ بوناپارت اون بش بیک عسکردن متجاوز تلفات و یردیکی و عکا اوزرینہ هجوم ایتماش اولسہ فرانسزلرک مصردہ دہا زیادہ اقامتہ مقتدر اولہ جقلری استدلال اولنور . بوناپارت کی ہر طوطدیغنی قویاران برجہانکیرک عکادن منہزماً فراری جزار پاشایہ بیوک بر سرمایۂ افتخار اولسہ سزادر .

مصرک فتح و استرداد

فرانسزلرک مصرہ استیلا سی خبری استانبولہ واصل اولدقدہ صدر اعظم بولتان عزت محمد پاشا معزول وارضروم و الیسی یوسف ضیا پاشا صدر صدارتہ موصول اولمغلہ ایکی یوز اون اوچ سنہ سی جمادی الاولندہ درسعادتہ کلش و فرانسه علیہندہ انکلترہ و روسیہ دولت لریلہ عقد اتفاق قلمش اولدیغندن ایکی یوز اون درت سنہ سی اوائلندہ اون درت قطعہدن عبارت روسیہ دونماسی خلیج درسعادتہ وارد اولمغلہ قیودانہ ہایون

اولان شرمتم قبولدان رفاقتنه بر فیلسفن حربیه ویریلهرک مسقو دونماسیله معاً فرانسه‌لو
النده بولنان جزایر سبعة نك تسخیرینه اعزام اولندی .

قورقه وچوقه اطهری حرباً وجزایر ملحقه استیماً تسخیر وایکی بیک قدر فرانسز
اسیر ایدلیکی مثللو ساحلده بولنان پروزه وپارغه و دیگر ایکی قطعه قلعه نك دخی فتحنه
مأمور تپه دئلی علی پاشا دلوینه قربنده فرانسزلی مبتلای انهمزام و پریشانی و قلاع
مذکورده بی علاوه قلمرو عثمانی ایلدی . جزائر سبعة نامیله مذکور اشبو اطهرده
بر جمهوریت تشکیل و دو بره وندیک جمهوری کبی اوچ سنهده بر کره یتیش بیک غروش
ویرمک اوزره تابعیت سلطنت سنییه ربط اولتوب ساحلده بولنان قلاع اربعه طوغریدن
طوغری یه حکومت دولت عاییه الحاق و بویابده سلطنت سنییه ایله روسیه دولتی بیننده
عقد مقاوله اولندی . بوناپارت منهنزماً عکادن عودت ایلد کدنصکره بر مدت مصرده
مهمساز مصالح جمهور اولوب لکن کوندن کونه فرانسه عسکرینه تنزل طاری و فرانسه‌دن
امداد واستمداد قبولری منسد اولمق حسبیه مصرده یایدار اوله میه جنی شه‌دن عاری
اولمغله استکشاف احوال شایعه سیاه اسکندریه یه عزیمت و فرانسه یه آدم کوندن کوندن
انکلتزه آمیرالنی اغفال و تحویل رخصت ایله ایکی یوز اون درت سنه سی ربیع الاخرنده
ایکی قطعه کوچک کی ایله مارسیلیه عودت ایلدی . مصرده بولنان جنرال قله بره یازدیغی
مکتوبده کنديسنك فرانسه یه کیتمنه لزوم کورندیکندن بحثله مقام اداره ده جنرال قله بری
توکیل ایلدیکنی والی ماهه قدر امداد کوندن من ایسه مصری تخلیه ایتمک اوزره عقد
مصالحه یه مأذون اولدیغی تحریر ایلدی .

اولجه جزایر پاشا مصرک تخلیصی ضمننده سر عسکر نصب اولنش ایسه ده حضورهایونده
عقد اولنان مجلس عمومیده صدر اعظم یوسف ضیا پاشا خفیفجه براردو ایله کندوسنك
عزیمتی خصوصی درمیان ایدوب هر طرفدن تقدیر و تحسین اولمغله ایکی یوز اون درت
سنه سی اوائلنده بر مقدار یکچری و طویچی و دائره سی خلقیله اسکداردن حرکت و شام
شریفه موصلت ایدوب ولایه و امرا و زعمای اصحاب تیمارک التحاقیله تقریباً الی بیک قدر
عسکر تجمع ایتمکه مصر اوزرینه تحریک لوای سطوت ایلدی . عریش قلعه سی تسخیر
و فرانسه عسکرندن مستحفظ بولنانلرک بقیه السیوفی اولان یوز الی قدری اسیر اولدیغی
متعاقب جنرال قله بر مصری ترك و تسلیم ایله حقیقوب کیتمکه راضی اولدیغندن سردار
اکرم وانکلز آمیرالی و مومی الیه جنرال طرفندن تعیین اولنان مأمورلر بالاجتماع شرائط
تخلیه بی قرارلش دیروب بیک ایکی یوز اون بش سنه سی شعباننك یکرمی سکننجی کونی

عقد مقاوله اولدی . بناءً علیه فرانسزلر تخایهٔ مواقعه مباشرت ایللریله مصر والیسی نصب اولنان نصوح پاشا ووزیر کتخداسی موردهلی عثمان افندی وجهه‌چی باشی وشیخ‌البلد ابراهیم بک درت بش بیک قدر عسکر ایله مصره سوق اولنوب انحق قلعه‌نک تسلیم اولنه‌جنی کونک کیجه‌سنده یعنی سنهٔ مزبورده شواننک اون سکزنجی کوننده عکس قضیه ظهور ایلدی . شویله که انکلتزدهن آمیراله وارد اولان امرنامه‌ده فرانسزلرک سلاح ایله تسلیم ایللری اشعار قلندیغنه مبنی امیرال هزار شرم و حجاب ایله تبلیغ مأموریت ایلدکده فرانسزلر پر آتش اولوب در آن ساعت یکرمی بیک قدر عسکر ایله جنرال قله‌بر اردوی هایون اوزوینه هجوم ایلدی . عساکر اسلامیّه متفرق و بیوک طویلر کیروده براغلمش اولدیغندن وقوعبولان محاربه‌ده موکب صدر اعظمی گرفتار انهمزام و پریشانی اولمغله صدر اعظم شامه عودت و فرانسزلر مصره رجعت ایلدیلر . درون شهرده بولنان جیوش عثمانیه ایله زقاق آره‌لرنده جنکه آهنک ایدوب برهفته قدر محاربه تمتد اولدیسده قله دشمن‌النده اولدیغندن نتیجهٔ مطلوبه‌یه وصول ممکن اوله‌مامغله عساکر عثمانیه حیقوب کیتمک واهالی حقنده عفوعمومی اجرا اولنمق شرطیله عقد مقاوله اولنهرق نصوح پاشا و عثمان افندی موجود عسکری آلوب اردوی هایون‌جانبنه عازم اولدیلر . فرانسزلر اکرچه بویله برغلبه‌یه نائل اولدیلر لکن کلیتلو تلفاته گرفتار اولدقلرندن قوتلری بدرجه‌دها تنزل ایتدی . حلب اهاالیسندن یکرمی یاشلرنده و سلیمان‌نامنده برفدایی جنرال قله‌بری قتل و اعدام ایلکله فرانسه ضابطاننک انتخابیله جنرال مینو مقام قوماندانی‌یه اصعادقلندی . بیک‌ایکی یوز اون بش سنه‌سی اواخری که اول بهار ایدی انکلتزده لولر آلمانیا واسویچره و مالطه طرفلرندن تدارک ایلدکلری اون بیک قدر عسکری انجوره اخراج ایلدکلری مثلوقپودان دریا کوچک حسین پاشا دخی دونمای هایونده بولنان الی بیک قدر نظام جدید و طویچی وارناؤد عسکریه اولا رشیدی و بعده رحمانیه‌یی حرباً تسخیر و آلتان فرانسز اسیرلرینی انکلتزده لولره تسلیم ایلدکدن صکره مصره طوغری حرکت ایتمکله جنرال مینو الی بیک فرانسز ایله اسکندریه محافظه‌سنه شتاب ایدوب تحصن ایلدی . بوسنه سوریه‌ده قحط و غلا و متعاقباً علت و با ظهور ایتمک جهتیله اردوی هایونده کلیتلو تلفات وقوعبولدیغنه مبنی عساکر اسلامیّه نقصان‌طریان ایتمش اولدیغندن صدراعظم یالکزر اون بیک قدر یکچیری و طویچی و یکرمی بیک مقداری باشی بوزوق عسکریه شامدن حرکت و مصره تقرب ایتمکله مصرده قوماندان بولنان جنرال بلپار روم و قبطی طائفه‌سندن مقدما عسکر یازدیغی درت بش بیک کشی‌یه بش الی یوز فرانسز ترفیق ایدرک قپودان پاشا فرقه‌سنی اشغال ایچون

ارسال و کندوسی قله برك ياپديغی کي اردوی هایونی اوروب طاغتمق اوزره سکز اون بیک قدر عسا کر منتخبه ایله موکب صدر اعظمی اوزرینه هجوم ایلدی . لیکن جیوش اسلامیة سنه سابقه کي غافل و متفرق بولندقلرندن بیک ایکی یوز اون التی سنه سی محرمی اوائلنده وقوعبولان محاربه ده فرانسزلر منهزم اوله رق مصره عودت ایلدیلر . قپودان پاشا اوزرینه کیدن فرقه دخی جزوی محاربه دن صکره ترك سلاح ایلر یله جمله سی اسیر ایلدیلرک انکلتراه لولره تسلیم قلندی . بونک اوزرینه صدر اعظم و قپودان پاشا اردولری برلشدیکندن جنرال مومی الیه آرتق تسلیم مملکت ایله چیقوب کیتمکدن بشقه چاره قالمدیغی تیقن ایتمکه یاپیلان مقاوله وجهله بقیه السیوف اولان فرانسزلی آلوب رشید ساحلندن کیلره بینه رک فرانسه یه عودت ایلدی و عسکر اسلام مصره داخل اولدی . جنرال مینو بونا پارطه نك کوندردیکی امدادک ورودینه مترقباً اسکندریه قلعه سنك محافظه سنه اهتمام ایلدی ایسه ده ذکر اولنان امداد انکلتراه لولرک کرتارنچه مدافعه کارانه لری اولدیغندن بالضروره تسلیم مملکت و معیتده بولنان فرانسزلی مستصحباً مارسیلیه عزیمت ایلدی . فرانسزلرک کرک مصره و کرک اسکندریه ده ترك ایلدکلری طوب و تفنک و مهمات و فیره دولت علیه ایله انکلتراه دولتی بیننده تقسیم اولندی . فرانسزلرک مصره مدت اقامتلی اوچ سنه یه قریب اولوب کلوب کیتملری دخی قرق الی بیک قدر عسکر و بر دونما اتلافندن بشقه برشیئی مفید اولدی . خطه مصریه نك تخلص خبری در سعاده واصل اولدقدہ پک بیوک شنلکلر اجرا اولمشدر . مصر والی لکی قپودان پاشانک کتخداسی اولوب اولجه عهدہ سنه رتبه وزارت احسان اولنان خسرو پاشایه توجیه و کوله منلرک رفع تسلطلی ضمننده معیتده سکز اون بیک قدر روم ایلی عسکری تعیین اوله رق صدراعظم برآستانبوله رجعت و سکز آی صکره انکلیزلر دخی اسکندریه نك تخلیه سنه مباشرت ایلدیلر .

مقدمه و قعه سلیم خانی

بوندن صکره دولت علیه نظام جدید عسکرینک تکثیر و تنظیمه و روم ایلیده رفع لوی طغیان ایدن طاغلو اشقیاسنک تنکیلنه و حجازه تسلط ایتمکه اولان وهابیلرک استیصالرینه تقید و اهتمام ایتمکه اولمسیله برابر فرانسه ایمپراطورلغی تحصیل ایدن بوناپارت انکلیزلر ایله حربه مداوم ونهجه و پروسیا و روسیه دولتریه کاه مصالحه کاه محاربه ایدرک مقام مظفریت و تعظمده قائم اولغله انکلتراه و روسیه دولتری وقت وقت اتفاق سابقک تجدیدی نی طلب ایله سلطنت سنیه بی تعجیزه ابتداء و بعد المصالحه در سعاده

وارد اولان فرانسه ایلچیلری ایکنجی دفعه اوله رق سلطان سلیم خان حضرتلرینی طرفلرینه جلب و امالهیه درلو درلو مواعید و معروضات ایله نصب شبیکه اختیال ایلرله ارکان دولت کمال حزم و احتیاط ایله اداره اشداده چالشمقده ایدیلر .

نظام جدید تکثر ایتدجه یکچریلرک خصوصت و عداوتی دخی ترقی ایده کلوب ارکان دولتک رأی ایسه یکچریلرک کلیاً رفع و ازاله سی مرکزنده اولدینی حالد سلطان سلیمک حلمی و جسارتسزلکی مانع اوله رق ایکی طرفی دخی تلطف ایله بروقه چیقارمقسزین حصول مطالبی متمنی اولوب حالبوکه کوندن کونه یکچریلرک شقاوتی آرتقمده واستمالت اولندجه شمارمقده اولدقلرندن بوکیدیشک بر فنا تتجه بی منتج اوله جنی مرتبه وضوحه رسیده اولمسيله صدر اعظم یوسف ضیا پاشا تقدیم استعفا ایلدیکنه مبنی اقدمجه بوستانجی باشیلقدن قبودان دریا اولان حافظ اسماعیل پاشا ایکی یوز یکرمی ایکی سنه سی محرمنده نائل مسند صدارت عظمی اولدی .

روم ایلینک هر قضاسنده برر اعیان اولوب بونلرک اکثریسی کسب عصیت و قوت ایلرله والیرلرک امر ونهی کاینجی جریان ایده میوب یکدیگریله محاربه لری دخی اکسیک دکل ایدی . برده طاغلو اشقیاسی دنیلان فرقه لر واردی که بالقانلرک ایکی جانبلرنده اوچر بشر یوز کشی اوله رق کشت و کذار و قرا و قصبائی نهب و غارت ایدرلر و طرف دولت علیه دن اوزرلرینه سوق اولتان وزرا و مأمورینی کوزلرینه کسدره بیلورلر ایسه مقابله ایدوب عکس حالد صعب المرور طاعلره و اوزاق محللره چکیلوب صکره ینه سرنمای ظهور اولورلردی . بووجهله روم ایلینک اغتشاشی و باخصوص و دین و بلغراد یماقلرینک یعنی مستحفظ یکچریلرینک مظالم و تعدیاتی روسیه لونک تشویقاتنه منضم اولمغله صربستان رعایاسی علم افراز بنی و شقاوت اولدقلرینه وودین والیسی پاسبان اوغلی عثمان پاشا اگرچه مظهر عفو پادشاهی اولمش ایسه ده طرف دولتدن بروجهله امین اوله مدینی جهتله رئیس عصاة اولان قره یورکی ایله مخادنت اوزره بولندیغنه مبنی ماده عصیان مشدد اولدیغندن قونیه والیسی قاضی عبدالرحمن پاشا سر عسکر نصب اوله رق معیتنه سواری و پیاده یکرمی درت بیک قدر نظام جدید ترتیب اولنوب ظاهرأ صرب عصائی اوزرینه و حقیقتده روم ایلی اصلاحنه و بلکه ده روسیه لونک ممالک عثمانیه یه هجومی ملحوظ اولمغله انک مدافعه سنه مأمور ایدیلرک ایکی یوز یکرمی برسنه سی ربیع الاولنده ادرنه یه طوغری اعزام قانندی .

روم ایلی اعیانلری بو عسکرک سوقندن متوجش اوله رق بربرلریله عقد اتفاق و ادرنده اجتماع ایدوب مقابله یه و بعد الغلبه استانبوله هجومه حاضر لنقمده اولدقلری استخبار اولندقمده

اگرچه نظام جدیدك آنردن پرواسی یوغیسه‌ده مرکز سلطنت دخی اشقیای مزبورده ایله متفق‌الافکار اولان یکیچریان ونظام جدید دشمنلری اولان سبک‌مغزان ایله مالامال اولدیغندن و مدیران دولت ایسه عزم قوی و بطش شدید اربابندن بولمقدقلرندن نظام جدید اردوسی استانبوله جلب و عبدالرحمن پاشا منصبنه اعاده اولمغله ادرنه جمعی دخی یرو یزینه طاغدی .

سلطان سلیم خان حضرت‌تیرینك اندرونده امور دولتجه مؤتمنی و مستشاری سرکاتبی احمد افندی و امور ذاتیه‌سنجه محرم اسراری مابینچی کرد احمد بك اولوب طشره‌جده کیزلی ستمه دیو مشهور اولان حاجی ابراهیم افندی ایله کتخدا دینیلان ابراهیم نسیم افندی منظور و معتمد پادشاهی ایدی . والده کتخداسی یوسف اغا سنه سابقه‌ده اوج اقبالدن ساقط و قپودان دریا کوچك حسین پاشا ایکی یوز اون سکر سنه‌سنده لحد قبره هابط اولمغله میدان شہسواری مذکورالاسامی اوتاد اربعه‌یه قالمشیدی . سرکاتب عقلا دن بر ذات اوله رق حتی مابینچی احمد بك ایچون بو کرد پك ایلرویه کیدیور جمله مزك باشی بلایه اوغرا ده حق دیدیکی منقولدر .

صدر اعظم حافظ اسماعیل پاشا قلباً نظام جدیدك خلافتده اولوب باخصوص ابراهیم کتخدانك اقبال و استقلالنه طاقت کتوره‌مدیکندن و طرف سلطنته اولان افاداتی دخی متمر اوله‌مدیغندن علی‌روایه روم ایلی اعیانلرینی خفیاً تحریک ایلش و ابراهیم کتخدایی قایق ایله یالینسه کیدر ایکن و یاخود یالینسنده اوردرمق کبی افعال و حشیانه تصمیم ایلش اولدیغندن هم افکار عامه‌یی تسکین و همده یکیچریلری تلطیف یولنده بیوک بر توجیهاته لزوم کورنمکله ینه اوتاد اربعه مذکورنك تنسیبلری اوزرینه ایکی یوز یکرمی بر رجبنده صدر مشارالیه اسماعیل پاشا و شیخ الاسلام صالح زاده اسعد افندی عزل اولوب مقام صدارته یکیچری اغاسی بولنان و کچی بوینوزی دیمکله مشهور اولان ابراهیم اغا و مسند مشیخته دخی آل فیضدن عطاءالله افندی نصب اولوب اقبال و اجلال ایله زبانزد انام ونظام جدید مخالفلری طرفندن مظهر دشنام اولان ابراهیم کتخدا و دفتر دار مصطفی رشید افندی که کوسه کتخدا دیو معروفدر بونلر دخی عزل اولنهرق بر عظیم توجیهات اجرا قلندی . لکن سنه سابقه‌ده اعلان عصیان ایدوب خوف قهرسلطانی ایله قریمه فرار ایدن طریزون والیسی طیار پاشا ایله ادرنه‌ده مجتمع اولان اعیانلرک و استانبوله کی یکیچری بغاتنك شهزاده سلطان مصطفی ایله مخبره‌لری تحقیق ایدوب واسطه اولنلرک تأدیپ و تربیه‌لری لازمه ذمت حکومت ایکن سلطان سلیمك حلم و شفقتی مانع اولدی .

وقوع سفر روسیه

مؤخراً وارد اولان فرانسه سفیری جنرال سباستیانی از سر نو سلطان سلیمک فرانسه‌یه میلی استیصال ایدوب جنک و صلحه متفق اولمق درجه‌سی متحقق اولمغه و بو اوانده روسیه دولتیله فرانسه بینده محاربه تجدد ایلمکله دالماچیاده بولنان فرانسه عسکری طونه ساحلیله لهستانه هجوم ایده بیللمری احتمالی سد ایچون روسیه‌لو بقیه ایکی اردو سوق ایدرک ایکی یوز یگر می بر سنه‌سی رمضانده سرحد خاقانیده واقع خونین و بندر قلعه‌لرینی استیلا ایلدیلر بو خبر در سعادت واصل اولدقده روسیه اوزرینه اعلان حرب اوله رق تدارکات سفریه‌یه اشتغال قلندی .

انکلتره دونماسنک استانبوله ورودی

انکلتره دولتی فرانسه‌یه دوست اولنلره دشمن و دشمن اولنلره دوست اولمق مسلکندمه پایدار اولمغه انکلتره ایاجیسی روسیه‌یه اعلان حربک تأخیرینی تکلیف و قلعین مرقومتنک استردادینی ضامن اوله جغنی افاده ایله برابر سلطنت سنیه بو صورتلره موافقت ایتمدیکی حالده انکلتره دولتی دخی دولت علیه‌یه اظهار خصومت و استانبوله دونما سوقیله حرب و قتاله مباشرت ایده جکنی بیان ایلدی . لکن فرانسه ایاجیسنک افاداتی نزد پادشاهیده بغایت مثمر و مؤثر اولدیغندن انکلتره ایاجیسنک تکالیفنه حواله سمع اعتبار قیلنمدی . بناءً علیه انکلتره ایاجیسی بقیه فرار و بوزجه اطهده بولنان انکلتره دونماسنده قرار ایدوب موافق هوایه انتظاراً بوغاز محافظلرینی محاربات ایله اغفال ایدرک نهایت سنه مرقومه قربان بیرامی کونی ایکی اوچ انبارلی و بش قپاق و ایکی فرقتین و ایکی قروتدن عبارت اولان انکلتره دونماسی قوتلی برلدوس هوا ایله آتش افشان اوله رق قلعه سلطانیه دن مرور و نغره بروننده لنگر انداز اولان التی قطعه فرقتیندن دردیخی احراق و ایکی عددینی ده اخذ ایتد کدن صکره قزل اطه‌لر پیشگاهنه کلوب لنگر انداز اولدیلر . پای تحت عثمانی‌یه دشمن ورودی غیر مسبوق اولدیغندن بو کیفیت کرک دولته و کرک اهالی‌یه پک بیوک وحشت و دهشتی مستلزم اولمسیله یدی قلعه دن سرای بروننه و قاضی کویندن اسکداره قدر استحکامات انشاسنه و دونمای هایونک تجهیز و اخراجنه فوق الغایه اعتنا و سرعت کوسترلدی . انکلتره آمیرالی بر تقریر ارسالیله روسیه‌لو ایله عهد سابق اوزره تجدید مصالحه اولتمق و فرانسه ایاجیسی استانبولدن طرد قیلنمق و دونمای هایون امانه کندولرینه تسلیم اولتمق شرطلرینک قبولی یگر می درت ساعت مهلت ایله تکلیف ایلدیکندن ترسانه تر جانی اولان مشهور ریاضیات خواجه‌سی اسحق افندی انکلتره دونماسنه اعزام اولوب دونمای هایونک

تسلیمی مسئله سی کلیاً طی والغا و فرانسز ایله چیسینک طردی انکلتزه دوئمناسنک عودتندن
 صکره بر مناسب زمین ایله اجرا اولنق وانکلتزه دولتنک کفالتیله روسیه معاهده سابقه سی
 تجدید قلمق اوزره قرارلشدیر یله رق و اوچ کون دها مهلت آلنه رق افندی مومی ایله
 عودت ایلدی. لکن فرانسه ایله چیسینی سیاستیانی کرک مابین هایونی و کرک باب عالی بی تشجیعده
 دامن در میان اولوب (انکلتزه دوئمناسنده قره عسکری یوقدر که استانبولی ضبط ایدیه بیلیمک
 اجتماعی موجب خوف اولسون یا بسه یا بسه استانبولک بعض محالرینی احراق ایدیه بیلور .
 حد ذاتنده دخی طرف طرف قضاء یا تمقده در . بوندن دولت علیه یه بیوک بر ضرر ترتب
 ایتمز انحق اون بر قطعه انکلز کمیسنده قورقیلویده اظهار موافقت و مغلوبانه تنظیم مقاوله
 اولنور ایسه پک بیوک تقیصه بی و سلطنت سنیه نک کسر ناموسنی مستلزم اولور) دیویان
 حقیقت حاله قیام ایتمکین بوافادات نزد دولت علیه ده قرین تصویب اولمغله انکلتزه امیرالنه
 خبر ارسال و آق دکز بوغازندن چیقمدقجه تنظیم مصالحه قابل اوله میه جفی تذکار قلندی
 اسکدار و استانبول ساحلرینه بیگدن متجاوز طوب وضع اولنوب یکر می قطعه سفن حربیه که
 اکثریسی فرقتین و قروت ایدی بشکطاش پیشگاهنه چیقارلمش اولمغله انکلتزه لولر حربیه
 مباشرت ایلدکلری تقدیرده بعض مرتبه ایراث خسار ایتله لر ییله کندولری دخی زده لئه جکلری
 ولاحاله عودته مجبور اوله جکلری جهتله تشید و تنظیم قلمقده اولان آق دکز بوغازنده
 یکیدن بر آتسه طوتیله جکلری مطالعاتی مانع جرأتلری اولمغله استانبول پیشگاهنه ورودلرینک
 اوتجی یعنی ذی الحجه نک یکر می ایکنجی کونی رجعت و اقدججه اخذ ایتدکلری ایکی قطعه
 فرقتینلری لایسکی اوکنده براغوب بوغازندن خروج ایلدیلر. لکن چیقیشلری کیریشلری
 کبی قولای اولیوب ایکی قطعه فرقتینلری اغراق و قصور کیلری دخی کلیتله رخته دار ایدلر
 بر مدت بوزجه اطهده تعمیرات ایله مشغول اولدقن صکره چکیلوب کیتدیلر ابراهیم
 کتخدا و ابراهیم افندی و سرکاتبی احمد افندی انکلتزه لو پولتیقه سنه مائل
 و فرانسه لولره التفات ایله انکلز لک کوچندر لمسنه غیر قائل اولدکلری حالده سلطان سلیمی
 اقناع ایدمه دکلری معلوم اولمغله فرانسه سفیری جنرال سیاستیانی سبک مغز اولان
 یکیچر اغاسی پهلوان اغایه و سائر اوعیارده بولسانلره انکلز کیلرینک استانبوله
 کلیسی ارکان دولتنک دعوتی اوزرینه در یوللو القات مفسده اجرا ایلدیکندن و ذاتاً
 مشار الیهم حقنده خصومت عمومیه حاصل اولمش اولدیغندن پک چوق آدم بونک موافق
 حقیقت اولدیغنه اعتقاد ایش ودرلو روایات تحدث ایلشدر که عاصم افندی تاریخنده تفصیلاً
 محرر در . حالبوکه سالف الذکر ذوات اصدقادن و عقلا دن اولوب پادشاهی اخافه ایتمک

ایچون پای تخت دولته دشمنی دعوت ایتمک مثللو خطر عظیمی اختیار ایتیه جککری
شویله طورسون پک ساده دل اولنلرک بیله بویله وخیم العاقبه حالاته قولایلقله جسارت
ایده میه جککری درکاردر . بناءً علیه بواسناد ، سیاستیانینک اکدیکی تخم فسادک ثمره سی
وبرطاقم سبکغزانک اقوال بی مالی اولدیغنده شبهه اولیوب فقط عاصم افندی کبی اصحاب
فضل وکالدن اولان برداتک بوکا وجود ویرمی جای تعجبدر .

خروج اردوی همایون

ایکی یوزیکرمی ایکی سنه سی محرمک یکرمنجی کونی که مارتک اون یدیساییدی صدراعظم
وسردار اکرم ابراهیم پاشا قاعده قدیمه دولت اوزره سنجاغ شریفی استصحاب ومرتب
آلای ایله داود پاشا صحراسنه چیقوب صفک اوچنجی کونی ادرنه یه طوغری حرکت
وربیع الاولک اون التجی کونی سلستره یه مواصلت ایلدی واستانبولده مهم امور دولت
قائمقاملغنه انتخاب اولنان کوسه موسی پاشانک دست خیانت و شیطنته تسلیم قلندی .

وقوع اختلال وجلوس سلطان مصطفی خان رابع

ایکی یوزیکرمی ایکی سنه سی ربیع الاولک یکرمنجی کونی سلطان سلیم خان
حضر تلیرنک خلعلری ماده فیجیه سی واقع اولغله بونک اسباب وتفصیلاتی بروجہ آتی
بیان اولنور شهریار مشارالیه حضر تلی طریق مولویه یه سالک وشعر وموسیقی یه مائل
غایت حلیم وسلیم شاعر مشرب برپادشاه ظریف ونکته دان ایدی عساکر منتظمه ترتیب
ایلمک وطوطخانه وترسانه مصالحنه نظام ویرمک وهندسه خانه وباروتخانه ومطبعه واقشه کار
خانه لری مثلومدنیت ومعموریتی مستلزم شیلر ایجادایتمک کبی دولت وملته پک بیوک خدمتار
اجراسنه تشبث ایلمش وخیلیجه دخی ایلرولتمش ایسه ده اسباب آتیه ایله محووتلف ووجود
همایونلری سهام آلامه هدف اولدی . اولایکیچریلر ویکیچریلرک علوفه سنی مأکل ایدینان
ایرادجیلر نظام جدیدک دشمن قویلری اولدیغی مثللو مرض جزام کبی عروق عوامه
سرایت ایتمش اولان یکیچری غیرتکشاکیله مفظور اولانلر دخی آنلره منضم اوله رق
دائماً نظام جدیدک لعن وطعن ایدرلر وبلکه کفره نسبت ایلرلر ایدی . ثانیاً عساکر
منتظمه نک لزومنی متفطن اولان علما وصدور ورجال دولت معدود ومحدود اولوب ساده
لوحات وزرا ومتعصین صدور وارکان وروم ایلی واناطولی اعیانلری عموماً طرف خلافتده
ایدیلمر . باخصوص سلطان سلیم خان حضر تلی ذوق وشوق ایله آلفته ومتنفذان عصر
دخی اکا پیرو اولدقلری جهتله بوغازایچنده مهتابلرده وسیریرلرنده وقوناق وساحلخانه لرده
اولان طرب وسفاهتی ونظام جدید تته سندن اولان بعض الافرانغه شیلری کورنلرک

تعصب و اوکان دولت حقلرنده اولان خصوصتاری آن بآن قوت بولمده ایدی . رابعاً
 شهریار مشارالیه حضرتلری طریق علمیه رجانه چندان اهمیت و یرمیوب حتی فرانسزلر
 ایله برنجی دفعه عقد اتفاق اولنهجی وقت ارکان دولت بسط محاذیر و صدور علمانک
 جمعیله کیفیت بالاطراف تذکر اولمنسی عرض ایتدکلرنده بوایش صدور دنیلان آدمکلرک
 بیلهجکی شی دکلدر دیو خط هایون اصدار بیتورمغله درحال اتفاقیامه تعاطی اولمنشیکن
 متعافاً فرانسزلرک مصره استیلا ایللرینه و ایکنجی دفعه ینه فرانسزلره الدانوب وارکان
 سلطنتک سوزینی دیکله میوب عقد اتفاق ایلسی انکلتره دونماسنک استانبوله کلمنه و روسیه لونک
 قلاغ خاقانی به استیلا ایلسنه سبب اولدیغنه مبنی طریق علمیه رجالتک اکثریسی مغیر
 و امور خارجییه وقوفی اولانلر معترض ایدیلر . خامساً خاقان مغفورک ارباب قدرت
 وسطوتدن برمعین صادقی یوغیدی .

اولوقتک احوالنه واقف بعض اصحاب و ثوقدن استماع اولمنشدرکه برقاچ سنه اول
 برفساد جمعیتی تشکل ایتمش ایکن قپودان دریا بولنان کوچک حسین پاشانک مهابت
 و اقتداری مانع جسارت اولمشدر . چونکه قپودان مشارالیهک افراط عطایا و احسانی
 سببیله دائره سی خلقی و ترسانه چاوشلری و قالیونجی ضابطان و نفراتی اوله رق اوچ بش بیك
 قدر عسکر امر و اراده سنده ایثار نقدینه جان ایتمه حاضر و کندوسنک دخی سلطان
 سلیم خان حضرتلری اغورنده هر درلو فداکارلغی اختیار ایدهجکی ظاهر ایدی . مشارالیهک
 حلم و مرمحتی حکم مقامیله متناسب اولدیغندن ابتدای جلوسنده بعض قرناسنک تشویقات
 و تشجیعاتیله اظهار ایلدیکی جرأت و شهامتدن آز وقت ظرفنده فطرت اصلیه سنه رجوع
 ایتمهکله خوف سیاستی قلوب عامه دن زائل اولمشیدی . جودت پاشا تاریخنده تفصیل اولندیغی
 وجهله یکیکچریلرک سرکشکلری آرتدجه تربیه و تأدیبلری شویله طورسون بالعکس
 تلطیفات متنوعده بولنور و شهزاده سلطان مصطفانک عونیه سی ایقاظفتهده دامن درمیان
 اولدقلری طیارپاشا وادر نه وقعهلرنده مرتبه ثبوت و ارمشیکن مجازاتلرندن و هیچ اولمزایسه
 طرد و دفعهلرندن بیله اجتناب ایلردی برده شیخ الاسلام اولان عطاء افندی ظاهراً
 زهد و تقوی اصحابندن اولمسلیله برابر نظام جدید مروجلرندن کورینور
 ایکن قلباً طرف خلافتده اولدیغندن تقویت بخش اشرار ایدی متجربین صدوردن سیروزی
 زاده طاهر افندی مرحومدن استماع اولمنشدرکه سلطان سلیم علینده بولنان فئه باغیه دن
 بعضیلری خزینه کتخدالغندن مخرج رستم افندی و صالح بک نامنده ایکی نمک بحرامی خفیاً
 شیخ الاسلام مشارالیهک حضورینه کوتوروب شهریار شهیدک مقام خلافتنه منافی بعض
 احوالنه شهادت ایتدیرمشلر وانک اوزرینه فتوی المشلردر .

اشبو رستم افندی ایله صالح بك مؤخر آشامه تغریب اولنوب منفور انام اولدقلری حالدہ اورادہ واصل دارمجازات اولدیلمر قائممقام کوسه موسی پاشا مقدا بعض تأدیبه اوغرامش اولدیغندن ارکان دولت حقندہ آتش عداوتی فروزان اولمشیکن درون شیطنت مشحونندہ صاقلیوب تبصص کلجی ایله قلوب کبرای ربودہ چوکان اختیال ایلش اولمسیلہ لین الجانب بر آدمدر دینیلہرک مقام قائممقامیہ اصعادقلنمشدی . حافظ اسماعیل پاشا وقندنبرو حاضر لنمقدہ اولان جمعیت فتنہ بی حسن تلقی ودر حال شرمزہ بی و طغیان دائرہ اتفاقہ دخول ایلدی . اسباب مشروحه ایله هیولای فتنہ صورت بولمقدہ ایکن اردوی هایونک خروجندن صکرہ قره غوللره نظام جدید قونیلہ جق وقره دکنر بوغازی محافظه سیچون طربزوندن وقره دکنرک سواحل سائرہ سندن ترتیب و جلب اولنان ایکی بیک قدر قلاع یماقلرینه نظام جدید البسه سی کیدیریلہ جک حوادثلری شیوعبولمغلہ وباخصوص حرمین شریفہ وهابی طائفہ سی مستولی اولہرق بوسنه حجاج مسلمینی مدینہ منورہ یه قویمبوب زیارت روضہ مطهرہ دن محروماً عودت ایلدکلری خبرلری وارد اولمغلہ غلیان افکار مشد اولدی . مع مافیہ مصر سفری نظام جدیدک زمان ایجادینہ تصادف ایتمشیکن عکایه وقیودان پاشا معیتندہ اسکندریہ یه سوق اولنش اولدقلری حالدہ بو دفعه دها مهم اولان روسیہ سفرینہ کوندرلما ملرینہ دائر مطالعہ رسمیه یه تصادف اولنماسی ایکی ملاحظه یه مبنی اولسی طبعیدر : برنجیسی یکیچری طائفہ سی وروم ایلی اعیانلری نظام جدیدک دشمن جانلری اولدیغندن بر مقاتلہ داخلیه وقوعندن احتراز قضیه سی وایکنجیسی یکیچریلرک اردوی هایون ایله عزیمتلری اوررینہ نوعمای استانبول اشقیادن تخلیه قلنمش اوله جغندن مرکز سلطنتک نظام جدیدہ تودیع وتسليم قلنمسی مقصدی اولمق کرکدر

وقوع فتنه و تبدل سلطنت

بیک ایکی یوز یکرمی ایکی سنه سی ربیع الاولک اون یدنجی بازار ایرتسی کونی سالف الذکر قره دکنر بوغازی قلعه لرینک یماقلری عقد جمعیت و بزه نظام جدید البسه سی کوندرلش قبول ایتیز دمدمه سیله رفع لوای شقاوت ایدوب قباچقی مصطفی نامندہ برفته انکیزی قوماندان انتخاب ایدرک اغلری اولان خلیل خاصکی بی وطایه لر تعمیرینہ مأمور رئیس سابق انکلز محمود افندی بی پاره دلقلری خبری در سعادته واصل اولدقدہ استعداد دهر وشهره نظراً بوشرارہنک بر آتش خانمانسوز اوله جغنی سلطان سلیمک اصدقاسی کندوسنه تبلیغ ودر حال ده نظام جدیددن بر مقدار عسکر سوقیلہ تأدیب و تربیه لرینی تدبیر

ایتمشیر ایسه ده شهریار مشارالیهک مزاج هایونلری عطف نظر جلادت ایتمکه مساعد اولمیدیغندن و (آمان افندم هم کندیکزه و همده بزه قییارسکن) دینلرجه قان دو کولمکسزین سهولتله ایشک بتورلمسی رأینده مصر اولدقلرندن موجد فتنه اولان قائم مقام پاشا ایله آنکله همدست اتفاق بولنان خونیه جمعیت فتنهک حسن تدابیر ایله دفع و رفعی خصوصنی تحمیل ایلدیلر. حالبوکه براختلال عظیم وقوعبوله جغنی دور اندیش اولان اصحاب زکا چوقدنبرو جزم ایلشیر ایدی. حتی دده پاشا مرحوم نقل ایدر ایدی که کوسه کتخدا دیمکه معروف اولان مصطفی رشید افندی وقعه بی استماع ایدر ایتمز حادثات مشکله ظهورنده عادت مألوفه و مشهوره سی اولدینی اوزره بش اون قیلدن عبارت اولان صقالنی انامل تفکر ایله قاریشدره رق برمدت کزندکن صکره کتخداسنی چاغروب عجبا بزم دائرده قباچقی بی بیلور آدم وارمیدر دیو سؤال و او دخی آشچی باشینک یکنی ایدوکنی اخبار ایلدکده آشچی باشی بی مابین او طه سنه جلب ایله قباچقی مصطفی اغا او غلمزه سلام ایدرم عامه نک معلومیدر که بن اتلی یه سوتلی یه قارشمدم هر نه امر اولندی ایسه آنک اجر اسنه تقید ایلدم بو جهته حمایه ایللرینی رجا ایدرم و شمدی او غلمه بعض مصارف ایجون پاره لازمدر دیهرک بیکر عدد ییلدیز التونی ایله ملو ایکی طور به التون اعطا و بریسنی قباچقی خر جلق ایلسون و دیگرینی رفاقتنده بولنان سوز صاحب لرینه توزیع ایتسون دیو ارسال ایشکه اشبو التونلر اشقیایه واصل اولدقده کوسه کتخدا بزم بابامزدر بزدن اکا ضرر کلز مستریخ اولسون جوابیله آشچی باشی بی اعاده ایلشیر و بو جهته تخلص کریبان حیات ایلشدر.

صالی کونی شیخ الاسلام افندی و صدور علما جلب اولنه رق باب عالیده مجلس عمومی عقد اولنوب ویریلان قرار موجبنجه اجرای نصیحت ایله جمعیت اشقیایی تفریق ایلک ضمننده صنایدیکچریاندن قزغانی مصطفی بوغازه کوندردلی و مرقوم اخشام اوزری عودت ایدرک یمقلرک ضابطانی محمود افندینک و خلیل اغانک قتلندن بغایت مکدر و مضطرب اوله رق احاد عسکر یه دن ظهور ایدن بو فعل مکروهک دامن عفو و صفح ایله مستور بیورلمسنی و نفرات عسکر یه اولحوالیده خیمه نشین اقامت اولان نظام جدیددن متوحش اولدقلرندن عسا کر مرقومه نک قشله لرینه چکلمسنی و جا ایلدکلرینی سویلیدی.

کیفیت حضور هایونه عرض اولنه رق نظام جدیدک قشله لرینه چکلمسی چون امر ویرلدی و سلطان سلیم حضر تریله اصدقای دولت بر درجه اغفال و اشقیای مرقومه نک استدکاری کی سیر و حرکت ایللرینه ارئه طریق احتیال قلندی. بو صورتله ایش بیتدی

ظن اولنیورکن چهارشنبه اقشامی اشقیاطویخانهیه واصل وقائم مقام پاشا طرفدن بومصلحت جمله اتفاقیله اولمشدر صاقین مدافعه قیدنده اولمسونئر دیو طوپیچیلره خبر کوندرلمش اولدیغندن انلر دخی اشقیایه ملحق اولمغله صباحه قدر استانبوله کذار وجمع یکیچریان اولان آت میداننه قزغانلری چیقاروب مقام بغی وطغیانده قرار ایلدیلر . قلعه یمقلری بیک قدر کشتیدن عبارت ایکن طوپیچیلرک وسائر یکیچیریلرک انضمامیله جمعیت عظیمه حاصل اولدی . پنجشنبه کونی علی السحر تکرار باب عالیده عقد مجلس اولنوب ابراهیم کتخدا نظام جدید ایله مدافعه اشقیایه خصوصنی ایراد ایدر ایتمز روم ایلی قاضی عسکری ولی شمس الدین اطاله لسان دشنامه اغاز وسائر متفقین دخی تصدیق ضمنی ایله اتحاد نهفته یی باز ایتمکله شمدییه قدر تحت شبهه ده بولنان اتفاق فتنه میدانه چیقمغله ابراهیم کتخدا وحاجی ابراهیم افندی صاوشوب کیتدیلر وشیخ الاسلام ایله قاضی عسکرلر جمعیت اشقیایه اعزام قلندی . نظام جدیدک کلیاً رفع والغاسی و ابراهیم کتخدا وحاجی ابراهیم افندی وسرکاتبی احمد افندی ومابینجی احمد بک وکتخدا وکیلی محسن افندی ورئیس وکیلی صفی افندی وضربخانه امینی بکر افندی و بوستانجی باشی شا کر بک ووالده کتخداسی سابق یوسف اغا و نظام جدیدک ذخایرینه مأمور اولان قپان نا ئبی عبداللطیف افندی تک قتل واعداملری طائفه باغیه نک مطلوبلری اولوب مساعدده اولندقجه انحلال جمعیت ممکن اولهمیه جنی قائممقام پاشا طرفندن حضور هایونه انها وبوبابده مجمع اشقیاده اولان شیخ الاسلام افندی جانبندن دخی تأکید واستعجال اولندیغنی اشعار قلنمغله ارتق ایش ایشدن کچمش اولدیغندن بیچاره سلطان سلیم تخلص نفس ایچون اظهار موافقه مجبور اولدی . بناءً علیه نظام جدیدک رفع والغاسی دلاللر واسطه سیله اعلان وطلب اولنان ذواتک دخی هر بری بر یرده دردست اولنوب اعدام قلندی . فقط یوسف اغا هنوز حجدن عودت ایدرک قونیه طرفلرینه تقرب ایلدیکنه وقپان نا ئبی دخی طریق علمیه دن بولندیغنه مبنی ایکسی دخی بروسه یه نفی اولنوب ونائب مومی الیه میرمیرانلق توجیه اولنوب بعده اعدام قلندیلر .

رؤسای اشقیانک شدتلری زائل و دائره اطاعته رجوعلری متقرب اولمشیکن محرک فتنه اولان اعظم مصلحت بو درجه یه کلد کدنصکره سلطان سلیمدن امنیت جائز اولماز دیو القات خضیه مبادرت ایملریله تبدل سلطنته قرار ویرلدی و ایکی بیک قدر عسکر ترفیق اولنهرق شیخ الاسلام ایله صدور علما جمعه کونی صباحلین باب عالییه کوندرلدی . قائممقام موسی پاشا خدنک مفسدتنک هدف مقصده وصولدن منشرح الفؤاد اولهرق

باب عالی رجائی وعلما طاقنی آلوب سرای هایونه بالعزیمه سلطان سلیمه افاده کیفیت اولندقدده بالضروره حرمسرای هایونه عزیمت بیوزوب بعده ساعت بشه قریب سلطان مصطفی خان رابع حضرتلری جالس سریر سلطنت اولدی و رسم بیعت اجرا اولندقدن صکره آیاصوفیه جامشریفه سلاملق رسمی دخی ایفا قلندی ..

احوال علمدار مصطفی پاشا

سنه سابقهده روسجق اعیانی ترسنکلی اوغلی برفدایی قورشونیه فوت اولدقدده متعلقاتندن هزارغراد اعیانی اولان مصطفی بیراقداریینه قائم اولوب فقط جانب سلطنت سنییه عرض محضر تقدیمه استحصال مساعده سنییه مبادرت و مطاوعتکارانه حرکت ایتکله روسیه سفری ظهورنده رتبه وزارتله سلسیره ایالتی مشار الیه توجیه اولمشیدی . اصحاب قدرت وسطوتدن اولدیغندن اسماعیل ویرکوی طرفلرینه وقوعبولان تعرضات دشمنی مدافعه وغالبانه محاربه ایتکده اولدیغنی حالده اردوی هایونک طونه سواحله تقربنده بش التی بیک سواری ایله استقبال ایدرک موجب تقویت جیوش مسلمین ولوای شریف سرعسکر لکیله تعظیم وتوقیر اولمشیدی . استانبولده اختلالک ابتدای ظهورنده اردوده یکیکچری اغاسی بولنان پهلوان اغادن امنیت دولت منسلب بولندیغنه مبنی عزل و تبدیلنه اراده سنیه سنوح ایتکله موجبجه قول کتخداسی یکیکچری اغاسی نصب اولمشیکن طائفه یکیکچریان زور بازوی تغلب ایله ابقا ایتدیردکارینی متعاقب جلوس خبری واصل اولغله اغای مومی الیه دخی یکیکچریلری تحریک ایله صدر اعظم ابراهیم پاشایی فراره مجبور ایتدی . بوخبر استانبوله وارد اولدقدده بوغاز محافظی چلبی مصطفی پاشا صدر اعظم نصب اولنهرق ربیع الآخرک یکرمی دردنجی کونی مرکز اردوی هایون اولان سلسیره وصولنده بیراقدار مصطفی پاشا صدارتک تبدلندن دلکیر و بوجهته صدر جدید ایله میانه لرنده آتش عداوت جایکیر اولغله ارائه روی درشتی ایله روسجق جانبده عطف زمام ایلدی . مشار الیه تأمین وتلطیف مقصدیه یکیکچری اغاسنه الباس فروه وزارت ایلسیله عتو و طغیان صدچندان اولدیغندن بعض ارکان دولتک تحریکیله یکیکچریلر بوکره مشار الیه علیه قیام و پاره لیوب کتنام ایلدیلر . سلطان سلیم رجالندن رامنر افندی و هیچ افندی برر طرفه نقل ایله تبعید اولمش ایسه لرده علمدار پاشا طرفندن جلب اولندقلرینه و وزیر کتخداسی رفیق افندی ایله رئیس غالب افندی دخی سلطان سلیم طرفدارلری ایدوکلری جهته حقارنده معامله غدیره اجرایی متصور ایدوکنی تفرس . ایلدکلرینه مبنی آنلردخی یکیکچری اغاسنک پاره لندیغنی کون بغته روسجغه فرار و علمدار

پاشا حمایه سنده قرار ایلدیلر .. اردوی هایون بر بحران ایچنده ایکن فرانسه و روسیه
ایمپراطوری بیننده تیلستیده عقد مصالحه اولنوب دولت علیه ایله مسقولو بیننده متارکه
ومتعاقباً مصالحه اولنمی دخی شرط قلمغله رئیس سابق غالب افندی مأمور ایدیلرک جمادی
الآخره اوآخرنده تنظیم متارکه اولندی . اردوی هایون دخی مشتانشین اولق اوزره
ادرنهیه عودت ایلدی .

محاربه بحریه

انکلیز کپلرینک عودتندن صکره قبودان دریا سیدی علی پاشا اون سکر قطعه سفن
حریه ایله آق دکر بوغازندن خروج وانکلتزه دوتماسی مصر طرفه کیتمش اولدیغندن
یونجه اطبه بولنان روسیه دوتماسیله جنکه آغاز ایلدی . لکن سفن اسلامیه نك اکثریسی
قارنیتده قاهره غوغا ایده مامکله یالکمز قبودان پاشانک را کب اولدینی مسعودیه نام اوچ
اتبارلو ایله قبودانه بکک سوار اولدینی قپاق وبر ایکی کمی دهایدی سکر ساعت جنک
ایلدیلر . واقعا پاشا کیسنده یلکن و دیر کدن اثر قالمیوب قبودانه کیسی دخی ایدی
دشمنه کرفتار اولدی ایسه ده مسقو سفینه لرنده دخی ایلرطوتار یرقالمدیغندن یونجه اطه یی
ترک ایله قورفیه رجعته مجبور اولدیلر و بوجتهله آق دکر بوغازی محاصره دن قورتلدی .
حقا که قبودان مشارالیهک اظهار ایلدیکی شجاعت محیر عقول اولدینی معلوم انام ایکن
لوندانه مشربی مزاح دولته غیر موافق اولدیغندن عصرینک مورخلری یعنی وقعه نویس
عاصم افندی وشانی زاده خدمات جان سپارانه سنی مداهنه طریقه قربان ایتلر دره بشقه
خصوصلرده فنالغی اولسه بیله بویله برغازی آدمک دین و دولت اغورنده سبق ایدن
قداکارلغی اضاعه ایلک لایق انصاف دکلدر .

انکلیزلرک اسکندریه یه تسلطری

فرانسه لولردن استرداد اولندقدن صکره مصرک حالی پک قاریشمش وانکلتزه لولر
بعض کوله من بکلرندن ال طوتمش اولدقلرندن جزوی اقدامله خطه مصریه یی ضبط
ایده بیله جکلری امیدیه اوآخر سلطنت سلیم خانیده درونلرنده سکر بیک قره عسکری
اولدینی حالده قرق قطعه دن متجاوز سفن حریه ونقلیه دن عبارت اولان انکلتزه دوتماسی
یفته اسکندریه یی ومتعاقباً رشیدی تسخیر ایتشلر ایسه ده مصر والیسی بولنان محمد علی
پاشا کوله منلری تأدیب و تربیه ایله اولدقچه اداره یی یولنه قویمش بولندیغندن اولاً رشید
اوزرینه مهاجمه نمای سطوت اوله رق انکلیزلولری تدمیر و بش التی یوز قدرینی اسیر ایدوب

بعده اسکندریه بی محاصره ایلمکه انکیزلر خلاف مأمول بو مدافعه بی کوردکلرنده عقد شرائط تخلیه ایله عودته مجبور اولدیلر .

تبدلات داخلیه و جلوس سلطان محمود خان ثانی

قائم مقام موسی پاشانک اباواجدادن موروث چفتلکاتی عصر سابقده ایکی دفعه مصادره اولنوب بعدهینه کندوسنه صالتش ومدت مدیده اینه بختی محافظه سنده ترک اولنهرق تذلیل وتحقیر اولنش اولدیغندن ارکان دولت حقنده حاصل اولان بغض وعداوتی هضم وکظم ایده میوب اله فرصت یکدیکی آنده اخذ انتقامه مسارعت و مطالعه انجام کار ایله تبدیل سلطنت ماده فحیه سنده خی جرأت ایتش ومقتوللرک مجوهرات نفیسه واموال کثیره سندن خلیجه شیء اختلاس ایش ايسه ده افعال ملعونانه سنک یانه قالمیه جنی اندیشه سیله مسلوب الشعور ایکن پادشاه جدیدک قرناسی سلطان سلیمک اعدامی تکلیف ایله تضییق ایده کلد کلرینه وبوکار مکروهه دخی متجاسر اولدیغی تقدیرده ارتق کندوسی ایچون تخلیص کریبان حیات خیرامکانده اوله میه جنی مجزومی بولندیغنه مبنی ایشدن چکلمک تدابیرینه تشبیه استعفايه آغاز ایلدیکندن ایکی یوزیکرمی اوچ سنه سی ربیع الاخرینک یکر می دردنجی کونی چاوش باشی شہسوارزاده حمداہ بک مقام قائم مقامی یہ اصعد وموسی پاشا بروسه دم اقامت ایتک اوزره ابعاد اولندی اون کون صکره شیخ الاسلام عطاء افندی دخی عزل وصمانی زاده عمر افندی مقام فتوايه ابعاد اولندقدہ معزولک هوادارلری القا آتیله یکچیری ضابطلری رفع پردہ ادب وعطاء اه افندینک ینہ مقامنه اعاده سنی طلب ایلہ اصرار ایلدکلرندن بالضروره ایرتسی کونی مسند مشیخندہ تقریر قلندی وبونک اوزرینه مفتی مشارالہک استبداد واستقلال صدچندان اولدی بنہ علیہ حمداہ پاشانک قائم مقامی قرق کونہ وارمق سزین مفتی اولان موسی پاشای دفعہ ثانیہ اولہرق قائم مقام نصب ایتدیرتدی عصر سلیم خانیدہ طربزون والیسی ایکن عضیان ایدوب بعده قریمہ فرار ایدن طیار پاشا پادشاه جدیدہ اولان منسوبیت سابقہ سنہ مغروراً استانبولہ کلکله فائل توقیر واحترام وموسی پاشا اوزریتہ اواخر شعباتده قائم مقام اولدی لکن حبث طینت وسلطان سلیمہ عداوت اصحابندن اولمغله شاید برعذر واهانتہ تشبث ایدر مطالعہ سیله اردو رجالی بغایت متوحش ومضطرب اولوب رفع ودفعی ضمنتہ صدر اعظم ایلہ بینلرینی افساد وطیار پاشا مقام قائم مقامیدہ بولندقچہ ماجرای سابقہ بناء جبارزاده اردوی ہمایونہ کلز دیوبر مطالعہ اختراع وایجاد ایدرک ایکی یوزیکرمی اوچ محرمنده عزلنہ ظفریاب اولملریلہ رجال دولتندن اکیلی مصطفی افندی مقام قائم مقامی یہ اعتلا ایلدی .

مقدمه و قعه ثانیه

علمدار پاشانك يانتده مجتمتع اولان رفيق و غالب و تحسین و بهیج و رامنز افندیلر سلطان سلیمك احساندیلده و برکشیده سی و متغلبه عصرک متفوری اولدقلرندن علمدار پاشایه شهریار مخلوعك محاسن و مکارمنی تعداد و انك خلعلیه دولت علیه نك گرفتار اولدیغی اغتشاش و مصائبی بیان و ایراد ایده ایده عاقبت اعاده جلوس خصوصنه اقناع ایلدیلر لکن بواصر عظیم پك چوق مقدماته محتاج اولمسیله صرهمسی دوشدکجه اقتضاسنه کوره حرکت اولمق اوزره ترتیب و تصمیم اولندقدنصکره اولار فیک افندی و ایکنجی دفعه ده بهیج افندی استانبوله کلوب و مقربان دولته حلول ایدوب متغلبه دارالسلطنه نك امور دولته مداخله بو ذات شاهانه نك بر شیخ الاسلام عزله اقتدارینی سلب ایتک درجده مغالبه لری اصدقای دولتی دڭخون و خصوصیه علمدار پاشایی مکدر و محزون ایتکله مساعدۀ سنیه ازران بیوریلور ایسه تأدیب اشقیایه حاضر و ظهور امر فرمان پادشاهی به منتظر در دیهرک انواع ریش خند و حتی سلطان سلیمك اعدامی دخی تعهد ایله قرنانك بوم شوق فؤاد لری مطمح نظر اولان نقطه دن دانۀ ابله فریب ایله صیدوبتد ایلدیلر بئزۀ علیه علمدار پاشانك استانبوله بکلسنه غایت خفی اوله رق رخصت سنیه تعلق ایدوب یکدیگرینی متعاقباً رفيق افندی وزیر کتبخداسی و غالب افندی رئیس و بهیج افندی دفتر دار و تحسین افندی چاوش باشی نصب اولنه رق بو وجهله اردوی هایونك اداره سی متفقین انه کچدی و رامنز افندی عقل خواجہ سی اولق اوزره علمدار پاشا یانتده قالدی . متفقین مشارالیم صورت ظاهر ده علمدار پاشایی صدر اعظمه مطیع و منقاد ایدرک صدر مشارالهی تحت امنیت و امتنانه اللدقدنصکره استانبول متغلبه لرینك تأدیب و تربیه لری کیفیتنی اشرا ب ایلر لیه و صدر اعظم دخی ذاتاً متغلبه نك تسلط و تجربندن بیزار و ایشك ایچ یوزینی ادرا کدن عاجز اولمغله تدابیر مقتضوره یی حسن تلقی ایلندی بونك اوزرینه ارتق مصلحت مرکز مطلوبه و اصل اولمش بو حسب التعليمات دور آیالت بهانه سیله علمدار پاشا اون اون بشیک قدر عسکرایله روسچقدن حرکت و برولره طوغری عزیمت ایلش ایدو کندن مذا کرۀ احوال سفریه ایچون ادرنه به دعوت اولندی .

و برق اچ کون لوازم مهماتنوازی و تعظیبات فائقه اجرا قلندی بعده عقد اولنان مجلس مشورته متار که نك امتدادی سبیلله ادرنه ده اقامت بهوده مصارف کلیه به سبب اولمغله استانبوله عودت ایدیلرک تنظیم مصالحه مقدار اولمدیغی حالده تجهیز لوازمات حربیه ایله حرکت ده اسهولتی و منفعتی اوله جفی تذکر اولمغله و علمدار پاشا دخی بنده برابر کیدر و خاکپای هایونه یوز سوررم دیمکله

اولوجهله حرکتہ قرار ویرلدی. فقط رسماً استیذان اولنورایسه طائفه متغلبه نك جواز
 کوسترمیه جککری درکار اولدیغندن استیذاندن صرف نظر وبرقاچ کون مارین وعابرینك
 سیر و سفرلری منع اولنه رق استانبوله تقرب اولندجه طویلأمنه اعتنا اولنق صورتی
 اختیار اولندی. رئیس الاشقیاء اولان قره دکر بوغازی ناظری قباچی مصطفی نك
 درجنك اول تدمیری ایچون بر مقدار عسکر ایله خصکوی اعیانی ارسال وجمادی الاولینك
 اون طقوزنجی کونی ادرنه دن انتخاب اولنوب اعیان مومی الیه بغته باغی مرقومك روم
 ایلی فناری قلعه سنك خارجنده اولان خانه سنی باصوب قتل وقلعه یمقلری مطلع اولنجه یه
 قدر قلعه پی ضبط وتحصن ایلدیکی خبریله باغی مرقومك سر مقطوعی اردوی هایونك
 چورلی مرحله سنه وصولی کونی وارد اولدی. قباچینك قتلی استانبوله انواع کفتکوی
 موجب اولدینی حالده اردوی هایونك علمدار پاشا ایله کلمکده اولدینی ارکان
 سلطنتك معلومی اولدقده جمادی الاولینك یکریمی اوچنجی بازار کونی باب فتوا پناهیده
 عقد مجلس اولنه رق کیفیت میدانه قونلدی. وقعه سابقه ده ذی مدخل اولنلرک جان
 باشلرینه صجرا یوب بعضیلری مدافعهلرینی تدبیر وبعضیلری دخی قلعه قبولرینك سدیله
 دخوللرینه رخصت ویرلأمنی تقریر ایدرلر ایکن قائم مقام پاشا بوکون سلوری یه وصالی
 کونی استانبوله واصل اوله جقلرینی بیان ایلمکله ارتق تدابیر وتدارکاته میدان قالمدینی
 تبین ایلدیکندن بالضروره بر معتاد طرف سلطانیدن دعوتنجی ارسال اولندی. وبروجه
 ترتیب ماه مزبورك یکریمی بشنچی صالی کونی سلطان مصطفی خان حضرتلری سنجاغ
 شریفی استقبال ایچون انجیرلی چفتلکنه دک چیقوب مرتب الای ایله اردوی هایون
 استانبوله داخل وصدر اعظم باب عالی یه قائد اولوب علمدار پاشا ولی افندی صحراسنده
 مرکوز اردوگاهنده قرار ایلدی. ماه مذکورك یکریمی یدنجی کونی علمدار پاشانك اوچ
 بش بیک آدم ایله باب عالی یه کلمسینی متعاقب شیخ الاسلام عطاءاه افندی عزل وعرب زاده
 عارف افندی نصب اولنوب ایکی کون صکره روم ایلی وانا طولی قاضی عسکرلری چاوش
 زاده شمس الدین افندی ولحومی زاده محمود نورالدین افندی وانا طولی پایه سنی حاز
 مشهور خواجه منیب افندی نفی وابعاد ویکيچریلرک اشداء اشراسندن ایکی چورباجی
 اعدام قلندی.

متفقیندن علمدار پاشانك معیتده بولنان رامنز افندی سلطان مصطفی نك سنجاغ
 شریفی استقباله ورودنده بالتوقیف سرعت سیر ایله استانبوله کیدیلوب سلطان سلیمی
 اجلاس ایلمك صورتی تذکر ایتش اولدینی حالده دیکرلری بونی تنسیب ایتیوب

متغلبه نك طرد و دفعندن صكره سراي هايونده بر مجلس عمومى عقديله سلطان محمد رابع
 خلعى طرزنده تبديل سلطنت اولمسنه قرار و ير مشلردى. بناءً عليه شيخ الاسلام و صدورك
 عزل و نفى اولملىرى متعاقب قيودان دريا سيدى على پاشانك دخى عزلى طرف صدر
 اعظميدن عرض ايتديرلش ايسهده والده سلطان حمايه قيام ايلديكندن صدر مشاراليه
 شمديلك بونك تاخيرى لازم كلديكنى و انتظام امور دولت حاصل اولمش ايدوكندن
 ارتق عودت ايللىرى لزومى علمدار پاشايه اشعار ايلدكده علمدار پاشا بهمه حال قيودانك
 عزلى مقتضى و بزم عودتمز انك حصونه موقوفدر. ديو تند و تيز بر جواب ارسال
 ايسكه و صدر اعظم بعض قرائن حاله دن سلطان سليمى اجلاس نيتنده بولندقلرى
 استدلال ايدوب بوايسه كندى منافع و مطالعه سنه مغاير بولمغله كيفيتى مقربان سلطنته اشعار
 و رفيق و بهيج و تحسين افنديلر ك قتللى خصوصنده طرف سلطنتدن ترخيص بيوريلور
 ايسه متفقينك ترتيب و تصورلى زائل و قلعه قولرينك سديله علمدار پاشانك دخى
 مدافعه سى قابل اوله جغنى تذكار ايلش ايسهده مقربان سلطنت متفقين طرفندن اوله
 كر كى كى اغفال قلنمش اولديغندن صدر اعظمك اخطارينه اصلا وجود و يرمديلر
 و بويه شيك احتمالى يوقدر ديو جواب كوندرديلر رفيق و بهيج و تحسين افنديلر اشبو
 مخبرات خفيه يه مطلع اولدقلى آنده علمدار پاشا اردوسنده بولنان رامنز افندى يه
 ابلاغ ماجرى و بعد ازين بر لحظه توقف موجب و خامت اوله جغنى انما ايللريله حمادى الاخرونك
 دردنجى پنجشنبه كوني على السحر علمدار پاشا اون بيك قدر عسكر ايله حركت و باب
 عالى يه دهشتمى مواصلت اولوب عرض او طه سنده قهراً صدر اعظمدين مهر هايونى اخذ
 و چاوش باشى تحسين افندى يه تسليم و صدر مشار اليه قرق الى سوارى يه تسليم ولى
 افندى حراسنده اولان اردوسنه ارسال ايلدكدن صكره شيخ الاسلام افندى ايله سائر
 اقتضا ايدن اركان دواتى جلب و جمع ايله سراي هايونه عزيمت ايلدى. سلطان مصطفى
 خان حضرتلى احواله واقف و لدقه اورته قيوى سد ايتديروب سلطان سليم
 و شهزاده سلطا محمودك اتلافنه امر و يرمش اولمغله باش چوقدار فتاح و خزينه كتخداسى
 ا به سليم و مير اخور محمد و خزينه و كلى نذير و تبديل خاصكيسى بغدادلى على و بونلره تابع
 بش اون نفر بوستانجى حرم هايونه دخول ايله سلطان سليمى شهيد ايدرك سلطان
 محمود خان حضرتلرينه دخى هجوم ايتمشلر ايسهده لاللى عنبر و حافظ عيسى آغالرك
 محافظه لريله سقف سرايه چيقوب تخليص كريبان حيات ايلديلر بعض سراي آغالردن
 منقولدر كه سلطان مصطفى خان چراغان كوشكنه ينش امر ايدوب كيتمك اوزره

ایکن علمدارك باب عالییه ورودی استماع اولمغله ترك اولمش و اگر علمدار پاشانك كسی یارم ساعت قدر تأخر ایش اولسنه ایدی سلطان مصطفی سرایده بولمیه جق و امر مطلوب سهولتله حاصل اوله جق ایش نه چاره که مقدرات الهیه سلطان سلیم حضرتلرینك شهادتنه و بو سببله يك چوق قان دو کلسنه متعلق اولمسیله حکم قضا قرین امضا اولمشدر . علمدار پاشا باب السعاده یی آچدیرمغه چالشمقده ایکن سلطان سلیمك شهادتی متین و سلطان محموده سوء قصد و قوعی محسوس اولمغله اصدقای دولته بر درجه خشیت و ملال استیلا ایلدیکه کمال حیرت و دهشتدن نه یاپه جقلرینی شاشرمشدر ایدی .

هله رامنر افندیك اخطارات متجلدانه سی ایلله آرتق سلطان محمودك صحت و سلامته حصر همت اولنوب زور بازو ایلله باب السعاده آچدیرلدی و مشاورالیه حضرتلری دخی بالای بامدن اینوب قوشخانه قیوسی جانبندن ظهور ایتمکه درحال تخت عثمانییه اجلاس و بیعت عمومیه اتمام اولنوب علمدار پاشا مقام صدارته اعتلا ایلدی .

خاقان مغفور بیك یوز یتیش بش سنه سنده تولد و ایکی یوز اوچ تاریخنده جلوس ایدوب یکریمی ایکیده مخلوع و اون درت آی مهرورنده شهید اولمغله سن شریفلری قرق سکر و مدت سلطنتلری اون طقوز سنه یه قریبدر . شهادتلرینك ایرتسی جمعه کونی لاله لیده واقع پدرلری تر به سسنه دفن اولندیلر قتله منفوره ایلله بو ماده مستهجنده قولاً و فعلاً ذی مدخل بوائمان اوچوزدن متجاوز اشخاص قتل و اعدام اولندیغی مثللو خونه سلیم خانیدن قائم مقام اسبق موسی پاشا و طیار پاشا منفارلی اولان از میر و شمنیده شمشیر مجازات قنطره سندن امرار اولندیلر و وقعه خلعه آت میدانی جمعیتی ارکانندن اولان شیخ الاسلام اسبق عطاء اه افندی ایلله قاضی عسکرلر نفی و تغریب و قیودانلق بارتبه و زرات رامنر افندییه توجیه اولنهرق سلفی سیدی علی پاشا بروسهده اقامت ایتك اوزره تبعید اولندی . صدر اعظمك هییتی و سطوت سیاستی یکچیریلری سوت دوکش کدییه دوندروب باخصوص مذاکره احوال سفریه و تنظیم مهام دولت علیه ضمننده اناطولی والیسی قاضی پاشا و جبار زاده و قره عثمان زاده و سپروزی یوسف بك و سائر اعیانلر استانبوله جلب اولمغله در سعادت صحرالری عساکر متنوعه ایلله مالامال اولدیغندن اداره امور دولته تعرض و تعریض ایتمکه کیمنه نك زهره سی قالمدی . بناءً علیه قانون اساسی طرزنده بر اتفاقنامه یازیلوب صدر اعظم و شیخ الاسلام و قیودان پاشا و قاضی پاشا و قاضی عسکرلر و رجال دولت و مذکورالاسم اعیانلر جانبندن تمهیر و ظرف پادشاهیدن باخطهایون تصدیق بیورلدی و سکبان نامیله عساکر منتظمه یازمغه شروع اولندی .

بعده سنه آتی‌ده سفر مقتضی اولدینی حالده عسا کر کلیه ایله سفره کلمک شرطیله اعیانلره رخصت ویرلدیکندن عودت ایتدیلر .
 بو کره دخی یکیکچریلرک کلیاً رفع و الغاسی تنسیب اولنش ایسه ده طرف پادشاهیدن مساعده بیورلمدی . لکن بو عدم مساعده ایله سلطان سلیم مرحومک جسارتسزلکی بیننده فرق کلی واردر . زیرا سلطان سلیم زماننده اون اون بشیک نظام جدید میدان ککشیدی . بو دفعه ایسه هنوز عسا کر منتظمه تدارکنه تشبث اولنوب باخصوص آستانه علیه صدر اعظمک سکرز اون بیک قدر قیرجه لی عسکر یله مملو اولدیغندن ای فناینه دولت عسکری اولان یکیکچریلرک محو وازاله سی حالده مرکز سلطنت بتون بتون صدر مشارالیهک عسکری النده قالمق لازم کلوب بو ایسه موافق قانون عقل و سیاست دکل ایدی . حتی سند اتفاق حضور هایونه عرض اولندقدن سلطان محمود خان حضرتلری خواجه لری اولان شهر امینی ابراهیم افندی و باش چوقدار عمر اغا ایله لدی الاستشاره بو شرائط استقلال سلطنتی محل اولدینی میدانده ایسه ده شمیدیکی حالده تصدیق اولنماسی ممکن اوله میه جغندن ایلروده الفا و احما اولنق لازمه ذمت سلطنتدندر دیدک لری و سلطان محمود خان حضرتلری دخی بونیت ایله خط تصدیق کشیده بیوردق لری منقولدر .

وقعه علمدار پاشا

صدراعظم استانبولک احواله غیرواقف و مدیر امور اولانلر یکیکچریلرک کلیاً مغلوبیتته معتقد اوله رق صدر مشارالیهی اطرافدن تقدیم اولنان جواری ایله ذوق و شوقه مبتلا و کندولری دخی تکمیل دارات و احتشامه اعتنا ایدوب حزم و احتیاطی فراموش و روم ایلی عسکرینی خانلره و وکلا قوناقلرینه تفریق و تقسیم ایله عروس غفلتی دراغوش ایلدک لری نه مبنی منتظر وقت فرصت اولان صناید یکیکچریان هیولای فتنه یه صورت ویردیلر و رمضان شریفک یگر می یدنجی صالی کیجه سی امساک و قتلرنده بغته باب عالی یه مهاجه نمای ورود اوله رق القای آتش ایلدیلر ایش بو درجه یه کلنجه یه قدر ارکان دولت خبر آله مامش و حین اقتضاده عسکرک تجمعی ایچون اعیانلره تعلیمات و بعض علایم کبی شیلر اعطا و ترتیب اولنماش ایدو کندن صدر مشارالیه دائره صدارتده بولنان توابعیله مدافعه یه قیام ایلدی ایسه ده امداده دسترس اولنه مامسیله و آتش هولناک باعث تفرقه جمعیت اولمغله بالضروره برمحزنه کیروب تحصن و هجوم ایدنلره قورشون آتمغه اغاز ایلدی . سکرز طقوز ساعت قدر بو حال دوام ایلدک دن صسکره یکیکچریلر مخزنک قبه سنی دلمکه شروع ایلدک لرندن

صدر مشار الیه یاننده بولنان جبخانه به آتش ویرمکه قبه ده و جوارده اولان ایکی
 اوجبوز قدر شقی پابرهوا و کندوسی دخی عازم دار عقبا اولدی .
 اشقیانک برطاقی بونکه مشغول ایکن برطاقی دخی رئیس غالب افندینک قوناغنه
 کیدوب مسافر بولنان الی التمش قدر روم ایلی عسکرینی طلب ایملریله افندی مشار الیه
 بلا مخالفت تسلیم ایلدی . اشقیا دخی بزم خصومتتمز وزیر اعظمک ذاته منحصر وانک
 ایسی ایه تمام اولدیغندن سزه برکونه ضررمر یوقدر دیوب و اوکلرینه آدم قاتوب قلعه
 قپوسندن اخراج و خانلرده و سائر یرلرده بولنانلری دخی بو وجهله طرد و دفع ایلدیلر .
 وزیر کتخداسی رفیق افندینک قوناغنه کلنله خاصکوی اعیانی اولوب نفراتیله برابر
 اوراده مسافر بولنان سلیمان اغانک رأی و تنسیبی اوزره دانه تفنک ایله جواب ویرمکه
 آنلر دخی جنکه ابتدار و بالاخره برچرخه طوپی کتوروب انک صدمه سیله قوناغک
 قپوسنی رخنه دار ایلدکلرندن افندی مشار الیه لاجل الاستیمان بنک طاشنه ایندکده اوزرینه
 هجوم ایله پاره پاره ایلدیلر جهادیه ناظری بهیج افندی اختفا ایدوب دفتردار تحسین افندی
 محتفی اولدینی محله طوتلش اولدیغندن آنی دخی پاره لیوب درجنک اول کشته تیغ
 شقاوت اولان یکیکچری اغاسنک اقا قپوسنده اولان نعشی یاننه القا ایلدیلر . اولوقتی مدرک
 اولان بعض ارباب و قوفدن استماع اولندیغنه کوره غالب افندی به عدم تعرضک سببی
 بوایمشکه رمضان شریفده رفیق و بهیج و تحسین افندیلر آیاصوفیه و سائر جوامعده اجتماع
 ایتدکجه تصحیح امور دولتی مذاکره ایدرلر و غالب افندی آنلره قارشیمیوب قرائت
 قرآن کریم ایله مشغول اولور ایمش . یکیکچریلرک جاسوسلری بونلرک احوالنه مد نظر
 دقت و استراق اقواللرینه حواله سامعه ملغت ایده کلدکلرندن غالب افندینک بو حال باعث
 سلامتی اولمشدر . قپودان راحر پاشا ظهور فتنهیه واقف اولدقده کویا سلوری وادرنه
 طرفلرندن یکیکچریلره امداد کله جکی جمله تحقیقاتندن اولق حسیبله آنلری مدافعه ایچون
 ادرنه قپوسی طرفلرینه بفرقه عسکریه کوندروب کندوسی ترسانده آرام و بویله بیهوده
 بر مطالعه و تدبیر ایله افاته وقت ایلدی .

وقعه هونلک منظور پادشاهی اولدقده عسا کر منتظمه سر عسکری قاضی پاشا و قپودان
 راحر پاشا و جر خه جی علی پاشا و اسکدارده مقیم قپودان اسبق صالح پاشا و سلیمیه قشلا سنده
 بولنان عسا کر منتظمه دن اوج درت بیك عسکری سرای هایونه جلب و نتیجه مصلحت
 انتظار اولنوب فتنه باغیه ایه وکلایی افنا ایتدکدنصکره سرای هایونه هجوم ایملریله
 جیوش منتظمه سر کرده سی اولان سلیمان اقا ساعت طقوز راده لرنده ایکی اوج بیك قدر

عسکر ایله خروج واشقیای قهر وتنکیل ایدرك چنبرلی طاشه قدر کلوب اورادن باب عالی طریقله صغوق چشمه قپوسندن سرای هایونه دخول ایلدی و فرو نلرده بوله بیلدیکی اتمک و سمید و چورك مثللو ما کولاتی آلوب کتوردی . سلیمان اغانک بو سیر و سفری ایکی ساعت اول واقع اولسه و رامنر پاشا کی دهاته عصر دن بولنان بر ذات تدابیر بیهوده ایله امرار وقت ایتیموب باب عالی یه امداد ایلسه صدر مشار الیهک تخلیصی ممکناتدن اولمسنه نظراً عن قصد اغماض اولندیغی تحت شبهه ده در حتی سرای هایون ارکانک وقعه دن اول خبردار ایدوکلری بعض قرأئن ایله استدلال اولمشدر .

سلطان مصطفانک تکرار سلطنتی زبانزد اشقیای و سرای هایونه هجوملری دخی بونی مؤید اولدیغندن چهارشنبه کیجه سی شربت شهادت اشراب اولندی . پادشاه مشارالیه غایت ساده دل و میوه نارسیده سلطنتی اله کچورمک ایچون ایقاز فته یه متجاسر اولوب دولت علیه نک انواع فلاکت و ضایعاتنه سبب اولمسیله برابر هم سلطان سلیمک و همده کندوسنک اتلافنه بادی اولدی . بیک یوز طقسان اوچ سنه سنده متولد و ایکی یوز یگر می ایکی سنه سنده جالس اورنک عثمانی اولوب اون درت ماه مرورنده مخلوع و اوچ آی یگر می کون صکره شهید اولمشدر . اختلالک ختام بولدیغی جمعه کیجه سی پدرلری یاننه دفن اولمشدر . فرداسی چهارشنبه کونی فته باغیه ینه سرای هایونه مهاجمه نمای ورود اولدیغندن سالف الذکر سلیمان اغا اوچ درت بیک عسکر ایله اخراج و خونریزانه چنکه شروع اولمغله درت بش بیک قدر شقی رهرو وادی عدم اولوب دو نتمای هایوندن دخی جمع امرای یکچریان اولان اغا قپوسنه کله انداخته مباشرت قلنه جغه مبنی طائفه باغیه نک بنیان ثباتلری متزلزل اوله رق اقدیمجه اغا قپوسنه احضار ایلدکلری قاضی عسکرلری عفو جرایم رجاسیله حضور هایونه کوندردیلر و فیما بعد مرکز اطاعتده قائم اولمق شرطیله عفو پادشاهی ارزان بیوریلوب طوب و تفنک منقطع اولدی . بو وجهله ایش بیتدی ظن اولنور ایکن ایرتسی پنجشنبه کونی صنادیدیکچریانندن قاندره لی نامنده بزکشتنی علی الصباح غلطه طرفلرنده علم افراز طغیان اولوب خوف قهر سلطانی ایله دونکی کون هر بری بر یرده اختفا ایدن اشقیای اجتماع ایدرك در حال طوپخانه و ترسانه بی ضبط و طوپخانه نک قزغانلرینی میدان لحه ایصال ایسکله آتش فته یکی باشند علو افشان اولدی . ایکی کوندنبرو وقوعبولان مقاتلاتده مومی ایه سلیمان اغا و بعض ضابطان و التی یوز قدر سکبان مقتول اولوب اشقیای ایه سرای هایونک صولریخی کسمک و آیاصوفیه مناره لرندن درون سراه قورشون آتمق درجه لرنده ادبسنر لکه جرأت ایتلمیله و سبک مغزان اهالی جانبندن قولاً

و فعلاً طائفه باغیه به معاونت و حتی سرای پادشاهی آشچی و قپوچیلری مثللو بعض خائنلر بیله عساکر منتظمه به اظهار خصومت ایتمکده بولمیلرله آرتق امید غلبه بر طرف اولدیغندن قاضی پاشا و رامز پاشا و ترسانه امینی مورده لی علی افندی فراره مجبور اولدیلر بعده چرخه جه علی پاشا و قاضی عسکرلر مجمع اشقیایه کوندریلوب طول و دراز محاوراتدن صکره سکبان اوجاغی لغو اولمق اوزره سد باب فتنه اولندی و ایرتسی جمعه کونی یکیکچریلر سلیمیه ولوند چفتلکی قشله لرینی احراق والیرینه کچن عساکر منتظمه ضابطان و نفراتی اعدام و افنا ایله تتمیم شقاق ایلدیلر .

اشقیانک طعن انداز اوله کلدکلری شیخ الاسلام عرب زاده افندی عید شریفک اوچنجی کونی عزل و دری زاده عبدالله افندی نصب اولتوب بدایت وقعه ده چاوش باشیلقدن قائممقاملغه انتخاب اولنان محسن پاشا دخی صدر صدارته اعتلا ایلدی رؤسای اشقیادن قاندره لی محمد چکدیر کوندروب بروسه ده اقامته مأمور اولان قپودان سابق سیدی علی پاشایی کتورتشمش اولمسيله طلب اشقیایله مقام قپودانی به اصعاد اولندی قاضی پاشا مملکتی اولان علائیه به واصل اولمش ایسه ده یکیکچریلرک ابرام والاحارلیله صادر اولان فرمانلر موجبنه تکه لی اوغلی محمد اغا هجوم ایدوب سلح سنه مزبورده اعدام ایلدی بهیچ افندی و مورده لی علی افندی دخی دانه دام فریب ایله میدان چیقاریلوب سنه آتیه اوائلنده ازاله اولندیلر رامز پاشا روسجغه مواصلت ایدوب لکن سالف الذکر قاندره لی محمد میر میرانلق توجیهیله تعقیبنه کوندرلمش و سلسیره والیسی خسرو پاشا دخی روسجق اوزرینه مأمور ایدلمش اولدیغندن بالضروره قارشویه کچوب روسیه لولره التجا ایلدی و درت بش سنه اورالرده آرام ایلد کد نصکره بعد المصالحه بلغراد محافظه نامیه اغفال و جلب اولنه رق یرکویده اعدام قلندی .

انکلتراه ایله تجدید مصالحه اولندیغی

دولت علیه فرانسه خاطری ایچون روسیه به وانکلتراه لولر روسیه خاطری ایچون دولت علیه به اعلان حرب ایلش اولدقلری حالد فرانسه و روسیه دولتری عقد مصالحه و تنظیم اتفاق ایلش اولدقلرندن سلطنت سنیه ایله انکلتراه لودخی تجدید مصالحه به عرض خواهش ایتدکلری جهتله بالمخبره طرف دولت علیه دن مرخص تعین اولنان وحید افندی ایله انکلتراه مرخصلری چناق قلعه سننده اجتماع ایتمشلرایدی . افندی مشارالیه اصحاب درایت و مکناتدن برذات اولمغله یک کوزل بر معاهده عقد و تنظیم ایتمکله سلطنت سنیه بی برغائله هائله دن تخلیص ایلدی معاهده مذکوره ایکی یوز یکرمی سنه سی ذی القعدة سنک اون طقوزی

تاریخچه مورخ و محافظه حقوق دولت علیه بی متضمن اولوب عهدنامه مجموعه سند مسطور
اولمغه عیناً درجه تصدی اولمندی

تجدد سفر روسیه

سلطان سلیم مرحومی درلودرلو مواعید دلفریب ایله اغفال ایدرک روسیه لویه اعلان
حرب درجه سینه قدر کتورمش اولان فرانسه ایمپراطوری یوناپارته یتلسیتده روسیه
ایمپراطوریه عقد مصافات ایلدکده دوات علیه نک دخی روسیه لوا یله متارکه و متعاقباً معاهده
ایلرینی شرط ایلدیکنه مبنی روسیه نک ضبطه کچمش اولان قلاع و ممالک دولت علیه
و بوزجه اطه محاربه سنده ضبط اولنان قالیون عقب متارکده جانب سلطنت سنیه به تسلیم
قلمق شرائط اساسیه سی ایله ایکی یوز یکرمی اوچ سنه سی حمادی الاخره سنک یکرمنجی
کونی عقد متارکه قلمقش و مذاکره مواد صلحیه پارسده اجرا اولمق اوزره اوراده
بولنان دولت علیه سفیری محب افندی به مرخصلق فرمانی کوندرلمشیدی . مؤخرآ
روسیه و فرانسه ایمپراطورلری ارفورتنده ملاقات ایدرک بیلرنده منعقد اولان مصالحه
مرتبه اتفاقه ایصال اولمغه و باخصوص فرانسه ایمپراطوری سلطان سلیمک خلیله دولت
علیه نک برخیلی وقتدنبرو چالیشدیغی تنظیمات عسکریه و ملکیه سی برآنده محو و هبا
اولدیغی مشاهده ایله اصلاح احوال دولتن بالکلیه مایوس اولمغه ممالک دولت علیه نک
تقسیمی مذاکره سیله مسقوولرک حرایص و منهمک اولدقلری نقطه دن ارائه دانه فرب
ایدرک روسیه ایمپراطورینک شهباز فؤادینی شکار ایلدی . لکن بوصورت پکده قولای
اولیه جغندن بشقه استانبولک مسقولر انه کچمی بوجهله تجویز اولنور مواددن
اولدیغندن نهایت شمدیلاک افلاق و بغدادنک تملکیله روسیه ایمپراطورینی ارضا ایده بیلدی .
بناءً علیه مذاکره صلحیه به مباشرت اولمق ایچون محب افندی طرفندن فرانسه خارجیه
نظارتنه افاده واستعجال اولندقجه کاه پترسبورغدن ایلچی کله جک دنیلوب و کاه سلطان
سلیمک شهادتندن ناشی عرض انفعال ایدیلوب بویله جه برخیلی زمان امرار اولندقدن
صکره بالاخره مسقولر افلاق و بغدادنی ترک ایتیمور و مقدا عقد اولنان متارکه شروطنه
روسیه ایمپراطورینک مساعدیه سی استحصال اولنه میور دیهرک و توسطدن دخی اعراض
ایدیلهرک عادتاً محب افندی بی استتقال ایلدیلر بوحالک ظهورنده آرتق دولت علیه نک
طوغریدن طوغری به مسقولو ایله مخابره ایلمی لازم کلسکه علمدار مصطفی پاشا صدارتنده
بکرشده بولنان روسیه فلد مارشالنه مکتوب یازیلوب جواب موافق الندیغندن
بعدالوقعه رئیس غالب افندی و حرمین پایه لولرندن محمد رضا افندی و بکلکچی

عزت بك مرخصی اول وثانی وثالث انتخاب اولنوب یكرمی اوچ سنه سی شوالنده اعزام قلندیلر غرائبندركه فرانسه ایمپراطوری سلطنت سنیه یی روسیه وانكلتره كبی ایکی دولت عظیمه ایله بوزشیدردقدنصكره اورته ده براقیویرمش وبوكره دخی واقع اولان بیوفالخی دولت علیه یه داغ بربالای داغ اولمشیکن ایکی سنه یه وارمقسزین روسیه وفرانسه دولتری بینده اولان مصافت و اتفاق مبدل خصومت وشقاق اولقله بوناپارته دولت علیه یی یکی باشند اغفاله چالشدی ایسه ده دولت علیه اوچنجی دفعه اوله رق الدائمقندن اجتناب و كندوسندن اوكرندیکی لسان دیپلوماسی ایله كچشدیروب نهایت روسیه لویله فرانسه لونك كرم حرب و قتال اولدینی اوانده مسقولرایله عقد مصالحه ایلشدر حتی بعض فرانسنرتاریخلری بوناپارتك خطیاتی تعداد ایتدكلری صرده دولت علیه یی نظر اتفاقدن براقسی سببیه مسقولولر فرانسنرك هجومی مشاهده ایتدكلرندن در حال سلطنت سنیه ایله عقد مصالحه ایدرك طونه سواحلنده بولنان یوزاللی بیهك قریب عسكركلرینی جلب وفرانسه علیهنده اعماله مقتدر اولدیلردیوبوناپارته یه طعن انداز اولشدر دره علمدار پاشاوقعه سنده صدراعظم نصب اولنان محسن پاشانك عدم اقتدارندن وسیدی علی پاشانك زوربالر التزامیه قیودانلق مقامنه اصعاد قلمش اولمسندن ناشی یكرمی اوچ سنه سی ذی القعدة سنك اونجی كونی محسن پاشاویكرمی درت سنه سی صفرینك دردنجی كونی سیدی علی پاشا عزل اولنوب مهر صدارت حلب والیسی صدراسبق یوسف پاشایه ارسال وچرخه جی علی پاشا قائممقاملق ومؤخر آقپودانلق ایله اجلال قلندی و صدر جدیددخی ربیع الاولك طقوزنجی كونی در سعاته واصل اولدی اسماعیل ویركوی و ابرائیل قلعهرینه هجوم ایدن مسقوفرقه لری مدافعه اولنقده ایسه ده دشمنك طونه نك بو طرفنه كچمك صدنده اولدینی محقق اولغلله صدراعظم سردارا كرم نصب اولنهرق سنجاق شریفی مستصحباً موقع حربه عزیمتی قرار كیر اولدیغندن یكرمی درت سنه سی جمادی الاولیسنده قاعده قدیمة دولت علیه وجهله صدر مشارالیه اردوی همایونه حرکت و شمینی یه مواصلت ایلدی .

یكرمی درت سنه سی محاربانی

روسیه لینك بیوك اردوسی دو بریجه یه كچد كدن صكره ایکی یه منقسم اولوب برفرقه سی وارنه و دیگر فرقه سی شمنیده بولنان اردوی هایون اوزرینه صولت ایلدی و بك قدا كارانه جنكه كیرشدی عساكر اسلامیه دخی امر مدافعه ده دلیرانه حرکت و تدمیر دشمنده ابراز

شجاعت ایلر یله مسقولو خلیجه تلفاته دوچار اولدقلرینی مشاهده و برایشه مقتدر اوله میه جقلرینی استدلال ایدرک عودته مضطر اولدقلری مثللو دونمهای هایونک وارنه یه وصولی جهته اوراده بولنان دشمن فرقه لری دخی کاینیخی تضییق اولندیغندن انلردخی رجعت قهقری یه مجبور اولدیلر بناء علیه اردوی هایون روسجغه سوق اولنوب یرکویه کچمک و بکرشه طوغری حرکتله طونه نک بو طرفنده بولنان دشمنی عودته اجبار ایلک خصوصنه قرار ویرلمشیکن طونه سر عسکری خسرو پاشا رسوانده بر فرقه روسیه عسکر یله محاربه ایدرک منهنزم اولمغله و مسقویوک قوماندانی کافه جیوش متفرقه سنی جمع ایدرک التمشیک قدر عسکر ایله سلستره نی محاصره ایلکله بالضروره بکرش اوزرینه مصمم اولان حرکت ترک و شجاعان غزاتدن پهلوان ابراهیم اغا و بوشناق اغا و فوج فوج کلکده اولان دره بکلری و اعیانلر سلستره طرفنه اعزام اولنوب و صدراعظم دخی اردوی هایونی روسچقده براغوب عسا کر منتخبه ایله بالذات عازم سمت غزا اولدی .

روسیه لولر سلستره پیشگاهنده انشا ایلدکلری استحکاملرنده جزئی عسکر تدارک ایدرک قوه کلیه ایله سلستره نک ایکی ساعت بعدنده جنود اسلامیه یی قارشولدیلر و رمضان شریفک اون بشنجی کونی حربه مباشرت اولندی سکز طقوز ساعت آتش جنک و قتال کرما کریم اشتعال و احشامه قریب ته دانی علی پاشا زاده مختار پاشانک ارنبوددلا و لر یله امداده یتشمسی دشمنک باعث انهنزای اولوب سالف الذکر استحکاماتده دخی پایدار اوله میه رق دو بر یجه یه طوغری فرار ایلدیلر بو محاربه ده اون بیکدن متجاوز روسیه لولر تلف اولدینی مرتبه تحققه واصل اولمشدر . بعده صدراعظم سلستره صحراسنه اردو قوروب مشارالیه پهلوان ابراهیم اغایه وزارت توجیه و سائر غزات موحدینی عطایای مناسبه ایله تلطیف ایلدی . روسیه لولر یاره لولرینی و مهمات و آغیرلقلرینی و عسکرلرینک چوغنی قلاص طرفنه کچروب بروده برقاج استحکام ایچنده بر مقدار عسکر براغوب حال تدافعی یه کیرمش اولدقلرندن و موسم شتا دخی دخول ایلدیکندن صدراعظم شوال ایچنده واقع قاسمک اون التیسنده اردوی هایونی مشتای شمنی یه ایصال ایلدی .

بوسنه طونه نک بروجه تنده اکر چه خلیجه موفقیت ظهوره کلدی لیکن التییدی آیدنبرو محصور اولان اسماعیل و ابرائیل قلعه لرینه معاونته امکان بولانه مامش اولدیغندن مذکور قلعه لرک گرفتار آیدای اعدا اولدینی خبری اردوی هایونک مشتایه دخولند نصکره جه واصل اولمغله موجب تزايد اکدار و آلام اولدی .

ارضروم و الیسی و شرق سر عسکری اولان فرهاد پاشا و طربزون و الیسی و چرکستان

سواحلی سرعسکری شریف پاشا و چلدیر والیسی سلیم پاشا اولحوالی خاندان قدیملرندن و ذاتاً یکدیگریله منافس اولدقلرندن هنگام سفردہ اولسون اتحادایلرلی فریضه ذمتلری ایکن بالعکس تشدید خصومت ایلرلیله بونلرک اتفاقسزلخی اولحوالیده برایش کوریلهمامسنی وفاش قلعهسنک روسیهلوالنه کچمسنی موجب اولمغله جلهسی عزل وتنکیل اولنوب سنه آتیه ایچون شمیدین ولایه وعسکر ترتیبینه مباشرت اولندی .

یکرمی بش سنهسی وقوعات حربیهسی

یوقاریده بیان اولندیغی اوزره روسیه وفرانسه ایمپراطورلری بیننده عقد اولنان مقالوله نامه حکمنجه دولت علیه ی افلاق وبغدان قطعهلرینی ترکه اجبار ایتک ایچون مسقولولر کمال کرمی وشدتله جنکه میاشرت ایدوب اگرچه اسماعیل و ابرائیل قلعهلرینی ضبط ایده بیلمشلرایسهده شمنی و سلستره محاربهلرنده منهزم اولدقلرندن وسلطنت سنیه بلافتور مدافعهیه دوام ایتکده بولندیغندن ایکی یوز یکرمی بش سنهسی اول بهارنده روسیهلوال تکرار تدارکات جسیمه ایله دوبریجده اجتماع ایدوب وارنه و سلستره و شمنی وینکبولی اوزرلرینه درت قول عسکر ترتیب ایدرک هجوم واقتحامه مبادرت ایلدیلر وارنهی محاصره ایدن فرقه دونمای هایونک اورایه وضولیله عودته مجبور و شمنی اوزرینه کلان قلمار شال اردوسی دخی بش اون کون محاربه ایتدکدنصکره تلفات کلیهیه کرفتار اوله رق رجعته مضطراولدی ایسهده دوبریجه جوارلرنده بولنان بابا پاشا وجرخه جی سروری پاشا وقوشانجه خلیل پاشا مفرزه لرینه غلبه ایدوب بابا پاشا ایله سروری پاشایی اسیر و خلیل پاشایی شهید ایلدیلر وبالاخره سلستره و روسجق قلعهلرینی ضبطه ظفریاب اولدیلر نیکبولی اوزرینه سوق ایلدکلری فرقه اوجهتدن بالقانلره طوغری ایلروملک و ممکن اولورسه تجاوز ایدرک دولت علیه یی تهدید ایتک مقصدینه مبنی اولوب کرچه لوفیجهیه قدر تسخیر ایلمشلرایسهده مدافعات شدیدیه ثمره سیله اضمحلال درجه لرینه قریب تلفاته کرفتار اولدقلرندن لوفیجهیه پیادار اوله میوب طونه ساحلنه عودته مجبور اولدیلر بوسنه نک ایام صیفی محاربات مذکوریه ایله مرور ایدوب انجق روسیهلوالر الی بیکدن متجاوز عسا کر معلمه ضایع ایتملریله قوتلری خلیجه تدنی ایلدی .

صدارت لاز احمد پاشا

صدراعظم یوسف ضیا پاشا عصر سلیم خانیده نظام جدید مرتبلرندن اولمغله یکچریلرک

منفوری اولوب کندوسی دخی بونی اندیشه ایدینه رک بغاة یکچیریانک تلطیف واستمالترینه مکب وساعی وبوجهتله اردوی هایونده طائفه مرقومه نک متجاسر اولدقلری سیئاته اغماض عین ایله تربیه لرندن متحاشی اولمق تهمتیه عزل وتبدیلی نزد پادشاهیده قرار کیر اولمش واولوقتی ادراک ایدن بعض ارباب وقوفدن استماع اولندیغنه کوره تزیدد وقع وحیثیتی ضمنتدم خالق پایه سی طلبنه متجاسر اولسی اغبرار طبع ملوکانه یی استلزام ایش ایدوکنه مبنی ایکی یوزیکرمی التی سنه سی ربیع الاولنده عزلی واقع اولدی ومقام صدارته علمدار پاشا چاشنیسنده ارباب حرب وضربدن بریسی آرانلدیغندن ابرائیل ناظری لازاحمداغ بومثلولرک مرجی کورنمکه خدمت صدارت وسرداری محول عهدۀ اشتہاری قلندی یوسف ضیاپاشا صاحب معارف وفن تاریخه واقف برذات اولدیغی حالده خالق پایه سی طلی کبی معناسز وطبع ملوکه کران کله جکی شبهه سز اولان برشیئه تصدیسی عقله ناملایم ایسه ده پک زیاده زیب وزینته ودارات وحشمته مائل اولسنه نظراً بلکه بویله برامرنامعقوله جرأت ایتشدن چونکه صدر مشارالیه اردوی هایون ایله داودپاشا صحراننده اقامت اوزره بولندیغی حالده شیخ الاسلام دری زاده عبداہ افندی مکتوب بحیسنی استفسار خاطر ضمنتدم ارسال ایلدکم لوازم تکریماتی بعدالایفا خزینہ دارینی چاغروب مکتوب بحی افندی اوغلمزہ دائرہ خیامیزی سیرایتدیردیو امرایتمکه اوطاغ وتیاق چادرلری تماشاولنورایکن بریسینک کش آویزه سی ناقص اولدیغندن خزینہ داراغا بورایه مقتضی اولان آویزه دردست اعمالدر دید کدنصکرم لاجل التنفس خزینہ دار اغانک چادرینہ وارلدیغی متعاقب قیومحی باشی یه عتاب وآل عثمان اردوسنک برهفته دنبرو تأخر عزیمتنه سبب اولدیغی بیان ایله آویزه نک سرعت تنظیمی تنبیه ایش اولدیغی مکتوب بحی مومی الیهک اوغلی موالیدن عزیز افندی مرحوم نقل ایدر ایدی .

یکرمی التی سنه سی محارباتی

اول بہارک حلولیلہ عسا کر عثمانیہ فوج فوج اردوی هایونہ وارد اولمقدہ اولدیغندن صدر جدید روسجفک استردادینی تصمیم ایدرک ایکی یوزیکرمی التی سنه سی جمادی الآخرہ سنک التنجی کونی شمنیدن حرکت وروسجق اوزرینہ صولت ایلدی .

مسقولولرک مدافعه قصدیلہ کوندر دکلری قوہ مفرزه منہزم اولمغله وروسیہ دولتیله فرانسه دولتی بیننده محاربه وقوعی مرتبہ تحققه وصول بولمغله مسقولولر (له) حدودینہ عسا کر

کلیه سوقنه مجبور و بوجهتله کچن سنه طونه سوا حلقه واقع اولان ضایعات کلیه عسکریه لرینی ا کاله غیر مقتدر ایدو کلریته مبنی هجوم اسلامیانه تاب آور مقاومت اوله میوب ماه مزبورک اوز سکنز نجی کونی روسجنی ترک ایلدکلرندن جیوش موحدین قلعهیه داخل اولدی .

اشبو روسجق مظفرتی اوزرینه سلستره و دو بریجه طرفلرنده بولنان مسقوفرقه لرینک طرد و تنکیلی متصور ایسه ده طرف هایوندن طونه نک قارشو طرفنه کچلمسی و بکرشه طوغری حرکت اولنسی امر بیورلدیغندن و دین والیسی ادریس پاشا و سیروزی اسماعیل بک قلفاته امرار اولنوب صدر اعظم دخی اون بیک قدر منتخب عسکر ایله خلال رمضانده یرکوی جانبنه مرور ایلدی . روسیه لولر ایکی ساعت قدر کیرویه چکیلوب استحکام آلتنه کیردیکی مثللو صدر اعظم دخی استحکام انشاسیله مشغول اولدی . بعضی ارکان دولت مادام که طونه عبور اولنمشدر باری بلا توقف ایلرویه کیدیلور ایسه خصمک ضعف حالی مشهود اولسیله بلکه برایش کوریلور دیو صدر مشار الیهی تشجیع ایلدیلر ایسه ده کارگیر اولدی . رمضانک اواخرنده روسیه لولر روسجنگ برقاچ ساعت اشاغیسندن اوچ بش بیک عسکر امرار و روسجق خارچنده بولنان تیه دللی زاده ولی پاشا اردوسنی باصوب تارومار ایسکه وزیر کتخداسی غالب افندی ایله برابر قالان کتبه و خدمه و اصناف مثللو درندی جمعیت بربرینی باصه رق درون قلعهیه جان آتدیلر . روسیه لولر دخی محاصره صورتنده ساحلاری احاطه ایسکه صدر اعظم اردوسی مبتلای اضطراب اولدی . زیرا ذخایر و مهماتلری منقطع اولدقدن بشقه پک احتیاطسز کچلمش و حتی لزومی مقدار مراکب بحریه بیلله استحضار قلماش ایدی . صدر مشار الیه هزار مشقتله روسجغه عودت ایده بیلوب قسم اعظمی حال محبوسیتده قالدیلر . بو اوانده ایسه فرانسه ایمپراطوری بوناپارت روسیه ممالکنه هجوم ایتک اوزره اولدیغندن روسیه لیلر عقد صلحه خواهشکر اولملریله بالخباره وزیر کتخداسی غالب افندی مذاکره صلحه ضمننده بکرشه کوندردی . آنجق مسقولولر عساکر اسلامیانه عودتنه رخصت و یرمیوب فقط ذخیره اعطا ایدرلردی بو حال ایله براز زمان ده مرور و موسم شتا حلول ایدوب چادرلرده آرام ممکن اولدیغندن مسقولولر عساکر اسلامیانه سلاحلرینی آلوب مسافره افلاق کویلرینه تقسیم ایلدیلر .

مصالحه روسیه

بوندن اول وقوع بولان مکنله لرده مسقولولر افلاق و بغدادن ممالکنی وفاش نهرینه قدر چر کستانی تماماً طلب ایده کلدکلرندن بشقه صربلورده دخی بیوک امتیازلر ایستلردی .

شمدی ایسه فرانسه لو ایله متهی حرب اولدقلرندن هر نصل اولور ایسه دولت علیه ایله عقد صلحه مجبور ایدوکلرینه مبنی پروت نهرندن حدود قطع اولنه رق خوتین و بندروکیلی و آق کرمان و اسماعیل قلعه لرینک تمکیلله اکتفا و صربلوری دولت علیه نک آغوش مرحمت و عاطفته تسلیم ایلدیلر. روش حاله باقینجه اگر هزیمت مزبوره واقع اولیوب دولت علیه اظهار ثبات ایده بیلسه حدود سابقه اوزره عقد صلح میسر اوله جنی امید اولنور ایدی. اولوبابده بکرش عهد نامه سی نامیله مشتهر اولان وایکی یوز یکرمی یدی سنه سی جمادی - الآخره غره سی تاریخیه مورخ بولنان صلحنامه رساله عهده ده مندر جدر.

احوال صرب

ویانه انهمزامندن صکره نمچه لولر بلغراد ونیشه قدر تجاوز واستیلا ایلدکلری هنکامده صرب رعایاسی تحصیل استقلال سوداسنه دوشوب علم افراز عصیان اولمش ایه ده بیک یوز ایکی تاریخنده کوپرلی زاده صدر شهید فاضل مصطفی پاشا صربستان قلعه لرینی نمچه لولرک آیدای تغلبلرندن تخلص وعصاة صربیه یی تازیانه شمشیر ایله تأدیب ایشیدی. اوتوز سنه صکره بلغراد وسائر قلاع صربیه تکرار نمچه لولرک گرفتار استیلاسی اوله رق یکرمی سنه قدر زیر اداره لرنده قالدقدن صکره ینه جانب دولت علیه دن استرداد اواندی و صربلورک آرزولری استقلاله دسترس اولمق مرکزنده اولمسیله نمچه لورک اداره - لرندن دخی چندان محظوظ اوله مدیلر. سالف الیان عصیان واستیلا لر مبیله قرای صربستانده اولان اسلام طاغیلوب بعد ازین دخی امنیت کامله حاصل اوله مدیغندن اهالی اسلامیه بلغراد و سمندره و بوکردانی و فتح الاسلام و اوزونجه و صوقل کبی صربستانده واقع قلعه لرده تمکن ایتکله نوعا صربیه اراضیسی اسلامدن تخلیه اولمشیدی. بوندن صکره اجانبک القای مفاسدیله کوندن کونه فک ربه تبعیت هواسی ذهنلرنده تزايد و تقرر ایدوب سلطنت سنیه دخی بوحاله مطلع اولمش حتی ایکی یوز ایکی سفرنده اردوی همایونک روسیه و آوستریا دولتلرندن قنغیسی اوزرینه سوق اولنوب دیکرینه سرعسکر کوندلمسی تذکر اولندیغنی ائشاده صربستانک ملحوظ اولان عصیان و طغیانی در پیش نظر مطالعاه قانه رق موکب صدر اعظمینک و دین جانبنه سوقی مقتضی کورلمشیدی. عصر سلیم خانیده روم ایلمینک هرجهتی برر متغلبه النده اولدیغنی مثللو بلغرادده دخی قلعه یمقلرندن یعنی مستحفظ یکچیریلرندن جزایر غرب اوجاغی طرزنده ذایلر تغلب ایدرک صربیه رعایاسی حقنده انواع مظالم و تعبدیاته قویلدیلر وایکی یوز اون التی تاریخنده والی

بولنان مصطفی پاشای دخی اعدام ایلدیلر . بناءً علیه صربستان رعایای روسیه لوردن کوردکاری تشویقات و دایلدن مشاهده ایلدکاری تعدیات اوزرینه ایکی یوز اون سکر سنه سنده زروء عصیانہ عروج ایدوب قره یورکی نامنده برکنزی یعنی کوی کهیاسنی عموم قوماندانی انتخاب ایلدیلر . دایلدن بو وجهله ایشک فناالشیدیغنی کوردکارنده کرک جانب دولت علیه دن و کرک بوسنه وودین جهتلردن استمداد وبلغراد الدن کیدیور دیو فریاد ایتشلر ایسده نظر دولته متهم اولدقلرینه وقره یورکی دخی صرب رعایای دولت علیه عاصی اولیوب دایلدن مظالمه طاقت کتوره مدکلرندن بالضروره انلرک علیه قیام ایلش اولدقلرینی بیان ایله بوسنه وودین والیرینی اغفال ایده کلدیکنه بناءً کرک جانب دولت علیه دن و کرک ولایه مزبوره طرفندن کاینغنی معاونت و امداد اولنماغله صربستان قلاعنده بولنان اهالی اسلامیه محصور حکمنده قالدیلر . یکر می تاریخنده بلغراد محافظلغی سلیمان پاشایه توجیه اولنوب فقط صربستان طریقلری اهل اسلامه مسدود اولدیغندن نمچه ممالکسندن مرورایله بلغرادک قارشوسنده واقع زمونه کلدی . اول آراق بوسنه والیسنک ایکی اوچ بیک آتلو ایله بلغراد امدادینه کوندردیکی قوشانجهلی خلیل اغا حمله صف شکنانه ایله بلغراده واصل و بغتة قلعهیه داخل اولوب اهالینک اکثریسی دایلدن بیزار اولدقلرندن خلیل اغایه عرض مطاوعت ایلر ایله سلیمان پاشا دخی درحال بلغراده مرور و رئیس بغاة اولان درت نفر دایلی اعدام ایلدکن صکره قره یورکییه خبر ارسال و سبب فتن اولان دایلدن ازاله سی جهتیله بعدازین اهالی صربییه مظهر عدالت دولت اوله جغندن ترک سلاح ایله یرلی یرینه طاغملری بیان اولندقدن ترک سلاح ایتک شویله طورسون بر درجه ده قلعده تقرب ایله دائره محاصره یی تضییق ایلدیلر . نهایت ایکی یوز یکر می بر سنه سی عید اضحی کیجه سی بغتة وبلغرادی راشد پاشا تاریخی قولنجه واروش قپوسی محافظی بولنان عزیز بک نامنده بر خانی بیک مجار التونی اعطاسیله اطماع ایدرک واروشه مستولی اولمیر ایله قره یورکی قلعده بولنان محافظ سلیمان پاشا و قوشانجهلی خلیل اغایه خبر کوندروب دولت علیه بلغرادک محافظه سنی بزه حواله ایلدی چیقوب کیتسونلر دیو تکلیف تخلیه و تسلیم ایلدی . بلغراد اوچ درت سنه دنبرو محصور حالنده اولوب بوکره واروش دخی الدن کیتمش اولدیغندن بلازاد و ذخیره درون قلعده او تور مق تحت امکانه اولدیغنه منی خلیل اغا کندی عسکرینی واهالیدن بر مقدار کسان استصحاب ایدوب بر تقریب ایله نهرأ سمت سلامت واصل اولمش ایسده محافظ پاشا و سالف الذکر عزیز بک نیشه کیتمک اوزره بلغراددن سکر اون ساعت مفارقت ایلدکلرنده صریلور

با صوب جمله سنی اتلاف و اهالی قلعه حقه ده دخی انواع مظالم ایله قتل عام قاعده سنی اجرا ایلدیلر بو وجهله بلغراد الدن کیتد کدنصکره صو قولدن ماعدا قلعه لر پایداری اوله میوب جمله سنی عصاة صربیه ید تغلبه کجی متعاقباً روسیه سفری ظهور ایتمکه دولت علیه بونکله مشغول ایکن بوسنه و ودین و صوفیه طرفلرندن عساکر کلیه تعیین اولوب عصاة صربیه نك تأدیله اوغراشیلوردی . صرب قومی بدویت وجفا کشلکه مألوف و بش اون سنه دنبرو کرک کندیلیلرینک ممارسه سی و کرک مسقولرک تعلیمیه قواعد حربه یه ذی وقوف اولدقلرندن پک کلیتلو تلفات و ضایعاته مبتلا اولدقلری حالده شدائد مقاتله یه تحمل ایدرک اصلا فتور کتور مدکلرینه و طاغیر باشنده تحصن ایده کلدکلرینه بناءً استیصاللری ممکن اوله مامشیدی . روسیه محاربه سی ختام پذیر اولدقندن صکره ایکی یوز یکر می یدی سنه سی رمضاننده صدر اعظم لاز احمد پاشا معزول و صوفیه سر عسکری خورشید پاشا مقام صدارته موصول اولوب اردوی هایونی ادرنه یه کتوردی و اغرائی استانبوله کوندردی مسقولولر حسب المصالحه صربلورله آچیقندن معاونت فعلیه ایده مامکده ایشه لرده تشجیعات و ترغیباتدن و اعمال شدت اولتمامسی ایچون دولت علیه یی تعجیزاتدن خالی اولدقلرندن صرب رؤسای بکرش عهد نامه سنده مسطور اولان مساعداته قناعت ایتیوب استقلاله قریب امتیاز طلبنه جرأت و حرکات عصیانیه مداومت ایلدیلر . بناءً علیه صدر مشارالیه اوج قول عسکر ترتیبیه اوزرلرینه هجوم و راست کلدیکی فرق عصائی تدمیر و تشکیل ایتمکه ارتق مقاومت طاقلری قالمدیغندن بالضروره استیمان و قلاع مغصوبه یی تسلیم ایله دائرة اطاعته کیردیلر و سلاحلری دوشیریلوب قلعه لره وزرا و احرا و مستحقظین نصب و اقامه اولوب صدر اعظم دخی یکر می طقوز سنه سی اوائلنده استانبوله واصل اولدی .

احوال حجازیه

جودت پاشا تاریخنده تفصیلاً بیان اولندیغی اوزره عصر عبدالحمیدخان اولده حادث اولان وهابی مذهبی جزیره العربده کوندن کونه توسع ایدوب بونلرک دفع شر و شورلری ایچون بغداد و شام و الیرینه مأموریت ویرلمش و بغداد طرفلرندن بالدفعات مقاتلات واقع اولمش ایشه ده دفع صائل صورتنه منحصر و مرکز اجتماع وهابیان اولان درعیه یه مواصلت غیر قابل اولمغه کیتدکجه اکثر قبائل مذهب مذکوره مائل و درعیه ده مقیم اولان نجد شیخی سعودک اطاعتنه داخل اولملریله شیخ مزبور حریم شریفینی تهدید ایتمکه یاشلادی . اول اوانده سلطنت سنیه فرانسلری مصردن چیقارمق تدارکاتیه مشغول

اولدیغندن وهابیلرک استیصاللرینه باقمه وقتی یوغیدی . بناءً علیه اواخر سلطنت سلیم خانیده وهابی طائفه سی حرمین شریفینی ضبط ایلدی . متعاقباً روسیه سفری وتجدد سلطنت وقوعیه دولتک مشغولیتی تراید ایدوب خصوصیه حرمین شریفینک تخلیصی مصردن اعمال قوته موقوف اولدینی حالد سردار اکرم یوسف ضیا پاشانک مصرده براقدینی اون بیگ قدر ارنبود وروم ایلی عسکریه کوله من طائفه سی بیننده مقاتلات جریان ایتکده ایدی . بمنه تعالی فصل مخصوصنده تفصیل اولنه جنی وجهله محمد علی پاشا مصر والیلکنده مستقر وکوله من بکترینک استیصالیه استقلال و اقتداره نائل اولدقدن صکره ایکی یوز یکریمی الی تاریخنده اوغلی طوسون پاشایی عساکر کافیه ومهمات لازمه ایله ینبوعه ارسال ایدوب محاربات عدیده ایله حرمین شریفین تخلیص اولنمغله یکریمی سکر سنه سی اوائلنده اولاً مدینه منوره نک و مؤخرآ مکة مکرمه نک مفتاحلری والی مشار الیهک انختار اغاسی لطیف آغا واوغلی اسماعیل پاشا واسطه لریه استانبوله واصل وعظیم آلائی ایله خرقه سعادت دائره سنه داخل اولدی . احوال حجازیه نک اصلاحی وطائفه وهابیه نک استیصالی ایچون والی مشار الیهک بالذات جانب حجازه عزیمتی امرواراده بیورلدیغندن مشار الیه ایکی سنه قدر حرمین شریفین ده اقامت وشیش وهابیان اولان سعودک کتخداسی عثمان طامی نام شخصی بالمحاربه اله کتیروب استانبوله ارسال ایلکله الای کوشکی پیشکاهنده اعدام قلندی . بعده والی مشار الیه اوغلی طوسون پاشایی بالاستصحات مصره عودت ایتسنی متعاقب طوسون پاشا مطعوناً مرتحل دار آخرت اولدیغندن منحل اولان جده والیلکی رتبه وزارتله دیگر اوغلی ابراهیم پاشایه توجیه بیورلدی . مشار الیه برقاچ سنه دها وهابیلرک تعقیب واستیصالنه اقدام وبالاخره مرکز اجتماعلری اولان درعیه نی تسخیر وسعود ایله اوغلی عبدالاهی اسیر ایدوب روضه مطهره دن اختلاس ایلدکلری مجوهراتی استرداد ایلدیکنندن جمله سی آستانه علیه وارد اولدقده سعود وعونه سی قنطره سیفدن امرار ومجوهرات مذکوره بالتعمیر محل عالینسه ارسال قلندی .

دره بکترینک استیصاللری

سلطنت سنیه نک غائله سفریه سی برطرف اولدقدن صکره بروقتدیری اناطولی وروم ایلینک هرطرفنده حادثات اولوب دره بکی واعیان تعبیر اولنان و اوامر دولت علیه کاینغی انقیاد ایلان اشخاصک رفع وازاله لرینه تشبث اولنوب بونلردن تسکلی اوغلی

وقلیونجی و طاغ دویرن اوغلی و سائر معلوم الاسامی اشخاص مأمور تنکیلری اولان وزرا و امرا معرفتلیله اعدام اولنوب سیروزلی یوسف بك و قره عثمان زاده و جبار زاده دره بکترینک اصحاب قوت و سطوتندن اولملریله برابر مرکز اطاعتده قائم و سفرلرده خدمتله مسبوق اولمغله انلره تعرض اولمندی .

احوال تپه دئلی علی پاشا

یانه والیسی تپه دئلی علی پاشا ذاتاً ارنبودلق خاندانندن و اصحاب درایت و شجاعتدن اولوب یالکز کندیسنگ امارتی قرق سنهیه قریب ممتد اولمسندن ناشی یانه و یکیشهر و سلانیک و مناستر سنجاقلرنده ایکی یوزدن متجاوز جسیم چفتلکلره مالک اولدیغندن ثروتی کوندن کونه متزاید و قوت و مهابتی متری اوله رق اولحوالیده علم افرازا استقلال اولمش و روسیه و نمچه و فرانسه سفرلرنده خدمات مبروره اظهار ایش ایدوکنه بناءً اوغلی ولی پاشایه وزارت و دیگر اوغلی مختار پاشا و صالح پاشا و حفیدی محمد پاشایه میرمیرانلق احسان اولنوب موره والیایکی و جوارده اولان سنجاقلر مشار الیه توجیه اولنوردی . علی پاشانک افراد حقنده مظالم و تعدیاتی فوق الحد ایسه ده یوللر تنظیمی و زراعتک تکثیریه اولحوالی بی اعمار ایتک خصوصنده اولان اقدام و غیرتی غیر منکر اولوب حتی طوچی نامیه سکز اون بیک قدر عساکر منتظمه ترتیب ایلدیکی حالده استانبولده یکچیریلر تعریض و شکایتله اغاز ایلدکلرندن عساکر هر قومه بی قلعه لره تقسیم ایش ایدی .

اولویه متصرفی وزیر ابراهیم پاشا که علی پاشانک بیوک اوغلی ولی پاشانک قائن پدریدر علی پاشا عادت مألوفه سی اوزره اورالرینی دخی حوضه حکومتله ادخال ایلک ایچون یکر می بش تاریخنده اهالی بی تحریک ایلله ابراهیم پاشا اوزرینه غلو ایتدیروب اعانه صورتنده بر مقدار عسکر ارسالیله ابراهیم پاشای تحلیص و یانهیه جلب و حبس ایلدی . بو کیفیت سلطان محمود خان جضرتلرینک باعث غضب و انفعالی اولوب ابراهیم پاشانک تکراریرینه اقامه سی ایچون متعدد خط هایونلر کوندلرلشیکن برطاقم اعذار واهیه سردیله عدم مطاوعت اظهار و بالاخره روم ایلیده استخدام اولنماق اوزره پاشای مشار الیهک تخلیه سیلی اشعار اولندقدده بونده دخی مبادلاتسزلق ابراز ایلدیکنندن تأدیب و تنکیلی لازمه ذمت سلطنت اولوب فقط مستعد فساد اولان موره اهالیسی علی پاشانک هیبت و سطوتیله اجرای مافی الضمیره قادر اوله مدقلری معلوم اولدیغندن پک ایلرویه کیدلیوب کاه تهدید

و کاد تلطیف ایله معامله اولنوردی. اول عصرده مستشار سلطنت و مؤتمن پادشاهی اولوب
 زمام اداره ید استقلالنده بولنان نشانجی حالت افندی علی پاشانک معتاد اوزره تقدیم
 ایلدیکی مبالغ و هدایایه عدم قناعتله مقطوعاً سنوی بیك کیسه طلب و علی پاشا دخی بویله
 ویرکوی معین کبی تقدیمه اعطاسندن مجانبت ایلدیکنندن حالت افندی منفعل اولوب علی
 پاشانک قهر و ازاله سنه نصب نفس اهتمام ایلدی. وقتا که علی پاشانک کتخداسی اولان
 پاشو بک بعض اسباب ایله مشارالیهدن خوفه دوشوب فراراً استانبوله کلدی. علی پاشا
 بر ارنبود فداییمی ارسال ایدوب میرمومی ایله سلطان یازید جوارنده ساکن اولدیغی
 قوناغک پنجره سنده اوطورر ایکن قورشون اتدیرمش اولدیغندن علی پاشانک دارسلطنت سنیهده
 بوجهله فدایا استخدام ایلمسی کندوسندن بالکلیه امنیت و اعتمادی سلب ایلدیکنه و بر رجه مشروح
 حالت افندی دخی شراره فساد و مروجه جناب اولدیغنه منی علی پاشانک تنکیلنه قرار ویرلدی اشبو
 قورشون آتلق ماده سنی بعضر حالت افندیکنک تصنیعاتنه حمل ایتیشلر ایهده عقلاً ضعیف کورینور
 اول امرده علی پاشا و اوغللرینک حوزه حکومتلرینی یاتیه سنجاغنه حصر والویه سائردهن
 کف یدله اورالرده اولان چفتلکاتی سائر اصحاب املاک کبی اداره ایتدیرمسی امر اولوب
 علی پاشا غفوجرایم رجاسنه اغاز ایتدکجه شدت غضبی مؤدی و رفع وزارت و امارت لریله
 تیه دلنده اقامت ایللری اراده بیورلمسینه بادی اولوب بالاخره اوتوز التی سنه سی اوائلنده
 موره والیسی صدر اسبق خورشید پاشا سرعسکر نصب و تعیین و روم ایلی والیسی ایله جوارنده
 بولنان وزرا و امرا علی پاشا توابعاتنک رفع تسلط و استیلا لرینه مأمور بیورلدیلر بناء علی ذلک
 طرف طرف مقاتلاته بدأ و مباشرت اولمغله و علی پاشانک اوغللری ولی پاشا و مختار پاشا و صالح
 پاشا و حفیدی محمد پاشا بلا مخالفت موکب سرعسکریه دخالت ایللریله علی پاشایانیه قلعه سنده
 تحت محاصره یه آلوب اوغللری کوتاهییه و انقره یه نفی اولندیلر.

ایام محاصره تمتد اولدقدده مصاحته سهولت بیان ایدنلر خوفه دوشوب علی پاشا
 خانداننک اضمحلالی کورلمدکجه ارنبود طائفه سی عاقبت اندیشلک ایدر ولایقیله علی پاشا
 علیهنده اوله مزلدیه رک سلطان محمود خان حضر تلرینی غدر صریحه سوق ایتلریله سائف الذکر
 ولی پاشا و صالح پاشا و محمد پاشا منفالرنده اعدام اولندیلر مختار پاشا روسیه سفرنده اردوی
 هایونک مضایقه سی حالنده یتشوب غلبه اسلامیانیه سبب مستقل اولمغله حضر پاشا دینلورایدی
 ایکی سنه یی تجاوز ایدن مدت محاصره ده علی پاشانک منتخبی اولان درت بیك قدر عسکرینک
 بک چوغی تلف و بر مقداری دخی فرار ایتمکله ناچار علی پاشا استیما ایدوب قلعه دن چیقمش
 و خورشید پاشا سنه و قدم خدمته بناء مظهر عفو عالی اوله رق استانبولده اقامه سنی

بالدفعات عرض و نیاز ایش اولدینی حالده قرین مساعده پادشاهی اوله مامغله ایکی یوز
 اوتوزسکزنه سنه سنده قنطره تیغدن امرار اولندی . بعض تواریخ خصوصیه ده کورلدیکنه
 نظراً علی پاشاده مأمول اولان درجه مجوهر و نقود چیقیمیوب املا کندن ماعدا قرق بیک
 کیسه یه قریب نقودی ظهور ایشدر .

روم اختلالی

موره جزیره سنده برروم حکومتی تشکیلی خیلی وقتدنبرو روسیه لولرک آرزو کرده لری
 اولدیغیدن واقع اولان تشویق و ترغیبلریله سکسان ایکی سفرنده موره رعایاسی علم افراز
 عصیان اولمشلر ایسه ده محسن زاده محمد پاشانک ومؤخرأ جزایرلی حسن پاشانک سیف
 سطوتلریله تأدیب اولمشلرایدی ده اصرکرملری تپه دنلی علی پاشانک حاصل ایلدیکی قوت
 واقتدار مانع تصمیماتلری اولمقده ایکن علی پاشانک قولی و قنادی قیریلوب یانیه ده تحت محاصره یه
 وضع اولمغله وموره والیسی خورشید پاشا دخی جزیره موره طوائف عسکریه سنی
 بالاستصحاب عزیمت ایلکله مسقولولرک ارادینی وقت وروملرک منتظر اولدقلری زمان
 مساعد یوزکوستردی وعلی پاشادخی تخلص کریبان ایچونروملری عصیانہ دعوت ایلدی
 بناء علیه اوتوزالتی سنه سنده افلاق وموره ده آتش فساد علوانداز اولوب اگرچه افلاق
 اختلالی دائره سنی تجاوز ایده مامش و ابرائیل ویرکوی کی قلاع طونه ساحلنده اولدیغندن
 پیدرپی اعانه و امداد اولدینی جهتله کیدعصادتدن مصون اولمش ایسه ده موره نك مقر ولایتی
 اولان طرابلسجه قلعه سی وسط جزیره ده و امداد و اعانه دن مأیوس و ذخیره سزلکدن بی تاب
 اولمغله درجنک اول تسلیمه مجبور اولدی یانیه ده مشغول جنک وستیز اولان سرعسکر
 خوشید پاشانک حرمی دخی طرابلسجه ده بولمغله دائره اسارته داخل اولدقلرندن مشارالیه
 کلیتولوپاره اعطاسیله تخلص ایشدر اشبوروم اختلالنده کرک استانبول بطریقخانه سنک
 و کرک طشره لرده بولنان پک چوق پاپاس وقوجه باشیلرک ذیمدخل و متفق الکلم اولدقلری
 اله کچن اوراق مزایاسندن معلوم اولمغله مظنه سوء اولان اشخاصک قتل و اعدامنده استعجال
 و طرف طرف اطهره و ساحلله وزرا و امرا و محافظین تعینیه تقویه لرینه اعتنا اولندی
 اوتوز یدی سنه سنده سرعسکر خورشید پاشا انتخابیه درامه لی محمود پاشا موره
 سرعسکری تعین اولنوب یکریمی بشیک قدر عسکر ومعیتته مأمور ورزا و امرا ایله
 ازدیندن تحریک وموره دربندندن امرار اولنوب محصور بولنان انابولی قلعه سی
 پیشکاهنه نصب سرادقات سطوت اولمش واولحوالیده بولنان اشقیا طرد و تنکیل وقلعه یه

قرق کونلک قدر ذخایر جمع و وضع اولندقدنصکره طرابلسجه نك استردادى ضمننده سوق
 موکب عسکرى اولمنسنه تشبث قلنمش اولدینى حالده یدى بیک قدرارنبودعسکرى گذشته
 علوفه لرنى طلب ایدوب ایفاسنه چاره بولنه مامسى سبیلله بغته عودت ایلش اولدقلرندن
 بو کیفیت عساکر سائرهنك شاشقنلغنى مستلزم اولدى چونکه بواردونك لوازمات نقلیه
 ومهمات مقتضیه سی پک ناقص وموره خرستیانلری عموماً ایاقده وطاغ ودره واورمانلر
 ایچلرنده مترصد فرصت اولدقلرندن مخبره طریقلری وجلب ذخایر ومهمات یوللری
 بالکلیه مسدود اولسیله انابولی یه کلورایکن چکیلان مضایقه ومشقت یوماً فیوماً مزداد
 اولدی بنابرین طرابلسجه یه کیدمک شوپله طورسون انابولیده دخی اقامته
 امکان اولدیغندن افتان وحیزان عودت وکردوسه مواصلتده انابولینک آچلقدن
 تسلیمه مجبور اولدینى استخبار اولندی وبوغموم ایله سرعسکر محمود پاشا وفات ایلدی .
 تپه دئلی ایشی بتدکدنصکره موره اختلالی برطرف اولور امیدى بالکلیه خلاف چیقوب
 کیتدکجه آتش عصیان کسب اشتداد ایلدیکندن بوفناقلره سبب مستقل عد اولنان حالت
 افندی اوتوز سکر سنه سنده مقتول و خورشید پاشا دخی موره اردوسنک پریشانقله
 عودتندن ناشی کندیسى تحت مسئولیته آنور واهمه سیله خسته لنوب ایکی اوچ کون
 صکره دار آخرته موصول اولدی . بوندنصکره موره سرعسکری نصب اولنان بوسنه
 والیسی جلال یاشا موقع مأموریتته واصل اولقسزین وفات ایدوب خلفی ابوبکود محمد
 پاشا دخی یکیشهردن ایلرویه کچه مامکله روملر موره جزیره سنه کاملاً استیلا ایتدکن
 یشقه خارجه دخی تجاوز ایدرک آتنه یی ضبط وساقزه یرایکی بیک اشقیا ارسالیله اهالیسنی
 آیاغه قالدیروب قلعه یی محاصره ایلدیلر . محافظ بولنان وحید پاشا قرق کون قدر مقام
 مدافعه ده قائم وقپودان علی پاشانک دونمای هایونله ورودی اوزرینه اشقیا بالکلیه منهزم
 اولوب قرای رعایا سرتاسر یغما اولندی . خورشید پاشا مرحوم معیتده ابراز حسن
 خدمت واطهار شجاعت ولیاقت ایتمش اولان ودین والیسی رشید محمد پاشا ایکی یوز
 قرق سنه سنده روم ایلی سرعسکری ومصر والیسی محمد علی پاشانک اوغلی ابراهیم پاشا
 موره والیسی نصب اولنمغله مشار الیه ابراهیم پاشا چند سنه دنبرو مصرده تربینه اقدام
 اولنمقده اولان عساکر منتظمه دن اوچ آلاى عسکر ایله موره جزیره سنه داخل اولوب
 طرف طرف اشقیایی تنکیل وطرابلسجه یی تسخیر ایلدکن صکره سرعسکر رشید پاشا
 ایله بالملاقات روملرک دارالحرکات اتخاذا ایلدکلى مسلنک استحکاماتنى محاصره ایلدیلر .
 قپودان دریا خسرو پاشادخى دونمای هایونله وارد اولوب روملرک بحرآ امیدوار اولدقلری

راه آغانه بی سد ایتکه محصور بولانن الی یدی بیک قدر فدایی اشقیادن پک جزوئی
 قرار ایده بیلوب ماعداسی قنطره شمشیردن مرور و مسلنک قلعه سی ایدی اسلامیه
 دخول ایلدی . قبودان مشار الیه قرق برسنه سی خلانده جمع سفائن اشقیا اولان سیسام
 اطه سی اوروب استحکاماتی تخریبه ویوزدن متجاوز سفائن اعدایی ضبطه موفق اولدی .

وقعه خیریه

عسا کر موظفه دولت علیه نك اك كزیده سی اولان یکچریلرک نظام وانتظامی بالکلیه
 مختل اولدینی مثللو لوازمات سفریه ترتیباتی دخی محو و مندرس اولدیغندن مورد قلاعه
 بش الی سنه دنبرو سوق اولنان اردولره ذخیره و مهمات یتشدریله میوب بوحال ایسه
 میدانده و دشمن خارجی اولسه بیله موجب پریشانی اوله جنی درت یوز سنه دنبرو دولت
 علیه نك رعیتند بولنان روم طائفه سنك متجاسر اولدقلى عصیانك رفع وازاله سنه قدرتیاب
 اوله مامسیله متین وتنظیم احوال عسکریه و سفریه یتثبت واعتنا اولندینی حالده دوام
 دولت تحت مخاطره ده ایدوکی آرتق عقول بسیطه اصحابنك دخی کرکی کبی منظورلری اولدیغنه
 مبنی اتفاق ارکان دولت ایله یکچریلردن اشکنجی عنوانیله عسا کر منتظمه ترتینه قرار
 ویریلوب قرق برسنه سی اواخرنده تعلیم وتعلمه شروع اولمشیدی . لکن صنادید یکچریان
 بوخصوصده اظهار مطاوعت و اعطای سند ایتمشلر ایسه ده امنیت جائز اوله میه جغندن
 عصیان وطغیان ایدرلر ایسه تأدیب و تربیه لرینه حاضر بولنق ایچون طویجی وخبره جی
 ولغمجی وترسانه اوجاقلری رؤسای وضا بطانی ایقاظ اولندقدن بشقه روم اختلالی سببلا
 قره دکر بوغازینك جانبینی محافظلری اولان آغا حسن پاشا وعزت محمد پاشانك معیتلرند
 بولنان ایکی اوچ بیک قدر سکبانك درحال استانبوله نقلی لوازماتی دخی تهیه ایتدیرلشیدی
 فی الحقیقه ظن وتخمین اولندینی اوزره تعلیمه مباشرت اولندقدن برآی کچرکمزفه باغیه
 علم افرازشقاوت اولمق اوزره عقد اتفاق ایدرک قرق برسنه سی ذی القعده سنك طقوزنجی
 پنجشنبه کیجه سی باب عالی یی و آغا قپوسنی باصوب یغما ایتمشلر ایسه ده صدر اعظم یالیسنده
 بولمغله ویکچیری اغاسی جلال الدین اغا دخی اختفا ایتکه تعدی اشقیادن مصون اولدیلر
 صدراعظم سلیم پاشا ومشار الیهما حسین پاشا وعزت پاشا ومعزول ومنصوب شیخ الاسلام
 وقاضی عسکرلر ودرس خواجهلری و رجال دولت سرای هایونده مجتمع اولوب سلطان
 محمود خان حضرتلری دخی بشکطاشدن سرای مزبوره کذار ایلدی . عسا کر مرتبه
 مذکوره فوج فوج سرای هایونه واصل اولمغله سنجاق شریف اخراج اولنوب سلطان
 احمد خان جامع شریفی مرکز حرکت اتخاذا اولندی . اشقیا ات میداننده واقع قشله لرده

مجمع اولدقلرندن حسن پاشا و عزت پاشا و طویچی باشی قره جهنم ابراهیم اغا و خبره جی باشی دده اغا کندولرینه منسوب عسکر وایکی قطعه طوپ ایله اعزام اولندیلر. قنّه باغیه میدان قبولرینی سد ایله تحصن ایتک ایسته مشلر ایسه ده طوپ صدمه سیله قپو قیریلوب برقاق نوبت صالحم انداخت اولنه رق بر مقدار اشقیا عازم داربوار اولسنی متعاقب پراکنده و پریشان اولدیلر. قشله لر دخی درحال یاغلو پاچاوره ایله احراق اولندی. یکچیری اوجاغنک بقا و یاخود الغاسی بین الارکان تذکر اولندقدن فیما بعد بونلردن حسن خدمت مأمول و امنیت جائز اولماغله برغلبه واقع اولمشیکن اضاعه فرصت اولنماسنی رئیس الکتاب سیدا افندی و سائر اصدقا ایراد و اتیان ایتکله و اراده سنی پادشاهی دخی بومر کرده متعلق اولماغله یکچیری اوجاغنک کلیاً الغا اولندیغی ممالک محروسه یه اعلان و یکچیری ضابطان و نفراتندن اسائن سابقه لری معلوم اولان بیکدن متجاوز اشقیا کرک در سعادته و کرک منفالرنده اعدام اولنوب اهون شر اولانلریتک نفی و تبعیدیه اکتفا قلندی.

بشیوز سنه دن زیاده و وقوعات جسیمه یه مظهریتله اس اساسی مشدد اولان یکچیری اوجاغنک بویله اوج بش ساعت ایچنده محو و نابود اولیورمسی نفرت عامیه مبتلا اولملرندن و بو دخی نظامات موضوعه لریتک بالکلیه محو و مندرس اولمسندن نشأت ایشدر. بمنه تعالی تفصیلاتی تکمله ده ایراد اولنه جق ایسه ده یالکز فقره آتیه نک بیاننه شروع اولندی. مومی الیه دده اغا که الی اوج تاریخنده فریقلق رتبه سیله قرانته ناظری نصب اولنوب مأموریتنه نسبتله حفظی پاشا نامی ویرلمشدر. مشار الیه شویله سویلر ایدیکه واقعاً یکچیری لک ملحوظ اولان طغیانلرنده نه وجهله حرکت اولنه جنی اولجه مصمم بولمش و طویچی و خبره جی اوجاقلری ضابطانندن بر درجه یه قدر امنیت النش ایسه ده تمامیه اطمنان حاصل اوله مامشیدی. وقعه نک ظهورنده درحال خاصکویده اولان خبره جی قیشله سنه کیتدم قشله قپوسنده ضابطان و نفراتک مجمع و بکا مترقب اولدقلرینی کورمکه بعض مرتبه خوف و تلاشه دوشدم لکن ای اغالر وقعه معلومکز اولمشدر. نه پیا جقسکز دیدیکمه جمله سی یگزبان اوله رق سلطان سلیم خان مرحوم بزم اوجاغمزک تنظیمنه چوق همت ایش و حق مزده احسانلر ایتمشیکن هر نصاسه او وقعه ده یکچیری لره اتباع مزدن ناشی مهم اولدیغمزدن بولکه نک اوزرمزدن ازاله سی ایچون بر خدمت ابرازینه منتظر ایدک بناء علیه شمیدی اراده دولته جان و باش فدا ایتکه حاضرز دیدیلر بن دخی او یله ایسه بیورک کیده لم دیدیکمه کمال سرعتله قایقلره بینوب و ارقم صره یالی کوشکنه کلوب جانیسپارانه خدمت ایلدیلر دیو توضیح افکار ایدر ایدی. سائر اوجاقلر و علما و اهالی نک دخی عموماً متفر بولملری ایشک بویله سهولته بتمسنی موجب اولمشدر.

ظهور سفر روسیه

بالاده مسطور اولدینی اوزره موره جزیره سیله حوالیسنده بریونان حکومتی تشکیلی روسیه لولرک نصب نفس اهتمام ایتدکلری شی اولوب بو خصوصده انکلتزه و فرانسه دولترلرینک موافقتلرینی دخی قزانمش اولدقلرندن دول مشار الیهم طرفندن اچقه و مهمات و کولکلو ضابطان و نفرات اعطاسیله فسدۀ روم اقدار اولمغله برابر موره رعایاسته امتیاز اعطا اولمنسی هر بار تکلیف ایتمکده ایدیلر اولجه مسلنک و مؤخرأ رشید محمد پاشانک سیف سطوتله آتنه دخی فتح اولنوب اشقیای روم کرکی کبی تضییق اولنمش و بو حالدن برمدت ده دوا ایدر ایسه بالکلیه مقاومت اقتدارندن ساقط اوله جقلری میدانه چیقمش اولمسیله دول مشار الیهم سفراسی تکلیفات سابقه لرینی تشدید ایدوب مقدماموره قلاعی اهل اسلام اتند بولنق اوزره امتیاز طلب ایدرلر ایکن شمدی موره و حوالیسنک بالکلیه اهل اسلامدن تخلیه سنی وبر ویرکوی مقطوع ویرلک شرطیله اداره داخلیه لرینک کندولرینه ترکی طلب و موافقت اولمندیغی حالده ترک سفارت ایدم جکلرینی قطعاً بیان ایتدیلر طرف هایوندن دخی موره اهالیسی سلطنت سینه نک تبعۀ قدیمه سندن اولوب تأدیب و تربیه لری متختم ذمت حکومت اولمغله اجانبک مداخله یه حق لری اوله میه جنی و بو باده هر درلو حادثاتک اختیارقلنه جنی صورت متجددانه ده افاده و بیان اولندیغندن سفرای مومی الیهم قرق اوچ سنه سی اوائلنده استانبولدن افتراق وانکلتزه و فرانسه و روسیه لونک موره ساحلارنده طولاشمقده اولان سفن مجتمعه لری بختۀ هجوم ایله ناوارین لیماننده لنگر انداز اولان دونمای هایونی اغراق و احراق ایلدیلر بوجه تله موره مصاحق فنا لشمش و تکالیف مزبور دنک عدم قبولی حالنده روسیه لولرک اعلان حرب ایدم جکلری مرتبۀ وضوحه رسیدم اولمش ایسه ده طرف سلطنت سینه دن طونه ساحلرینه و موره جهتلرینه عسا کر و مهمات ارسالیه ابراز متانت و صلابت اولندیغنه مبنی ایکی یوز قرق اوچ سنه سی شوالنده روسیه عسکری مفصل حدود اولان پروت نهرینی مرور ایله حرکات خصمانیه مباشرت ایلدی .

اذا حسین پاشا طونه سر عسکری و قپودان دریا عزت پاشا وارنه محافظی تعیین وارسال و طرف طرف مدافعه تشبثاتنه ابتدار اولنوب انجق دولت علیه عسا کر منتظمه ترتینه اشتغال ایدم لی ایکی سنه یه وار مقسزین روسیه سفری کبی برابر کران آتنه کیرمش و دونمای هایون ناوارین وقعه سنده تلف اولق حسیله موجود اولان و یکیدن تدارک قلنان بش اون قطعه سفن حریبه قرد کزک محافظه سنه غیر کافی بولنش اولدیغندن روسیه لولر

طولجی وایساقی و ابرائیل قلعه لرینی ضبط واستیلا و وارنه یی برآ و بحرآ تضییق ایلدکاری خبرلری وارد اولدقده اولا وارنه یی تخلیص وبعده طونه ساحل لرینه عزیمت ایتک اوزره صدر اعظم سلیم پاشا سکرز اون بیک قدر عسکر ایله قرق درت سنه سی اواسط صفرنده اعزام اولنوب ذات پادشاهی دخی داود پاشایه خروج و اوراده بولنان رامی قشله سنی مرکز موکب هایون اتخاذا ایتدیلر اوچ آی قدر محصوریتدن صکره وارنه قلعه سی گرفتار دست اعدا اولمغله محافظی بولنان عزت محمد پاشا صدر اعظمه اسناد قصور ورخاوتی متضمن خاکبای هایونه عریضه لر تقدیم ایلسنه و صدر مشارالیهک دخی وارنه نک تخلیصنه موفق اوله مامسنه مبنی عزل اولنوب مشارالیه عزت پاشا صدر اعظم نصب اولندی غرائبندرکه سلیم پاشا موکب صدارتده عزت پاشای کوز حبسنه وضع ایدوب ترتیب مجازات شدید عزمده ایکن کندوسنه خلف اولمش و سلیم پاشانک کافه اموال و اشیاسی وحتی ادرنده برصرافه براقیدینی تحقیق کرده عالی اولان بشیوز کیسه لک نقودی دخی عزت پاشایه احسان اولمشدر .

دول ثلثه دونمالری مورده یی ابلوقة تحتنه آلمرلیله مورده سر عسکری ابراهیم پاشا بعد ازین اوراده عسکرینک ذخایر و مهماتی تدارکده عاجز اولدیغندن و بروقدنبرو پدری محمد علی پاشا مشارالیه ابراهیم پاشای مصره جلب ایتک استدعاسنده بولندیغندن هر قدر مساعدت سنیه ارزان بیورلماش ایسه ده بالضروره عسکرینی مستصحباً مشارالیه ابراهیم پاشا مصره عودت و در حال مورده بر مقدار فرانسر عسکری چیقوب ید اسلامده بولنان برقاق قلعه یی ضبط ایلدکاری خبری وارد اولدی فرانسه وانکلتره دولملری روسیه لو ایله متفقاً دونمای هایونی یاقش و علناً روملره اعانه ایتکده بولنش ایسه لرده رسماً سلطنت سنیه اعلان حرب ایتدکلرندن مقتضای وقت و حال الجاسیله استانبولدن مفارقت ایدن ایلچیلری دعوت اولندیغندن قرق درت سنه سی او اخرنده وارد اولدیلر و حقلرنده تکریمات فوق العاده اجرا اولنه رقینه مورده مصالحتی مذاکراته مباشرت قلندی موسم شتانک تقریبی و وارنه نک الدن چیقمی سنبلرلیله صدر جدید موکب صدارتی شمنی مشتاسنه ایصال ایلسیله برابر فحشیاته انهماکی و خلاف رضای عالی بعض حرکاتی شیوعنه و ایفای خدمته مقتدر اوله میه جنی تحقق ایلدیکنه مبنی قرق درت سنه سی رجبنده معزول و مورده محاربه لرنده ابراز شجاعت و تحصیل شهرت ایدن رشید محمد پاشا مقام صدارته موصول اولدی . مسقولونک قفقاسیه اردوسی انابه و صخوم و اخسته و قارص قلعه لرینه استیلا ایتدکلن صکره ارضروم اوزرینه یوریمکده اولدیغندن و ارضروم و الیسی

و شرق سرعسکری اولان صدر اسبق غالب پاشا مدافعه‌نک امکانشز لغندن بختله عقد مصالحه‌نک لزومنی عرض ایش ایدوکنندن بو کیفیت فتور ورخاوتنه حمل اولنه‌رق عزل اولنوب اکیلی صالح پاشا شرق سرعسکری نصب اولندی . قرق درت سنه‌سی بوفلاکتارله مرور و قرق بش سنه‌سی موسم حربی حلول ایلدکده تکرار مقاتلاته مباشرت اولنوب بعض محالرده اوفق تفک مظفریتلر ظهور ایش ايسه‌ده دشمن برقاچ آیدنبو تصدیق ایلدکده اولدینی سلسره قلعه‌سنه استیلا و شمنیده اردوی همایونی محاصره ایلدی . شمنینک استحکامات موقعیه‌سی و ایچنده اوتوز بیك قدر عسکر بولمسی جهتلریله ضبط و تسخیری ناقابل اولدینی مسقولرک معلومی اولدقده شمنی‌بی تحت محاصره‌ده طوتوب دیگر براردویی ادرنه‌یه طوغری سوق ایللریله بالقانده و قزانلقده مدافعه‌سنه چالیشلدینی حالده موفق اولنه‌مدیغندن و ادرنه شهری استحکاماتدن خالی ایدوکنندن قرق بش سنه‌سی صفرینک اواخرنده اول پای تخت قدیم کرفتار دست اعدا و متعاقباً ارضرومک استیلاسی خبری دخی هویدا اولدی بناءً علیه هر نه صورتله اولورسه اولسون مصالحه‌دن بشقه چاره قالمدیغندن دفتردار صادق افندی و موالیدن امین بك زاده عبدالقادر بك و آمدجی کوسه عا کف افندی مرخص تعیین و ادرنه‌یه اعزام اولنغله قرق بش سنه‌سی ربیع‌الاولی اواسطنده شروط آتیه ايله عقد صالح قلندی .

ادرنه معاهده‌سی نامیله مشهور اولان اشبو معاهده حکمنجه موره حکومتی تصدیق اولندقدن بشقه کاملاً چرکستان و آخسقه قلعهلری روسیه‌لویه و افلاق اراضیسندن بولان قلاع‌هدم اولنه‌رق امارته ترك قلنش و مملکتینک و صریه‌نک امتیازاتی تزید و احکام و التی ناحیه علاودسیله صریه حدودی توسیع اولنشدر تجارت تضمیناتی اوله‌رق بریجق و سفر تضمینی اولنه‌رق اون‌ملیون مجار التونی ویرمک دخی جمله شرائطدن اولدینی حالده مؤخرأ روسیه ایمپراطوری کال فتوتندن اوچ ملیونی عفو ایشدر .

سلطنت سنیه موره‌یه امتیاز ویرمامک سوداسیله بوقدر مال و جان اضاعه ایلدکدن صکره هم موره‌نک قراللق وجهله تصدیقنه و همده ضایعات مذکورنک اختیارینه مجبور اولدی اولوقتک اصحاب نفوذندن و سفر طرفولرندن پرتو پاشا برلایحه‌سندن اکرچه مسقولویه غلبه امید اولنمز لیکن بلا محاربه موره قرالغی قبول اولنورایسه یول اولور و بك چوق محالره سرایت ایدر بناءً علیه و سعمزی صرف ایتدکدن صکره بالمجبوریه اختیار ایلر ايسه‌ک دشمن هر وقت بوقدر تکلف التزام ایلز دیمشدر .

بونک محاکمه‌سی اوزون مقالاته محتاج ايسه‌ده طقسان اوچ سنه‌سندن بوقضیه‌نک عینی

مع زیاده بزم دخی باشمزه کلدیکنندن بویله شیلر حکم زمانک اقتضاسنه تابع اولدیغنی اعتراف ایتک ضروریدر .

احوال بغداد

فصل سابقده ذکر اولدیغنی اوزره بغداد ایالتی یوز سنهیه قریب زماندنبروکوله منلر ائنده اولوب بونلر طرف دولت علیه اطاعت ابراز ایدرلر سده دولتک حکمی کینبغنی جریان ایتز ایدی . ایکی یوزیکرمی التی تاریخده مشهور حالت افندی بغدادک مخصصات سنویه سی اولان ایکی بیگ کیسه یی تزید ایتدیرمک وبقایای تحصیل ایلک مأموریتیه اعزام اولوب اولوقت والی بولنان سلیمان پاشا بورالر یناشمدیغندن حالت افندی موصله عودت وحائز اولدیغنی استقلال ویدنده بولنان فرمانلر موجبجه بابان پاشالرینی وموصل والیسنی معیتنه بالاستصحاب بغداده رجعت وبالحاجره سلیمان پاشانک قتلیلهینه کوله منلردن عبده اغای مع الوزاره والی نصب ایلش ومؤخرأ بیوک سلیمان پاشانک اوغلی سعیدپاشا مقام ولایت انتخاب قلمش ایسه ده سوء اداره سی جهتیله پدرینک کوله لرندن داود افندی تغلب ایلدیکنندن ایالت بغداد مشارالیه داود افندی به بارتبه وزارت توجیه بیورلمشیدی بو ذات فضلادن واصحاب لیاقت واققداردن اولدیغندن تزید قوت ومکنته موفق اولوب حتی اوتوز طقوز تاریخنده ایرانلو ایله دولت علیه بیننه شقاق طاری اولمغله ایرانلورک شهزاده عباس میرزا ومحمد علی میرزا معیتلریله ارضروم وبغداد طرفلرینه سوق ایلدیکی ایکی اردونک برنجیسی شرق سرعسکری نصب اولنان جبارزاده جلال الدین پاشا عسکرینی پریشان ایلدیکی حالد ایکنجیسنی مشارالیه داود پاشا منهزم ایلش اولدیغندن تجدید معاهده خصوصنده منافع کلیه سی مشاهده اولمشیدی سلطنت سنیه عسا کر منتظمه ترتیبندن وموره وروسیه سفرلرینک تتابعندن ناشی مصارف کلیهیه مبتلا اولوب اگرچه بغدادده دخی عسا کر نظامیه تشکیل قلمش ایسه ده مخصصات سنویه نک تزیدینه بغداد خزینه سنک تحمیلی آشکار ایدوکنندن مخصصات قدیمه یی اون ایکی بیگ کیسه یه ابلاغ ایتدیرمک مأموریتیه دفتر دار سابق صادق افندی قرق بش سنه سنده بغداده اعزام قلندی صادق افندینک احوال محلیه یه لایقیله کسب وقوف ایتکسزین بغداد والیلکنی داود پاشانک دائره سی متخیرانندن بعضیلرینه وعدا ایلیسی کندوسنک سبب اتلافی اولدیغنی خبری طرف دولت علیه منعکس اولدقده بغداد ایالتی حلب والیسی لازعلی پاشایه توجیه ومعیتنه عسا کر نظامیه وتجارلو سواریسندن مقدار کافی عسکر ترتیب وترقیق اولنه رق ارسال اولمغله وبواوانده بغداد .

وحوالیسند شدتلو بر طاعون ظهور ایدرك داود پاشانك قوت ومكنتنی اضاعه ایتكه طقسان كون محاصره دن صكره بغداد قلعه سی فتح وداود پاشا در دست اوانوب استانبوله كوندردلی وكوله من طائفه سندن اكثریسی كرك اثنای محاربه ده وكرك بعدالفتح مقتول اولدیغندن كوله من اوجاغی بالكلیه منطفی اولدی داود پاشانك علم وفضلنه حرمة و تپه دلنلی علی پاشانك قتلی امثالی مثللو وزرانك وباخصوص مصر والیسی محمد علی پاشانك موجب توحشی اولدیغنه بناءً اعدامنه تصدی اولمیبوب استانبوله اقامه اولمش ومؤخرأ بعض مناصبه بولندقدنصكره شیخ الحرم ایكن ارتحال داربقا ایلشدر .

احوال اشقودره لی مصطفى پاشا

لباعن جد اشقودره والیسی بولنان مصطفى پاشا هنگام سفردهودین سرعسگری نصب اوانوب مسقولونك ادرنه یه تخطیسی اوانده معیتده بولنان اون بش یكرمی بیك قدر ارنبود عسگریله فلبه یه جلب اولنه رق بر درجه یه قدر مصالحه ده حسن تأثیری كورلمشیدی بعدالمصالحه روم ایلی ایالتی صدراعظم رشیدپاشا عهدسندباقا وارنبودلغك اصلاحنه مأمور بیورلمغله صدرمشارایه ایله مصطفى پاشایتنه شقاق مستولی اولدیغندن قرقیدی سنه سنده مشارایه مصطفى پاشا صورت ظاهرده رشیدپاشا عاینه وحقیقته دولت علیه اوزرینه علم افزاز طغیان اولوب بوسنه وارنبودلق طرفلرنده بولنان امرای تحریك ایله صوفیه قدر تحت حكمنه آلمشیکن صدر مشارایه عساكر نظامیه ایله پرله ده مدافعه ومنهزم ایتكه اشقودره قلعه سنده تحصن ایلدی وبرمدت محصوریت حالنده بولندقدنصكره نفسی تسلیمه مجبور اولدی . بودخی اصحاب علم ومعرفدن اولوب عینیه داودپاشا کی مظهر عفوهایون اولمش وعصر عبدالحجید خانیده مناصب عدیده ده بولنه رق شیخ الحرم ایكن وفات ایلشدر .

غرب اوجاقلری وفرانسه لونك جزایره استیلاسی

فصل سابقده مسطور اولدینی اوزره غرب اوجاقلری اوروپا دولتریله حرب وصلحه مأذون اولوب توارنج مختلفه ده اوروپالور جانبندن یالکز جزایر غرب اوزرینه اونیدی دفعه هجوم واقع اولمشیکن ضبطنه مقتدر اوله مدقلرینه مبنی سفن تجاریه لرینك تأمین مقصدیه بررمقدار بدل مقطوع اعطا ایدرك صلح اولورلرایدیکه بوناپارته کی برجهانگیر بیله بووجهله عقد مصالحه ایلشدر . حتی مورخ واصف افندی سفارتنامه سنده یازارکه ایلچیلکه اسپانیاده بولندیغ اوانده جزایر لولر کیتلو مبالغ وهدایا اخذ ایدرك اسپانیالورایله عقد صاح ایش اولملریله جزایر ضابطانندن برقاچ دای ایله مادرید شهرنده ملاقات وسرك مدارتعیشکنز

اسپانیا سفائن و ساحلرینی غارتہ منحصر ایکن نصل صلحہ راضی اولدیکز دیوسؤال ایلدیکمده بوصلحک غایتی انجق ایکی سنه تمتد اوله بیلر و بوکره الدیغمز مبالغ وهدایا اغتنام ایده جکمز اموالدن زیاده در دیو جواب ویردکری بیسان و صلحلرینک مبنی علیہنی وماہیتی ایضاح ایلشدز . اشبو جزایر مجاہدلرینک محاربات بحریہ ده اولان ورزش والفتلری و نائل اولدقلری غلبه و مظفریتلری حیرتده عقول اوله جق درجہ ده ایدی لیکن اوروپاده صنایع حربیہ واسلحہ ناریہ ترقی ایتدکجه اولکی کبی دشمن کیلرینه چاتوب رانیہ ایلک قابل اوله مدیغندن بازوی همترلرینه فتور کلشیدی جزایر بکلر بکیسی حسین پاشا احوال عالمدن بی خبر برجاهل جسور و ادخار ایلدیکي نقود و فیرہ یه مغرور اولمغله فرانسه تجار سفائنندن ضبط و تسخیر اولنان کیلری و درونلرنده بولنان مال و ملاحلری فرانسه دولتی طایفه آغاز ایلدکده رد و تسلیم ایتدکدن بشقه فرانسه قونسلوسی حقنده معاملہ بارده دخی اجرا ایلش اولدیغندن اول امرده فرانسه دولتی جانب سلطنت سنیہ یه عرض شکایت ایلکله طرف دولت علیہ دن جزایر والی و امراسنه خطاباً اصدار اولنان فرمان عالی مأمور مخصوص واسطه سینله تسیار و مطلوبات مذکورہ نک اعاده و تسلیم یله برابر ترضیہ ویرلسی دخی امر و تذکار اولنمشیکن والی مشار الیہ ک حق و بلاہتی وامرا وارکاننک بوبابده مشارکتی اندفاع مضرتی حاصل ایدہ مدی مرویدرک والی مشار الیہ طرف دولتدن کیدن مأمورہ قلعہ نک متانت و رصانتی و طوپلرینک جسامت وجہ خانہ سنک کثرتی و نقود مدخرہ نک و فرتنی تماشا ایتدیروب بوقدر قوت و قدرتلہ فرانسه لویہ نصل سرفرو ایلیم دیدکده مأمور مومی الیہ بواتونلر بوجہ خانہ بی طوپلرہ وضع ایدوب آتہ مز دیو جواب ویرمش ایسہ ده والی غافل بواتونلر بنده اولدکجه آدم تدارکنده زحمت چکمز دیہ رک رأی و قرارنده اصرار ایلشدز . بناءً علیہ برفیلو فرانسه دونماسی ایکی سنہ قدر جزایر لیمانی آبلوقہ ایلہ تضییق ایتدکدن صکرہ قرق یدی سنہ سی واسطنده برفرقہ فرانسه عسکری طولون ترسانہ سندن حرکت و خارج لیمانده قرہ یه خروج ایدوب جزایر قلعہ سنی تحت محاصرہ یه آلدی درون قلعہ ده آنجق درت بیک قدر ترک عسکری بولنوب پاشانک امیدوار اولدینی عربان دخی امداده شتابان اولمغله بش اون کون ظرفنده امکان مقاومت بالکلیہ مندرس اولدیغندن حسین پاشا کندوسنک وامرانک اموال ذاتیہ لر یله چیقملرینی مقاولہ ایدرک اموال و فیرہ حکومتی و دارالمجاهدہ اولان جزایر قلعہ سنی فرانسلرہ تسلیم ایتدی و بوبده بویله کیتدی . مؤخر آ قلعہ مرقومہ نک ردی جانب سلطنت سنیہ دن فرانسه دولتہ تکلیف اولنش و بعض مرتبہ وعد دخی آلمش ایسہ ده

علت فرنگی کبی التیام پذیر اوله مدی جزایر ملحقانندن قسطنطنیه قلعه سنی مرکز اتحاد
ایدینان مشایخ عربانندن شیخ عبدالقادر اون بش سنه قدر فرانسزلر ایله اوغراشمش
ایسه ده بودخی بالاخره نیل مقصددن مایوس اولمغله فرانسه لویه دخالت وانلرك التماسیه
شام شریفه رحلت ایدوب اوراده عازم دارعقبا اولمشدر .

قره مانلی خاندانندن طرابلس غرب بکلیر بکیسی اولان یوسف پاشا فوت اولدقده
بیوک اوغلی علی پاشا مقام امارته صاعد اولوب جانب دولت علیه دن دخی تصدیق اولنش
اولدینی حالد برادرلری عصیان قیام و طرابلسی محاصره یه اقدام ایلرله علی پاشا طرف
دولتدن استمداد ایش اولسنه مبنی الی ایکی سنه سنده برقاچ قطعه سفن حربیه ایله سکر
طابور عسکر فریق نجیب پاشایه ترفیقاً ارسال قلمشیدی . وصوللرنده علی پاشا قلعه
قبولرینی آچوب عسکری ایچرویه آلمسی عقبنده نجیب پاشا کندو والیدکنی اعلان و علی
پاشایی بالمله عیال و توابعیله استانبوله اعزام ایلدی بوجهتله طرابلس ایالتی طوغریدن
طوغرویه حکومت سلطنت سنیه یه کیرمش و علی پاشانک قرنداشلری مندرس اولمش
ایسه ده عربانک اطاعته آلملری ضمنده قبودان دریا طاهر پاشا کوندریلوب برقاچ سنه
حرکات عسکریه متمادی اولمشدر . علی پاشا حقنده الطاف سنیه ارزان بیوریلوب اون
بیك غروش شهریه تعیین وقوناق تخصیصیه توقیر اولندی لکن بو کیفیت تونس حکومتک
طرف دولتدن توحشنه بادی اولمغله نه نتیجه یی انتاج ایلدیکی بمنه الکریم محنده توضیح
اولنه جقدر .

احوال مصریه

عصر سلیم خان ثالثده قبودان دریا اولان کوچک حسین پاشا فرانسزلرك ید غصبندن
مصری تخلص ایلک اوزره دونمای هایون ایله مأمور اولدقده کندوسنه منتسب بولنان
قواله چورباجیسی حسین اغایه مکتوب کوندروب بر مقتدر ضابط ایله برایی یوز کزیده
عسکر طلب ایش اولدیغندن حسین اغا دخی یکنی محمد علی اغای انتخاب و معینه ترتیب
ایتدیکی عسکر ایله ارسال ایتکله حسین پاشا بونلری دونمای هایونه بالارکاب صوب
مأموریته عزیمت ایتشدی . بعد الفتح آرنبودلقدن وروم ایلینک سائر جهتلرندن کیدن
طوائف عسکریه نك اکثریسی اوراده قالدقلى مثللو محمد علی اغا دخی قالمش و کندوسی
امی ایسه ده درایت و شجاعته متصف و حکمت حکومته واقف تهیدینی ایقاعه قادر
برضابط متبصر اولمق حسیله سرچشمه لک یعنی بالمله باشی بوزوق عسکری سرکردلرینک
رئیس مقامنه قائم اولمشدر .

سردار اکرمک عودتند مصر والیسی نصب اولنان خسرو پاشا عساکر نظامیه ترتیبی وقشله بناسیله مشغول اولوب باشی بوزوق عسکرندن مصری تخلیه مقصدیله بعض سرکرده لره رخصت ویرمش ایسه ده گذشته علوفه لرینی اعطایه مقتدر اوله مدیغندن باشی بوزوق طاقمی عصیانه قیام ودفتردار جابی افندی بی اعدام ایتدکلرندن ماعدا خسرو پاشایی دخی فراره اجبار ایلرلیله میرمیراندن ارنبود طاهر پاشا قائممقاملغه انتخاب وجانب سلطنت سنیه دن والی کوندرلمسی عرض محضر ایله استدعا اولندی .

قپودان سیدی علی پاشانک برادری جزایرلی علی پاشا مقدما خیلی وقت مصرده اقامت ایدرک احوال مملکته کسب وقوف ایلدیکنه و بو اوانده استانبولده بولندیغنه مبنی والی نصب و بحرآ ارسال قلوب آنجق حجازه مأموراً مصره وارد اولان یکچیریلر علوفه طلیله طاهر پاشایی قتل ایش و کوله من بکلری دخی علی پاشادن سوء قصد توهمیله مصره تقربنده تلف ایتدیرمش اولدقلرندن مصر والی کی خورشید پاشایه توجیه بیورلدی و مکمل دائره سی خلقیله قاهره یه داخل اولدی ذکر اولنان وقعه لر بتون محمد علی اغانک تصنیعاتی آتارندن اولدیغی متین اولمغله قولایلقله مصردن چیقارلمسی ضمننده خورشید پاشانک انها سی اوزرینه جده والی کی رتبه وزارتله محمد علی اغایه توجیه قلندی ایسه ده مشارالیه محمد علی پاشانک معیتنده بولنان عسکری طائفه سی ینه عصیانه آغاز و خورشید پاشایی قلعه ده محاصره ایلدکلری خبری در دولته واصل اولمغین قرنا ی شهر یاریدن صالح بك ارسال وقنغی طرف قوتلو ایسه اکا ویرلمک اوزره برقطعه ابقا و برقطعه توجیه فرمانی اصدار و تسیار اولندی . محمد علی پاشا هدایای کلیه اعطاسیله میرمومی الیهی جلب ایسکله مصرک محمد علی پاشایه توجیهی متضمن اولان فرمان ابراز اولندیغندن ایکی یوز اون طقوز تارینخنده ولایت مصر محمد علی پاشا عهده سنده تقرر ایلدی .

محمد علی پاشا شمدی یه قدر کوله من بکلریله خوش کچینوب اقتضا ایتدکجه والیر علمینده آنلری دخی استعمال ایدر ایدی . زمام اداره ید اقتدارینه کچد کدنصکره بالطبع کوله منلرک رقیب حکومت اولملری حقنده اولان مضمربینی اظهار و بعضلرینی قوله آله رق دیگرلرینی اوروب ازمکه شروع ایلدی . محمد علی پاشانک کیدیشی و مصری تحصیل ایدیشی سلطنت سنیه نك نظر دقتی جلب ایسکله ایکی یوز یکرمی برسنه سنده ایالت مصر موسی پاشایه واندن منحل اولان سلانیک و قواله سنجاقلری محمد علی پاشایه توجیه اولنوب موسی پاشا قپودان قدری پاشایه ترفیقاً و دونمای هایونه ارکاباً اسکندریه یه کوندرلدی . محمد علی پاشا اسباب مدافعه نك استحضارینه مسارعتله برابر کندوسنک ابقاسی متضمن مصر علماسی و اشرافی

طرفندن تنظیم ایتدیردیکی عرض محضرلری قپودان پاشایه واستانبوله تقدیم وکلیتو مبالغ وهدایا دخی تسیار ایلمکه موسی پاشا سلائیکه ارجاع و محمدعلی پاشانک بیوک اوغلی ابراهیم بک که مشهور ابراهیم پاشا در رهن صورتیله استانبوله اقامت ایتک شرطیله ایالت مصر محمدعلی پاشا عهده سنده ابقا قلندی . بوخصوص حقنده ارکان دولتک مذاکراتی متضمن اولان مضبطه خزینة اوراقده محفوظ اولمغله منظور فقیر اولمشدر ایکی یوز یکر می ایکی سنه سنده انکلتزه دوتماسی استانبول لیمانه ولوج و بش اون کون طرفنده خروج ایتدکدن صکره اسکندریه غنیمت و سکرز اون بیک قدر عساکر بریه اخراجیله اسکندریه ورشیدی ضبط ایتدیکی زمانده محمدعلی پاشا کوله من بکاریله محاربه اوزره بولمغله در حال کوله منلر ایله باریشوب بالاتفاق انکیزلر اوزرینه هجوم ایلدیلر

وقوعبولان مقاتلاتده انکیزلرک پک چونغی مقتول و برمقداری دخی مرکزده دوکلیکه مجبور اولمغله دوتمالری رجعت قهقرییه مبتلا اولدی و محمدعلی پاشا تشریفات پادشاهی ایله تاضیف بیورلدی بوند نصکره بر طرفدن مأمور اولدیغی حجاز سفری تدارکاتنه اقدام و بر جانبندن دخی کوله من بکارینک تنکیلنه نصب نفس اهتمام ایدوب کوله منلری مغلوب واقطار مصریه حاصلات و اداره سنه مداخله لرینی قطع ایتدکجه حکومتک وقع و نفوذی و واردات و اقتدارنی ترقی ایتدکده ایدی نهایت حجازده اردو حیقاره جنی کون آلایده بولمق اوزره مصرده موجود اولان کوله من بکارینی قلعه یه دعوت و ترتیب ایتدیکی عسکری بغته اوزرلرینه هجوم ایتدیروب بر آنده برقاق یوز امرا و کاشف اتلاف ایتدیردیکی مثلواطراف و نواحیده بولنانلرک دخی اکثری اله کچیریلوب قتل و اعدام و برمقداری افریقا چوللرینه و طرابلس طرفلرینه فراره اجبار اولندی و کوله من اوجاغی بالکلیه سوندی و بو دفعه ده بیکدن متجاوز بهادران چرا کسه محو و نابود اولدی یوقاروده بیان اولندیغی وجهله حرمین شریفینی وهابی طائفه سندن تخلیصه موفق اولسی بین الاسلام موجب توافرشان و شهرتی اولمغله برابر مصرک زراعت و عمارتی تزئید و باخصوص نهر نیلدن اسکندریه یه آچدیغی جدول که محمودیه نامیله مشهوردر اقطار مصریه نک فوق العاده ثروت و ترقیسنی استلزام ایلدیکندن محمدعلی پاشانک موفقیتلری دللرده داستان اولمغه باشلادی صدر اسبق یوسف کامل پاشا محمدعلی پاشا دن استماعاً روایت ایدرایدی که ایالت مصری اون اوچ بیک کیسه وارداتله بولوب بو واردات ایکنجی سنه سی اون سکرز بیک کیسه یه ترقی ایتمشیکن اوچنجی سنه سی اون بیک کیسه یه تنزل ایلمکه غالباً بونک سببی انکیزلرک اسکندریه ورشیدی ضبط ایللری خائله سی اولمشدر . دردنجی سنه او توز بشیمک کیسه یه چیقوب بعده ترقی ایده ایده

محمد علی پاشانك اواخر ایامنده غیراز برالشام درت یوزبیک کیسه‌نی تجاوز ایلیدی محققدر. بوترقینك برمقداری فیئات مسکوکاتك تقریباً بش مثلی راده‌سندده تزیاید ایلسی قضیه‌سی ایسه‌ده قسم اعظمی کوله‌من بکالینك مضبوطاتی اولان اراضینك حکومه‌ته انتقال ایلمسندن وزراعت وتجارتك تکیژندن منبعث اولمشدر.

طرف دولته ویریلان مال مقطوع بالترقی اون ایکی بیک کیسه‌یه بالغ اولمش ایسه‌ده حالاته نسبتله پک جزوی بولندیغندن ومحمد علی پاشانك عزمی قوی وافکاری بلند ایدوکنندن کندوسنه قالان مبالغ کلیه ایله برطرفدن عساکر منتظمه ترتیب وتکشیریله طوپ وتفنك وباروت فابریقه‌لری وترسانه وحوض انشاسی مثللو لوازمات حربیه‌یه اقدام ایدر وبرجانبدن دخی کوله‌لرندن واولاد اهلیدن اوروپایه شاگردان ارسال ایدرک علوم حربیه وفنون ریاضیه‌یه مالک آدم یتشدیرر وآوروپا ارباب معارفندن جلب ایلیدی اشخاص واسطه‌سیله هم نظامات عسکریه‌سی اکیال وهمده شکر ومنسوجات فابریقه‌لری انشا ایتدیرمک کبی وسائط تمدن وترقیه اهتمام ایلر ایدی مع‌مافیه بووجهله دول مستقله‌ده جاری اولان قاعده وآینه تطبیقاً تدارکات حربیه‌یه مباشرت ایلسی نزد سلطنت سینه‌ده قرین جواز اوله‌میه‌جنی طبیعی بولمنسی درپیش مطالعه ایدرک بونك ازاله تأثیری مقصدیله طرف‌هایونه ومتفذان مقرینه وسائر ارکان دولته پیدرپی هدایای کلیه تقدیم ایدوکلیدی کبی ممالک محروسه‌نك هرجهتندن حجج شریفه کیدن علما ومشایخ واشرافه پاره‌لر وهدیله‌لر ویرر وبعضارینه کیزلوجه ماهیه وسالیه‌لر تخصیص ایدرک عامه ناسك قلوبنی جلبه بغایت اعتنا ایدر ایدی حتی یوسف کامل پاشادن استماع اولمشدرکه مکرکچی عثمان پاشانك سلحدار علی اغایه چوق‌پاره ویره‌کلیدی وبرکره اوچیوز کیسه بردن تقدیم ایلیدی بالمناسبه محمدعلی پاشانك حضورنده تفوه اولندوقده اوچیوز کیسه‌نك لقردیسمی اولور بن سلحدار اغایه بالدفعات آخرنجه آلتون اعطا ایلدم دیمشدر. رجال دولتعلیه‌دن مشهور حالت افندی وهابی غائله‌سی بتدکدنصکره‌که تقریباً اوتوز بش تاریخلریدر شام وحلب ویاخود بغداد وموصل ایالتلری برلشدیریلرک صورت تلطیفده محمدعلی پاشانك بو قدر خدمت وموفقیتی اوزرینه بووجهله ازعاج اولمنسی لایق شان سلطنت دکلدردیه‌رک منعنه نصب نفس اهتمام ایلیدی مرویدر. سرعسکر اسبق سلیمان پاشا مرحوم که سرای‌هایوندن مخرجدر مصر مسئله‌سنك ظهوری اثناسنده بر رسم کونی سرای‌هایون اغالینك متخیزانیه برابر بر معتاد حضور‌هایونده قائم ایکن سلطان محمود خان حضرتلری سلحدار اغای مؤاخذه‌یه باشلامغله اغالر طشریه چیمق استدکارنده صالیورمیوب وقعه مذکورده‌نی تذکار واغلره خطاباً محمد

علی پاشانك بو درجه يه كلسنك سېي بو احمدقور ديو ساجدار اغاي ارأه اياش ايدوكني
نقل ايله تأييد روايت ايدر ايدى

استانبولده يكيچريلرك الغاسندن اول محمد علي پاشا مصرده عساكر منتظمه ترتيب
وتأسيس ايدوب موردده ابراهيم پاشا معيتنده استخداام ايلش ومحسناتي دخی کورلمش
ايدى روسيه سفرى ظهورنده جانب دولت عليه دن وقوعبولان طلب اوزرينه اون ايكي
بيك عساكر نظاميه وعد وترتيب ايلشيككن او آراق مصر آلتونلريتك فيئاتي بر مقدار
تنزيل اولمغله بوني بهانه ايدرك عساكر مرتبه يي كوندريميوب يكرمي بشبيك كيسه قدر
اعانه تقديه ارساليله اكتفا ايلدى بلا استيدان موردن عسكرينى چكمنسى ومسقوسفرينه
اعانه عسكريه ده بولنامسى بروقتدنبروحقنده مضمر اولان شبهه يي تأييد ومركز مطاوعتكاريدن
انحرافنى تحقيق ايلمكه روسيه سفرنى بتدككن وبغداد تسخيرى حاصل اولدقن صكره
صدر اسبق سليم پاشا شام واليسى نصب اولنوب علي روايه مصرده برحادثه احداثيله محمد
علي پاشانك تنكيلى اسبابنه چالشمق اوزره مأموريت خفيه ويرلمش ايلش ومحمد
علي پاشانك ايسه اچقه قوتيله اندرون هايونده و ارکان دولت ايچنده متعدد جاسوسلرى
اولديغندن كيفيته كسب اطلاع ايدرك ذكر آتى تشبثاتنه ابتدار ايلدى چونكه محمد علي
پاشا يكرمي اوتوز بيك عساكر نظاميه و قياق وفرقتين اوله رق اون بش يكرمي كمى يه
مالك اولوب اوتهدنبرو ارزوسى دخی شام وحلب ايلالرينى حوزه حكومته الحاق ايلك
ايدى حتى بو صورت ارکان دولتك مجزومى اولديغندن وقت سفرده شرق سرعسكرى
غالب پاشا مذکور ايلالرك محمد علي پاشايه تفويضيله اناطولى حدودينك محافظه سنى عهدده
اقتدارينه توديع ايلك حكم زمان ايجابندن اولديغنى يازمش اولديغنان بو كيفيت غالب پاشا
حقننده موجب اغبرار هايون اولمشيدى جزار احمد پاشادن صكره عكا واليسى اولان
عبداه پاشا چندسنه مقدم فرمانلى اولديغنى حالده محمد علي پاشانك توسط وشفاعتيله مظهر عفو
پادشاهى اولمشيككن محمد علي پاشانك عكا يه فراريدن كوله لر ينى ويرمامسندن طولاني يينلرنده
حاصل اولان مخالفت اوزرينه محمد علي پاشا سوق ايتديكى عسكرو دونما قوتيله عكايي تضيق
وتسخير ايليوب عبداه پاشاي استانبوله ارسال ايلدى وبعض وسائله ايله شامده اختلال
احداث ايدوب والى بولنان سليم پاشاي ائتلاف ايتديرمكه شام اهاليسى مؤاخذه دولتى
درپيش ملاحظه ايدرك محمد علي پاشايه دخالت مجبور اولدير بوبابده نصايح وتهديدى
حاوى اصدار وتسيار اولنان اوامر عليه دن برتره حاصل اوليوب باخصوص محمد علي
پاشانك اشقودردلى مصطفى پاشاي عصيانه تشويق ايلديكى مركز ثبوت وارمغله طرف

شیخ الاسلامیدن ویریلان فتوای شریفه که بالجمله معزول شیخ الاسلام ایلہ صدور علما و مشهور درس خواجه لرینک امضالریله دخی توثیق و تصدیق اولمشدر انک موجب شریفی اوزره محمد علی پاشا ایلہ عونہ سنک تدمیری ضمنده ادرنه والیسی اغا حسین پاشا سردار اکرم و مصر والیسی نصب اولنوب معینته ترتیب اولنان اوتوز بیک قدر عسا کر منتظمه و غیر منتظمه ایلہ اعزام قلندی .

عسا کر عثمانیه نك طلیعه سی اولان اینجه بایراقدار اوغلی محمد پاشا معیتده کی باشی بوزوق عسکر یله میرلوا بکر پاشا قوماندہ سنده بولنان اوچ آلا ی پیاده و میرالای عصمت بکک سواری الای شخص و حورانہ واصل اولدقلری کون ابراهیم پاشا یدی الای پیاده و بش الای سواری ایلہ خصه داخل اولمغله و سردار اکرم مدیق قلعه سنده و جیوش دولتعلیه مذکور ایکی نقطه نك ارسنده واقع اوتوز ساعتک مسافه ده طاقم طاقم کچمکده بولملریله قاعده حریبه یه توفیقاً عسکرک اجماعیله جربه مباشرت لازمه دن ایکن امرای عسکر یه جاهل و حرکات عسکر یه دن غافل اولدقلرندن قرق سکر سنه سی اواخر محرمنده ذکر اولنان طلیعه فرقه سی همان جنکه کیریشوب بوزولدیلر بوانه زام کیروده اولان عسکره و سردارا کر مه موجب دهشت و تلاش اوله رق اولا حاجی طوتمق ایچون اولجانبه حرکت ثانیاً اسکندرونه کلان مهماتی محافظه ایلک مطالعه سیله اسکندرونه رجعت ایدرک یتمش سکسان ساعتک مسافه نك قطعیه عسکر ده تاب و توان قالمیوب بر طرفدن قولرا عاتی دخی ضایعات کثیره یی موجب اولدیغندن اردی هایونک ایلر و طو تاریری قالمدی بناء علیه سردار اکرم عزل و اولجوارده بولنان صدر اسبق رؤف پاشا قائم مقام و مشار الیه محمد پاشا سر عسکر نصب اولندی . مسقوسفری ختامندن برو ارنبودلق اصلاحیه مشغول اولان صدراعظم رشید محمد پاشا معیتده بولنان عسکرک بر مقدار یله استانبوله جلب و ابراهیم پاشا اوزرینه مأمور ایدیلرک اولکی اردودن دهامکمل براردو ترتیبیه اعزام قلندی ابراهیم پاشا قونییه کیرمش و موسم شتادخی حلول ایلمش اولدیغندن صدراعظم بهارده قدر آق شهرده اقامت و خفیف سواری ایلہ قونییه یی تحت محاصره یه الوب مصر ایلہ مخبراتی قطع و محتاج اولدیخی لوازم و مهماتک و رودینی منع ایلہ تضییق ایلک افکارنده ایدی .

زیرا اولوقتک حکمنجه قونییه نك اطرافنده بولنان والی و متصرف و مساملرک بشر التیشریوز قدر قبولری خلقی اولدیغندن قریب و بعید بونلری قونییه نك اطرافنده دور ایتدیره رک ممکن اولان تضییقاتی اجرا ایتدیرمک قابل ایدی لکن سلطان محمود خان حضر تلری حسین پاشا اردوسنک پریشانلغندن پک زیاده متأثر و راحت و آرامی منسوب

اولمغله صبره اقتداری قالمیوب اولوقت مابین هایون مشیری بولنان فراری احمدپاشایی ارسال و بلافاصله وقت حربه مباشرت اولمنی قطعاً امرایلدی بناءً علیه قرق سگز سنه سی رجینک اواخر یله کانون اول اوائل ایدی که آق شهردن حرکت وقونیه صحراسنه موصلت اولنوب شدت شتادن ناشی موقع طوتمق واستحکام یایمق کبی شیلره زمان وامکان مساعد اولمدیغندن همان عسکرک ایاغی توزیله حربه مباشرت قلندی اتی ساعت قدر جنکه دوام اولنوب آثار غلبه نمایان اولمش و صدر اعظم قونیه دروننه عسکر صوقق ایله مشغول بولنمشیکن هواظیت سیسیلی اولدیغندن واقشام تقرب ایلدیکندن صدر مشارالیه کندو عسکری اولمق ظنیه دشمن سوارسی ایچنه کیویور مکه اسیردوشدی و بونک در حال شیوعی عسا کر عثمانیه نك رجعتیه بادی اولدی عسا کر عثمانیه جیوش مصریه نك ایکی قاتی درجه سنده ایسه ده مصر عسکری هم معلم و همده فرانسیز جنرال لرندن اولوب سلیمان پاشا نامیله مشهور اولان برفن حرب ماهرینک ترتیب و پلانی تحتیده اولمغله نائل غلبه اولدیلر .

بووقعه اوزرینه ایش کسب اهمیت ودهشت ایلدیکندن سلطان محمودخان حضرتلری روسیه ایمپراطورندن استعانه ایسکه سنه مزبوره ذی القعدسی اواسطنده برفرقه روسیه عسکر یله برفیلودونما بوغاز ایچنده واقع خنکار اسکله سنه وارد اولدی .

وابراهم پاشا دخی کوتاهییه کلدی عقب وقعه ده طوپخانه مشیری خلیل پاشا و آمدی رشید بک که صدر اسبق مشهور رشید پاشادر مصره اعزام اولندقلری مثللو روسیه لو طرفندن دخی مأمور مخصوص کوندرلمش وانکلتره وفرانسه دولتلری سریراً ایشه بر نتیجه ویرلمز ایسه پک نیوک وقعه لک ظهورینه سبب اوله جغنی تفرس ایدرک انلر طرفندن دخی محمد علی پاشایه اجرای نصایح وتهیدیات اولمنش اولمغله محمد علی پاشانک عهده سنده بولنان مصر و کرید آیالتلرینه الحاقاً شام و حلب و صیدا آیالتلرینک و ابراهیم پاشانک عهده سنده بولنان جده و ایلمکنه الحاقاً اطنه آیالتنک توجهیله اصلاح ذات البین اولمنی قرارلشدیرلدی ورشید بک استانبوله بعدالعوده کوتاهییه کیدوب ابراهیم پاشایی ارجاع ایلدی .

سر عسکر سابق نامق پاشا که قدمای ارکان دولتن اولوب وجودیله افتخار اولنور و هروقتده طوغری بی سویلر بر ذات اولدینگی جمله نك معلومیدر الی تاریخنده میرلوالق رتبه سنی حائز ایکن محمد علی پاشا حقنده اوروپا دولتلرینک افکارینی یوقلمق ودولت علیه نافع بر صورت استحصال ایلمک اوزره سفارت مخصوصه ایله اوروپایه کوندرلمش وانکلتره دن بدأ ایله فرانسه ونمچه و پروسیا و روسیه حکمدار لر یله کوریشوب بوبابده استحصال ایلدیکی معلوماتی کلوب سلطان محمودخان حضرتلرینه عرض ایلشدو مشارالیه دن

شو و جهله مرویدر که محمد علی پاشا کوندن کونه تزید قوت و تکثیر ثروت ایتسیله برابر دولت علیه نك گرفتار اولدینی مهاجمات خارجی و داخلیه دن ناشی اعادة اقبال ایتسی غیر ممکن کی کوردیکندن سلطنت عثمانیه و وارث اوله بیلمسنى ذهنتده قرارلشدیرمش و بونك مقدماتی استحضاره نصب نفس اهتمام ایتشیدی . اوغلی ابراهیم پاشانك موردیه مأموریتده چونکه اولجه عسا کر منظمه ترتیبه موفق اولمش اولدیغندن عصاة رومی تشکیل و استیلا ایلدکلی قلاعی استرداد ایلدی و یالاکیز طاغیر باشلارنده بعض اشقیاء فرقه لری قالدی بحال اوروپا لولرک مشهودی اولدقده یونان حکومتك تأسیسی بین الدول مقرر اولدیغندن بواشیدن ال چکمسنی محمد علی پاشایه تبلیغ ایلدیلر مشارالیه دخی شمدیکی حالده کندوسنك اورادن چکلمسی دولت علیه دوئماسنك محاسنه موقوف اولدینی و اولوقت خط رجعت منقطع اولدی اعتذار یله عسکرینی موردن جلب ایدم بیله جکنی تعهد ایتمکه فاوارین وقعه سی ظهور و ابراهیم پاشا دخی عسکرینی بالاستصحاب مصره عودت ایلدی بونك اوزرینه روسیه محاربه سی آچیلوب اون ایکی بیک عسکر امداد کوندرمک اوزره تعهد ایتشیکن بعض اعذار واهییه سردیله آنی دخی بدله ربط ایتدیردی و ایکی اوچ سنه مرورنده اجرای مافی الضمیره قیام ایلدی .

بوروایتی مؤید اولمق اوزره لطفی افندی تاریخنده مسطور بعض خطوط هایونده (محمد علی موره حقنده اوروپا دولتریه مذاکرات و مقالاته کیرشمش بونه دیمکدر هیچ بروالینك بویله شیلره لیاقت و استحقاقی وارمیدر) مآلنده بعض فقردرلر واردلر لکن نه چاره که اولوقتلرده محمد علی پاشانك بو تصمیماتی احاد ناسه دکل ارکان دولتک اکثر بنه آکلاتمق غیر قابل ایدی . چونکه محمد علی پاشا اصحاب خروجک دول قدیمه حقنده اختیار ایدم کلدکلی ابن خلدونده مسطور اولان قاعده و مساکه تمامیه توفیق حرکت ایدر ایدی بناءً علیه حکمت بین اولان ذوات محدوده دن غیری کافه خلق محمد علی پاشا دولتک صادقی اولوب تنظیم احوال نخبه آمالی و مسقودن اخذ انتقام نتیجه مقصد مافی البالیدر اعتقادنده ایدیلر حتی بوافیکارک بقیه سندن اوله رق لطفی افندی بیله تاریخنده حیف صد حیف که بعض ارباب نفاق پادشاه آنام ایله بویله بروزیر ذی قدرتک آردلرینی بوزدیلر دیو تأسف ایدر .

ارباب نفاقدن مراد خسرو پاشادر چونکه بین الانام مشهور اولدینی اوزره خسرو پاشانك تا مصر والیکندن برو محمد علی پاشایه غیظ و خصومتی اولوب دائماً علیه نه بولمور ایتش . حالبوکه خسرو پاشانك الی وفاته مصر دن موظف اولدینی صکرده دن

تحقق ایلدی مع مافیہ خسرو پاشا مصردن پاره آلمغله سلطنت عثمانیہ اولان صداقت واستقامتہ خلل کلیوب هم پاره آلور و همده دولت علیه حقنده اولان تصمیمات مضر دنك اندفاع و ازاله سنه چالیشور ایدی ظاهرده مصلحت بتمش ایسده حقیقته تدارکات و تمهيات دوام اولنسی ضروری ایدی چونکه ابراهیم پاشا قونیہ ایله اطنه نك آرد سنده واقع کولك بوغازینی استحكامات جسیمه ایله ترصین ایدوب مصرده دخی دو نمانك تزیدینه اقدام و عساکر نظامیه نك تکشیرینه اهتمام اولمقده و آیالات سائر دنك مقطوعات معینه لرینك اعطاسنده تسامح و خصوصات سائر ده مستبدانه معاملہ قلنمقده ایدی صدراعظم رشید پاشا کوتاهیہ ده موقوف ایکن معزول و صدر اسبق رفیق ثابت پاشا صدر صدارتہ موصول اولوب بش اون کون صکره رشید پاشانك سبیلی تخلیه قلنمغله استانبوله ککش وایکی یوز الی سنه سی اواسطنده سیواس ایالتی و مؤخرأ دیار بکر و خرپوت طرفلرینك اداره سی عهده سنه تفویض و معیتنه براردو ترتیبیله صورتا کردستانك اصلاحنه مأمور ایدلمشیدی حلیجه کردستانده اصلاحاته دخی موفق اولمش ایسده اساس مأموریتی اولان مصرلو مدافعه سنه حاضر لنمقده ایکن الی ایکی سنه سی شعبانده مرتحل دار آخرت اولمغله عهده سنده بولنان دیار بکر و سیواس ورقه ایالتلری بارتبه وزارت کوتاهیہ فریقی حافظ محمد پاشایه توجیه بیوریلوب اردوی هایونك استکمالنه اعتنا ایدلدی .

پروسیا مارشالی مشهور مولتکه اولوقت خدمت دولت علیه ده و حافظ پاشا اردو سنده ایدی آنك رأی اردوی هایون فرات نهرینی کچمیوب یالکز ارائه سلطوت و مهابتله اکتفا ایدلدیکی حالده آز وقت ایچنده مصر عسکرینك طبیعتیله پریشان اوله جنی مرکزنده ایدیسنه ده طرف هایوندن جنکه مباشرت اولنسی خصوصنده تأکید و تعجیل بیورلمقده اولوب حتی قرناى شاهانه دن محمد علی بك که صکره داماد و صدر اعظم اولمشدر تنفیذ امر پادشاهی ضمننده اعزام اولمشیدی بنابرین الی بش سنه سی ربیع الاولنده حافظ پاشا اردوی هایونی مستصحبأ فرات نهرینی مرور و حلب جوارنده واقع نزیب نام محله محاربه یه آغاز ایدوب سوء تدبیر ثمره سیله معسکر عثمانی بوکره دخی رهین انہزام و پریشانی اولدی .

سلطان محمود خان حضر تلری مصر وقوعاتیلہ خواب و حضوردن مہجور اولدیغندن دفع اندوه و ملال قصدیله استعمال ایلدکلری مشروبات شدیدہ طبع هایونلورینی تغیر ایتکله چاملیجده واقع اسما سلطان باغنه نقل بیورمشلر ایدی .
خبر انہزام و اصل اولمقسزین الی بش سنه سی ربیع الآخرینك اون طقوزنجی

کونی الی الی یاشنده وسلطنتک اوتوز ایکنجی سنه سنده مرلحل دار آخرت اولوب وصیتلری موجبجه دیوان یولنده واقع اسما سلطان سرائی عرصه سنه دفن وبعده مکلف تربیه بنا قلندی خاقان مرحوم حضرتلری یوز الی سنه دنبرو کلان پادشاهلرک اعظم واعقلیدر هنکام سلطنتلری دولت علیه نک اوان انحطاطنه تصادف ایلدیکندن ممالکجه خلی ضایعات واقع اولمش ایسه ده برمدتدنبری طوائف ملوک حکمنه کیرمش اولان اعیان ودره بکلرینک ازاله سیله حقیقه سلطنتی خار آزاردن تطهیر ایلدی باخصوص بغاة عسکریه یی تأدیب و جنود منتظمه تأسیسنه موفق اولملری غیور و مقدم و مصالح دولتک و خدمه سلطنتک دقایق احوالنه واقف تهیدینی ایقاعه قادر وبالذات اداره دولته مقتدر بر شهریار جلیل المآثر ایدی .

جلوس سلطان عبدالمجید خان حضرتلری

بیوک شهزاده سلطان عبدالمجید خان حضرتلری اورنک عثمانی اولوب صدارت عظمی مجلس والا رئیس خسرو پاشایه و مجلس والاریستی ساقی رؤف پاشایه و سر عسکرلک چند کون اولجه تجارت ناظری نصب اولنان خلیل پاشایه و نظارت مذکوره سر عسکرلکدن انفصال ایدن سعید پاشایه توجیه بیورلدی . ایرتسی کون تزیب انهرامی خبری و بش اون کون صکره قبودان دریا فوزی احمد پاشانک دونمای هایونی اسکندریه کورتوروب محمد علی پاشایه تسلیم ایلدیکی پیام غریبی واصل اولدی . چونکه احمد فوزی پاشا معتمد و مؤتمن محمودخانی ایدی . اولوقت کسب اشهار ایدن روایاته نظراً کویا سلطان محمود خان حضرتلری خلیل پاشا و خسرو پاشادن سلب امنیت ایله بعض مرتبه و سوسه یه مبتلا اولدقده احمد فوزی پاشا شهزاده جوانبخت حضرتلرینه سوء قصدی درعهده ایتمش ایدوکنندن شمدی جلوس هایون وقوعنی و خصمانندن خسرو پاشا و خلیل پاشانک صدراعظم و سر عسکر اولدقلرینی استماع ایله جان خوفنه دوشوب بوخباتی اختیار ایشدر . شویله که دونمای هایون قلعه سلطانیه ده ایکن تبدل سلطنت خبری واصل اولدقده احمد پاشا کتخداسی بولنان شریف اغا وانک اوغلی اولوب ریاله هایون اولان عثمان بک که تحول حکم زمان ایله مؤخرأ استانبوله کلوب مع الوزره بوسنه والیسی اولمشدر . انلرایله بالذاکره صورت فراری قرارلاشدیردقدن صکره امرای بحریه یی بعض اقوال ابله فریانه ایله اغفال ایدهرک همان حرکت و مصره طوغری عزیمت ایلدیلر .

دونمای هایونک بووجهله کیدیشی ارکان دولته موجب اندیشه اولمغله مجلس والا کاتبی محسن افندی یه بریسی احمد پاشانک ابقاسنی و دیکری قبودانه هایون بولنان مصطفی

پاشانك قپودان دریا لقبی متضمن ایکی فرمان ویریلوب اولابقا فرمانی اعطا ایله احمد پاشایی اغفال وبعده مصطفی پاشانك مأموریت فرمانی ابراز ایله اجرای مأموریت ایتسی تعلیم قلنه رق مخصوص واپور ایله اعزام قلندی. مومی ایله محسن افندی ردوسدن ایلروده دونمای هایونه مواصلت و احمد پاشایه ابقا فرمانی اعطا ایلدکده احمد پاشا فرمانی قرائت ایتدیروب محسن افندی بی کتخداسی شریف اغایه مسافر ویردی. و محسن افندی کرك مصطفی پاشا وکرك امرای بحریه ایله ملاقات قپولری مسدود اولدیغنی کوروب شاید تحری اولنور خوفیله مصطفی پاشانك مأموریت فرمانی دکره آتمغه مجبور اولدی. اکر مصطفی پاشانك قپودان پاشانگی رسماً اعلان وفرمانی دخی طوغریجه کندوسنه اعطا اولمش اولسیدی احمد پاشانك هیچ برشیئه قادر اولهمیه جغنی بدیهی ایکن ارکان دولتک عقلانگی ایشی مشکلاته کرفتار و بالعکس احمد پاشانك ابقا فرمانی تقویه نفوذ و اجرای مافی الضمیری امرنده تسهیلاتی استلزام ایلدی. خارجیه ناظری رشید پاشا مصر علیهنه دول معظمه ایله عقد اتفاق ایچون ایکی سنه دنبرو اوروپاده بولنوب موفق دخی اولمشدی. تبدل سلطنت عقببنده استانبوله کلوب الی درت سنه سنده اجراسی تصمیم اولنمشیکن بالایجاب تأخیر اولنان تنظیمات خیریه بی اعلان و اجرا ایتدیروی بوبابده کلیخانه ده قرائت اولنان خط هایون ایله سنه منرقومه ده تنظیماتک ایلرویه تعلیقنی متضمن اولافرمان عالی صورتلری دستور نامنده اولان مجموعه ده مسطوردر.

مصر محاربه اخیر هسی

انگلتره و اوستریا و پروسیا و روسیه دولتلریله باعه دنامه عقد اتفاق اولندی. فرانسه دولتی محمد علی پاشانك مجلوبی اولدیغندن قرال بولنان لویی فلیپ و خارجیه ناظری کیزو بواتفاقک حاصل اوله مامسنه پک چوق اقدام ایتشلر ايسه ده مقتدر اوله مدیلر. ومع مافیه اتفاق دوله داخل اولمدیلر ايسه ده مصره دخی اغانه یه جسارت ایدم مدیلر بناء علیه مصر ایالتی بالورائه و عکاقلعه سیله صیدا ایالتی قید حیات ایله محمد علی پاشایه تفویض اولنق اوزره شام و حلب وجده کرید واطنه ایالتلرینک ردی و دونمای هایونک اعاده سی تکلیفیله صدارت مستشاری رفعت بک مصره کوندریلوب مذاکرات و مخبرات طویله جریان ایلدیکی حالدده محمد علی پاشانك ازضاسی قابل اوله مدیغندن الی الی سنه سی اواسطنده حربیه مباشرت اولندی.

استانبولدن کوندریلان بر قپاق و برقاق قطعه سفن حربیه و نیجه لولرک چند قطعه سفینه لری انگلتره دونماسیله بالاجتماع مصر و برالشام سواحلی تحت ابلوقه یه اندی و مرکز

عسکری اتخاذ اولئان قبریس جزیره سینه تقریباً یکرمی بیك قدر عسا کر عثمانیه سوق اولنوب اردوسر عسکر لکی صدر اسبق عزت محمد پاشایه وعسکر قوماندانلخی سرویلی سلیم پاشایه احواله قانندی بیروت قلعه سی جزوی محاربه ایله تسخیر اولندقدنصکره ابراهیم پاشا درزی طاغی اتکلرنده چند دفعه مقاتله یه تصدی ایتمش ایسه ده جمله سنده مغلوب اولدیغندن طوئلق راده سنده ایکن شامه فرار ایدوب اعتماد ایلدیکی عکا قلعه سنك دخی اوچ بحق ساعت ظرفنده قوه بحریه ضربیله فتح اولندیغنی استماع ایتدکده ارتق شامده دخی آرام ایدمه یه رک چوللره دوشدی وتعریف اولمز مضایقه وشائد ایله آج عریان مصره طوغری چیتوب کیتدی .

ابراهیم پاشا رشید پاشا وحافظ پاشا اردولری مثللو جسم قوتلره غلبه ایتمشیکن بو کره عسا کر جزویه قارشو سنده تحته پرده قدر مقاومت ایده مامسی غریب کورینه جکندن بونك اسبابی تفصیل ایتک اقتضا ایلدی .

مقدمه بخدمه ترقیم اولندیغنی اوزره محمد علی پاشا حج شریف ایچون مصر دن کلوب کن مشایخ وخواجه لره واشراف ممالکه عطیه لر وخرج راهلر اعطا ایدرک وقابل خطاب اولنلرینه دولتک اغتشاش احوالندن ومسقوک غلبه سندن یانوب یاقیله رق دین و دولت خدمت ارزوسنی اظهار ایده کملکه وبرطرفدن دخی کرک استانبول وکرک طشره لر اشرافنه خفی وجلی یاره لر کوندرمکه او یله بر توجه عمومی جلب ایتشیدیکه اکثر خلق ولایتنه ومؤید من عنده اولوب قریمک تخلیصی بونک یوزندن اوله جغه اعتماد ایدرلر وحرمینک خوار جدن تطهیرینه موفقیتنی براعت استهلال عد ایدرک مدح وستایشیه امرار اوقات ایلرلر ایدی . باخصوص مرض جزام کبی عروق انامه سرایت ایتمش اولان یکیچری غیر تکشلکندن وعسا کر نظامیه احداثندن وآنک تفرعاتندن اولان بعض معاملاتدن والبسه اجنبیه یه میل ورغبت قانمسندن طولای کافه انام بیزار اولوب بوشیلرک سبیتنی خسرو پاشایه عطف ایله پادشاهی بویوللره سوق وترغیب ایدن خسرو پاشادر دیرلر ایدی . حتی محمد علی پاشا ایله خسرو پاشانک فی الاصل بینلری بوزوق اولدیغندن محمد علی پاشا بونی سر رشته ایدینه رک ابله غریب اولان بومثللو سوزلر ایله اصلاح مزاج دولت ضمننده اتفاقه دعوتی متضمن بعض والیله مکتوبلر کوندروب اغفاله چالشمش وبو مکتوبلرک اکثری ولایه طرفندن جانب دولت علیه تقدیم قلمشدر . توجه عامه شول درجه ده ایدیکه حسین پاشا اردوسنه دفتر دار نصب واعزام اولئان عظمای رجال دولت علیه دن طاهر افندی عقلا دن واصدقای دولتدن بر ذات اولدیغنی حاله یولده کیدر ایکن بونه کیفیتدرکه بن جانب سلطنت سینه دن مصر

اوزرینه سوق اولنان اردونك دفتردارى اولديغ حالده كوكل او طرفه محب ومتوجهدر
 ديو بعض محرملرينه سويلديكي محققدرد. ايسته ابراهيم پاشانك غلبهسى توجه عمومينك
 كندو طرفه معطوف اولسندن وقدمنه هر كسك دیده كشای انتظار بولمسندن منبعثدر.
 بودفعه كي پريشانغی ايسه یدی سكر سنه دنبرو زیر اداره سنده بولنان سوريه اهالیسنك
 انعكاس اميد عدالت ايله نهيه اوغرا دقلرينی اكلاملرندن ناشی كمال نفرتلرندن وطائفه
 عسكريسنك روگردانغندن نشأت ايتمشدر. چونكه حربه مباشرت اولمسيه برابر جبل
 لبنان اهالیسی وعشائر و عربان مصرلو علیهنه قیام ایدوب جنود مصریه دخی فوج فوج
 وحقی صادق بك نامنده بر میرالایك تحت قومانداسنده بولنان الای هیئت مجتمعه سیله
 اردوی هایونه دخالت ایلدی. بونلك جمله سی دوریجهیه کوندریلوب اوراده اسكان
 اولندیلر امرای مصریه دن اولوب كذلك طرف دولته دخالت ایتش اولان کلیسیلی محمد
 پاشا ومیر آلی صادق بك نقل ایدرلر ایدیکه ابراهیم پاشا درزی طاغندن شامه عودت
 واطرافده بولنان عسکرینی جمع ایتدکده کیجه لری طاقم طاقم فراره غاز ایلر یله محافظه لریچون
 قره غوللره ضابطان اقامه اولمیش اولدیغی حالده فراریلرک اوکی التیق شویله طورسون ضابطان
 دخی فراره شتاب ایلدکلرندن برقاچ کون ایچنده عساكر مجتمعه نك نصفی قالمیوب قالانلرک
 دخی کوزلری او یولده اولدیغی مشاهده اولنغین ابراهیم پاشا بالضروره چوللری طوتوب
 مصره طوغری عودته مجبور اولمشدر

عكا قلعه سنك تسخيرندن صكره اسكندريه نك ضبطی تصميم قلمقده ایدی لیكن محمد
 علی پاشا آرتق قوه نقودیه اعمالی زمانی گلش اولدیغی تفرس ایدرک انكلتزه باش وکیلی بولنان
 ذاتی دام اطماعه دوشورمش اولدیغندن مصر ایالتی وراثتله توجیه اولتمق صورتنه محمد علی
 پاشا راضی اولور ايسه ایشك بتورلمسی ضمننده امیراله تعلیمات گلش واللی یدی سنه سی شوالنده
 بو باده محمد علی پاشانك ركاب هایونه استعطا فنامه سی ورود ایتش اولمسیله مصر بالتوارث
 محمد علی یایه توجیه بیوریلهرق ایشه ختام ویرلدی ودونمای هایون استانبوله واصل اولوب
 ایالات مستحصله ولایه عظامه توجیه بیورلدی اولوقت انكلتزه ایلیچیسى بولنان بونصوبی
 بو قرارك علیهنده اولدیغندن مقتضای مأموریتی اوزره رسماً قبولی باب عالی یه عرض ایدر
 وخفیاً انكلتزه دولتی محمد علی پاشانك کلیاً قالدیرلمسنة باعه دنامه بورجلی ایدو کندن قبول
 اولنماسنی اخطار ایلر ایش لیکن هر نصلسه قرار واقع نزد دولته لیه ده قرین تصویب
 اولمشدر واقعا مصری حرباً ضبط ایتك بیوك تكلفاته وکلیتله تلفاته محتاج اوله جغندن
 بشقه انکلیز لولر دخی برلکده بولنه جنی جهتله ایلروده نهرنك کسب ایده جکی مطالعه سی

جای دقت ایدی بناءً علیه بوقدرله اکتفا مناسب کورلمشدر خارجیه ناظری رشید پاشا مرحومک امتیاز شرائطی حاوی قامه آلدینی فرمان عالی مصره ارسال اولندقدده محمدعلی پاشا ایکی شرطنک تبدیلی استدعاسیله اعاده ایسکله بوکا دخی مساعده اولنمق اقتضا ایلدی مذکور شرطک بریسی وراثت ایالتک اولاد ارشده منحصر اولسی شرطنک اولاد اکبر شرطنه تبدیلی وایکنجیسی مصرک حاصلاتندن اوچ رابع مصارف محلیه ایجون بالتوقیف رابع دیکرینک خزینة دولته تقدیمی فقره سنک دخی سکسان بیك کیسه مقطوعه ربط قلمسی ایدی مذکور فرمانلر دستورده مسطوردر بوندنصکره مصرک تغیرات احوالی بمنه تعالی جلد آتی یه عائد اولمغله بوفصلک تکمله سنه شروع اولندی .

بشنجی فصلک تکمله سی

سلطنت سنییه بوفصلک حاوی اولدینی زمانده ضایعات عظیمیه مبتلا اولدی اولاسکسان ایکی سفرینک نتیجه سی اوله رق اقلیم قریم الدن چیقمغله بوماده ارکان ذولت وافراد اسلامیه یی دلخون ایلدی چونکه بوندن سکسان سنه مقدم محارستان دخی حکومت سلطنت سنییه دن منفک اولمش ایسه ده اورالرده اهل اسلام یالکیز قلعه لرده ساکن ومسافر صورتنده اولوب کافه اهالیسی خرسیتیان ایدی قریم ایسه ایکی ملیونه قریب سکنة مؤمنینی حاوی بولندیغندن بوجهتله بالطبع اهل اسلامه زیاده تاثیر ایلشیدی بناءً علیه قریمک تخلیصی نخبه آمال انام اولوب موقوف علیهنی لایقيله مطالعه وموازنه یه دخی صدر اعظم یوسف پاشانک شدت تهالکی مانع اولمغله وانکلیرلر ایسه فرانسه لونک روسیه ایمپراطور یچه سی نزدلرنده حاصل ایلدکری اعتباره رغماً سلطنت سنییه یی حربیه تشویق وترغیب ایده کلرله ایکی یوز ایکی سفری کشاد اولندی لیکن بونک نتیجه سی اوله رق قریمی تخلیص ایده لم دیر ایکن اوزی ایالتی اوسته ویرلدی فرانسزلو ایله عقد اتفاق قلمق حسبيله ایکی یوز یکرمی بر سنه سنده ینه روسیه سفری ظهور ایدرک بوکره دخی طوزله نهریله پروت نهری بیننده اولان اراضی وسیعه وقلاع متعدده ضایع ایلدکدن بشقه صرب ملتیه امتیاز ویرلمک مجبوریتی حادث اولدی بوندن صکره روم اختلالی ظهور ایدوب بونک نهایتی دخی هم مورده نک قراللق اولمسنی وهمده چرکستان وچلدر ایالتلرینک روسیه لویه ترک قلمسنی وافلاق ایچنده بولنان قلاع خاقانینک احساسنی و صرب امتیازینک توسیع وتا کیدینی مستلزم اولدی وبونی متعاقب فرانسزلر دخی جزایر غربی استیلا ایلدی .

سلطان محمود خان حضر تیرینک جلوسلرندده ارنبودلغک بر جهتی یانیسه والیسی
تپه دئلی علی پاشا وبرجهتی اشقودره والیسی قره محمود پاشا خاندانی تحت ادارهلرنده
وسیروز وسلانیک طرفلری سیروزی اسماعیل بک عهدہسندده وروم ایلینک سائر بلاد
وامصاری اعیان دینیلان متغلبه ضبطلرنده اولدینغی مثللو جزایر غرب اوجاقلری داییلرک
وحرمین محترمین وهابی طائفهسنک ید غصبندده ومصر محمد علی پاشا حکمندده وبغداد
کولهمن پاشالری وچلدیر وکردستان ایالتلری دخی امرا نامنه اولان بغاۃ اللرنده ایدی
اناطولینک بوزوق طرفلری جبار زاده وآیدین طرفلری قره عثمان زادهلرده اولوب
قصور بلاد وقصباته دره بکلری دینیلان متغلبه مستولی اولمغله والیلر یالکیز مرکزایالت
اولان یرلرده اوطورور وبونلرہ مداهنه ایله جلب منفعت وامرار ایام حکومت ایلرلر
ایدی جبار زاده وقره عثمان زادهلر ایله سیروزی اسماعیل بک هم عظاما واشراف اعیاندن
وهمدہ اوامر پادشاهینک اجراسنه مداوم مطاوعتکاراندن اولوب سفرلرده دخی
خدمتلری سبق ایش اولدیغندن مومی الیهم حقارندده معاملہ تأدیبیه اجراسنه محل
اولامغله خاندانلرینه تعرض اولنمیوب مؤخرأ اسماعیل بکک اوغلی یوسف بک وجبار زاده
جلال الدین بک وقره عثمان زاده یعقوب اغا رتبه وزارتہ نائل وتغیر اداره امور دولت
سببیه ایالات عدیدهده والی اولمشلردر وقوعات صردسندده مسطور اولدینغی اوزره بونلرک
غیرسیسی پنجه سطوت محمود خانیده نابود اولوب طوائف ملوک رنگنه کیرمش اولان
ممالک دولتعلیه قوه قاهره پادشاهی ایله هیئت منتظمه سابقهسنه رجعت ایلدی وسلسله
انضباطی قرین انحلال اولان نسخه کبرای سلطنت شیرازہ بند انتظام اولدی .

سالف الذکر اعیانلر ایله دره بکلری یوز سنهیه قریب زماندنبرو کسب قدرت
وتیمز ایش اولدقلرندن بونلرک منشائی بروجہ آتی تفصیل اولنور : فصول سابقهده
مسطور اولدینغی اوزره ولایه ومتصرفین طرفندن برسنجاق ادارهسنه مأمور اولان کسانه
متسلم وقضا ادارهسنه مأمور اولانلرہ ویوده تعبیر اولنور وهر شهر وقصبهده اهالی
طرفندن منتخب برده اعیان بولنورایدی ممالکتک ضبط وربطی ولایه ومتصرفین ومتسلم
وویودهلرہ وامور حقوقیه ونرخ ارزاق حکام شرع شریفه عائد اولدینغی مثللو مراتبات
امیریہنک ومملکت مصارفی اولان مبالغک توزیع وتحصیلی ودفترلرینک ترتیب وترقیمی
خصوصلرندده ولایه وحکام طرفلرندن مخاطب اعیانلر اولمغله اعیان بولنلر
بوایشلری اشراف مملکت ایله بالاجتماع تسویه ایدر ایدیکه اعیانلر اهلینک وکیلی وحکام
ایله اهالی ارمسندده واسطه دیمک اولور ایدی اشبو اعیانلر مملکتلرینک اغنیاسندن

واصحاب حیثیت و نفوذدن اولملریله ولایه و متصرفینه امیدلرندن زیاده منفعت ابراز ایدرک
 متسلمملکی و و یوده لقلری درعهده ایتکه باشلادیلر ایچلرندن لیاقت و درایتی حائز اولانلر
 هم ولاتی و همدی حکامی خوشنود ایتکه تزیید حشمت و ثروت و تأسیس بنیان عصیت
 ایدوب و قاتلری و قوعنده یاخاندانندن و یا منسوبینندن بر مقتدری انک مقامنه قائم اولور
 ایدی بونلرک پک و حشی اولنلری چوقلق پایدار اوله میوب دور اندیش و حکمت بین
 اولنلری مملکتی کما ینبغی اداره و ولاتی مطیب ایتدکدن بشقه ارکان دولتن بعضیلرینه
 کسب انتساب ایدرک و کندوسنی دولته طانتدیروب سفر و حضرده خدمات مقبوله ابراز
 ایلیرک کوندن کونه توثیق حکومت ایلرلر ایدی سلطنت سنیه عسا کر منتظمه ترتیبینه
 موفق اولدقن صکره تنظیماتک مقدماتی حکمنده اولان اصلاحات ملکیه دخی یوز
 کوسترمکه باشلامشیدی شویله که والی و متصرف و و یوده لرک کیف مایشاء قتل نفوسه
 محاسرتلری بافرمان عالی منع اولنوب قصاصاً و یاخود سیاستاً ازاله لری مقتضی
 اولنلر حکام شرعشریفک تحت تصدیقنه التمدیجه اجرا قلنماسی امر اولندی
 و مخلفات ضبطی فی الاصل نوعاً معقول و مشروع بر درجهده یعنی مخلفات واقعه اموال
 امیریهدن مختلس و مدخر اولسی مظنون اولنلر حقنده جاری ایکن صکره لری سوء استعماله
 وارد یغندن میری ایله معامله سی اولسون اولسون و خدمت دولته بولنسون بولنسون
 اغنیادن بریسی فوت اولدقده ورثه سنه جزئی برشی ترک اولنه رق مصادره قلنور و بعضاً
 دخی مخلفات ورثه یه ترک اولنه رق مقطوعه ربط اولنور یعنی بر مبلغ معین اخذیله بتریلور
 ایدی بودخی بافرمان عالی الغا قلندی یکچریلرک الغاسیله انلره متعلق منصب و قلملری یعنی
 یکچیچری افندیلکی و سپاه و سلاحدار کتابتلری و بونلره مماثل مأموریتلرکه لغو اولسان
 او جاقلرک محاسبه جیلکلی دیمکدر بونلر دخی الغا اولنوب عسا کر منتظمه سر عسکرلکی
 و مقاطعات و مصرف نظارتلری خاصه و نظامیه محاسبه جیلکلی مثللو منصبلر احداث و ماهیه
 معاشلر تخصیص قلندی فصول سابقهده برنبده بیان اولدینی اوزره اوقاف سلاطیندن فاتح
 و سلطان سلیم و سلیمان حضراتی و قفلرینک اداره سی صدراعظم لره و سلطان بایزیدک اداره سی
 شیخ الاسلام لره مخصوص اولوب قصور اوقاف سلاطین ایله نسللری منقرض اولمش بعض وزرا
 و امرا و قفلری قرنا و خدمه مخصوصه پادشاهی یه چراقلق اوله رق توجیه اولنور ایدی
 بردفعه وقف ترتیب ایدن اصحاب خیرات و قفلرینک شرائطی تعیین و خیرات و مبراتلرینه
 صرف اولنه حق مبالغی و خدمه سنه و یریه جک و ظائفی تخصیص ایتدکدن صکره تولیتی اولاد
 و اعقابنه و نظارتی صدراعظم و شیخ الاسلام و دارالسعاده اغاسی و استانبول قاضیسی مثللو

ارباب مناصبه تفویض ایلیش اولدقلرندن بونظارتلرک برر مفتشی اولوب تحت نظارتلرنده بولنان اوقافک هر سنه محاسباتی رؤیت ایتدیرر و شرط واقفک اجرا قلنمیدینی و یا خود خیرات و مبراتک محتاج تعمیر ایدوکی خدمه وقف طرفلرندن و یا محله لیس جانیندن افاده واشتکا قلنور ایسه متولیلری شرائط اوقافک تمامی ایفاسنه اجبار ایدرایدی وقتاً بوقت واقفلرک سلاله لری منقرض اولدقده تولیتلری نظارت طرفلرندن مناسب آدملره توجیه ایتدیریلور و اراق اولاد مشروطیتندن چیقمش اولدیغندن بومثللو تولیتلره صدقه تولیتلری اطلاق قلنور ایدیکه توجیه پادشاهی ایله تصرف اولنور برنوع مأموریت دیمکدر استانبول شهری مرور زمان ایله کاملاً دیه جک درجه ده وقفه منقلب اولمغین معاملات بیع و شرانک توثیق و اجرایی متولیلرک و جابیلرک اللرنده قالدیغندن انواع فساد و تزویر واقع اولمقده ایدوکنه مبنی ذکر اولنان مناصبک حق نظارتلری برلشدیریلرک اوقاف هایون نظارتی احداث قلندی انحق بوضورتک موافق حال و مصلحت ایدوکی مسلم اولمسیله برابر ناظر اولنلردن بعضیسنک مزاج غصبکارانه سی و بعضیسنک امرهم حقوقدن بی خبر لکی جهتلیله خزینه اوقاف سؤاستعمالات ایله مالامال ایدی شویله که سلطان محمودخان حضرتلرینک وقفلرینه ایراد بولمق فکریله اسم بی مسما اوله رق کدک ایجادقاندی بو کدکلرک برصنفی محدود اولوب مثلاً استانبولده یوزسکسان قلایحی کدیکی احداث و اصنانه بیع اولمقله بومقداردن زیاده قلایحی دکانی کشاد اولنه مز ایدیکه برنوع انحصار امتیازی دیمک اولور ایدی برصنفی دخی قوندره جی کدیکی مثللو غیر محدود کدکلردر که هر کیم طالب اولور ایسه ویریلور و هیچ کیمسه بلا کدک قوندره جیلحق صنعی اجرا ایدمز ایدیکه بودخی من جهة اوصنعتکده اجراسنه رخصت دیمک اولور ایدی بو کدکلر اصناف بیننده آلتوب صاتیقله عادتاً مستقفات اوقاف کی خرج فراغ وانتقال و اجاره مقررر اخذ اولنور ایدی مع مافیه بر دکان و یا خود بوستانده برقاق سنه مستأجراً مقیم اولنلر مال صاحبک خبری اولمقسزین خزینه اوقافدن برر کدک الوب صکره مال صاحبی مستأجری چیقارمق و یا کرایه تزئید ایلک مراد ایلدکده مستأجر بنم بوراده کدیکم بولندیغندن مقرر اولان کرادن بشقه بر شی طاب ایلکه حقت یوقدر دیو دعوایه قیام و تنفید مرام ایلکه اومثللو دکان و بوستان و سائر نک هم وقف قدیم و همده صاحبلرینک حقلری مصادره اولمش اولدی .

سوء استعمالاتک برنوعی دخی فراغ وانتقال خرجلرینک و محمولات معجلاتنک نصفی متولی و جانی و کاتبلره ویریلوب نصف دیکرینک خزینه اوقافده توقیف اولمسید . بو اصولک اتخاذندن مقصد کویا بویاردلر خزینه اوقافده تجمع ایدجک و هر وقفک

خیرات و مبرات آنی تعمیریه محتاج اولدقدد نقود مترا کمه سندن تسویه اولنه جق ایدی .
 حالبوکه اوقاف خزینه سنده متعدد قلملر و پک چوق مأموریتلر احداث اولمغله
 بونلره و خارجدن شوکا بوکا معاشلر و معیناتلر و ثواب اعتقادیلر نو بنو تحداث ایدن
 تکیه لر و طعامیلر و تعینلر تخصیص و بیکر و بیک بشر یوز کیسه لر صرفیلر مجدداً و تعمیراً
 تکیه لر انشا اولمغله و قفلرک مبالغ مترا کملری اضاعه قلندی و خیرات و مبراتک تعمیریه
 احتیاجلری محللی و متولیلر طرفلرندن اوقاف نظارتنه خبر ویرلدکجه و قفلرک حاصلات
 مترا کمه سی دفترلرده موجود ایسه ده و زنده مفقود ایدوکنندن بالضروره کچوشدیریلور
 اولدی اوقاف خزینه سی بوخصوصده مدعی علیه اولدیغی حالده حاکمک صفتی دخی حائز
 اولمسیله و قفلرک حامیسی اوله جق ایکن مخربی اولدی .

نظیماتک ظهوریلر بالجمله سلاطین و سائر اراضی موقوفه سی مالیه خزینه سی طرفندن
 ضبط و تعمیر اولنوب عندالحساب اراضی موقوفه مزبورده حاصلات عشریه سی سنوی
 قرق درت بیک کیسه یه بالغ اولمغله شهریه به بالتقسیم خزینه مالیه دن اوقافه اعطا قانور
 ایدی . صکر دلری فؤاد پاشا مرحوم اشبو بدل مقطوعه مالیه نک اوقافه ویردیکی پاره یه
 اعانه نامی و یروب موازنه عمومیه ده آچیق کورندکجه تنقیص ایده ایده ربع درجه سندن
 آشای تنزیل ایلدی جوامع سائر خیرات سلاطینک ایسه اکثر وارداتلری اراضی موقوفه
 حاصلاتی اولدیغندن و بروجه مشروح بوندن تنزیلات کلیه وقوع بولدیغندن مصرفلری
 قارشولقسنز قالمق حسبیلر بالضروره شونک بونک و قفلری حاصلاتیلر اداره اولملری ایجاب
 ایلدی بناء علیه پک چوق اصحاب خیراتک مبراتلری خراب و متروک اولدیکه مشهود آنامدر
 کله لم تنظیماتک اجراسیلر اداره امور ملکیده اتخاذ اولنان اصول اداره جدید نک تفصیلاتنه
 کلخانه و تنظیمات فرمان عالیرنده بیان اولنان شرائط ایله تنظیمات خیریه اعلان اولندقدد حکومت
 کیفیه مألوف اولان والی و متصرف و و یوده لر و عموماً ملتزم لر بونک علیهنده بولندیغی مثلاً
 حکمت حکومتدن غافل و منافع شخصیه لرینه منهنک بعض ساده دلان ارکان دخی طعن
 و تشنیع ایدرلر و انواع محاذیر بسط و بیان ایلرلر ایدی لیکن حقیقت حالده قیام و دوام دولت
 ایچون تنظیمات خیریه نک اهم و الزم اولدیغی کوندن کونه میدان جیقدی و تفرعاتی نو بنو
 اصلاح قلندی بویله امور کلیه ده کوچک کوچک یا کلشلقلر ضروری اولوب حالبوکه
 هر شیده نظر و اعتبار کلیاته راجع اولدیغندن بشقه بدایت حالده یولسز کوریلان مواد
 درجه درجه حسن نتیجه ایصال قلنمش و الا آن قلنمقدد بولنمشدر .
 تنظیماتک اس اساسی امنیت جان و مال و ناموس قضیه لرندن عبارت اولمغله شرعاً

وقانوناً حکم ترتب ایتدکجه هیچ کیمسه حقنده مجازات اولنماسی ومصادراتک بالکلیه رفعی ومظنون جنایت اولانلر حقنده جاری اولان اشکنجه ماده فحیه سنک ترکی متعدد فرمانلرله تنیه وتأکید وهرقنی مأمور اولورایسه اولسون ونه رتبه وحیثیتده بولنورسه بولنسون افعال مردوده مزبوریه متجاسر اولانلرک مجازات شدیدیه کرفتار اوله جقلری اعلان واشاعت قلندی زیر اولایه ومتسلمین شهر وقصبه لرده اغنیادن بریسنی کوردکلری آنده یاقباحث جزویه ببناء ویاخود کلیاً بی اساس برافترایه ابتناء قتل ونفی مثللو مجازات شدیدیه تهیدید و مال واملاکی مصادره وتجریم ایتمکی اعتیاد ایدنمشلر ایدی . عصر سابق وکلانلر اولوب آیدین وادرنه وبروسه وسلانیك والیلکلرنده بولنان طاهر پاشاوعاکف پاشا ونافذ پاشا وصدر سابق خسرو پاشا وحسیب پاشا کبی عظمای خلاف تنظیمات حرکات مهمتیه تحت محاکمه یه آلنوب مأمورین سائریه عبرت کوسترلدی اکرچه بونلر حقنده اولوقنده خارجیه ناظری اولوب تنظیماتک مؤسسی اولان ومتکلم وحده بولنان رشیدپاشانک بعض مرتبه اعراض شخصییه مروی وتقویم وقایع نسخهلریله نشر اولنان مقالات نوعاً بونی مؤید ایسه ده تنظیماتک تقرری بومثللو تهدیدات وعبرته محتاج ایدی .

تنظیماتک اساسلرندن بریسی دخی هر نوع واردات دولتک طوغریدن طوغرییه خزینه یه کلوب هر درلو مصارفک دخی خزینه دن اعطا اولنسی ماده سی ایدی . چونکه فصول سابقه ده بیان اولندیغی اوزره سلطنت سنیه نک الپاشلو وارداتی اولان اعشار خاص هایون ومقاطعات میریه وزعامت وتیمار ومالکانه مقاطعاتی ویوردلق وواجاقلق وواقف ناملریله منقسم اولغله خاص هایون ضربخانه عامرهدن ومقاطعات میریه خزینه طرفندن ولاته ویاملتزمینه الزام ودیگرلری دخی اصحابی جانبندن یابالذات تعشیر اولنور ویاخود الزام قنور ایدی تنظیماتک برنجی وایکنجی سنه لری کافه اعشار ورسومات امانه اداره ایتدیرلدی لکن معشرلرک ارتکاباتندن بشقه ذخائر مدخره یی حفظ ایتمک ووقت وزمانیه صاتمق دولت مأمورلرینک یایه ییله جکی شی اولمدیغندن کلیتو خسار نمایان اولغله تنظیماتدن اول ملتزمملرک متجاسر اولدقلری مظالم وتعدياتک ازاله سی وقاعده معتدله وجهله استیفای حقوق عشریه قلمنسنی متضمن نظامات وضع ویاتأسیسیله ینه الزام اصولنه رجعت قلندی مالیه ناظری اسبق صفوتی پاشا مرحومدن مسموع فقیر اولمشدرکه بدایت تنظیماتده درت سنه تقدیرمالیه نظارتنده بولندیغی حالده امانتاً اداره اولنان سنه لرک کار وضرری شویله طورسون قاج غروش حاصلات اولدیغنی میدانه چیقارمق ایچون نصب نفس اهتمام ایلشیکن مقتدر اوله میوب خلفی اولان نافذپاشا مرحومک دخی بوبابده واقع اولان اقدام واهتمامی نتیجه

بخش مطلوب اولاً مغله تعیین ماده محکمه کبرایه قالمشدر دیر ایدی
برده و قیلله اراضینک قوه نابتیه سنه کوره اونده و طقوزده و سگزده بر اوله رق تعیین
اعشار اولمش و قیود خاقانی ده هر مملکتک مقدار اعشاری و رسومات متنوعه نک کمیت
و کیفیتی تحریر قلمش ایکن بدایت تنظیماتده کار فرما بولنانلرک عدم و قوفلرندن ناشی عشر
دیمک اونده بر دیمک اولوب طقوز و سگزده بر اوله رق عشر استحصال اولنان یرلر ملتزم لرک
غدر و ظلمنه اوغرایوب تأسس ایلش ظنیه اونده بردن زیاده عشر النامسی مؤکداً امر
و اعلان قلمشدر . شیخ الاسلام اسبق رفیق افندی مرحوم یا ککشلقله بویله بر حقوق
مشروعه اضاعه اولندی دیو تأسف ایدر ایدی .

مقاطعات امیریته نک غیریسی اولان و اعشاری اصحابنه عائد بولنان اراضی که بروجه
بالا خاص همایون ایله مالکانه مقاطعاتی و زعامت و تیمار و اوقاف و یوردلق و اوجاقلق
ناملریله منقسم اولان اراضیدر بولنرک امانه اداره اولندقلری اوچر سنه لک حاصلاتی
بالتلثیت بدل تعیین اولمق و سنه بسنه جانب خزینه دن اصحابنه و یرلمک اوزره قرارلشدیریلوب
اجرا اولندی . انجق بر طاقم ارباب نفوذ اعمال قوه نفوذ ایله طشره لرذن حاصلات
واقعه نک بر قاج مثلنه مضبطه لر کتوروب موجبنه مالک اولدقلری مقاطعه و زعامت لرینه
اضعاف مضاعفی اوله رق بدل تقدیر ایتدیردیلر و هنوز بدله ربط اولنمان مقاطعات اصحابندن
اشترا ایدرک و اولوجهله خلاف واقع مضبطه لر جلب ایلیه رک عشر تعیین ایتدیردکلری
یک چوق واقع اولمشدر .

ینه تنظیمات اساسی جمله سندن اولمق اوزره و یرکونامیه طشره لرده توزیع اولنان مبالغک
سنه بسنه خزینه مالیه کوندرلمسی امر اولندی فصول سابقه ده تفصیل اولندیغی وجهله
و یرکونک ماضع لمی اولان شیلردن ولایه و متصرفین حضریه و سفریه لری توزیع دفترلرینی
تصدیق ایتدکلریچون حکام شرعشریفه و یریلان خرج امضا و کلوب کیدن مباشر لره
اعطا اولنان خدمت مباشریه و مسافر خانه مصرفلری کلیاً الغا اولندی چونکه حسب تنظیمات
بیوک و کوچک کافه مأمورینه معاش تخصیص قلمش ایدو کندن جمله سی مصارفات واقعه لرینی
معاشرندن تسویه ایلک و هیچ کیمسه دن بر آچقه و بر حبه مطالبه و اخذ ایتماک
شروط اعظمنندن ایدی و ینه و یرکودن تسویه اولنه کلان حکومت قوناغی و کوپری
و قالدیرم مثللو شیلرک مصارفات انشائییه و تعمیریه لری و منزخانه مصرفلری خزینه
جلیله دن اعطا اولنه جنی اعلان قلندی بناءً علیه هر قضانک محصلی هر سنه توزیع اولنان
مبالغک مقدارینی تحقیقه قیام و بعضلری شمعدی به قدر بلا فرمان توزیع اولنان مبالغی

سلطنت سنیہ متجاسر لرندن استرداد ایدہ جکدر دیو وجود مملکتی اغفال ایدرک توزیعات سابقہ یکوننی قیادتیلر واعتقادلرنجہ دولته خدمت ایلدیلر. لکن بعض مملکتلرک وجوهی نتیجہ مصلحتی درک و تظنن ایلمکله غایت خفیف دفتر تقدیم ایلدیلر.

واقعا توزیعات دفترلری استانبوله کلک و قومیسئون مخصوصندہ بالتدقیق قبولی حاوی فرمان عالی صادر اولمق نظامی اقتضاسندن ایدی لکن ولایہ و متسلم و ووددلر خارج از فرمان چوق شیلر علاوہ ایدرلر ایدی اشبو دفترلرک موجبنجہ هر قضا و قرایہ ویرکولر تخصیص اولندقدن صکرہ شهر و قصبہ لردہ واقع املاک تحریر و ارباب تجارتک تمتع مخمنہلری درجات وضعیلہ ترقیم اولنہرق آرو آرو ویرکولر طرح و توزیع اولندی. لکن تحریر املاک و تمتعات مادہسی امر عظیم و وقوعاتنی یورتک تکلفات مہادیہ موقوف اولدیغندن بوقاعدہ باشہ چیقاریلہ میوب ایکی سنہ مرورندہ هر شهر و قصبہ و کویلرک معین و مخصوص اولان ویرکولری قومشوجہ توزیع و تقسیم و بالتحصیل خزینہیہ تسلیم قانمنسی اختیار قلندی یدی سکیز سنہ بوقاعدہ جاری اولدقدن صکرہ الا آن مرعی اولان تحریر املاک اصولنہ تشبث و سنہ بسنہ اکالنه اعتنا قانمنشدرکہ الی ہذہ الا آن سعی و غیرت اولنمقدہ در.

کراستہ و کندیر و کهرجلہ مثللو تکالیف عینہیلہ مکلف اولان قضالرہ دخی ویرکولر وضع اولنوب او مثللو لوازمات حربیہی دولت پارہ سیلہ مبیاعہ ایدہ جکدر دینلیدیکی کبی بعض کوپری و طریق تعمیر و تنظیمی مقابلہ سندن ویرکودن معاف اولان کویلرہ دخی ویرکو وضع اولنش و مکلف اولدقلری شیلرک جانب خزینہدن تسویہ قانہجنی اعلان قانمنشیدی. برقاچ سنہ مرورندہ خزینہنک تعمیراتی درعہدہ ایلیدیکی شیلرک خراب اولمغہ باشلادیغندن پیدرپی محللرندن استدعالر کلدکجہ پک جزئیسی اجرا اولنہ بیلوب ماعدالری استعمالر ایلہ و بو سنہ خزینہنک وقتی یوقدو جوابیلہ کچشدیریلور اولدی لکن کیتدکجہ خرابی تمکثر ایدرک خزینہ ایسہ واردات مقررہ سیلہ مصارف دائمہسنی ادارهدن عاجز قالدیغندن اومقوله مملکتک مصارفنی رؤیت ایتک ایچون شهر و قصبہ لردہ بلدیہ صندوقلری کشاد اولنوب قنطاریہ و کیالیہ مثللو رسومات متفرقہ بوصندوقلرہ ترک اولندی.

فصل سابقہ ذکر اولندیغنی اوزرہ ذخیرہ یتاغی اولان محللردن کیلہسنی یکر میشر پاردهیئات مقطوعہ ایلہ و مبیاعات امیریہ ذخیرہسی نامیلہ ذخایر کلیہ مرتب اولوب بو ذخیرہ استانبولہ کتوریلوب و تعینات عسکریہ و سائرہ بوندن ایفا اولندقدن صکرہ بقیہسی رایج وقته کورہ فرونلرہ توزیع اولنور ایدی. حسبالتنظیمات بو دخی رفع اولنوب اکمکچی

اصنافك ديله دكلىرى يردن ذخاير مبايعه ايدرك طوتيلان چاشنى به تطبيقاً تعيين اولنان نرخ ايله صاتملىرى اعلان قلندى. لغواولنان اشبو مبايعات ذخيره سنك اداره سى ايچون دولتجه مناصب معتبردن اوله رق ذخيره ناظرى و خزينه كتبه سى وار ايدى. آرتق بولره لزوم قاليوب فقط وكلاتل مناصبندن اولق و ممالك محروسه نك تكشير زراعتنه چالشمق اوزره زراعت نظارتى احداث اولنقله معيته مستشار و مجلس و مکتوبچى و محاسبه جى و كتبه و مأمورين ترتيب و تشكيل اولندى شوراسى غرائبندركه اينكى اوچ سنه طرفنده نظارت مزبور ذخيرده خزينه سنده مدخراولان مبالغى معاشات مخصوصه و يردكدن صكره اكمكچى اصنافندن اولان بقايايى تحصيل و معاشره توزيعه صرف همت ايدوب بودخى ختامه رسیده اولدقده غيرى ايش قالمديغندن هيئت نظارت طاعلمشدر .

جزیه شرعيه اوروپالولرك اك زياته كوزلرينه باتان ديكن اولوب بو اوانده ايسه اوروپالولرى خشنود ايدجك دولتعليله نك دول متمدنه مسلكنه سلوك ايتديكنى كوستره جك شير التزام قلمقده اولديغندن درجك اول على الرؤس جزیه جبايتنى الغا ويطريقخانه لر معرفيله عن جماعة تحصيلنه قرار ويرلدى لكن تنظيماتك ايكنجى سنه سنده مؤسس و حامى تنظيمات اولان رشيد پاشا موقع اقتداردن ساقط و عزت پاشا صدارته و صفوتى پاشا ماليه صاعد اولمغه مشيرك نظامى ناميله تنظيماتك مواد متفرعه سى اصلاح اولنديغى صروده جزیه نك على الرؤس جبايتى اصولى اعاده قلندى زيرا يطريقخانه لر دخی عن جماعة استيفای حقوقدن اظهار عجز ايتمشر ايدى بش آلتى سنه صكره كه رشيد پاشانك كوگب اقبالى تكرار ضيا پاش كمال اولديغى زماندر ينه عن جماعة تحصيله رجوع اولنوب نهايت قریم محاربه سى اوانده صادر اولان اصلاحات فرمانى حكمنجه بدل عسكرى به منقلب و صور اجرائيه سى برقچ هيئته متحول اولديسه ده الان برقرار صحيح و سالم تحتته وضع اولنه مامشدر .

وقعه خيريه دن صكره اصول اداره دولت تحويل اولمغه باشلا ديغندن اكرچه وكلا و مأمورينه معاشر تحصيل اولمقده ايدى حسب التنظيمات كافة مأمورين و كتبه به ايلقلر تخصيصيله انه كلان خرجلىرى بعضلىر كلياً الغا و بعضلىر خزينه به ايراد قيد اولندى مقام صدارته يوز بيك ووزرايه يتمش بشر بيك و عظامى رجاله يكرميشر اوتوزر بيك و اوچنجى درجه ده بولنان مناصبه اون بشر يكرميشر بيك غروش و قلملره دخی مقدار كافى معاشر تخصيص وات اكمك تعيينلىرى دخی ترتيب و اعطا قلندى مركز ايالت اولان سنجاقلره بر والى و بر محصل والويه ملحقه به امرای عسكريه دن برر

ضابطه مأموری و برر محصل و قضالره دخی کذلک برر ضابطه مأموریه برر محصل و مال و تحریرات کاتبی تعیین اولنوب و الیلره یتمش بشر و کافه محصل و ضابطه مأمورلرینه یدیشربیک بشر یوزغروشدن اوزر بیک غروشه قدر و کاتبلره بیک بشر یوز ایکیشربیک غروش راده لرنده معاشلر تخصیص قلندیغی مثللو حکام شرع شریفه و تشکیل اولنان مملکت مجلسلری اعضالرینه و ترتیب قلنان ضبطیه و تحصیلدارنفراتنه معاشات متناسبه تعیین قلندی قدیمآ مرتب اولان ایالتلر اکرچه ظاهرآ ابقا اولنش ایسه ده قضا محصلنک سنجاچ و سنجاچ محصلنک مرکز ایالت محصلنه ارتباطی اولمیوب جمله سی مستقل اولمغله بر والی ایله قضا ضابطه مأمورینک و عموماً محصللرک وظیفه جه یکدیگرندن فرقلری یوغیدی بر ایکی سنه قد بو وجهله اداره اولنوب لکن ترتیب اولنان معاشاتک یکونی وارداتی احیا ایلش و حتی بعض قضالرک کافه حاصلاتی مصارفه مقابل کورنمشدر بناءً علیه سالف الذکر مشیرلک نظامی وضع اولنوب بونک حکمی موجبنجه ولاتک الویه ملحقه یه حکمی جاری اولمق قاعده قدیمه سی اعاده و معیتلرینه برر دفتردار و هر سنجاغه برر قائم مقام و قضالره اهلینک ارباب حیثیت و اقتدارندن برر مدیر نصب اولنوب اشبو مدیرلره معاش مقابلی قبو آلتی حاصلات موضوعه سیله اراضی فراغ و انتقال حاصلاتی و ایکی بیک غروشدن اشاغی اولان محلولات معجلاتی تخصیص قلندی حکام شرع شریفه بر موجب نظام اخذ اولنه کلان خرج مواتیق اعاده اولنه رق معاشلری قطع و مجلس اعضالری مملکتلرینک خاندانندن اوله رق خدمتلری فخری اولمق اقتضا ایده جکندن معاشلری بالکلیه الغا اولندی.

احوال عسکریه

فصول سابقه ده تفصیل اولندیغی اوزره دولت علیه نک بدایت ظهورنده ترتیب و تشکیل اولنوب اولوقلرده اکثر دولده موجود اولمیان عساکر موظفه منتظمه نک ثمره نظام و انتظاملریله سلاطین عثمانیه حضراتی فتوحات متوالیه نائل و دشمنلرینک دفع و تنکیلیله کوب شان و شهرتلری اوج کماله واصل اولمشیدی عصر سلیمان خاندن صکره اداره دولت بشقه رنک و هیئته منقلب اولمقدن ناشی موظف و منتظم اولان عساکر عثمانیه نک یعنی یکیکچری و سپاهینک دخی انضباط و انتظاملری مختل و مشوش اولدیغندن تحدث ایدن عتوو طغیانلری درجه درجه تزايد ایدرک سلطان عثمان وقعه فجیهه سی مثللو نسیانی ناقابل بر مصیبت عظیمه یه قدر منتهی اولدی مؤخرآ سلطان مراد رابع و کوبریلی محمد پاشانک سیف سطوتلریله تأدیب و تربیه اولندیلر ایسه ده هیئت منتظمه سابقه لرینه

ارجاعی ممکن اولدی مع مافیه معایش عسکریه اولان علوفه مخصوصه نك بیع و شراسنه مساعده اولندقدن صکره مخصوصات عسکریه نك قسم اعظمی ایرادجیلره منتقل اولمغله جیوش موظفه اطلاق اسم بی مسمی حکمنه کلوب یکچیریلک فخری بر خدمت دیمک اولدی پیدر پی ممالک دولت علیه استیلای اجانبه کرفتار اولمغه باشلادی .

بناءً علیه احوال سیاسییه واقف اولان ارکان دولت بینده عسا کر منتظمه ترتیبینک لزوم و اهمیتی میدانه چیقوب حتی داماد ابراهیم پاشانک اواخر ایامنده بر مقدار عسکر ترتیب و اسکدارده بر قشله تنظیم اولمشیکن بطریق وقعه سنده محو و مندرس اولدینی شمععدانی زاده تاریخنده مسطوردر عصر محمود خان اولده ینه بوداعیه تجدد ایدوب بعض نظامات ولایحله قلمه الديرلمش ایسهده اجراسنه موفق اولنه میوب فقط طویچی خبره جی اوجاقلرینه عسا کر منتظمه ترتیبه شبیه نظام ویرلمشدی سلطان مصطفی خان ثالث حصرتلی بومقصدک حصولی پک زیاده ارزوایلمش اولدینی حالده یکچیریلک سرکشکلرندن خوف اولنه رق میدانه کتوریه مدیکی محققدر عصر سلطان عبدالحمیدخان اولده صدراعظم اولان خلیل حمید پاشا عاقل فطین وحمیتکار برذات اولمغله عسا کر عثمانیه نك اصلاحنه تشبث ایدوب اوله سرعت طویچیلری نامیله اولوقته کوره منتظم و مکمل وقشله نشین اوله رق ایکی بیك نفر طویچی تحریر و حمزه جی ولغمچی اوجاقلرینی دخی بدرجه دهها تنظیم ایلدی ثانیاً سرحدده بولسان یکچیریلری یوقلمه ایتدیروب کلیتلو محلولات میدانه چیقارمش و مخرب نظامات عسکریه اولان علوفه بیع و شراسنی کلیاً منع ایدرک استانبولده بولسان یکچیریلک دخی یوقلمه مسنه شروع ایلمش اولمسیلا تحدث ایدن قیل وقال خصمانه سر رشته اعتراض اوله رق القات مفسدتکارانه ایله بیچاره بی قتل و اعدام ایتدیردیلر و بقای دولت ایچون اهم و الزم اولان او یله بر تشبث خیرک تأخرندن حاصل اوله جق نتایج وخیمه بی یادرک ایده مدیلر و یاخود اختیار ایلدیلر متأخرین ارکان دولتدن قیوجی مراد پاشا و کوپرلی محمد پاشا سکسان طقسان یاشنده اولدقلى حالده اصلاح مزاج دولت ایچون راحت و حضوری ترك ومدت صدارتلینی سفرلرده آت اوزرنده و انواع مشاق و مخاطرات ایچنده مرور ایلیشکن تتابع دهور مزاج ابنای زمانی افساد ایلدیکندن مشارالیه مزاج و مشوارنده جوان طبع و یأس و کسلدن عاری ذاتلر و اوصاف برکزیده بی جامع آدملر یتشدرمکه مزرعه دولتک قوتی قالمغله نه راغب پاشانک فضل و کمالندن ونهده قوجه یوسف پاشانک امیانه فدا کارلغندن بر ثمره نافع حاصل اولماشدر یوز سکسان ایکی وایکی یوزایکی سفرلرنده اور ویا لورک عسا کر

منتظمه سنه باشی بوزوق حکمنده اولان جیوش اسلامیه نك مقابله ایدمهیه جکی عامه ارکان دوات نظرنده مرتبه ثبوته واصل اولمش اولمغله سلطان سلیم مرحومك اوائل سلطنتنده نظام جدید نامیله عسا کر منتظمه ترتیب وقشله وسائر لوازماتی تتمیم اولنوب تکثیر وتنظیملرینه اقدام وهمت قلمقمده بولنمشدی لکن مدیران سلطنت بوعسکرک یکیکچریلرله برابر دوام وبقای حیزامکانده اولدیغنی تفتن ایتمکله وبر قاق سنه ظرفنده عسا کر مرقومه یکیکچریلری الفا ایدمیلرله جک مرتبهیه رسیدم اولمغله بغته یکیکچری اوجانک رفی خصوصنده متفق الکلم بولنمشلر ایسه ده سلطان سلیم خان حضر تلرینک حلم وشفقتلری مانع محاسرت اولدیغندن یکیکچریلر فرصتی دوشیروب شهریار مشارالیهک خلعلیه ارکان دولتی کشته شمشیر اعتساف وعسا کر منتظمهیه دخی محوواتلات ایلدیلر علمدار پاشا وقعسی دخی اشبو مقدمهیه تالی اولدی .

بولندن صکره یکیکچریلرک کانون عتووظغیانلری لهیب افروز اشتعال اولوب وقعه خیریهیه قدر بر اختلال دائمی ایچنده بولندیلر بووجهله امثالی غیرمسبوق صورتده تمتد اولان آزونقلاری نفرت عامهیه مستلزم اولدیغندن وقعه خیریهده پک قولایلقله تنکیل والغالری میسر اولدی نظام جدید عسکرینک یکرمی بیکدن زیادهیه واصل اولدیغنی تاریخلرده روایت قلمقمده ایسه ده بولنرک ساکن اولدقلری سلیمیه قشلهسی شمدیکی قشله نك ثانی راده سنده ولوند چفتلکی دها کوچک اولدیغنی اووقتلری مدرک اولنر متفقاً روایت ایدرلرایدی بوحواله کوره مذکور قشلهلرک اولمقدار عسکری استیعاب ایدمهیه جکی درکار اولدیغنه وقونیه والیسی قاضی پاشا معیتده وبولی متسلمی احمد آغا رفاقتمده تنظیم قلممش وقونیه وبولیده انشا اولنان قشلهلرده اقامه اولنمش اولان نظام جدید دخی ایکی اوچ بیك کشیدن عبارت ایدوکی کذلک مسکینلری دلاتیله میداتمه بولندیغنه نظراً یکرمی بیك راده سنه وارمق مستبعدر اکثر خلک مشهود اولان جمعیت عسکریهیه اوچ مثلی تخمین واشاعه ایللری طبایع بشریه اقتضاسندن اولدیغندن بوروایتک دخی اوقیلیدن اولسی ظن اولنه یور بروجه مسطور استانبول وقونیه وبولیدن غیری یرده نظام جدید یاپیله میوب جبار زاده دخی تعهد ایتمش ایسه ده فعله کلامشدر چونکه جبار زاده عاقبت اندیش بر آدم اولدیغندن بوخصوصده جانب سلطنت سنیه دن وقوعبولان تکلیفی رداید میوب فقط بنده بند بر لایحه تقدیم ایدرک مألنده امر دولتی اجرا ایدم جک ایسه ده ایشک نيك وبدنه متداخل ومسؤولیتنه شریک اولمیه جغنی بیان ایتمش وصدر عصر بولنان کچی بوینوزی ابراهیم پاشا دخی هر بندنک اوزرینه شرح ویروب تمهیر ایلشدر بولایحه

منظور فقیر اولوب تاریخه نظراً سلطان سلیم مرحومك اواخر ایام ساطنتی اولمق حسبیه موقع اجرایه کله مدیکی وقوعات دلائله متبییندر .

وقعه خیریه نك ایرتسی کونی عسا کر منتظمه تحریرینه شروع اولنوب پیدری تکثیرینه اقدام قلممقدمه اولدینی حالد ایکی سنه یه وار مقسزین روسیه سفری ظهور ایدوب عسا کر منتظمه ایسه هنوز اوتوز طابوره بالغ اولمامشدی حسب القدر مسفولولر مظهر غلبه اوله رق ادرنیه قدر پای انداز تجاوز اولملریله استانبولده یکچیری بقیه سی وغیر - تکشیری اولان اجلاف بومغلوبیتی یکچیر یلرک الغاسنه وجیوش منتظمه ترتیبه عزو واسناد ایدرک انواع قیل وقاله جرأت وبعض مرتبه نمایشه محاسرت ایتشیر ایسه ده سلطان محمود خان حضرتلری مهیب وغیر بر شهریار قوی العزم اولدقلرندن اصلا فتور کتور میوب لازم کلنلری تأدیپ وتأسيس نظامات عسکریه یه فوق الغایه اهتمام ایلکله بر طرفدن قشله لر وخسته خانه لر ودبولر یاپیلور وبر طرفدن عسکرک تکثیریه برابر اوروپادن تعلیم جیلر وخواجه لر جلب قانه رق تعلیم وتعلمک اکلانه چالیشلور ایدی عسا کر منتظمه موظفه خاصه ومنصوره نایله ایکی صنفه تقسیم وبعض وزرا معیتلرنده دخی طابورلر تشکیل اولونوب الی التمش بیک راده لرینه بانغ اولدینی حالد الی تاریخنده اناطولی وروم ایانک ایالات مناسبه سنده عسا کر ردیفه ترتیب وتحریر اولندی اشبو عسا کر ردیفه هر سنجاقد وچر دردر طابوردن عبارت اولغله هر ایالتک اونر اون ایکیشر طابور ردیفی حاصل اولوب ولایه عظام بونلرک مشیری وقوماندانی ایدی اهلینک شوق وغیر تلرینی مستلزم اولمق اوزره عسا کر مذکور نك بیکباشی وقائمقام ومیرالایه قدر ضابطانی ممالک تلرینک اعیان ووجوه زاددلرندن ترتیب اولنوب عسا کر منصوره نك ربع معاشلری ویریلور . وهفته ده ایکی کون البسه عسکریه یی لابس اوله رق تعلیم ایدرلر وسائر کونلرده ایشلریله مشغول اولورلر ایدی .

سلطان محمود خان حضرتلری بدایت نظامده اندرون اغالرندن بر طابور ترتیب ایدوب تعلیم ایتدیرر وبعضاً بالذات کندوسی قومانده ایلر ایدی سرعسکر خسرو پاشانک اوتهدنبرو دائر دسند یتش سکسان کوله اکسیک اولمیوب بونلری او قودور ویازدیرر وبعضیلرینی اوروپایه کوندروب تحصیل فنون ایتدیرر ایدی . نوبنو کشاد اولنان عسا کر خاصه ومنصوره طابورلرینه بونلردن ضابطان انتخاب قلممقدمه ایسه ده فنون حربیه یی تعلیم وتعلم ایتدیرمک اس اساس نظام اولدینی تمین ایتکله الی بر سنه سی مکتب حربیه انشا وخواجه وشا کردانی ترتیب وتنظیم اولنه رق مقتضیات عسکریه اجرا قلندی . یعنی

ردیف‌لر عسا کر منصوره یه قلب و ضابطانی مملکت‌لرینه ارجاع قلوب بش سنه خدمت
عسکر یه ده بولندقدن صکره ردیفه چیقماق نظاماتی و تفرعاتی اعلان و خاصه و در سعادت
وروم ایلی و اناطولی و عربستان اردولری نامیله بش اردو تشکیل اولنوب هر بریسنگ
سواری و پیاده و طویجی اوله رق اوتوز بیک کشیدن مرتب اولسی تصویب قلندی .
چونکه بدایت نظامدن برو عسا کر خاصه و منصوره یه انسان نفرا تگ خدمت‌لری مدتی
غیر معین اولدیغندن خلق عسکره کیدن اولادلرینه فوت اولمش نظریله باقرلر و بوجه‌تله
عسکر لیکدن کمال مرتبه نفرت کوستر لر ایدی .

و قتیله سلطنت سنیه نگ صنوف عسکر یه سندن بر شعبه اولان تیمارلو سوار یسی یوز
بیگدن متجاوز منتظم و مکمل و امور حربیه ده و فن فروستده ماهر ایالات عسکر ی
ایکن فصول سابقه ده بیان اولندیغی اوزره درجه درجه نظام و انتظام‌لری مختل
اولدیغندن و قنابوقت اصلاح احوال‌لرینه اعتنا اولنمش و عصر عبدالحمید خان اولده توجیهات‌لر ینگ
اجراسی و بر طرفه مأموریت‌لری وقوعنده صورت حرکت‌لری حقنده نظامات جدیده
وضع اولنمشیدی . ایکی یوز بش سنه سنده اناطولی ایالتنگ بالمله سپاهیسی اسماعیل قلعه سی
محافظه سنه مأمور اولدقلری حالد روسیه لو حرباً قلعه مرقومه یه مستولی و بک چوق
تلفات واقع اولدیغندن شهدانگ کیفیات و مقداری تبیین ایدنجه یه قدر محلول دینیلان
تیمارنگ توجیه اولنماسی خصوصنه اراده سنیه متعلق بیورلمشیکن بعد المصالحه اصحاب
تیمارک اکثر یسی حیاتده و بلده لرنده استراحتده اولدیغی نمایان و سفره کلیوب برر صورتله
الای بکلرینی و سائر ضابط‌لرینی ارضا و اسکات ایلدکلری عیان اولمغین هم ارباب تجارتی
بر نوع تأدیب و همده نظام جدید ایچون واردات بولمق مقصدیله تیمارات محلوله جبه لولرینه
یعنی ملازم‌لرینه توجیه اولنمیوب جمله سی مقاطعه یه تحویل و میری یه ضبط اولنمق جاری
ایدوکی فصول سابقه ده اتیان اولنمشدر بناء علیه زعامت و تیمارلرک مقداری تنزل ایتیش
ایسه ده ینه یکر می اوتوز بیک سپاهی موجود اولدیغندن بونلرک عسا کر منتظمه هیئته
قونلسی تصمیم و آلایلر ترتیبیله امرای عسا کر موظفدن و کندولرندن ضابطلر نصب
اولنهرق تعلیم و تنظیم‌لرینه اعتنا قلندی یدی سکز سنه بویله جه مرور ایلدکدن صکره
آلتش تاریخنده عسا کر ضبطیه وظائفی ایفا ایلر یچون حکومت اداره لرینه جلب اولندیلر
صدر اسبق مترجم محمد رشدی پاشا مرحومدن استماع قلندیغنه کوره ذکر اولنان سپاهیله
سنوی ایکی یوز بیک کیسه یه قریب تیمارات بدلاتی اعطا قلنمقده اولدیغی حالد لایقوله
استفاده اولنه مدینی و بو قدر پاره ایله مکمل و منتظم یکر می بش بیک سواری اداره

اولنه بیله چکی تذکر و مطالعه قلندیغندن التمش اوچ سنه سی کافه ارباب تیمار باقید حیات نصف بدل تیمار ایله تقاعد ایدلدیلر .

واقعا وزرا و امرانک سوء استعمالتیه اکثر زعامت و تیمارلر نا اهل و ضعفاالترینه کچوب عادتاً مأکل حکمنه کیرمش اولدیغندن بونک اصلاحی لازمه دن ایدی لیکن کلیاً الفا اولمقدن ایسه تحت نظام و انتظامه آلمسی ده خیرلو اوله جفی شمیدیکی حالدده متفق علمدر چونکه لسان قانونده صاحب ارض دینیلان سپاهیلر تیمارلری داخلنده بولنان قرانک جذبجد ضابط و حامیسی اولدیغندن اهالی نظرنده قدر و حیثیتلری و قوه عصیه لری وار ایدی و زراعت و حرثتدن خالی قالماسی منفعتلری اقتضاسندن ایدوکنندن اهالی یه اقتضاسنه کوره چفت و تخم ادانه ایدرلر و صو باصمق و بطاقلق حاصل اولمق کبی مانع زراعت حالات و قوعنده اهالی بی جمع ایدوب علی قدر الاستطاعه دفع مضرت ایلرلر ایدی . برده بونلرک لوازماتلرندن بولنان اک برنجیسی آت اولدیغندن دائماً حیوان یتشدرمکه اعتنا ایده کلملریله ممالک محروسه ده استنلیدیکی قدر حیوان بولنور ایدی که بوماده مهمه تیمارلرلرک الفاسندن یکرمی یکرمی بش سنه صکره لری عساکر نظامیه ایچون ممالک دولت علیه ده حیوان بولنه میهرق ممالک اجانبه مراجعت اولنق محبوریته ثابت اولمش واسلافک بومثللو تأسیساتده اولان دقایق و مطالعاتی بونکله دخی تحقق ایلشدر .

بالاده تسطیر اولندیغی اوزره طویچی و خنبره جی و انعمجی او جاقلری اللی آلتش سنه دنبرو فی الجمله نظام و انتظام تحتنه وضع اولنش ووقعه خیریه ده خدمت دولنده بولنش اولدقلرندن بونلرک الفاسی طرفنه کیدلیوب اصلاح احوال و توثیق نظاماتلرینه مباشرت و چور باجی و اوسته و سائر یکیکچریلره منسوب ناملرله مسمی اولان ضابطلرینه عساکر منظمه یه تطبیقاً یوزباشی و بیکیباشی دینلوب طابورلر و آایلر ترتیب قلندی و جمله سی بر اشدریلوب طویخانه مشیرلکی احداث اولندی جلوس عبدالحمید حانیدن صکره حریبه نظارتی که اولعصرک اصطلاحنجه اعمالات لوازم حریبه ایله مکلف ایدی بومأموریت و بار و تخانه لر نظارتی کاملاً طویخانه مشیر لیکنه علاوه و الحاق قلنمشدر .

ترسانه عامره نک کدکلو تعبیر اولنور طویچی و آرمادور نفراتی ایچون جزایرلی حسن پاشا مرحوم قشله انشا ایتدیروب علی الدوام ترسانه ده توطین ایش و نظام جدیده شروع اولندیغی وقت بالجمله قیودان و کمی خواجه لرینک و طویچی ضابطاننک وظیفه لری تزئید و تنظیم قلنمغله برابر کمیلره مطبعلر انشاسیله عساکر بحریه یه چور با و پلاو ویرلمکه باشلامش ایسه ده بنه هر سنه روز حضرده ساحل اولان یرلردن بیراق عسکری تعبیر اولنان

کوکلو عسکرلری کلوب کملره بالتقسیم سفر دریا یا فاولندقدن صکره روز قاسمده مملکتلرینه کیدرلر و بونلره قوری تعیین و یریه کلدیکندن کملرک ایچنده بقال و مناودگانلری آچوب سفینهلرک ایچنی چارشو و بازاره دوندیرلر ایدی .

آرمادور نفراتنک اکثریسی روم طائفه سندن ایکن روم اختلالنده بونلردن سلب امنیت اولندیغندن طرد اولندیلر ایسهده فن دریاده کسب مهارت ایتش اولملریله عصاتک خلیجه ایشلرینه یرادقلری اول عصرده یتشمش اولان قیودانلردن استماع اولنور ایدی وقعه خیرهدن صکره اراق بایراق عسکرلی ابطال و عساکر منتظمه بحریه ترتیب اولنوب روملردن ینه نفرات آلمغه باشلامش ایسهده جبخانه جی کبی مهم ایشلرده و اونباشی و چاووشدن بیوک ضابطه کده استخدام اولنملرلر ایدی آلمش درت تاریخنده ینه ترک اولندی سلطان محمود خان حضرتلری عساکر منتظمه نک ایلروله مسنه بالذات اقدام بیوردقلری مثللو ترسانه نک دخی اصلاحنه اهتمام بیورملریله اوروپادن خواجهلر و معمارلر و مهندسلر جلب ایتدیروب مکتب بحریه یی تشکیل و فنون بحریه یی تعلیم ایتدیرد کلرندن ماعدا طلبه نک مستعدلری لوندریه اعزام وانکلر کملرند سیر و سیاحت ایتدیرلرک علماً و عملاً فن دریاده ماهر ضابط و قیودانلر ایتدیرلمکک اعتنا و غیرت قلندی

سفن جسیمه نک تعمیر یچون عصر سلیم خاند برحوض یاپلدیغنی مثللو سلطان محمود و سلطان عبدالمجید زمان سلطنتلرنده دخی برحقوق انشا و ترقیات فن بحریه تطبیقاً فابریقه و دستگاهلر و محزنلر بنا اولنوب ترسانه عامه نک کوندن کونه اکمال نواقصنه همت قلندی و سلطان عبدالعزیزخان حضرتلرینک اقدام مجددانه لریله اوروپاده و ترسانه ده اون بش قدر بیوک و کوچک زرهلی سفن حربیه یاپدیرلدی ضبط و ربط ممالک و محافظه طرق و مسالک و لایه یچون و متسلمین و و یوده لر کندی بدنلرندن دلی و تفنن کچی و سکبان ناملریله عساکر متنوعه استخدام ایدرلر ایدی تنظیماتدن صکره هر ولایتک اقتضاسنه کوره ضبطیه نفراتی و اموال امیرییه نک استیفاسه یچون تحصیلدارلر تعیین و صکره لری عساکر منتظمه تطبیقاً آلایلر و طابورلر و ضابطان ترتیب اولنوب الحاله هذه استکمال نظامات و انضباط اداره لرینه چالشمقده درکه بوگونکی کونده یعنی اوچ یوزبر سنه هجریه سنده مقدار ضابطان و نفرات اللی بیکی متجاوز و مضارفات واقعه لری ایکی میلیون لیرایه قریبدر .

احوال مالیه

سلطان مصطفی خان ثالث حضرتلری مبالغ کلیه ادخار ایتمشیکن سکسان ایکی سفری اوغورنده استهلاك اولنوب حتی خلیل حمید پاشا برهند ایله چیسلیه مکالماتده سفر مزبور

ایچون یالکز خزینۀ دولتدن ایکی یوز بیک کیسه صرف اولندیغنی سویلشدر اول عصرده یلدرز التونی درت درت بچق غروش راده لرنده اولمق حسبله سالف الذکر ایکی یوز بیک کیسه شمیدی حساب کوره اون ایکی ملیون لیرا درجه لرینه بالغ اولور و مذکور سفر ایسه بش سنه متمد اولدیغندن ظاهر حالدۀ بوقدر مصرف آذربشی کورینور لکن فصل سابق تکمله سنده بیان اولندیغنی اوزره سفره مأمور اولان ولایه و متصرفین حوزه حکومتلری ایچنده بولنان اهاییه سفریه نامیله ویرکو توزیع و تحصیل ایتدکلرندن ماعدا صیف و شتا ترتیباتی اوله رق هر بر مملکتدن تحریر اولنان جیوش اسلامیه نك لوازمات سفریه لری و الی ایلق علوفه کذلک مملکتلری اهاییسنه بالتوزیع استحصال اولته کلکله وزعامت و تیمار اصحابی دخی ذاتاً دیرلکاری حاصلاتیله موظف بولنمغله بولنر خزینۀ دولتدن ویریلان پاردنک خارجده در قینارجه مصالحه سندن صکره سلطنت سنیه نك آز وقت ظرفنده یینه حربیه مجبور اوله جنی تحقق ایتک حسبله دونمانک تکشیرینه و طونه سواحلنده استحکامات انشاسنه و ذخیره ادخارینه اقدام اولنمغله برابر اس اساسی لوازم اولان پاره استحضارینه دخی اعتنا اولنوب ضربخانه عامرده اوتوز بیک کیسه تهیه ایدلمشیدی ایکی یوز بر سفری ظهورنده در حال اوتوز بیک کیسه قدر مبالغ دها تدارک اولندی که جزایرلی حسن پاشانک مصردن کتوردیکی و اعانه حربیه اوله رق کندوسنک اعطا ایلدیکی یکر می بیک کیسه ایله حلب جوارنده واقع مقاطعات امیریه نك مالکانه مقاطعاتنه تحویلله طالبلرینه صالمسندن حاصل اولمشدر

حساب سالف الذکر اوزره بونلرک مجموعی دخی درت ملیون لیرایه قریب بر مبلغه بالغ اولور عصر سلیم خانیده نظام جدید تنظیمنه شروع اولندقدۀ مصارفنه قارشولق تدارکی لازم کلکله قدیم شق ثانی دفتردارلنی نظام جدید دفتردارلغنه تحویل و مستقل خزینۀ تشکیل اولنوب بموق و انقیه و افیون کبی شیلریدواحد اصولی اوزره تحت انحصاره انهرق و زجریه رسمی ازسرنو تنظیم قلنهرق بونلرک حاصلاتی نظام جدید خزینهنه ایرادقید اولندقدن بشقه محلول اولان جسم مالکانه مقاطعاتی و تیمار وزعامتلر دخی خزینۀ مرقومه طرفندن ضبط و سائر صورتلرله واردات بولندقجه ضم و علاوه قلنور ایدی حتی سلطان سلیم مرحومک خزینۀ اوراقده منظور فقیر اولان برقطعه خط هایونلری مفادی (والدهم مرحومۀ نك خاصلرینی نظام جدید خزینهنه ویرمکی تصور ایلدم ایسه ده والده خاصلری ایدوکنندن و قتیله اخراج قلنور مطالعه سنه مبنی ترسانه ده انشا اولنمقدۀ اولان حوض مصارفنه قارشولق تخصیص ایلدم) حکمنی متضمندر که نظام جدید خزینهنسنگ توسیعنه نه درجه لرده اقدام قلندیغنی بوندن معلوم اولور

بعض تواریخك روایتہ كورہ نظام جدید خزینہ سی وارداتی یتش بیک کیسہ یہ رسیدہ اولمشیکن وقعہ معلومہ دہ خزینہ مذکورہ الغا ووارداتك بعضلری دخی ابطال و افنا اولنوب قصوری ایچ خزینہ شعبہ سی اولان ضربخانه عامرہ خزینہ سنہ نقل اولندی چونکہ مرۃ بعد اخری ذکر وتفصیل اولندیغی اوزرہ دولتك میری خزینہ سی وایچ خزینہ نامیلہ ایکی خزینہ سی اولوب مصارف دائمہ حکمنده اولان علوفۃ عسکریہ ایله بعض مصارفات متفرقہ میری خزینہ سندن رؤیت وتسویہ و فضلہ واردات ایچ خزینہ تعبیر اولنان اندرون هایون خزینہ سنہ وضع اولنه کماکله سفر ظهورنده ویاخود مهم بر مصرف کلی وقوعنده اورادن اخراج واعطا قنور ایدی

ینہ روسیہ سفری ختامندن صکرہ بیک ایکی یوز یکرمی طقوز سینه سندن اوتوز الی سنہ سنہ قدر واردات مرقومہ دن خلیجہ مبالغ تراکم ایتش اولدیغی حالده روم اختلالنده صرف واستهلاك اولمشدر قرق بر تاریخنده عسا کر منتظمہ تنظیم اولمغله ینہ قارشولق ندارکی ایچون کرک استانبولده وکرک طشردہ واقع جسیمجه شهرلرده رسوم احتسابیہ احداث اولندیکه یومیہ دکاکین وسائردهن عبارت اولوب برنوع پاتنت رسمی دیمک ایدی حتی شامده حادث اولان فتنہ وسلم پاشانك اتلافی بونلردن نشأت ایتشدر برده اناطولیده واقع اون بش قدر سنجاق ولایه و متصرفینہ توجیه اولنیوب متسلم ایله اداره ایتدیریلهرک ولایه و متصرفینہ عائد اولان منافع مقاطعات خزینہ سی که عسا کر نظامیہ خزینہ سی دیمک ایدی اورایه ایراد قید قلندی

نافذ پاشا مرحومدن استماع اولندیغنه کورہ تنظیمات خیریه قدر معینات مرتبه دن بشقه سلطنت سینه نك كافه وارداتی الی یوز بیک کیسہ راده لرنده اولوب بوقدر پاره ایله روسیہ ومصر سفرلری اداره وروسیہ تضمیناتی اولهرق بشیوز بیک کیسہ قدر مبالغ اعطا قلنمش اولدیغی حالده عسا کر ردیفدهن ماعدا خاصه ومنصوره وبحریه وطویحی اولمق اوزرہ یوز بیکه قریب جیوش موظفهنك ویکرمی قدر اوچ انبارلی و قیاق وفرقتین وبر چوق سفن صغیره نك معاشات ومصارفاتی کونی کوننه تسویہ اولنور و مصارفات معتاددهن بشقه فضلہ اولهرق مسقو سفرنده خسار دیده اولان محللر اهاالیسنه ایکیشر اوچر بیک کیسہ ادانه قنور ایدی که تفصیلاتی اسکی تقویم وقایع نسخهلرنده مسطوردر بودخی سلطان محمود خان حضر تلرینك كافه مصالح سلطنت سینه یه بالذات نظارت و حسن اداره یه اهتماملری نمرده سی ایدی خافان مشار الیه حضر تلرینك ارتحاللرنده طویقو سرای هایوننده واقع شوقیه دائرده سنده سکسان بیک کیسہ لك التون و مالیه ومقاطعات اوقاف و ذخیره

خزینہ لرنده دخی مبالغ و فیرد مدخر و موجود اید و کی ینه نافذ پاشا مرحوم دن استماع قائم شد. تنظیمات خیریه اجرا سنده واردات دولت دفعه بر مثلی راده سنده ترقی ایتش ایسه ده انک مقابلی اولان مصارفات دخی یکون مصارفاتی او نسبتده قبارتدی و تغیر اصولدن ناشی واردات تأخر ایدرک خزینہ جه مضایقه حاصل اولدیغندن یوز بیک کیسه لک قائمه نقدیه اخراج قانندی که خزینہ صورتلری مثللو یازمه و مالیه ناظری بوانان صائب پاشانک مهریله مهور ایدی ایرتسی سنه صفوقی پاشا مرحوم بالاستقلال مالیه ناظری نصب قلمقله و مشار الیه فن اداره ماهر و درایت و لیاقله متصف بر ذات اولغله درت سنه قدر تمتد اولان اشبو برنجی نظارتنده سالف الذکر قوائم نقدیه بی احما و بدایت تنظیماتده تخصیص اولنان معاشات لایتحصایی تنقیح و الغا ایدرک خزینہ بی بر حسن حاله قویدی که معاشات و مصارفات کونی کونه اعطا اولنوب حتی بعضاً ای باشندن برکون اول عسکرک توزیع معاشاتنه مباشرت قانور ایدی. مع مافیه وزرانک یتش بشر بیسک و عظمای رجالک یکرمیشر اوتوزر بیک و طشره دتتردار و متصرفلرینک اونر اون بشر بیک غروش آياقلری وار ایدی. تصرفات مشروحه عموم آياقلردن یوزده شو قدر بوقدر کسمک قاعده غیر صحیحه سیله اولمیوب لزومسز مأمورلری و اهم اولمیان مصارفاتی تنقیح ايله حاصل اولمشیدی.

دولت عایه نك داخلاً و خارجاً اصلاً دیونی اولمیوب بعض تجارتدن مبايعه اولنان اشیانک اثماني اعطا قلمق اوزرد تجاره تکلیف اولندقیجه مصارف نقلیه سندن اجتناباً المقدن استتکاف ایدرلر ونه وقت اقتضا ایدر ایسه اولزمان اخذ ایدرز دیرلر ایدی. مشار الیه التمش برسنه سنده و رضا پاشانک انحطاط اقبالنده عزل اولنوب یرینه ناند پاشا مالیه ناظری اولدی و خزینہ ددیوز طقسان بیک کیسه اموال مدخره بولدی بوندن صکره رشید پاشا دوری ظهور ایدوب امور ملکیه و مالیه و خارجیجه ده تغیرات کلیه حاصل اولمش اولوب آنحق انلرک تفصیلاتی و نتایج طبیعیه سی احوال آتیه و قوعاتنه عأددر.

سلطان مصطفی خان ثالث عصرندن سلطان سلیم مرحومک اواخر سلطنتنه قدراللی سنه مقداری مدتده بالتدریج سیم مسکوکاتک وزن عیاری تنقیص اولنغله التونک فیاتی بر مثلی ترقی ایلدی یعنی یلدر التونی دژت بحق غروش راده لرنده ایکن طبقه وز اون غروشه طوغری فیرلادی. سلطان محمودخان حضرتلری زماننده کرک التون و کرک کموش مسکوکاتده تبدلات کثیره واقع اولغله ابتدای سلطنتلرنده یکرمی بش غروش فیاتله قطع اولنان محمودیه التونی که بر بحق درهم و یکرمی ایکی عیارنده ایدی اواخر سلطنتلرنده

یتیم عز و شه چیقدی چونکه اؤسکره قطع اولنان ممدوحیه التونی یکر می عیارنده و یارم درهم وزننده اولدینی حالد یکر می غروش فیأته تداخله چیقارلمشدر . سلطان سلیم مرحوم شهزاده ایکن اجداد عظامنک سکهلرینی جمع ایدوب عیارلرنده اولان تفاوتی نظر تأسفله کورر . و کندولری نائل سلطنت اولدقده اصلاحنه عزم و جزم بیورلر ایش . حالبوکه جلوس هایونلری اوان سفره تصادف واسوچ دولته اعانه حربیه اوله رق ویرلمسی شرط اتفاق اقتضاسندن اولان سکز بیک کیسه نک ایفاسی کسب مشکلات ایتکله بالضروره کموش مسکوکاتک عیاری تنقیص اولندی و بوتدیر ایله دفعه برایکی بیک کیسه منفعت کوردی . سلطان محمودخان حضر نلری دخی بعض سبکمغزانک القاآتیه ایچ خزینه ده مدخر بولنان نقودی نوبنو احداث اولنان مسکوکاته تبدیل ایتدیره رک غروش حسابیه اولان ترقیاتی منفعت صحیحجه اعتقاد ایدرلر ایدی . واقعا بوصورت یکیحجری علوفه سی مثللو معیناتی تنقیص دیمک ایهده اشیا فیأتنک اوتوز سنه ظرفنده اوچ درت مثلته ترقیسی مستلزم اولدی . اوائل سلطنت عبدالحمید خانیده یعنی التمش درت تاریخنده تصحیح سک اولنوب یوزلک التون ویکرمیلک مجیدیه واقسامی قطع اولندی . شوراسی جای دقتدرکه سیم مسکوکاتک اکمعیاری اولان متالک اقسامنک بشاکنده طقسان بش پارلک قدر مالیت اولدینی حالد الی سنه دن متجاوز اتونندن جزوی فرق ایله تداول ایلدی . یعنی یکر می بزعدبشاکه بریوزلک التون تبدیل اولنور ایدی . بوندن استدلال اولندیغنه کوره برملیون کیسه لک قدر نقود مغشوشه قطع اولمشیکن ممالک عثمانیه منتشر و منقسم اولمق ودوائر امیریه ده قبول اولمق و تناسبی مرتبه افراطه واصل اولماق حسابیه مالیتندن برمثلی زیاده کسب اعتبار ایتشدر . بوقضیه یی مؤخرأ قطع اولنان ودرجه افراطه ایصال قلنان باقر مسکوکاتک احداثی تأیید ایتشدرکه تفصیلاتی احوال آتیه عائد اولمسیله اولبابده اطناب مقال اولندی . فقط اشیانک تراید فیأتی یا لکنز تغیر مسکوکاتدن اولیوب ترقی طبیعی دخی ظاهر اولدی . چونکه ایکی سنه دنبرو مسکوکات برحالد ایکن اشیاده برمثلی ده زیاده ترقی مشهود اولدی . منلا التمش تاریخیه یتیم تاریخی بیننده بغدایک بهر کیله سی سکز و طقوز غروشدن اون بش غروشه و لحم یاز و قیش اعتباریه اوچ غروشدن بش غروشه طوغری ایکن تاریخ تحریر اولنان اوچ یوز سنه سی خلانده برمثلی درجه سنده ترقی ایتشدر . التمش سکز و طقوز تاریخلرنده شعیرک کیله سی و خطبک چکیسی التیش غروشه مبايعه اولدینی خاطر نشان نامق الحروفدر . سکسان بش والی تاریخلرنده بعض محالسه واردات عشریه برمثلی تراید ایلدی بودخی اخراجات کمرکنک الغاسیله زراعتک

تکثیرندن منبعثدر دنیلوب بعضلری دخی بونی رد ایله فیأت ذخائرک بر مثلی ارتمسفی واردات عشریه نك دخی اونسبتده تزايدینی مستلزم اولدی دیو مقابله ایلشدرکه برنجیسی حساب تخمین ایکنجیسی حساب بسیطدر . دولتك احوال مالیه سی بومر کزده اولوب ارکان سلطنتك دخی ثروت وسامانلرینی ودارات واحتشام وعلو جنابلرینی ایراد ونمونه طرزنده بعض واقعات موثوقه لرینی ذکر وتعداد ایلک نوعما فائده دن خالی اولماقغله بیانه مباشرت قلندی : ارکان دولت دنیلان صدر اعظم وشیخ الاسلام وقپودان پاشا واجله صدور ووزیر کتخداسی ودفتردار ورئیس کبی عظمای دولتك یالی وقوناق ودائرہ صاحبی کتخدا ومهردارلری اولدقدن بشقه اوتوز قرق دانه ملبس ومزین ایچ اغالری وبر اولقدرده چوقدارلری بولنور واشجی وسایس وقایقچی وسرایدار مثللو خدمه دخی داخل حساب ایلدکده بر ایکی یوز کشتی یه بالغ اولور ایدی وسائر دارات واحتشاملری بونسبتده اولوب حتی ابراهیم کتخدا بر دفعه اتلرینک بر مقدارینی بعض بندکاننه اعطا ایتدکدنصکره ارتق التمش آتم قالدی بعد ازین کیمسه یه ویرم دیدیکنی عاصم افندی مرحوم تاریخنده حکایه ایدر . خلیل حمید پاشایه برهند ایکنجیسی عرض معاونت زمیننده جانب سلطنت سنییه به بشیک کیسه ویره بیله جکلرینی افاده ایلدکده مشار الیه اولقدر پاره یی بن وحاضر بالمجلس اولان قپودان پاشا پدرمز دخی ویره بیلور دیمشدرکه حساب عصره کوره ایکی یوز الی بیک التون قدر ایدر . وقعه سلیم خانیده مقتول اولان والده کتخداسی یوسف اغا و ابراهیم کتخدا و کیزلی ستمه حاجی ابراهیم افندینک اکثر اشیای نفیسه لری قائممقام موسی پاشا وسائر یغما کرانک دست غصبیلرند نابدید اولمشیکن مخالفاتلری اوتوز بیک کیسه یی تجاوز ایتمشدر بونلرک عطایا وتصدقاتلری حقنده ایشیدیلان حکایه دخی عقل قبول ایدمه یه جک درجه لرده مبالغه لی ایسه ده رمضانلرده و سائر اوقاتده فقرا محله سی اولان یرلره مخصوص آدملر کوندروب محله بقال واتمکچی وقصابلرینک ذمت دفتلری رؤیت وفقرا دینلرینی کاملاً اعطا ایتدیرمک عادات جاریه لرندن اولدینی و محبس لرده اولان مدیونینک وقت وقت بورجلرینی تسویه ایدمه کلدکاری متوتراً ثابتدر . روایات موثوقه دندرکه طویقپولی صالح افندی شیخ الاسلام ایکن سلطان مصطفی خان ثالث حضر تلی تبدیلاً خانه لرینی تشریف ایدوب اثنای صحبتده (افندی هر وقت کلمک ایسترم فقط قوناغکز پک اوزاق یرده در) دیدکده جوابنده (بشقه بر قوناق تدارک قابل ایسه ده جوار مزده بولنان ومنظور شاهانه کز اولان شو اولرک هیچ بریسنده مطبخ بولنیوب سایه هایونکزده طعاملری بنده خانه کزدن

کیدر و بو جهته محرومیتلرندن اخترازا تبدیل مسکن ایده میورم) دیمشدر
کوسه کتخدانامیه مشهور اولان مصطفی رشید افندینک چاملیجده واقع کوشکی که
حالا سامی پاشا مرحومک ورثه سنده در و کوسه کتخدا بناسیدر بر مقدار باغچه بی
حاوی ایدوکنندن بعض بندکانی انصافنده واقع بر باغی مباحه ایتک اوزره تشویق
واوزومندن استفاده اولنور دیو ترغیب ایلدکده اوزوم و سبزه یتشدیرمک زراع اهالی یه
عائد برشی اولوب انلرک منافعه اشتراک طبعی بزه یاقشمنز مناسب اولان باغچیلر اوزوم
کتورمک و بزپاره ایله آلمقدیر دیمشدر مع هذا مشارالیه خست و اداره یه اعتنا ایله
مشهورلردندر

محمد علی پاشانک انسلاب شعوری حسبیله اوغلی ابراهیم پاشا مصر والیسی اولوب
انجق متعاقباً وفاتی وقوعنه مبنی التمش درت تاریخنده عباس پاشا ایالت مصر ایله کامروا
اولمش و عیمیسنک و بیوک باباسنک مسالککرینی ترک ایله طرف سلطنت سنییه ابراز تمحض
ایتمشیدی لاجل التشکر اسباببوله ورودنده وکلا و مأمورینه وحق قلملره قدر عطیهلر
اعطا ایلدی مالیه ناظری بولسان نافذ پاشا که بودخی خست و اداره امور بیتیه ایله
معروف و ثروت و غنا ایله مشهوردر حصه سنه اصابت ایدن بشیوز کیسه بی تذکیر ماسبق
ایلّه قبولدن استکاف و صدر عصر اولان رشید پاشا بوصورت ملتزم اولان مضی ما ماضی
قضیه سنی اخلال ایده چکی جهته قبولنی ابرام و الحاح ایتکه نهایت مشارالیه پاره بی المغه
مجبور اولدیسده ینه کندوسی وضع ید ایتیوب بعض اصدقا و بندکانه تقسیم ایلدیکی
مشهودات عاجزانه مدنذر.

فصل سابقده ذکر اولنان مناوبه منصببری که مالیه خزینه سنه نظام ویرلدکده جمله سی
لغو اولنشدر ازان جمله باش محاسبه دنیلان قلم خزینه عامرهنک اس اساسی اولوب دولته کافه
واردات و مصارفاتی و نظامات و قوانین مالیه سی و حتی اندرون هایون و خاص اخور
خزینه لرنده بولنان مجوهرات و هر نوع اشیا یوقلمه ده مقید ایدی قلم مذکور بر کیسه دارک
والتی صنفه منقسم اوله رق التی خواجه نک تحت اداره سنده اولوب هرخواجه طویخانه و ترسانه
و مطبخ و ذخیره و حرمین خزینه لری مثللو شعبات خزینه نک حساباتنه مأمور اولمغله
علی الدوام واردات و مصارفاتلرینی تدقیق ایدرلر ایدی قنغی خزینه دن اولورایسه اواسون
اصحاب مطلوبه و یريله جک دین صورتلری مطلقا باش محاسبه دن اعطا اولنور و ذکر
اولنان شعباتک امانا و مأمورلری و خزینه کتخداسی و میراخور اغا تبدیل اولندقدده حسابی
رویت و قیودیه تطبیق قنلور ایدی

اشته باش محاسبه‌چی دینیلان ذاتکه اکثریا وزیر کتخداسی و دفتردار و رئیس کبی
عظما معزول قالدجه بو منصبی و دفتر امانتی و نشانیلغی حائز اولورلر ایدی بو قلمک
خواجهمسی اولوب نادراً خزینه کلور و اکثریا خانه‌سنده مقیم اولوب کیسه‌دار افندینک
کوندردیکی اوراقی صح و تمهیر ایدر ایدی مصالح جاریه‌دن النان خرجلردن قلمک
شاگردان و کتبه‌سنة توزیع خصوصی اجرا اولندقدن صکرده‌باش محاسبه‌جیلره سنوی یوز
یکرمی بیک غروش مقدار حاصلات قالدیغی بعض معروضات قیودندن استنباط اولمشدر
اشبو قلم دفتردار بولان ذاتک معیتده ایسه‌ده خلاف نظام ویا خود مغایر منافع
خزینه بر امری صادر اولسه بلا تردد جواب ویریلور ایدی چونکه قلمک حامیسی
اولان محاسبه‌چی عظمای دولتم و بلکه دفترداردن حیثیتی ذواتدن اولوب دفتردارلر
بر وجهله بو قلم اوزرینه اجرای نفوذ ایده‌مزلر ایدی اشبو اصول پک
حکیمانه بر شی ایسه‌ده بالالتزامی وضع اولمشدر یوقسه کیف مالتقمی تأسس ایتشدیر
بورلسی محل شه‌در .

مواد خارجیہ

اشبو فصلده بیان اولندیغی اوزرد پروسیا و اسوچ دولتلریله تجاویز و تحفظی عقد
اتفاق اولنوب بو اوانده واقع اولان ایکی یوز ابکی سفرنده اکر پروسیالیر حربه اشتراک
ایتمامشدر ایسه‌ده جسیم بر اردو سوقیله نمچه‌لوری تهدید ایدرک قبل السفر معین اولان
حدود اوزرینه تجدید معاهده‌یه موفق اولدیلر فقط روسیه حقنده اولان تعهدلری
«له» تقسیماتندن حصه‌اخذی منفعتی اوغورنده ترک وفدا ایتدیلر اسوجلورلر دولت علیه ایله
برابر حربه قیام ایلدیلر ایسه‌ده نه‌چارده که برقاچ دفعه مغلوب اولملریله اکمال تعهد قدرتیاب
وسلطنت سنیه‌نک عقد مصالحه‌سنة قدر پایدار اوله میوب بالضروره بعض فدا کارلق اختیاریه
مسقولولر ایله تجدید معاهده ایلدیلر دولت علیه حسب‌المقاوله اسوجلورلر سنوی سکزر
بیک کیسه ویرمک تعهدی التنده بولندیغندن خلیجه پاره ویرمش و بونک مقابله‌نده
اسوچ دونماسی بحر بالطقده بولان روسیه دونماسنه غلبه ایلدیکی جهتله روسیه دونماسنک
آق دکره کله مامسی منفعتنه دسترس اولمشدر .

ایکی یوزاون بر تاریخنده سلطان سلیم خان حضرتلری فرانسزلرک یاغلی‌باللی سوزلرینه
آلدانوب عقد اتفاق ایتشیکن ایکی سنه مرور ایتمکسزین فرانسزلر بغته مصره استیلا
ایلملریله سلطنت سنیه دخی انکلتزه و روسیه‌لورلر ایله اتفاق ایدرک خطه مصریه تخلیص

اواندی چونکه اولوقلرده انکلیزلر فرانسه لولرک دشمن دائمی و مسقولر دخی فرانسزلر ايله بوزوشوق اولدیغندن منافع تقابل ایلدی چند سنه مرورنده فرانسه ایمپراطوری بوناپارته ایکنجی دفعه اوله رق سلطان سلیمی اغفال وعقد اتفاقی از سرنو استحصال ایلسیله بو کیفیت انکلتزه دونماسنک استانبوله ورودینه و روسیه لونک اعلان حرب ایلمسینه وبالاخره سلطان سلیمک دوچار فلاکت اولمسینه سبب اولمشیکن فرانسزلر تیلستیت نام شهرده مسقولولر ايله عقد مصالحه ایتدکارنده دولت علیه یی براقیویردیلر ودها غیری ممالک عثمانیه نك تقسیمى مذاکراتنه کیریشدیله ایشته فرانسه اتفاقلری دخی بو نتیجه یی حاصل ایلدی. بوندن صکره روم اختلالی ظهورنده سلطنت سنیه بر متفق بولمغه موفق اوله میوب بالعکس فرانسه و انکلتزه و روسیه دولتلری دولت علیه علمینه عقد اتفاق ایتلریله موره قرالغنک حدوشی منتج اولدی. مصرلولر کوتاهیه یه قدر کملری اوزرینه سلطان محمود خان حضرتلری روسیه لولرد مراجعته مجبور اولمغه بر فرقه عسکر ايله بر فیلو دونما بکقوزه کلشیدی یوقاروده اسمی و اوصافی مسطور اولان نامق پاشانک تحقیقنه کوره مصر والیسی محمدعلی پاشا صاحب قوت و قدرت اولان ولایه دولت علیه یه مکتوبلر کوندروب سلطان محمود خان حضرتلرینه بر طاقم عزویات بسط و بیانیه شهرزاده سلطان عبدالمجید خان حضرتلرینی اجلاس ایدرک امور محتله سلطنت سنیه یی یولنه قویمق وبعده بالاتفاق روسیه لو اوزرینه هجوم ايله اخذانتقام ایلک دعواى ابلهفریبانه سیله اتفاقه دعوت ایلش و ولایه صادقه طرفلرندن بو مکتوبلر طرف پادشاهی یه تقدیم اولنش اولدیغندن سلطان محمود خان حضرتلری تلاشه دوشمش وحق روسیه ایمپراطوری نیقوله دخی معاذاد تعالی بویله بر غائله عظیمه ظهوری احتمالندن توحش ایدرک عرض معاونت ایلش اولدیغندن سلطان محمود خان حضرتلری دخی حسن تلقی ایدرک مذکور عسکر و دونما بروجه محرر بکقوزه کلشدر

بعد ازین سلطان محمود خان حضرتلری روسیه ایمپراطوریه متفق حالنده بولنوب بونک علت غاییه سی دخی مصر مسئله سی اولمغه و بواتفاق اوروپالولرک و همنه الویر مامکله بالاخره انکلتزه و اوستریا و پروسیا و روسیه دولتلری سلطنت سنیه ايله مصرلو علمینه بالاتفاق نتیجه معلومه استحصال قلندی بوفصلک جاری اولدینی زمانده دولت علیه نك احوال خارجییه دایر معاملاتی بواساسلرد مستند اولوب تفرعاتی ایسه وقوعات صردسند مسطور اولمغه بو قدر اجمال قلندی

اعتذار

بلاطفه تعالی اشبو اثر عاجزانهم بوراده ختامه رسیده اولمش ایسه ده من غیر حد
بعض اختارات خصوصیه تک دخی تذیلله قصور و خطیائتک خلوص نیت فقیرانه مه بناء
عفوی و بلکه تصحیح و توثیق مطالعه به رغبت بیوران اخوان کرامدن موجودر
اولاً وقایع سابقه تک نتیجه منبغه سی اعتباریله بادی نظرده تحسین و یا تقبیح اولمق
طبیعت بشریه ایجابنددر انجیق بو بایده تعمیق افکار یعنی قبل الوقوع حکم
حال و زمانه قیاساً ایشی نه نظاره کورمک ایجاب ایده جکی امشالی دلائلیله
ویا خود سائر قرائن ایله تدقیق اولمق لازمدر مثلاً یلدرم بایزیدخانک تیمورله محاربه سی
تقیح اولنوب اوقدر شدت کورسترماملی ایدی دینلور .

یاوز سلطان سلیمک شاه اسماعیل ایله محاربه سی تحسین وقوجه ارسلان شویله هجوم
ایتمدی بویله قیردی کچردی دیه مدح اولنور شمدی بونلرده اولان فرقی تعداد ایده لم:
برنجیسی تیمور ممالک عثمانیه به کیرمش و سیواسی تخریب ایله شهراده علاءالدینی اتلاف
ایلمدی شاه اسماعیل ایسه کوندردیکی نامه لرده پدریکزله بابا اوغل ایدک نه ایجاب ایلدیکه
اوزریه هجوم ایده یورسکزمقالنی تحریر ایدر ایکنجیسی تیمور ممالک رومی تملک ایتسی قابل
اوله میوب بعد الغلبه یقیلوب کیده جکی طبیعی وشاه اسماعیل ایسه ممالک عثمانیه به ملاصق
بولندیغندن اگر غالب اولسه اناطولینک اکثر یرلرینی تملک ایده بیله جکنه نظراً مخاطره سی
بالنسبه ده قوی ایدی اوچنجیسی یلدرم خان زمانه قدر رایات عثمانیه مغلوبیت کورمد
یکندن صرارت انهرام هنوز دماغ دولته طوقمماش اولوب سلطان سلیم زمانده ایسه
دها تیمور وقعه سی اونودمماش اولمغله اندن عبرتین اولمق ایجاب ایدر ایدی بونلری ایراد
ایتمکدن مقصد سلطان سلیمک حرکاته تعریض معناسنی متضمن اولیوب بویله شیلرده حکم
عصره کوره حرکت اولمق ضروریدر

اما بعضیسی موجب منفعت و بعضیسی مستلزم مضرت اولور دیرلر بو دخی اوقیلنددر
یوقسه کافه محاذیردن سالم ایش بکلمک محض مضرتدر بناءً علیه یالکیز نتیجه به حصر
نظر ایلک طوغری اولماز ثانیاً سردار و قودان پاشالارک اکثریا امور خیریه و فنون بحریه به واقف
آدملردن اولمامسی معترضدر حالوکه سردار اکرم اولنلره کافه مهام دولت مفوض اولد
یغندن ایکی صفی حائر اولمق مقتضی اولوب برنجیسی اصحاب رأی و تدبیردن وایکنجیسی
فزن حربیه به واقف ذواتدن اولمقدر لکن هر وقتده بوا یکی صفی جامع آدم بولمق قولای

اولمديغندن برنجی صنفك اربابی ترجیح اوانه كمشدر چونكه صاحب عقل و درایت اولان سردارلرهم امور مهمه دولتی اداره ایدر و همده ارباب حرب اولان وزرا و امرا و غزوات اسلام ايله بالاستشاره آرای متنوعه نك معقول و صائبی فرق و تمیز ایدرك او یوله كیدر و مستفید اولور نته كیم كوپریلی اوغلی فاضل احمدپاشا رتبه و فعلاً مدرس ایكن یكرمی اتی یاشنده وزیر وایکی سنه مرورنده صدر اعظم و سردار اکرم اولوب اون اتی سنه مدت صدارتنده فتوحات متوالیه یه مظهر اولمشدر كذلك بالطه جی محمد پاشا موسیقی شناساندن كوزلجه مؤذن نامیله مشهور بر بالطه جی ایكن برایکی سنه ظرفنده وزیر و متعاقباً صدر اعظم و سردار اکرم اولوب فتوحات عظیمه معلومه یه نائل و شهید علی پاشا دخی سلاحدارلقدن وزارتله چیقوب نشانجی و قائم مقام اولدقدن صكره ایکی اوچ سنه مرورنده صدر اعظم و سردار اکرم اولوب بر آیه وارمق سزین كاملاً موره قلاعنی فتحه موفق اولمشدر. عهد محمد خان رابعده و سلطنت احمد خان ثانیده قپودان پاشا اولانلردن مراد پاشا یكیچری اغالغندن و قپلان مصطفی پاشا میراخورلقدن و عموجه زاده حسین پاشا ملكیه دن یتشمش ذاتلر ایكن معیتلرنده بولنان اصحاب فنون بحریه یی حسن استخدا مه قادر و تهیدلرینی ایقاعه مقتدر ذواتدن اولملریله فتوحات فاخره بحریه یه موفق اولمشلردن عصر مزده دخی بونك مثالی واردركه مالیه ناظری اوله جق ذاتك مطلقاً فن حسابه ماهر اولسی التزام اولنیوب اداره ده صاحب لیاقت اولسی ارانیلور زیرا الك دقیق حساباتی ایكنجی و اوچنجی درجه ده بولنان مأمورین یا په ییلورلر .

ثانیاً خلق بیننده بعض مبالغات و بعضاً دخی هیچ اصلسز برطاقم حکایات تأسس ایتمشدر كه شبهه دن وارسته وقوعات محققه كبی تلقی اولنور مثلاً صدر اعظم لر عزل اولندقدن مطلقاً بالقخانه یه كوتوریلوب اكثریسی اعدام و بعضیسی نفی اولنور ایش حالبوكه سلطان محمود خان حضر تلرینك اون اتی صدر اعظم لرندن یالكز بندرلی علی پاشا قبریسنده و سلطان سلیمك طقوز نفر صدر اعظم لرندن یالكز روسجقلی شریف حسین پاشا اردوی هایونده و سلطان عبدالحمید خان اولك اون نفر صدر اعظم لرندن خلیل حمید پاشا بوزجه آطه ده و سلطان مصطفی خان ثالثك كذلك طقوز نفر صدر اعظم لرندن مصطفی ماهر پاشا مدلولوده و یاغلقجی امین پاشا ادرنده قتل اولمشدر كه قرق درت ذاتك ایچندن بشی مقتولدر دها یوقاریلره نظر اولندقجه بعض زمانلرده بر درجه تكثر و بعض اوقاتده بر درجه تنزل ایتدیكی كوریلور هله بدایت دولت علیه دن فاتح زمانه كننجه یوز الی سنه یی متجاوز مدته صدر اعظم قتلی واقع اولما مشدر و قپو آره سنده و سرای هایونك سائر مواقعنده بالاده مسطور

اولان مقتولیندن اول بعض صدر اعظم اعدام اولنش ایسه ده هیج بروقتده بالقخانه ده بردانه اولسون قتل واقع اولمامشیکن بو شهرت کاذبه اولقدر تأسس ایتمشدرکه هر کیمه سویلنسه بدیهیاتی انکاره حمل ایدر وقغیسی قتل اولنش دینلنسه بریسی تعیین ایده من صدر اعظم لک حین عزالرنده بالقخانه یه ایندیرملری اکتریا آقدکز اطه لرنه کوندریله کلدکاری جهته اوران کمی یه بندیریلوب اعزام اولنق مقصدینه مبنی ایدی بو شایعه یه قوت ویرن شی رؤف پاشا مرحومک حکایه مشهوره سیدرکه کویا رؤف پاشانک صدارتدن برنجی عزالنده بالقخانه یه ایندیریلوب قتلی تصمیم ولوازماتی احضار اولنمشیکن سلطان محمود خان حضرتلری رؤف پاشا کنج وکوزل آدمدر قلاوی دخی پک یراشور دیه قتلندن غمویه نفی ایلش ایدوکنندن پاشای مشارالیهک صکره کی صدارت لرنده کوشکلکندن بحث ایدن محرملرنه شمدی کنج لک وکوزل لک قالمدی قلاوی دخی ابطال اولندی جوابیله حکایه مسطوریه یی تلمیح وتذکیرایده کلمی قضیه سیدر حاجوکه رؤف پاشانک آسایش حال و آرامش بالندن بشقه ملتزمی اولیوب هر صدارتنده عصرینک متفداننه تسلیم زمام امور ایتک عادت اولدینی عصرینی مدرک اولنلرک معلوملریدر حتی تنظیاتدن صکره دخی بالدفعات صدراعظم اولمش ومدار اعتذار ایلدیکی خوف اعدام بالکلیه مرفوع ومندرس بولنش اولدینی حالده سرعسکر رضا پاشا ومالیه ناظری صفوتی پاشانک دست اقباللرنه تسلیم ریش سفید ایله وقتی خوشجه کچورمشدر برده فلاکت اعدامه اوغرایانلر بیوک بیوک ایشلره تشبث ایدنلردر مثلاً بندرلی علی پاشا حالت افندینک ازاله وجودی ایچون یکیکچریلری تحریک ایلک وشریف حسین پاشا اسماعلی قلعه سنک استیلاسنه سبب اولق وخلیل حمید پاشا اصلاح احوال عسکریه کبی امر عظیمه مباشرت ایتک سبیلریله قتل اولندقلری مثلاً یاغلقچی زاده امین پاشا سکسان ایکی سفرنده سرداراکرم اولوب خوتین محاربه سنده عساکر اسلام پریشان اولغله قاچوب کلان یکیکچریلرک بز دشمنی قزل المایه قدر سوره جک ایدک لکن یاغلقچی اوغلی برآمدی دیهرک اصل واساسدن عاری اولان نشریاتلری لاف وکذافدن و جمله مفتریاتدن عبارت اوله جنی معلوم ایسه ده بالضروره ایشی اولیه اکلامق وطوائف عسکریه یی تألیف وتصدیق ایلک واهمه سیله اعدام اولنمشدر حتی شیخ الاسلاملقدن معزولاً وفات ایدن عمر وحید افندی حقیدی حسام الدین افندی جندن روایه نقل ایدرایدی که بدایت سفرده عسکر اسلامک پریشانلغندن سلطان مصطفی خان مرحوم بغایت منفعل و بیک طقسان سکز سنه سنده اولدینی کبی عسکریننده اختلال ظهور ایدر وهمیله متوهم اولوب کمال اضطراب وحیرتندن ناشی علی الدوام تبدیل

قیافه کشت و کذار و بالذات تحقیق احوال ایده کلدی کردن بر کون وفاده واقع امینه سلطان سراینه کلوب قارشو سنده قوناغی اولان رکاب دفترداری عمر وحید افندی بی جلب ایله اردونک حالی نصل اوله جق و خزینه ده پاره قالدیغنی حالد هر کون پاره ایسترلر دیویانوب یاقلدیغنی صروده امین پاشانک دخی قتلنه امر ویرمش اولدیغنی افاده ایلدکده عمر وحید افندی عفونی استرحامه قیام ایلسی اوزرینه امین پاشا ذاتاً بیتمش وشعوری مختل و بلکه ویریلان امر شمدی به قدر اجرا قلمشدر دیمسیله عمر وحید افندی شدیداللسان بر ذات اولدیغندن امین پاشایی اوچ درت سنه ایچنده مکتوب بیلقدن رئیس ومؤخرأ مع الوزاره نشانجی و داماد و متعاقباً صدراعظم و سردار اکرم نصب بیورمش اولدیغکز دن انک ایچون دیوانه اولمقدن بشقه برشی قالدی دیو جواب ویرمشدر .

مصطفی باهر پاشایه کلنجه مشارالیه اواخر محمود خان اولده اعدام اولنانه دارالسعاده اغاسی بشیر اغانک بر کشیده سی ایکن قتل ایتدیرمکه ترتیب مقدمات مکر و فریب ایلسیله عموماً اندرون خلقتنک خصومتنه مبتلا اولمشیدی سلطان مصطفی ثالثک لابوین برادری اولوب عصر عثمان خانیده و پاشای مشار الیهک ایکنجی صدارتنده مغدورأ وفات ایدن شهزاده سلطان محمدک اتلافنه مانع اولمق اقتدارینی حائز اولدیغنی حالد تقید ایتما سی تهمتی عزو اولنه رق و خاندان عثمانی به خیانت ایدنلرک بقاسی جائز دکلدر دینلرک اعدام ایتدیر- مشدر وؤف پاشا ایسه بویله اغرایشلره تشبث شویله طورسون خاطرینه کلسه برقاچ کون اویقوسی قچار وکولکه سندن اورکر بر ذات اولسنه نظراً مجازات اعدامدن وجهاً من- الوجود عاری ایدی بو تفصیلدن مقصد التزام راحتدن حاصل اولان تکاسلاری ستر ایچون بویله حکایه لر تصنیع اولنوب سلطنت سنینک یار و اغیار نظرند بلا سبب صدر اعظم قتل ایتک و قلاوی یاقش- مق کبی غایت کوچک بر سبیله عقو ایلک مثللو حرکات کودکمنشانه دن اولدیغنی بیان و حقایق احوالی میدان قویوب بو قیلدن حکایات منتشره غیر واقعه و غیر معقوله به وجود ویرلماک ایچون براخطار خالصانه و بیغرضانه در .



افاده مخصوصه ده عرض ايتديكم اوزره اشبو اثر مفيدك دردنجي جلدني شوصورتله
طبع و نشر ايتمكه و بناءً عليه وصيت واقعه يي يرينه كيتيرمكه موفق اولديغمدن طولايي
جناب حقه حمد ايلرم .


ينه او افاده مخصوصه ده بيان اولنديغني وجهله اثرك نسخ منتشره سي قالماش اولان
اوچ اولكي جلدلرينك ده صرسييله يكيدين طبعي وانشاء الرحمن قريباً موقع انتشاره
وضعي مقرر در .

دولت عثمانيه ده جريان ايدن اسول ووقايعه دائر شمدي يه دكين مورخين سالفه
طرفدن يازيلن تاريخلر مياننده برقيمت مخصوصه يي حائر بولنان (نتايج الوقوعات) ك
مضبوطاتي بيك ايكي يوز اللى يدي سنه سنه قدر اولوب او تاريخدن اشبو بيك اوچ يوز
يكرمي يدي سنه هجريه سي ربيع الاخيرينك يدنجي كوننده كي جلوس حضرت محمد خان
خامسه قدر مرور ايدن يتمش ييللق وقوعاتك دخي بواثر نافع ذيل اولق اوزره تحريري
جملة تصورات عاجزانه مندر حتى در دست طبع اولوب نيچه حقايق و معلومات مهمه
تاريخيه يي محتوي بولنان (سعده پاشا - ياخود مزاردن ندا) نام اثر ناچيزانه مك
مقدمه سنده افاده ايتديكم كي اشبو ذيله سلطان عبدالجيد خانك جلوسنه مصادف
اولان بيك ايكي يوز اللى بش تاريخدن تا بيك ايكي يوز طقسان بش تاريخنه دكين
كذار ايدن قرق سنه لك وقايعه متدائر پدرم سعيد افندي مرحومك قسماً تحرير و قسماً
تقرير ايتمش اولديغني خاطراتك ده علاوه سي مصمدر .

مقدمه ده كي (افاده مخصوصه) نك صوك فقره سي كه اشبو جلد رابعك بيك يوز
سكسان سكر سنه سندن بيك ايكي يوز اللى يدي سنه سنه قدر جريان ايلان آلتمش طقوز
ييللق احوالي احتوا ايتديكنه متعلقدر او فقره نك باشنده (آلتنجي باني تشكيل ايدن)
دينيله جك ايكن سهواً (بشنجي باني) ديو ترتيب ايدلمش اولديغنك ده
تصحيحاً بياننه مبادرت قانمشدر .

محمد غالب









3 1761 06979667 0